

ASO LULU, 19 IUNI 2013

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faaaloalo ou te faatalofa atu ai i le paia maualuga o le Fono usu i lenei taeao fou i le paia ma le mamalu maualuga o le Maota i ona tulaga faalupe, o sa ma faiga o paia e tumau. O lea foi ua maea ona fofola le fala ma tatou piama i le Atua ma Lona finagalo i lenei taeao e to ai manu o le aso. Ia viia pea le alofa ma le agalelei o lo tatou Tapaau Sili i le lagi ona ua taitai mai lo outou soifua manuia aemaise lo outou soifua laulelei e tauavamea ai a tatou galuega i lenei aso.

E momoli atu le agaga faafetai ona ua atoa tagi ma atoa tupe i le fafao i lenei taeao ona ua tatou faatasi foi ma nisi o sui usufono sa tatou valavala ai, afioga i Minisita ona o nisi o fuafuaga, o malaga ma faatinoga o galuega a le Malo; malo le folau, malo le soifua manuia. Afio maia ma tala mai aao i lenei taeao fou.

Ua mavae atuvasa, ua tea foi sa o uila i le aso ananafi i le tatou uluai Fono ma taualumaga o lo tatou faamoemoe, e momoli atu ai le agaga faamalo ona o le onosai. O a foi suaga o le vaatele i tuleiga ma saunoaga, fale i le Atua lo tatou Maota. O le tatou galuega lava e faapena ona fai, e aumai avatu suaga faatamalii i upu ma tala, o a foi tuleiga ma saunoaga, aua ne i po le aso o tiga se finagalo. O suaga lava a lo tatou Maota e faapena ona faatalitalie a tatou galuega, ae talitonu o lo o mau le toovae ma faapena ona ulufia i le Agaga Paia o le Atua tatou te fefaasoai ai aua o la tatou ato e fevailiai ina ia maua le soifua manuia aua lo tatou valaauina.

E manatu o le a faasolo a tatou galuega ma e i ai le talitonuga o le Fofoga Fetalai e le o toe tóatele nisi o sui usufono e fia saunoa. Ua alu le aso ananafi o faatutugata le Maota, o lona uiga ua tatou talia uma le Tala o le Tupe. O lona uiga la ua tatau ona tali le Malo a nanei pe a faapea e talafeagai ai faamoemoega o nisi o sui usufono e le fia saunoa. A o le a avatu pea le avanoa ia i latou e fia saunoa, ia faifai malu le faiva i lenei aso.

Tatou te fia afea foi le tapuaiga a Samoa, alo maia i outou faiva-manaia. O lenei aso o le a alo atu foi lau Palemene i le faaauauina o ana galuega fai, e leai se faiva e manuia pe a le tapuaia.

E maea le Fonotaga i le aso ananafi o faasolo fuafuaga mo nisi o saunoaga faapitoa ma lauga a sui usufono o itumalo taitoatasi ma o le a faapena foi ona faasolo a tatou lauga.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2012/2013 MA LE TULAFONO TAU FAAOFI O
LE FAATATAUINA O TUPE 2013/2014 – felafolafoaiga faaauau i luga
o le faitauga faalua**

FOFOGA FETALAI: O le a faaau

au saunoaga a sui usufono i le tulaga tau tupe ma le tamaoaiga o Samoa faapea faiga faavae tau tupe a le Malo e auala i luga o le faitauga faalua o Tulafono Tau Faaofi e pei ona amataina mai i le Aso Fono ananafi.

E tolopo Taulumaga i le Aso Fono ananafi ua maea ona saunoa le sui usufono mo le itumalo faaalaalafaga o Gagaifomauga Nu.1.

O lea ua avanoa le Maota mo se saunoaga i lenei taeao.

O lea ua tulai mai se tasi o sui usufono mai Salafai, Saleaula, Levaopolo Talatonu ia te oe le Pule, tulai mai o lea ua avanoa le Maota mo le saunoaga.

Tofa LEVAOPOLO TALATONU (Gagaemauga Nu.2): E faafetai atu i lau Afioga i le Fofoga Fetalai ona ua maua lenei avanoa taua e fai ai se sao o lenei itumalo e tusa ma le faamoemoe i lenei tausaga.

Ou te manatu o lea ua uma ona e tai le soa, ua e topule foi le inati o le Tuitoga i la tatou faafetai aua e talitonu le taofi, sa tau pale lava vaalelea i le matagi le tatou folauga, peitai o lea ua tatou mapu i Fagalele, ua tatou feiloai fiafia foi i lenei taeao fou i magafetau o le soifua maua ma le lagi e mama.

O paia foi ma mamalu maualuga o le lauamanu ua lupepe i lenei taeao, ae a foi le tapuaiga ma fua faalepa i lo tatou atunuu, o le a tafaimaa lava le tamaloa o le Alataua i sa matou tala. Aua pe loloto lava ma uliuli le moana sausau, ae ua iloa ona penina tautele. Pe mamao foi ma maualuga le vanimonimo, ae ua iloga foi fetu o folauga ma ona tolotolo faitauina. E leai se potu, leai se mataalia e mafai ona seutafili pe utuvai tofo. E faapena se lagona lau Afioga i le Fofoga Fetalai o lenei itumalo i lenei taeao, e ui i lea le paia i Tapaau, le mamalu ia Saleaula ma ona Pule, faafetai o lo o tui mai pea le mulipapaga a o alofaiva la outou auauna aua le faatinoina o tiute.

A o le i faia se matou manatu, e muamua ona e i ai se mea e fia faasao i le saunoaga a le sui usufono ua mavae anapo i le tulaga e faapea ua ma aia le puua, vaeatu lava le paia o le Maota. E leai, sa uia lava tulaga o faaloaloga ma aga faa-Samoa. Ai foi o le manatu o le toeaina e fai se suavai a le Matua, o le ala lena. Ou te faafetai ona o lea na te silafia lelei tofiga, e tatau lava ona manatu mai i le toeaina matua o le tatou Itu. E ui i lea lau Afioga i le Fofoga Fetalai, o le a muamua atu sau faamatalaga.....

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O tulaga lava ia i upu o le aso ananafi, ua uma. O lea foi ua uma ona e saunoa manino i ai.

Ua ou tulai atu ona o lea e le i taunuu mai le sui usufono lea e agai tonu mai i ai le saunoaga, ae ou te fautua atu i le sui usufono o lo o saunoa nei, sa

matou faataupepe lava i le po anapo seia oo lava ina ua uma le Fono; ae amuia foi oe e le i taitai uma le Fono ae ua fiu e vaavaai atu oe ae ua leva ona e malaga i le fale, a o le taimi lena sa tatau ona e tali ai. O le a faapefea nei ona e toe tali o lea ua le o nofoia mai le Nofoa o le sui usufono? Pe oo mai nei foi le sui usufono ona taofiofigata lea, ae ou te faamalulu atu i le sui usufono, “Let bygones be bygones.” O mea na fai ananafi na teuteu ai lava ananafi.

E pei o le fautuaga lena i le tatou Maota nei. E i ai le upu foi lele e faasino i taua, “Na e lototele lava e te alu e tau o lou lava amo le fana fanua.” Afai lava o le taimi lea sa tatou ioe i ai ananafi e faatoa taape i le ta o le 7.00 i le afiafi, e faatoa taape lava i le ta o le 7.00 i le afiafi. Amuia oe na e vave oo lava i lo outou aiga e le i taitai po le aso.

Ia manuia le Fono.

Afioga Lafaitale Patrick Leiataualesa (Alataua Sisifo): Lau Afioga i le Fofoga Fetalai.....

FOFOGA FETALAI: Ina ia faasaoina le taimi o le sui usufono mamalu, se i tulai mai le sui usufono mo Alataua Sisifo.

Afioga Lafaitale Patrick Leiataualesa: Masalo o lea ua saunoa le Palemia a o lea na tuu ou te tulai atu leaga o le sui usufono lea ma te nonofo vaavaalua, e pei e fai sina tauga o le saunoaga a Saleaula lea e fai mai i le sui usufono. O le sui usufono foi o lau uo, a o le matou tuualalo, fai fai matua lo tatou taeao. Saleaula, o oe foi o le isi Tootoo. Ana iinei le toeaina lea, ou te le iloa po o le a foi le tala e fai atu ia te oe.

Ma lou faaaloalo lava.

FOFOGA FETALAI: Ou te manatu Saleaula, o lea ua avatu le fautuaga a le Nofoa. Aua ia le aloa le foe ma faanape aua o lea sa gafatia lava e Toeolesulusulu tatali la oulua mea na fai i le toeaina ananafi. E leai lava se saunoaga a Toeolesulusulu ona ua ia ioeina uma le fee e pei o le tele o le fale lenei, le meaituaolo ma le umu luau ma mea uma na fai, o la oulua tofa ma lo oulua faaoso ae leai se asiasiga na faia. O lea la sa tuu pea le saunoaga se i agiagi le Matua o lo tatou faaitu, ae malie oe lau afioga i le Pule, vaai lo oulua va nonofo ma le Matua. E le tatau ona faaseeina e le isi Pule le isi Pule, a o lea ua saunoa atu le Palemia, e manatu ua gase foi i Malolo lena fuilauvi ananafi ma e talitonu ua taatia i lagatonu i sau foi le toeaina – ua oo lava ia Palusalua ua talu’i anapo, ae malie ia. Ia sagatonu lau o le fo i lau fetalaiiga ma le tatou taeao fou, e manatu ua tea sa o uila.

Tulai mai le sui usufono mamalu e faaauau le saunoaga.

Tofa LEVAOPOLO TALATONU: Faafetai, leaga o la e faafofoga mai lou itumalo. A faafofoga mai lau Afioga i le Palemia o lea ou te taletale atu, o le mea lena na ou tuua ai le Fono ona ua le lava foi le malosia.

E ui i lea lau Afioga i le Fofoga Fetalai, e amata se matou tala i lau Afioga i le Minisita mo Galuega, Felauaiga ma Atinae Eseeese. Silasila lau Afioga i le Minisita, ua valu nei tausaga o ou i totonu o le Palemene, o lea lava e tulituliloa atu talosaga sa faia e le sui na mavae atu i o matou auala ma tulaga faapena. Ona pau lava lea o le nuu e leai se talaloa i totonu o Tumua nei, na o

Salamumu, ae saili i le sami le tamaoaiga o lo o soifua ai le tóatele o lo matou nuu i tua. A fua la i ai toetiiti lua maila e savavali ai agai i le sami, a o le faaletonu ia o lo matou auala e le i faia lava, e faapena foi ona pogisa e leai ni moli.

E oo foi la i Saleaula i Savaii lau Afioga i le Fofoga Fetalai, o lea lava matou te faamanatu atu pea, faamanatu atu pea ae leai lava so matou loto e faia, aua e lolo lava peau i le agi a le matagi, ae na ona matou talosaga atu ma saga talosaga atu Saleaula, e va foi i le tolu maila e savalia i luga o le lava faatoa maua palapala e galulue ai i tuamaota, ae toetiiti tofu aiga ma taavale laiti foi ia, ae pau lava lena o le mea o le fia faata faalelei, ia ona o foi lea e faaoga a latou taavale e pei ona i ai le faamoemoe a le tatou Malo. Na ona tuu atu lava i ou tafatafa lau Afioga i le Minisita, ae pule lau Afioga i lau faasoa.

Ona oo mai lea o lau mataupu i le maketi lea i Fugalei lau Afioga i le Fofoga Fetalai, masalo ua tele manatu ma finagalo ua faaalua i le maketi lenei e le gata i lena Itu a o lenei foi Itu, e faapea foi ia finagalo faaalua o le mamalu o le atunuu i le maketi lenei. Ou te faamalulu atu i lau Afioga i le Minisita e faapea foi le Pulega ma le Komiti Faafae i la outou tofa, sa fefulisai faalaaui mamafa ai lo outou finagalo i le tulaga o le maketi lea ma le atinae e taua tele i le atunuu. Peitai lau Afioga i le Fofoga Fetalai, e faiva ese lou pepe i so matou manatu vaivai, ona o le tulaga i le tuai ona faatino o lea faamoemoe, ma ou te faafetai foi ua tuai ona faatino le faamoemoe lea, ua totogo ifo ai ni vaivaiga e faapea aua o le tai ma lona taaga, lau Afioga i le Fofoga Fetalai, na ona ou fesili lava i le tatou Malo, sei toe silasila ane po o se mea ua talafeagai le faaauau o le atinae lenei o le maketi. E faavae se manatu vaivai lau Afioga a lenei itumalo pe a tatou fua i a tatou faiga faavae ua uma ona faataoto, o a faiga faavae ia? O le tuu atu o a tatou pisinisi i le Private Sector. E auai foi lou manatu i le tilotilo i le Tala o le Tupe lea ma tupe maua mai i le Private Sector, pau lava lena o tupe maua o lea e agai i luga le tele o lea e faia ai nei a tatou galuega ma a tatou atinae. O le isi itu lau Afioga i le Fofoga Fetalai, afai nei e uma le maketi lea a le tatou Malo, e le talafeagai foi ona toe fai se faatauvaga ma maketi a Private Sector, e le talafeagai foi, o lea foi toetiitiiti uma le maketi a Amau, o lea e i ai isi maketi e tolu o lo o i ai nei. Na pau lava sou lagona vaivai, o le fesoasoani a le Malo i mini markets ia ave i ai se fesoasoani mea tau tupe e upgraded i luga o le standard e tataua ona matua puipui ai le soifua maloloina o le mamalu o le atunuu. Ia o le fautuaga lena ae faasao mai le \$10miliona lea ou te vaai atu e agai i le fausiaina o tatou maketi. E tulou lava le Maota o le upu e to ia te au, ae afai o le seleni lea o le a fai ai se tatou maketi, masalo na o se faasee apa, e le umi, ae e faasao le \$10miliona lea ma se isi \$10miliona o le valuation e aliali mai ai i le...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai....

FOFOGA FETALAI: Malie Saleaula sei tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e taua lava le finagalo o le sui

usufono o lo o faaalua mai, o lea ou te maua atu i le finagalo o le sui usufono, e i ai vaega o lo o lagolago mai ai ia latou foi o lo o fai a latou atinae e tuu i ai le tulaga lea ae faasao seleni a le Malo i le tele o isi foi galuega, ia o se finagalo lelei, o se fautuaga taua. Ae peitai ane, e tele lava le faitau eseese o lo o i ai i ma le mau a le Malo, e le mafai ai ona tuulafoai e le Malo i le Private Sector le fau o le maketi, ona e i ai lava tulaga e faaeteete i ai le Malo, aemaise o itu e tele mau mea e aafia ai i le maketi. E tataua la ona fuafua e le Malo, aua a tuufau loa i tua i tagata i tua ona uiga ese loa lea o le mea e tulai mai i le itu o le tau o le a tuu atu i tagata i tua i a tatou faifaatoaga e omai e faatau ai a latou fua o faatoaga i inei, ona pule lava lea o latou foi i itu e soona tuu ai i luga a latou tau, e le gata i lea a o le utiuti o mea e paka ai taavale. Ae pei ona silafia o le fuafuaga lea e i ai, e i ai ma le vaega tele e paka ai taavale ina ia toai mai i ai le atunuu e faafaigofie ai ia i latou ona tuu ese a latou uta ma tuu ai i i ia ma omai foi tagata o le atunuu e faatau ai ma o i pasi ma o ese atu ai i tua. O le ala lena e ala ai ona i ai lava vaega e le mafai ona tuufau e le Malo, ona a tuufau loa ona taaalo loa lea o Private Sector, a o ai la o le a mafatia ai i i? e mafatia ai a tatou faifaatoaga. O le tulaga lena, e tele e le gafatasi e tafatasi, sei toe tilotilo i ai le Malo ae manaia le fautuaga a le sui usufono.

FOFOGA FETALAI: Malo. Faafetai le faamalamalamaga a lau Afioga i le Palemia. Tulai mai le sui usufono mamalu e faaauau le saunoaga.

Tofa LEVAOPOLO TALATONU: Faafetai. O le isi vaega e afua ai se manatu vaivai, masalo o le tele o tausaga lea e sui lava le tausaga ma maua mafauauga lelei masalo o le tatou Faigamalo i atinae, ae a tilotilo i totonu o le taulaga lena, ua le o toe lava ni fanua o le tatou Malo e faatino ai. O le isi vaega taua lava e mafua ai ona ou laga le mataupu lea, a silasila nei i le maketi lea i Salelologa, e i lalo o le Samoa Land, Vaitele o le Samoa Land, ae oo mai i totonu o le tatou taulaga ua ACC. O lau la fautuaga ma o lo o manino mai totonu o le Tulafono a le ACC le latou core function. O le ala foi lea ua fenumiai ai le atunuu i a latou mataupu e faatoai i le Matagaluega lea....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai o le mea e fia faasao.

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le mataupu lea o le core function, ou te manatua le taimi na faatoa fau ai le maketi lea i Fugalei, na matua maoae lava le luga lalo o le Maota lena, o le upu tonu lava lea ua e sau ai, core function. O le a la le mea na tupu? Ona tapa lea o le faamalamalamaga foi a le tatou Matagaluega o le Loia Sili ona omai lea o le Matagaluega o le Loia Sili, o la lava e i ai i totonu o latou galuega ma a latou aiataua le faatinoga o mea ia.

Lau Afioga i le Fofoga Fetalai, o itu taua na e laga mai, space, ua agai tatou ina utiuti, o le mea la lena lea e avatu e le Malo ae sau ua utiuti le elele o la e tele le ea i luga, o le mea lena o la e fai i atunuu atamamai, afai foi ua le lava

le eleele i lalo, fana loa i luga i le vateatea. O le tali lena i ē ia e pisa nei i le fai o fale faa-fogafale, aua foi a e manao i ni au fale se fa, e fa foi taualuga pe a faa-fogafale tasi, ae a tasi le fale faa-fogafale fa, na o le tasi lava le taualuga.

Lau Afioga i le Fofoga Fetalai, o le faaoga o le mea o le faautaga tatau, faautautaga tatau. A o lea ua e sau tonu lava i le mataupu lea o le space, e sao oe. Ma ou te tatalo ia faafogafoga lelei i ai le Taitai o le Itu Agai, space, e taua tele le mea o le limited space, o le le lava o le space. A e manao la e faataugofie, alu loa i luga i le vanimonimo.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o le mea e fia faasao.

Afioga Maualaivao Pat Ah Him (Palota Taitoatasi): Lau Afioga i le Fofoga Fetalai....

FOFOGA FETALAI: Malie lava se tasi o sui usufono mo Palota Taitoatasi, Afioga Maualaivao Pat Ah Him, sei tuu atu muamua le avanoa i le mea fia faasao a le Taitai o le Itu Agai.

Afioga Hon Palusalue Faapo II: Ona o lea ua taua lou igoa, silasila foi, e matua feteenai lava le saunoaga lea a le Afioga i le Palemia, feteenai ma le maketi lea ua le oo le faiga e agai i luga, ioe o lea na tuu e fai i luga ae gau ai ma le \$2miliona a le Malo, silasila la i le feteenai o saunoaga ia? O lea na ou maua lava le fai mai, e...mai lalo o le tupe gau lava le \$28million a le Malo.

FOFOGA FETALAI: Lau Afioga o lea ua ou maua le sui usufono mamalu, ou te....Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le faatulagaga o tau o se pisinisi e i ai le mea e igoa o le capital cost, e i ai le mea e igoa o le operational cost, a o lea ua na o le capital cost tau faavae, faatoa amata ona e talanoa i tupe maua ma tupe gau ina ua amata le operation ua alu le pisinisi. O lea e lei amata le maketi o lea e talanoa i mea gau, e leai se gau, sei uma le musumusuga lea a le Afioga i le sui usufono mo Falealupo, o le mea lea ua e sese ai ma confuse ai lou mafaufau o lou faalogo i le sui usufono lea mai Falealupo. A avatu o matou manatu aua e te toe faalogo i sui usufono, ae sei faalogologo mai e avatu mea taua e te malamalama ai. E le mafai ona e talanoa i ni mea gau, sei vagana ua amata ona faagaioi le pisinisi. O le mea lea faalogo i le sui usufono lea na saunoa nei le sui usufono mo Saleaula, e taua tele ona manatu ia e aumai, space, a oo loa lava ina faaletonu lalo ua tau le lava eleele, alu loa i luga i le lagi o la e tele le ea e agai ai i luga a tatou fale pei ona fai e isi atunuu i fafo. O le fesoasoani atu lena, e le tafatasi le mea e te agai i ai, vaavaai i ou autafa o iina e te maua ai isi manatu lelei, ae le o autafa tulata, a o autafa, tasi, lua, tolu, fa, o ia Saleaula e maua mai ai, ae aua e te faalogo tele ia Falealupo.

FOFOGA FETALAI: Malo faafetai i lau Afioga i le Palemia. E toe fautua atu le Nofoa i lau Afioga i le Taitai o le Itu Agai, ia o lea o le a tuu maa ae

maa i aau le tatou Fono, ia e alofagia le taumafai atu a le Fofoga Fetalai i taimi uma ou te tapa ai lou suafa, e tumu tele i le ava ma le faaaloalo atu leaga o oe o le Taitai o le Itu Agai, ae a tausolomua loa oe lou fai atu lava ae e saunoa lava ae toe taofi atu lava ae ua oo lau ta ma au upu, ia ona taitai sese ai lea o le tatou Fono, e le te'ite'i se aoao fesoasoani matua, e mau le toovae ma taofi mau o lea faatoa foufou le tatou Fono i le taeao. O le a amata foi le tauaiga-maa o lea e manaia, silasila i le matagofie o le lauga a Salafai, oka! Faaauau le space lea Saleaula, tulai mai.

Malie lava sei tuu atu le avanoa i le faauilavea a Samoa Aoao, tulai mai se tasi o sui usufono mo Palota Taitoatasi, Afioga Maualaivao Pat Ah Him.

Afioga Maualaivao Pat Ah Him: Faafetai lava i lau Afioga i le Fofoga Fetalai, leai ua ou tulai atu ma le faaaloalo ona o lea e taua i le saunoaga a le sui usufono le vaega lea o le Private Sector, e uiga i le faatauvaga o le fausiaina o mea nei o maketi. Ou te talitonu lava i le agai i le tulaga lea i le faatauvaga lava lea o le Private Sector, e ia i latou lava le faitalia i le lio lea. Ae i le tulaga aoao pe a silasila i ai le Malo ma le atunuu, e tatau lava ona i ai se puipuiga ma se faamalumaluga ina ia i ai le lagona o tagata o lo o i ai se nofoaga autu o lo o talafeagai ma faapitoa foi mo latou i le aufai-faatoaga, ae a omai foi le aufai-faatoaga i nisi e faaoga ai le private sector, o le latou lava faitalia, a o lo o i ai lava le avanoa tele lea o lo o puipuia pea e le tatou Malo ina ia i ai se nofoaga faapitoa e agai mai i ai tagata. A le fia agai mai i ai, ia e alu faatauvaga i le private sector. Ae a leai se nofoaga faapea, ou te talitonu ua fememeai le atunuu. Ma le faaaloalo lava.

FOFOGA FETALAI: Malo faafetai. Ia o lea ua maua le fesoasoani mai. Ou te iloa o lau Afioga o le poututoa o le private sector ou te talitonu o lou ala puipuilu lea i tulaga o auunaga a e o lo o galulue i lea tulaga, ae faataua foi le tulaga ona o le manulauti a le tatou Malo e puipui tagata lautele. Tulai mai Saleaula e faaauau le saunoaga.

Tofa LEVAOPOLO TALATONU: Faafetai i lau Afioga i le Fofoga Fetalai. O le isi la tulaga e mafua ai ona avatu se lagona, ona o le maketi le mea e tulaia uma i ai le mamalu o le atunuu. O le mea foi la lena sa fai atu ai sau faamatalaga, e manaia le split o maketi ia ona a tatou tilotilo i le traffic lea ua i ai, e matautia. E tasi lena mea tatou te vaavaai ma outou silasila i ai i le tulaga o le feomia o taavale i totonu ae le lava a tatou auala, ae pei o se tasi lena avanoa e mafai ai ona tau faaavanoa le auala o lo o feoai ai a tatou taavale. A o le mea lea o le space, e sao, e avanoa luga, ae na pau lava le fautuaga i se faautautaga tatau i lea itu, ia fai lelei se town plan, aua a faatu nei se fale tele i luga o le.... so o se atunuu lava, e fai lelei le latou plan i le latou taulaga. E faasolosolo atu lava i le laiti e tau i tua ia maua le view, maua le ea. Na pau la lena o se fesoasoani atu i le vaega lea.

O le isi vaega lau Afioga....

FOFOGA FETALAI: Malie Saleaula leaga o lea ua e tapa le Minisita tonu lava e nafa ma le town plan. Tulai mai le Minisita mo le Siosiomaga.

Afioga Hon Faamoetuloa Ulaitino Faale Tumaalii (Minisita mo Punaoa Faalenatura ma le Siosiomaga): Faafetai lava i lau Afioga i le

Fofoga Fetalai. E leai ua ou tulai atu i le tulaga lea leaga o lea ua tau le town plan. O lea ua i ai le fuafuaga a le Malo ma o lo o galulue ai nei le PUMA ma le Matagaluega o Galuega, Felauaiga ma Atinae Eseeese i le tapenaina atoa o le town plan o le taulaga e amata mai le Vaisigano e agai atu i Mulinuu. Ma lou faaaloalo lava.

FOFOGA FETALAI: Malo. Faafetai le fesoasoani mai i lau Afioga i le Minisita. Tulai mai le sui usufono mamalu.

Tofa LEVAOPOLO TALATONU: Faafetai. Ona ou o o mai lea i le Minisita mo le Soifua Maloloina lau Afioga. Malo faafetai i lau Afioga i le Minisita, o lea lava foi ua matauina pea le solo mai o tatou grants ma tupe foi o lo o maua mai faameaalofa mai a tatou paaga ma faalapotopotoga mai fafo. A fua le \$18miliona lea o fesoasoani mai a tatou paaga, e matautia le tele o nei tupe. Faafetai foi e le o nofonofo lelei le Matagaluega i a latou polokalame faasolosolo i le tulaga lava ma le auga o aute o lenei tupe mo polokalame e puipui ai le soifua maloloina. Ae na pau lava le fesili ou te fia fesili atu ai i lau Afioga i le Minisita, pe o faapefea ona mautinoa e le Matagaluega o successful polokalame ia. Aua o le upu moni lava lau Afioga, o lea foi na maua i saunoaga a nisi sui usufono ma suesuega foi, o lea e agai i luga le aofaiga o le mamalu o le atunuu o lo o ua maua pea i le gasegase o le suka ma le toto maualuga ma tulaga faapena. O lea la ou te fia fesili ai, pe aisea ua agai ai i luga le numera o gasegase ia, ae mafai ona tatou iloa pe a tuuititia tagata e maumau o latou soifua i le faamai. E mafai foi ona tatou mautinoa pe a tuuititia tagata e faamama o latou toto, se i tulou. E mafai foi ona tatou mautinoa pe a faapea ua alu i lalo le numera o gasegase e saili togafiti i atunuu mamao lea foi ua alu atu le isi \$10miliona. Peitai, e le o se taunuuga o naunau i ai le polokalame. O le ala lea o le avatu o sau fautuaga i lau Afioga i le Minisita, pe le ua talafeagai ona aumai se vaega o le tupe lea e tuu atu foi i tua i le private sector i private doctors latou te faia se siaki o le atunuu atoa. Aua o lea ua maua mai i faamaumauga, na pau lava le mea a le Matagaluega o lo o fai, o le fua o pauna o olomatutua i tua lea e fai a latou faamalositino. A ia manatua e lau Afioga ma le mamalu o le Maota, e i ai mea o tagata mai suka ae paeese, e i ai foi tagata e mai suka ae lapopoa. A fua la pauna, e maua tonu i ina le gasegase o o lo o gasegase ai se tagata. O le mea lea ou te fai atu ai, ia aoga le maau lea ma meaalofa lea i totonu o le polokalame.

FOFOGA FETALAI: Malie Saleaula se i tuu atu le avanoa ona o lea ua e taua le Minisita mo le Soifua Maloloina. Tulai mai lau Afioga i le Minisita.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, e le i i ai se manatu e faalavelave i le saunoaga a le Afioga i le sui usufono mamalu, ae i ai lafoga e tatau lava ona faasao leaga e faigata le faafogafoga mai a le atunuu. Ia ma o lea foi e tuuaia le afaigaluega e le mafai ona tali mai. O lea ua ou tulai ai lau Afioga i le Fofoga Fetalai, i le vaega lea o lo o saunoa i ai le sui usufono. Leaga o lea ua faaaliga lona tomai faafomai i le tulaga lea o le mai suka. O lea foi o lo o taoto i le Maota nei le faaaliga a le sui usufono, e i ai mai suka e paeese, e i ai foi mai suka e lapopoa, ae i ai foi le au lapopoa e le suka. Mo le

silafia e lenei Maota, o le mai suka, e le mafua mai ona o le tino puta po o le tino pae. E mafua mai i le lava o le vailaau o le insulin. O le insulin la lau Afioga ma lenei Maota...

Tofa LEVAOPOLO TALATONU: Lau Afioga i le Fofoga Fetalai, o le faafa ai lea ona faamalamalama le mea lea. Ua tatou malamalama uma lava.

FOFOGA FETALAI: Malie Saleaula, e lelei lou faafogafoga mai ae se i faamalamalama le mataupu. Tulai mai lau Afioga i le Minisita.

Afioga Hon Tuitama Talalelei Tuitama: O le insulin, e fausia i le totoga o le tagata e taua o le atealii po o le páncreas i le faa-Peretania. O le aoga o le insulin lea, na te momolia le suka e maua mai i le meatausami ona alu atu lea o le meatausami i le puta ona mitiia ai lea e alatoto ma o o atu i totonu o alatoto o le tagata. Mai la i totonu o le alatoto ua suia ai le meatausami lea e avatu e le tagata i le suka. Na pau lea o se vaaiga.....

Afioga Hon Palusalue Faapo II: Lau Afioga o se mea e fia faamalamalama.

FOFOGA FETALAI: Malie lau Afioga i le Minisita se i tulai atu le Taitai o le Itu Agai. Saunoa le Taitai o le Itu Agai.

Afioga Hon Tuitama Talalelei Tuitama: E le i saunoa le Taitai o le Itu Agai i le suka.

Afioga Hon Palusalue Faapo II: Lau Afioga, ua fai soo lava le mea lea e le Afioga i le Minisita, a faauilavea e alu ai lava, alu ai lava alu ai lava a o le taimi o le sui usufono lea e alu. O le a lau faauigaga o le mea lea? O le soli Fono le mea lea.

FOFOGA FETALAI: O lea ua maua atu lau faauilavea le Taitai o le Itu Agai. O le soli Fono lou fai atu soo ae fai mai lava. E le falala fua se niu i le tulai mai o le Afioga i le Minisita i taimi uma. E pau lava lea o le Minisita e matua malie atoatoa taualumaga, ona e taua. A o lea foi ua uma ona ave i ai le tatalo a le Fofoga Fetalai e faapuupu mai in short form le tulaga o le explanation, a o lea lava e ave – non-communicable diseases. O le faamai oti po o le Tsunami lea ua i le atunuu, lea e agai tonu i ai Saleaula. O lea la e taumafai mai i le mafuaaga o le mai suka ma le mea lea e i ai le atugaluga. Ae o le a tuu atu pea i le Minisita mo le faamalamalama leaga o lea e pogisa Saleaula e uiga tonu i le mataupu.

Tofa LEVAOPOLO TALATONU: Lau Afioga i le Fofoga Fetalai, faamolemole...

FOFOGA FETALAI: Malie la Saleaula se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te manatu o le 99% o le Maota lenei ma le atunuu atoa e fia malamalama i le faapogai o le faamai oti.

Aua e leai lava se isi e fia oti. E fia ola uma lava tagata. Ae o lea foi la ua maua i le taeao nei, e pei o le tomai faafomai lea sa i le sui usufono mo Saleaula e fua pauna ona iloa ai lea o lou suka. O le tomai lena o lea na aumai nei, o lona uiga o le tomai lena o lea e i le Taitai o le Itu Agai, e le suea i ni insulin, ae sue i lou mamafa. O lea la ua ou tei nei i lou faalogo atu, e le suea i le mamafa po o le mama le tulaga o le suka, ae sue i le insulin. O matou uma la nei e fia ola, o lea e fia faalogologo i le mea lea, vagana le toalua lea o le sui usufono mo Saleaula ma le Taitai o le Itu Agai, e fia vave oti laua. A o lea la, e taua tele lau faaiuga lena ua fai mai, se i matou faalogologo leaga matou te fia ola uumi.

FOFOGA FETALAI: Ia, e fai foi o lena a o lenei lau Afioga i le Minisita. O taliga e fia faalogologo. E o o foi i le Fofoga Fetalai ia, e matua lagona lava le fia faalogologo. Ae ona o le taimi o le tatou Fono, e tatalo atu pea i le tatou Fono, o le a usi lava le faafogafogaaga i lau tali faa-Minisita, ae faapuupu maia leaga o lea o le a uma le taimi o Saleaula. Malie lau Afioga se i tuu atu lava le avanoa i le tulai mai a le sui usufono o Aiga ma Sa Asomua. Tulai mai lau Afioga i le sui usufono mo Siumu.

Tofa Hon Tuuu Anasii Leota (Siumu): Lau Afioga i le Fofoga Fetalai, ua ou tulai atu ma lou faaaloalo tele lava ona o le tulai soo o le Taitai o le Itu Agai e taofiofi saunoaga ma faauilavea a Afioga i Minisita, o lea ua ou tulai atu ai e faatu se lafo, *Ina ia tuu pea se itula se tasi i le saunoaga a le Minisita ina ia toso ai pea le tatou Fonotaga.*

E le i faluaina le lafo.

FOFOGA FETALAI: Malie le sui usufono mo Siumu, o lea o le a ou faaii atua le saunoaga. Ae faauma mai le saunoaga a le Minisita.

Tofa LEVAOPOLO TALATONU: Lau Afioga i le Fofoga Fetalai, ona o lea e agai sese le saunoaga a le Minisita. Ou te le i fesiligia po o le a se mafuaaga o le toto maualuga ma isi mea. Sa ou fesiligia le faaaogaina o le tupe lea e \$18miliona lea e avatu nei i tua mo polokalame. O lea la e avatu se matou tuualalo i le faaaogaina o le seleni. Ia manatua lau Afioga i le Fofoga Fetalai...

FOFOGA FETALAI: Ia malie Saleaula, leaga e le mafai ona agai le saunoaga a le Minisita e na ona amata mai i lalo ae le i o o i luga. E tatau ona paelaufono uma mai le mea ina ia malamalama le mataupu. Ae faapuupu maia lau Afioga i le Minisita ona faaauau ai lea o le saunoaga a Saleaula.

Afioga Hon Tuitama Talalelei Tuitama: Lau Afioga i le Fofoga Fetalai, ona o lea sa saunoa le sui usufono i le puta ma le pae ae relate agai i le diabetes. O lea la ou te faamalamalama le mea e tau o le suka ona manino ai lea o le sese o le saunoaga a le Afioga i le sui usufono.

Tofa LEVAOPOLO TALATONU: Lau Afioga i le Fofoga Fetalai, e le o se metotia a au le fai atu e fua, o le metotia lena a le Matagaluega o lea e fai nei, o le o e fua pauna o tagata e iloa ai po o mai suka pe le mai suka. A o lea

na avatu lau tuualalo, ave le tupe agai i le private sector, ona agai lea o le private sector e fai siaki o le mamalu o le atunuu.

FOFOGA FETALAI: O lea o le a faapuupu mai le tali a le Minisita, toe lima ou minute. Tulai mai le Minisita.

Afioga Hon Tuitama Talalelei Tuitama: Lau Afioga i le Fofoga Fetalai, o lea foi ua toe saunoa le sui usufono fai mai e maua le suka pe a fua. O le galuega lena a le Matagaluega lea e fai nei, e fua le mamafa....

Tofa LEVAOPOLO TALATONU: Lau Afioga i le Fofoga Fetalai, o le galuega lena a le Matagaluega o lea e fai i le taimi nei.

FOFOGA FETALAI: Malie Saleaula, Saleaula.

Afioga Hon Tuitama Talalelei Tuitama: O le galuega a le sui usufono lea e saunoa mai o le galuega a le Matagaluega e o e fua le mamafa ae le fuaina le suka. O lea la e saunoa mai, e iloa le suka pe a fua le mamafa. A o lea la ou te taumafai e faasao atu le vaega lea. Lau Afioga, a o o la ina mitiia le suka i meataumafa nei, ona faaogaina loa lea o le insulin na te momolia le suka lea i totonu o musele taitasi o le tino. A o o i totonu o musele, ona susunu ai loa lea e tusa o le faaupuga e burn up le suka ina ia maua ai le energy. O le energy la lena e ala ai ona mafanafana lou tino, e mafai ai ona gaoioi ma mafai ai ona tautala.

Tofa LEVAOPOLO TALATONU: A burn foi le suka ua maua le siamu, a o le mea lea ua i ai ua alu lou taimi i le saunoaga a le Minisita i le mea lea e tau faamalamalama mai.

FOFOGA FETALAI: Malie Saleaula.

Afioga Hon Tuitama Talalelei Tuitama: Ana e le tulai soo mai, ua leva ona uma. Ia o lea o le a faaopoopo atu.

FOFOGA FETALAI: Malie ia lau Afioga i le Minisita, e tatalo atu ma le agaga faaaloalo o le a saausi lou taimi pe a oo i le taimi o lau tali faa-Minisita.

Afioga Hon Tuitama Talalelei Tuitama: O le faapuupuuga la o le vaega lea, e le o fuaina le mamafa o le atunuu ina ia iloa ai pe suka pe leai. E leai, o la e i ai masini e tui ai le toto, ona fua lea i le tamai masini lena e tau mai ai po o le a le maualuga o le suka lea ua e i ai, ae e le fuaina se suka i se mamafa.

O le faasaoga lea, e leai. O lea e feoai ma feaveai masini e fua ai le toto. E tui le toto ona tuu lea i totonu o le masini, e tau mai e le masini po o le a le maualuga ua i ai le toto. A o le uiga o lau faamatalaga lea e pei ona saunoa i ai i le pae ma le puta, e tusa lava pe e te pae e le iloa i ina le fua o le aofai o le inisulini lea e i totonu o lou tino.

Afioga Hon Palusalue Faapo II: Lau Afioga i le Fofoga Fetalai ma le faaaloalo lava. Ua ova le le mafaufau, ua le usitai i lau Afioga i le Fofoga Fetalai ma alu ai le taimi o le sui usufono.

FOFOGA FETALAI: Malie le Taitai o le Itu Agai, o lea ua uma ona ou folasia i malae ua uma ona avatu le fautuaga i le Minisita.

Afioga Hon Palusalue Faapo II: Leaga e le usitai, ana o se isi o matou ua leva ona tuli i fafo.

FOFOGA FETALAI: E tausolomua mai ia te oe le le usitai.

Afioga Hon Tuitama Talalelei Tuitama: E leai o lea lava ou te usitai i lau Afioga, ae leaga o lea ua fia Fofoga Fetalai. O lea ua manao e control e latou le Fonotaga, a o lea ou te usitai lava i lau Afioga i le Fofoga Fetalai.

Lau Afioga i le Fofoga Fetalai o le faapuupuuga la, e matua sese lava le mea lea e saunoa i ai le sui usufono. E lelei pe a sui se isi mea e talanoa i ai. Talanoa i mea e malamalama ai, ae aua le talanoa i mea e le o i ai sona malamalama.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea ou te fia fesili atu i le Minisita ma o le fomai foi i le vaega lea e faapea a susunu loa le suka ua alu atu i le musele, ona tupu loa lea o le vevela ma le malosi. O le malosi la ma le vevela lea e mafua ai ona tu soo le isi i luga?

FOFOGA FETALAI: Malie lau Afioga i le Minisita, ua ou tatalo atu ma le agaga faaaloalo. Ua silafia foi o lenei lava e tautata atu i le moa o le ala le tatou Fono? O lea ua malamalama ma manino lelei lau folasaga, e ese le fua suka, ese le fua pauna. O lea foi ua malamalama le sui usufono o lo o saunoa nei ma ua malamalama lea mataupu, a o le a lafo atu i lau tali faa-Minisita ona faamanino lea o lea mataupu.

Afioga Hon Tuitama Talalelei Tuitama: E faafetai tele atu i le fesili a le Afioga i le Palemia. Lau Afioga i le Fofoga Fetalai, o le mea lea e ala ai ona tutulai soo, ona e suka. Ua ova le vevela ma le mafanafana o le suka lea e susunu i le tino lea e mafua ai ona tafitifiti faapea ma tautala soo. Aua e oo i le tautala e alu ai foi le energy. O i latou la ia e faapea, o tagata suka uma lava na.

FOFOGA FETALAI: Tulai mai Saleaula, e manatu ua ova lou taimi ae ua ava atu ona o le tele o faauilavea lea e tuuina atu - faamaea maia lau lauga.

Tofa LEVAOPOLO TALATONU: Lau Afioga i le Fofoga Fetalai, o lea ou te matauina lava lou taimi e le i taitai.

FOFOGA FETALAI: Me i ese ma le Soifua Maloloina ae agai i se isi Matagaluega.

Tofa LEVAOPOLO TALATONU: Ua alu le fia minute o faamalamalama, ua atili ai ona matou nenefu i le saunoaga a le Afioga i le Minisita mo le Soifua Maloloina, ae ui i lea o le a ou agai mai i le Tala o le Tupe lau Afioga i le Fofoga Fetalai.

O le mea muamua lava ona o au ou te fiafia tele ou te suesue i fuafuaga tuutuu mamao a le tatou Malo, peitai lau Afioga i le Fofoga Fetalai. A ou tilotilo nei i le faapapalagi ma le faa-Samoa, e eseese mamao lava lau Afioga i le Minisita o Tupe.

Faafofoga foi o le a ou faitau atua le Forward Estimates o lo o faapea mai, “The forward estimates for the next three years show that the projected debt level is increasing.” O lona uiga e alu i luga a tatou aitalafu. Ae sau le faa-Samoa, “O faamatalaga tau tupe faaalu tuutuu mamao o le Tala o le Tupe i le tolu tausaga o lumanai, o lo o atagia ai le taua o le puleaina lelei o le tamaoiga.”

Ua matua vala i SIni le sese o mea ia e lua. E ui i lea lau Afioga i le Fofoga Fetalai, o le a ou oo atu i le Matagaluega o Tupe Maua.

Afioga Hon Faumuina Tiatia Faaolatane Liuga (Minisita o Tupe): Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa se i tulai atu le Minisita o Tupe.

Afioga Hon Faumuina Tiatia Faaolatane Liuga: O le mea lea e leaga ai le saunoa o le sui usufono.....

O le faamoemoe lena ae le faitau lelei le faaliliuina o upu ma lona faauigaina. O lea e sao lelei lava le faa-Samoa. O le agaga ina ia puipui ai le agai i luga o aitalafu. O le faasaoga sao lena ma le vaaiga mamao lena mo le agai atu i le tolu tausaga o lumanai nei. O le faa-Samoaina sa’o lena.

FOFOGA FETALAI: Tulai mai le sui usufono e faamaea mai le saunoaga Saleaula ua maea lou taimi.

Tofa LEVAOPOLO TALATONU: Lau Afioga i le Fofoga Fetalai, ona ou oo mai lea i le Matagaluega o Tupe Maua, a tatou revenues ia. O le a taoto lava sau faamatalaga i le aofaiga atoa o a tatou tupe maua ia e pei ona faamauina ai le \$760miliona i lenei foi tausaga. O le a taoto foi sau faamatalaga i le tatou \$222miliona o tupe faameaalofa po o a tatou grants mai a tatou paaga o lo o alolofa mai ma aumai a latou fesoasoani, a o le a agai tonu lava sau faamatalaga i a tatou lava tupe maua masani mai lafoga ma pisinisi a lo tatou Malo.

Lau Afioga i le Fofoga Fetalai, o lea ua ou faamauina le \$538miliona. Ou te faamalo atu i lau Afioga i le Minisita, e manaia foi lea faaopoopoga ua i ai, masalo o le faaopoopoga lea e i ai mai le tausaga na tea nei mai a tatou lava tupe maua e \$21miliona. E faamalo atu foi i le Matagaluega o Pisinisi, Alamanuia ma Leipa i a latou galuega ona ua feoloolo foi nai kamupani mai

fafo ua mafai ona latou resitalaina ma fai pisinisi i totonu o le atunuu. E le taumate lau Afioga i le Fofoga Fetalai, ua talafeagai foi ona siisii i luga a tatou seleni ua tataua ona maua. E pei foi ona faamauina le siitia o oloa ua aumai i totonu o le atunuu po o import.

FOFOGA FETALAI: Ua maea le taimi o le sui usufono, Saleaula. Faaiu mai le saunoaga o lea ua maea lou taimi.

Tofa LEVAOPOLO TALATONU: Lau Afioga i le Fofoga Fetalai, ua matua tumu au i lou faanoanoa, ae ui i lea o le a ou usitai. E ui i lea ua uma foi lau lauga.

FOFOGA FETALAI: Malo faafetai. O le agaga o lo o faagasolo pea a tatou galuega i tulaga masani.....

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie se i fai atu le tala lea a le Fofoga Fetalai Palusalua. O a tatou taimi faatulagaina, e tumu i le ava atu. E 30 minute taimi o sui usufono taitoatasi e aofia ai ma faauilavea. O lea na amata lau saunoaga i le 10 minute e tea ai le 9.00 i le taeao. A outou silasila i le uati, ua tea mamao le taimi a o lenei lava e ava atu ona o lo tatou va fealoaloai. O lea foi e amanaia le tulai mai o le Malo ma le taumafai e faamalamalama. Ia outou alofagia, e le o ni ai e avea, o lea e i ai isi avanoa i le taimi o le iloiloga auiliili, a o mea e faalauaitetele o lea lava e avatu le avanoa ona o le ava atu.

O lea foi ua talosaga i le Itu a le Malo e faapupuu mai tali ina ia mafai ona faasaoina taimi o sui usufono, ae e le uma ai ma e le o le tatou Tala o le Tupe mulimuli foi lenei. O a outou lauga lava na o lo o faasolo mai pea i taimi uma, ae tulai mai e faaauau le saunoaga o lea lava e avatu le avanoa.

Tofa LEVAOPOLO TALATONU: Lau Afioga i le Fofoga Fetalai, a fua atu o lou taimi ato lava na fao i faauilavea a Afioga i Minisita. Ou te lagona lava le faanoanoa ona o le tapenaga a lenei itumalo e fai ai sona sao i le Tala o le Tupe lenei, peitai e le mafai ona ou toe laasia se saunoaga ma se faaiuga a lau Afioga i le Fofoga Fetalai, a o le a faauma lau lauga i le televise ma le leitio, faafetai.

FOFOGA FETALAI: O lou lava lena finagalo Saleaula, o lea lava e piipii ama atu le Fofoga Fetalai.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie le Taitai o le Itu Agai se i tuu atu le avanoa i le Taitai o le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Na o le matuu e faafefe i le aveau. O upu na a le atunuu, e faafefe i le aveau. O lea e tele le avanoa e saunoa ai sui usufono, ae oo loa i mataupu ogaoga, mataupu e lagalaga ai manatu, e lelei ona nofo sauni le sui usufono e aumai ni ona manatu e lagolago ai le sao o ana mau. Aua o lea ua

faafogafoga lelei lava le Maota i le taeao lenei. O le mau lea sa tauave e le sui usufono lenei, “O le mafuaaga o le o i tua o le Matagaluega, e o e fua le mamafa ma le mama. A fua atu e mamafa o lena ua tau mai ai ua maua i le suka.”

O lea ua maioio lelei lava, o lea ua faamalamalama lelei. O manatu sese ia a tuu e alu loa ona atili ai lea ona mamai lo tatou atunuu ona o lea e taitaiseseina i ni finagalo. O lena ua ou logo atua, e le faapea na o outou tou te iloa o i le televise ae matou te le iloa foi o i le televise. O lea ou te toe fai atu, a outou o e fai a outou faaoloataua e le faapea matou te nofonofono, tatou te popoto uma lava e fai le mea lena, ae ou te manumanu i la outou faaoloataua. Ou te matua alofa lava i la outou faaoloataua aua a matou liliu loa i ai, o le atalii o a matou faaoloataua a outou faaoloataua.

O le mea lena na ona ou faamanatu atu ai faapena, na o le matuu e fefe i le aveau.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa se i tuu atu le avanoa i le Taitai o le Itu Agai.

Afioga Hon Palusalua Faapo II: Ma lou faaaloalo lava, e leai e le o taumafai atu ona o nisi tulaga. O lea ua matauina lelei lava le metotia po o le stradege lea e fai, o le faaumaina o matou taimi. O fea la o le a matou sulu i ai? Aua e mafai ona ou fai atu nei i la matou Vaega, aua ne i toe lauga se isi. O le mea lea e finagalo i ai lau Afioga i le Fofoga Fetalai i lou tuu avanoa i le Malo? O lea e i ai o latou taimi e tusa ai ma Tulafono Tumau.

FOFOGA FETALAI: Se i fai atu le tala lea a le Nofoa, Palusalua. E le taugofie lau tuuaiga lena faapea o le strategy lea e fai o le faaumaina o outou taimi. O lea ou te fua atua tuleiga ma saunoaga a sui usufono ma tali a le Malo lea e taumafai e faamalamalama. O le agaga ia malamalama mataupu. O lea foi ou te tuu avanoa..... silasila i le taimi lea ua ou tuuina atu? Ua ova atu ma le 15 minute le ova o le taimi lea e i ai. O lea na ou fai atu, e le uma ai iinei le tatou talanoaga. O lea tatou te agai i le isi tai 15 minute i mea taitasi, o lo o maua outou avanoa, ae e le mafai ona tosoa le tatou Fono.

Malilie le Taitai o le Itu Agai faapea foi le sui usufono o lo o saunoa, o lea lava ou te piipii ama atu ona o lo tatou va fealoaloai ma lo tatou va nonofo. Soia tou te atugalua i na tulaga o le fai fai o a tatou tala iinei ona outou laga lea i mea ia tou te saunoa ai i luga i le media. E le faia i fafo ni tonu o le atunuu o lea tatou te talatalanoa iinei i le Maota, o iinei e lipoi ai upu.

Ia outou finagalo malilie tuu mai pea lo outou faatuatuaga o lea e tau faasoasoa atu le faatonutonuina o la tatou Fono.

O lea Saleaula, ia vaatele i lou finagalo le taumafai atu, o lea foi ua fauma atu lou taimi.

Tulai mai se isi sui usufono e fia saunoa i le Tala o le Tupe i lenei taeao.

Afioga Peseta Vaifou Tevaga (Faasaleleaga Nu.4): Lau Afioga i le Fofoga Fetalai.....

FOFOGA FETALAI: Malie lea Itu o le Maota, o le a lafo atu i lea Itu i le sui usufono mo Faasaleleaga Nu.4, Peseta Tamaalelagi Tevaga Vaifou Peseta.

Afioga PESETA VAIFOU TEVAGA: Lau Afioga i le Fofoga Fetalai, e tele lava suafa matai o le Tofi o le itumalo. O Peseta Tamaalelagi, Tuala Tamaalelagi, Sala, Tevaga ma Vaifale.

E momoli atu le faamalo ma le faafetai i lau Afioga i le Fofoga Fetalai ona ua maua lenei laolao mo lenei itumalo e fai ai foi se sao aua le Fonousu a Samoa i lenei taeao. E muamua lava ona ou momoli le faamalo ma le faafetai i le tapuaiga a lo tatou atunuu pele. Le afio o Lana Afioga Mamalu O Le Ao o le Malo ma lau Masiofo, afio foi lau Afioga i le Sui o le Fono a Sui Tofia ma lau Masiofo. Afio lau Afioga i le Faamasino Sili, le mamalu i Tamaitai ma Alii Faamasino.

E momoli atu foi le faamalo ma le faafetai a lenei itumalo i lau Afioga i le Palemia, le Sui Palemia ma le mamalu o lau Kapeneta. Le afio o lau Afioga i le Taitai o le Itu Agai faapea le la Vaega Faaupufai. Le susu o Faauluuluga o Matagaluega ma Faalapopotoga faapea foi le mamalu o le Palemene ua potopoto i lenei taeao.

A o le i avatu se manatu o lenei itumalo ou te fia oo atu i lou itumalo, lou itumalo pele o Faasaleleaga Nu.4, afai o outou faafofoga mai, ia ou te faamalulu atu, o le a taoto paia o lo ta itumalo, leaga o le itumalo e tupuga mai i tupu o tupu, o le itumalo e faauluulu i ai Aiga o Samoa. O le mea lea lo tatou itumalo, afai o outou faafofoga mai e leotele atu le sui usufono ia e mafua mai i mea na.

Lau Afioga i le Fofoga Fetalai, ae ou te lei ulufale mai i le Maota lenei, sa ou mafaufau i le mafuaaga na mafua ai ona maua le Faavae o Samoa, ae pe faapefea foi ona fau e o tatou tuua lea ua taoto mai i tiasa ma tuugamau, o le a lava le mafuaaga na fau ai e ia tama matutua o le atunuu, ma faaigoia ai o le Faavae o le Atua Samoa? Sa ou tuu foi i le Atua, ma ou sailiili i le Atua e tali mai. Masalo po o nei i le 5:00 i le 4:00 i le vaveao a o sauni le lauga a lou itumalo ua musumusuga mai le Atua ia te au, o le musumusuga lilo lea a le Atua, amuia lou itumalo ua musumusuga i ai le Atua. Fai mai le musumusuga a le Atua, 'Peseta, o lea o le a ou faamanino atu ia te oe le mea na mafua ai ona maua le Faavae o Samoa, o au, o au o le Atua, o le Tupu o tupu, o Atua o Atua o le lagi ma le lalolagi, o lou Alo pele o Iesu, o le Palemia lea o le lagi ma le lalolagi, o lau Kapeneta, o soo ia o Iesu, a o le Palemene a le Atua, o tagata ola o tagata soifua uma o le lagi ma le lalolagi'. Silasila i le moni o lenei musumusuga lilo na aumai e le Atua? O lea na filifilia e le Atua Lona alo pele e avea ma Palemia o le lagi ma le lalolagi, toe filifili ona soo e sefulu ma le lua e Iesu e avea ma ana Kapeneta. A le Kapeneta lea e sefulu ma le lua lea e nonofo mai i luma i i? Silasila i le moni o le Faavae na fai e o tatou tuua i le musumusuga a le Atua e sefulu ma le lua Minisita o le Kapeneta, e sefulu ma le lua foi Soo o Iesu, e faapena foi le mea lea ua i ai le Palemene o Samoa?

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai....

FOFOGA FETALAI: Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Faatoa faaopoopo nei le Kapeneta i le 1994, e lei faaopoopo i le 1962 leaga e faamanatu atu i le sui usufono, ua ou le iloa po o ai lea sa la talanoa?

FOFOGA FETALAI: Malie le sui o saunoa, sei tuu avatu le avanoa i le faauilavea a le sui usufono mamalu.

Tofa Lealailepule Rimoni Aiafi (Faleata Sisifo): Faafetai lava na ona fesoasoani i le saunoaga matagofie a le sui usufono, leaga o la e faafofoga mai le atunuu ma le aufailotu ma le paia o Samoa, ne'i te'i ua faaseseina i talaiga fou ia ua sau nei, sei....

FOFOGA FETALAI: Malie le sui usufono mamalu, sei tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea lava ou te talanoa au i lau Minisita Lagolago, ae leai se mea e te faalavelave mai ai fua oe.

FOFOGA FETALAI: Ia agai tonu lau folasaga o lea e manaia lau bibliography i lenei taeao, le sui usufono mo Faasaleleaga Nu.4, o lea e fia maua po o ai tonu lava lea na oulua talanoa nei i le vaveao.

Tulai mai le sui usufono e faaauau le saunoaga.

Afioga PESETA VAIFOU TEVAGA: E fia fautua atu i le sui usufono mo Faleata Sisifo, vaai po o sao le tapuaiga la e i ai?

Tofa Hon Tuuu Anasii Leota: Lau Afioga i le Fofoga Fetalai o se mea e fia faamalalalama.

FOFOGA FETALAI: Malie le sui usufono, sei tulai mai le sui usufono mamalu mo Siumu.

Tofa Hon Tuuu Anasii Leota: Ona o lea sa saunoa le sui usufono na fesuai, o lea ua saunoa le Afioga i le Palemia na fesuai le Kapeneta. Pe na i ai se taimi na fesuai ai soo o Iesu? Ma lou faaloalo.

FOFOGA FETALAI: Ia aua e te atugalua i le saunoaga a Siumu, agai tonu lava o le a tauau ina galo lau folasaga o lea e lei faasoloa lau lauga. Tulai mai le sui usufono mamalu.

Afioga PESETA VAIFOU TEVAGA: Ia leaga e tatau pea ona ou tali atu i le sui usufono mamalu mo Siumu, e lei i ai se fesuaiga na fai e Iesu i ona soo a o la e amiotonu ona soo, a o le Palemene a le lalolagi, e fai fesuaiga pe a faaletonu. Ia o le mea lea lau Afioga i le Fofoga Fetalai, o le a tauau ina galo atu le lauga e lei....

Ia masalo o le a ou amatamea i le Afioga i le Minisita mo Galuega, Felauaiga ma Atinae Eeseese. Lau Afioga i le Minisita ma le mamalu o le

Matagaluega, o lea ou te manatua le sini autu o le tatou Malo i le taimi na fuafuaina ai le Matagaluega o Galuega e faamatuu mai e le gata i Private Sector ma le aufaipisinisi, ona o le manatu o le Malo i lenei vaitaimi, ua tataua ona avatu le lagolago a le Malo i nai o tatou tagata, ma ou te talitonu foi, o iinei lava i le Palemene lenei ma le Maota lenei na afua atu ai mea uma. Peitai la o le mea lea ua tulai mai nei lau Afioga a le Minisita o lea ua faamatuu atu, ma o lea ua i ai le Matagaluega lea o le LTA, o lea ua fai a outou taiala, o lea foi ua fai a outou sa. Ae silasila foi lau afioga, o le a tauau ina tatou alo atu ma le finagalo na manao ai le Malo ia lagolago i tagata uma. Silasila foi i le lesitala lea ua outou faia ua \$5,000 le totogi o le laisene e lesitala ai le kamupani po o nai kamupani tau atiae. Ae silasila foi, o lea ua uma ona lesitala kamupani a tagata uma ua i ai foi ma le mea lea o le business license pe a ma se mea o le \$500, a o le agaga o le Malo o le faamama avega. A fua atu foi i tulaga ia ua i ai laisene o loli, masini ma isi mea, ia o loli lava ia pau sefulu ua \$6,000, a lima la loli ia ua tolusefulu o masini, e uma ifo e lesitala e le kamupani toeitiiti lava po o se mea o le fitusefulu. O le agaga la o le taofi o lenei itumalo, sei toe silasila ane lava lau afioga, silasila i le mea lea ua fai nei i le lesitala, afai e le faamautuina mea uma e faapea foi ona outou taofia. Ua tele ia faitioga ona o le tulaga lea ua fai e le LTA, o lea ua outou faamuta ia le aso e lesitala ai kamupani, a misi i le aso e tasi ua outou taofia ia kamupani mo le tausaga atoa. Ae silasila foi lau Afioga, o le tele o nai kamupani o lea o lo o fai nai a latou nonogatupe i le Faletupe o Atinae ma nisi foi o faletupe a le tatou atunuu. O lona uiga a atoa le tausaga e lei totogia, e faapefea la ona fai mea ia?

FOFOGA FETALAI: Malie le sui usufono o lo o saunao, sei tulai mai le Afioga i le Minisita mo Galuega, Felauaiga ma Atinae Eeseese sei faamalamalama lou finagalo, tulai mai lau Afioga i le Minisita.

Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese): Lau Afioga i le Fofoga Fetalai ma le paia o lenei taeao, ou te manatu o le mataupu pei ona saunao i ai le sui usufono mamalu, ua ou le maua po o le 2006 na fai ai reforms ia a le Malo, o le agaga mauuluga lea ina ia tuuina atu galuega mo Private Sectors ia faaleleia ia le auaunaga i tua ma ia atinae ia kamupani eeseese. O le tausaga na tea nei sa fai ai le matou fono ma faauluuluga o directors o kamupani nei ma matou talanoa, o le tulaga ua i ai ua tele kamupani ua mafai ona lesitalaina. O le tulaga ua i ai ua ova ma le lima tausaga talu ona ave le faatuatuga ma le taumafaiga a le Malo ina ia malolosi ia le Private Sectors, ae ua tilotilo atu foi i le tulaga ua faatino ai galuega, ia o le popolega lea i ai, o lea sa fai ai le matou fonotaga ma tau ave i ai, ia pei ua oo i le vaitau ua tataua ona tilotilo i le quality o galuega ua mafai ona faatino ma le performance o lo o faatino e le vaega lea a le Private Sector ina ia mafai ona lelei tulai mai, e le faapea o le a alu lava lenei olaga atoa o taumafai ina ia ave i ai le...tufatufa i ai galuega, ae pei ua agai le silasila a le Malo aemaise le LTA i tulaga ia o le faatinoga o galuega, ina ia mafai ona tulai mai ia fai ia lelei galuega ona tatou oo ai lea i se isi tulaga. O lea ua i ai foi ua manino ma malamalama, o la foi e fai ia consultations ma tulaga e talatalanoa ai ina ia femalamalamaai ia vaega ia. O le tulaga foi o le siitia o le laiseneina o taavale, o lo o i ai fuafuaga e aumaia ia...ua leva ona faatalanoa i le tausaga na tea nei mo fua e tau fua ai aua e

tele lava ina solitulafono le feaveaiina o uta ia e feaveai i luga o le aualatele ma tele ai le aafiaga o auala i le tulaga o i ai. Ae pei o le fautuaga ua tuuina mai, ia o mea e tilotilo i ai ma vaavaai i ai i lea vaitau ma lea vaitau ina ia mafai ona galulue faatasi le Malo ma le Private Sectors i tulaga moomia ma tulaga lelei aua le agai i luma lau Afioga i le Fofoga Fetalai.

FOFOGA FETALAI: Malo. Faafetai mo le faamalamalama a lau Afioga i le Minisita, e manatu ua malamalama le mataupu le sui usufono mamalu, e fautuaina ua manino ma malamalama lou atugaluga i le tulaga lea. O lo o faasolo pea lou taimi ae agai i se isi mataupu fou.

Afioga PESETA VAIFOU TEVAGA: Lau Afioga i le Fofoga Fetalai, e moni lava o lea ua faamalamalama mai e le Minisita, ae le o manino tele le Minisita i le autu o le mataupu lea e avatu.

Silasila foi, o le tulaga lea o lo o tupu pea, o le mea lea a misi le aso lea o lo o outou faasalalauina i nai kamupani e lesitala ai a latou kamupani, ia ua outou taofia mo le tausaga atoa. Ae silasila foi i le Matagaluega lea e totogi ai a tatou business license, a faapea ua sili atu i le aso lea pei ona faatapulaaaina, e i ai lava fee foi ia e toe faaopoopo ia o nai fee laiti, a o le mea lea e fai e le LTA, e le o ni fee, ae matua ta mutu lava lea kamupani e le mafai ona toe maua ni galuega i le tausaga atoa.

O le isi foi mea sei ou oo atu pea i le vaega lea leaga o lea ua outou vaeluaina kamupani e galulue i Upolu toe galulue i Savaii. A o le mea lea ou te maitauina i le tele o galuega nei, tele foi galuega o lea e o atu kamupani i Upolu ma fai galuega i Savaii. O lona uiga e le o talafeagai le tulafono lea, o lea o le a tender le auala laupapa tele i Samalaeulu. O lona uiga o le a open le tenders, o le a tatala foi le avanoa i so o se kamupani iinei i Upolu. Afai la e amiotonu le faaiuga lea, ua lava la na o kamupani mai Savaii e tender i ai i galuega ia.

Lau Afioga o lea ua ou maitauina ma ou vaavaai i le tele o patupatu ia ua aveese mai i Malifa, ma ou te le o mautinoa o nei patupatu o le a aveese uma pe tuu na o se vaega. Silasila foi lau Afioga i le Minisita o le agaga faanoanoa lea ou te vaavaai i ai, ona o lea ua maitau atu ua masani foi lo tatou atunuu, aua pei o le auala lava lea na mafua ai nei mea o le faaitiitia o le saosaoa o taavale, aemaise foi sei tau faamasani lo tatou atunuu i tulaga foi lea i auala leaga o lea ua sui le tatou itu auala lea ua tatou i ai nei. Ae i le vaavaai i nai gasegase mai le motu tele i Salafai ma Upolu nei, o lea e aumaia nai gasegase nei i taavale nei a le falemai ambulance ia po o nai taavale foi i tua. O lea e natinati mai e aumai i le falemai i Motootua e fia maua se togafitiga. Ae silasila foi, masalo o le tele o mai ua feoti e le oti i le mai ae oti i le patupatu. Aua foi ua galulu faasoloatoa totoga o tagata. O le mea lea e tatalo atu ai i lau Afioga, ae a pe a lava ia patupatu ae aveese, e fai o le taugata o taavale a le atunuu, a o le aafia o taavale a le Malo. Silasila foi i lou itumalo, o lea e tagi mai lou itumalo, na amata ona faavae Samoa e leai lava ma se auala galue.

FOFOGA FETALAI: Malie le sui usufono mamalu o lea o le a tuu atu le avanoa i le faamalamalama a le Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala: Lau Afioga i le Fofoga Fetalai, na o le faamalamalama atu lava o nai vaega ia ona o la e faafofoga mai le atunuu. O tulaga o patupatu ma le faamoemoe sa i ai o le taimi sa fai ai le switch. Ia sa fai ma aoaoina avetaavale mo le saosaoa. A o le taimi lenei, o lea foi ua i ai le faaiuga a le Kapeneta, e pei la o le faaopoopoga mai o le four lane lea e i ai, e le toe i ai ni patupatu ae o le a vali lelei kolosi ia ina ia tele foi le tilotilo mai i le tulaga o le climate change o i ai ma le pollution o taavale foi nei e taofiofi. Ou te iloa foi ua lava le taimi e tatau ona aoaoina ai le au avetaavale ina ia iloa le vaega e tatau ai. O lo o i ai lava patupatu e faamosia i tulaga o falemai ma faleaoga, a o lea ua toe aveese uma patupatu ia. O lea sa maua atu o lea sa taumafai mai le sui usufono e toe fai patupatu, a o lea foi ua toe fai mai e tupu ai le afaina, a o lea ua agai le LTA mo vaega ia ina ia aveesea, ae taumafai tatou avetaavale e molimauina ia vaega ma le feoi i alatetele.

FOFOGA FETALAI: Malo faafetai i le fesoasoani mai a le Afioga i le Minisita. Tulai mai le sui usufono mamalu. Ou te manatu o lea ua malamalama mea tau patupatu.

Afioga PESETA VAIFOU TEVAGA: Faafetai. O le mea sili o lea ua ioe le Minisita o le a aveese uma ia patupatu e alofa foi i nai o tatou tuua matutua, ae faapea foi, aemaise lava nai tina ia ua lalata ona fananau, aua tasi lenei mea e vave ai ona fanau le isi olomatua e le i o o i le falemai. Ia ae faafetai o lea ua e saunoa mai, o le a aveese nei patupatu.

FOFOGA FETALAI: Malie le sui usufono o lo o saunoa se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le uiga ia o mea o faaiuga fai. E i ai faaiuga e fai ona o se agaga lelei. E le i soona faia foi patu ia, o le agaga lelei ina ia tau taofiofi ma faatonutonu ai le soona saosaoa o taavale afi, aemaise lava pe a tulata i aoga. Ae manatua e le tatou atunuu sa i ai le patu e faapea le tele, na o le tasi le futu ae toeitiiti afa futu le maualuga pe futu foi le maualuga. O lea ou te manatua na o le lua lava vaega sa i ai patu na, na o tai i le alu atu lea o le taavale i totonu o le uafu, ma le patu e tasi sa i Malifa. Ua alu alu na patu, ua tele foi faitioga na aumai, se i silasila i patu ia pe tatau ona faaauau pea. Ae sa i ai lava le lagona e tatau lava ona i ai nai patu. Ona faatonu lea o le Matagaluega o Galuega ma le Minisita foi sa i ai i lenei taimi, e toe vaavaai i le faiga o patu, pe le tatau ona faalautetele patu. O le mea la lenei na tupu, e faatolu ona fai patu, e futu ma le afa le lautele, a ua uma ona faatonu ia gafa le lautele. Ia toe alu toe vaai le patu ua lua futu, a o la e tau atu lava i inisinia ma le Pulega le mea tele. Ia maua loa le patu ua i ai, ua tupu loa ma le faalavelave, ua pipisi le mai patu, ua te i lava ua o atu ua patu ae i, patu ae o, e o o lava i Lufilufi, ua tupu ai ma le isi mai patu o le nofolua o patu, patu i, lua ita toe tu mai le isi patu. O le mea lenei o lea e tupu, ae i ai lava galuega lelei i le agaga lelei sa fai ma le le iloa o le a aafia ai isi tulaga sa le mafaufauina. O lea la ua aumai e le Afioga i le sui usufono le isi aafiaga lea, o le aafia o tatou tagata aemaise taimi e faatopetope atu ai le taavale afi ma alu atu patatu i luga o patu ia. O lona uiga, e o o atu i le falemai ua oti le mai.

E i ai lava la tulaga faapea e tatou te fautuaina, ae i le tulaga lava ia i lona amataga, e lelei le amataga. A o lea ua saunua i aafiaga ia o le tatou atunuu, o lea foi ua toe tilotilo i ai le Kapeneta ona faapea lea ona fetuunai ai le tonu. Lau Afioga i le Fofoga Fetalai, e i ai le upu foi lele, ‘o le uta a le potu e fetalai’, o lona foi la ua toe fetalai ai le faaiuga a le Kapeneta, ina ia matau mai, e i ai agaga lelei e fai ai se faaiuga, ae i ai foi isi agaga lelei ua toe fetuunai ai le faaiuga. Lau Afioga i le Fofoga Fetalai, o le toe faaopoopo atu lona.

FOFOGA FETALAI: Malo. Faafetai saunua faamalamalama i lau Afioga i le Palemia. Tulai mai le sui usufono mamalu e faaiu mai le saunouaga, ou te manatu ua malamalama mea tau patupatu, ae manaia le agai i se isi mataupu fou.

Afioga PESETA VAIFOU TEVAGA: Ia, e faimea faalogo lava foi lenei itumalo i lau Afioga i le Fofoga Fetalai, ae ou te le i alu ese ma le Matagaluega o Galuega, na o sina talosaga lava e pei ona faataatia. Ia aua foi ne i avea lau talosaga ma mea e uma ai lava lenei tausaga e le i faia, talu ai lava nei patupatu. Ia, silasila foi lau Afioga i le Minisita, masalo a e afio atu ma le Matagaluega i totonu o Puapua ma Asaga, talu lava ona faavae le Malo, e leai lava ni auala galue o nai nei nuu. A o le faanoanoaga ia te au, o lea foi ua ou toe vaai atu i le nusipepa o lea ua faasalalau mai ai nusipepa o isi nuu e le i leva ona fai a latou auala galue. O le ala lea e tatalo atu ai i lau Afioga, ia alofagia e manaomia lava se auala galue se i galulue ai si ou nuu o Puapua. Ia e faapena foi lou auala galue i Asaga. E pei o le agaga lona e tau avatu ai i lau Afioga, ae lafo atu pea. O lona e te silafia, na amata lava ona ou tatalo atu i le amataga o lenei Paeaiaga, o lenei lava ou te tatalo atu pea i lau Afioga.

Ona ou oo mai lea i le Afioga i le Minisita o Punaoa Faalenatura ma le Siosiomaga. Ia, aua e te popole lau Afioga i le Minisita, o lea ou te vaai atu ua e tago i lau peni. E leai na o lau faafetai lea e fia avatu i lau Afioga. Faafetai ona o lea ua manatu ua le toe tele sou taimi, ae na o le tatalo atu, ona o taimi ia sa feagai ai si o tatou atunuu ma lologa ia na uma nei lata i le Kerisimasi, na aafia ai le pitonuu o Puapua i le mea tonu lava la e i ai le falesa Mamona ua sau ai le sami i uta. O lona e silasila i ai o lea ua o ese ai le Ekalesia Mamona mai i ina ona o le sami a o la e ua fau le falesa fou i le vaotele. E tatalo atu i lau Afioga, e le i avatua se talosaga i le amataga, talu ai ona o le mea lea faatoa tupu nei. Ia alofagia e lau Afioga i le Minisita, e moomia sina taligalu e tau fesoasoani i lea itu o lou nuu. E pei lava foi ona ou tatalo atu, e o o lava foi i le taligalu o si ou nuu i Asaga, o la e ua manaia le afioaga i Lano ua uma ona fai, ae tatalo atu pe i ou nuu nei e lua.

Ona ou oo mai lea i lau Afioga i le Minisita o Tupe. E momoli atu le faamalo a lenei Itumalo i lau Afioga i le Minisita o Tupe i tausaga foi ua mavae sa ou galue ai ma lagolago ai i lau Afioga aemaise foi o le tatou Matagaluega. Ma o le agaga fiafia ma le agaga faafetai o lea ua matau atu ua lua ma le afa tausaga o ta galulue. Malo le galue, malo le tauatai i lau Afioga. Ma ou te talitonu foi, o oe le isi taitai e toa, e tele lou loto ma e lototele. Masalo ua ala ona tele lou loto ona o lea ua ou galue atu ia te oe. E ui lava ua...

Tofa Levaopolo Talatonu: Lau Afioga i le Fofoga Fetalai, o se mea e fia faamalamalama.

FOFOGA FETALAI: Se malie le sui usufono o lea ua faaiu mai le saunoaga a le sui usufono, Saleaula.

Tofa Levaopolo Talatonu: Na o si fesili lava lea e fia maua ai se malamalama mai le sui usufono o lo o saunoa, pe aisea le mea na tuli ai ia e le toeaina. Pe i ai se mafuaaga na ala ai ona tuli ia e le Minisita o Tupe?

FOFOGA FETALAI: O lea ua maua atu Saleaula. O le a faaiu mai pea le saunoaga a le sui usufono mamalu po o fea lea e agai i ai. Toe lima ou minute le sui usufono mo Faasaleleaga Nu.4.

Afioga PESETA VAIFOU TEVAGA: Se i ou tali atu lava i le mea lea e saunoa i ai Saleaula. Masalo o galo ia Saleaula...

Afioga Hon Palusalue Faapo II: Lau Afioga i le Fofoga Fetalai...

FOFOGA FETALAI: Malie le sui usufono o lo o saunoa se i tuu atu lava le avanoa i le Taitai o le Itu Agai.

Afioga Hon Palusalue Faapo II: Ou te tulai atu lava e faatu le lafo, ona o le matagofie o le saunoaga a le sui usufono, *Ia toe faaopoopo se isi lua minute i luga o le minute lea i le saunoaa a le sui usufono.*
O le lafo lea ma le faaloalo.

Faaluaina e le sui usufono mo Gagaemauga Nu.2 ma le sui usufono mo Aleipata Itupa i Luga.

E le i tuuina atu le maliega autasi a le Maota i le lafo.

FOFOGA FETALAI: Malie se i tuu atu le avanoa i le sui usufono mo Alataua Sisifo.

Afioga Lafaitale Patrick Leiataualesa: Lau Afioga i le Fofoga Fetalai, e leai foi se isi e fia faalavelave i le saunoaga matagofie a le sui usufono, a ua sao lelei le faaiuga lea ua fai, o le aualii ia na leaga ai si toeaina.

FOFOGA FETALAI: Ia, malie e faaiu mai le saunoaga le sui usufono mo Faasaleleaga Nu.4, o lea ua uma lou taimi toe tolu ou minute.

Afioga PESETA VAIFOU TEVAGA: Faafetai. A o le i faauma atua lau lauga, se i ou oo atu lava i le sui usufono mo Gagaemauga Nu.2, leaga e pei o ia lava lea ma le Taitai o le Itu Agai na mafua ai tuuaiga ia. E le o faapea ua leaga le Afioga i le Minisita, e leai o oulua. O lea la o le a ou tali atu i le mea lea na mafua ai.

Afioga Hon Palusalue Faapo II: Lau Afioga i le Fofoga Fetalai, o le mea e fia faasao.

FOFOGA FETALAI: E leai se i uma mai la le mea lea.

Afioga Hon Palusalue Faapo II: Leaga o lea ua tuuaia maua o maua ua mafua ai mea ia. E le o maua, o latou lava ia e 19 na saini i le tusi.

FOFOGA FETALAI: O lea o le a uma. Malie lau Afioga i le Taitai o le Itu Agai. Ia, tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea faatoa uma atu le lafo na faatu e le Taitai o le Itu Agai, e fialia e faafofoga i lau saunoaga. Se i matou faalogologo i le lauga, o lea e fialia i ai le Taitai o le Itu Agai.

FOFOGA FETALAI: Le sui usufono mo Faasaleleaga Nu.4, faaiu mai le saunoaga o lea ua toe lua ou minute. Aua e te toe tali i tuleiga ma saunoaga lea e avatu i le Itu lea, faalupelupe pea lau saunoaga i le lua va nonofo ma le Afioga i le Minisita o Tupe lea ua e see ai, ae faaiu mai le saunoaga ua uma lou taimi.

Afioga PESETA VAIFOU TEVAGA: Faafetai i lau Afioga i le Fofoga Fetalai. Silasila foi, leaga o la e faalogologo lou itumalo, po o le a le mafuaaga ua ou alu ese ai ma le Matagaluega o Tupe. O le mea tonu lava lea ou te tatalo atu ai i lau Afioga i le Fofoga Fetalai, tuu mai se avanoa leaga o la e sailiili lou itumalo po o le a le mea e fai ia te au. E tasi lava le mea lea e manatu i ai lou itumalo ua ou aia tupe a le Malo. A o le mea moni lava, o lea ou te fia tautala i le mea lea.

FOFOGA FETALAI: Lau Afioga i le sui usufono mamalu, o lea ua manino le mata o le vai i le tuleiga. A na e faaoga le avanoa leni e fia mai ai lau saunoaga ua maea.

Afioga PESETA VAIFOU TEVAGA: O le a ou tali atu ia te oe Saleaula, Saleaula, nofo i lalo a ou tautala nofo i lalo. Nofo i lalo o lea ou te tautala. O e malamalama i upufai o le ta itumalo? A tautala loa Peseta Tamaalelagi nofo i lalo Saleaula.

Tofa Levaopolo Talatonu: O le isi mea ou te fia fesili atu ai lau Afioga i le Fofoga Fetalai, pe sa saini i le tusi pe leai? Ia, e te usitai i lau tala e fai atu. Tali mai i lau fesili lea, na e saini i le tusi lea na ave e aveese ai le Minisita o Tupe?

FOFOGA FETALAI: Ou te tatalo atu pea ma le agaga faaaloalo i le tatou Fono. E le faaalua ni manatu faafiatagata ma le faualuga i totonu o le tatou Fono o lea e faasolo. Alaala i lalo le sui usufono mo Faasaleleaga Nu.4. O lea lava e tau lauama tootoo ma faapalepale atu le tatou Fono. Se aua le tu loa i luga pa oso. O le mea lena e maua i le pa ma oso o le matapogia faafuasei. Malilie sui usufono mamalu, le sui usufono mo Faasaleleaga Nu.4, ua ou tatalo atu. E le o ni ai avea o lea ua manino ma malamalama e leai se iota o tupe a le Malo na e gaoia, o lena e malamalama le faafofogaaga a le atunuu.

Faaiu mai lau saunoaga ua uma lou taimi. Aua e te toe atugalua i le saunoaga a Saleaula ma le Taitai o le Itu Agai, aua e uma foi e alu atu, aua o le tou kegi lea e toatolu a outou. Na ona e faaataata i totonu i i, e uma foi e alu atu fai le tou luluga lima i fafo i o.

Tulai maia le sui usufono mo Faasalelega Nu.4 e faaauau lau saunoaga o lea e agiagi malie le lua va nonofo ma le Minisita o Tupe.

Afioga PESETA VAIFOU TEVAGA: Faafetai ua tau sola foi manatu ae sei faauma atu pea lau faafetai i le Minisita sa ou tautua ai. Ou te talitonu e le o nisi lava tulaga na mafua ai ona ou alu ese ma le tatou Matagaluega ona o tulaga foi i le vaavaai mai a le atunuu ma le latou masalomia i lou nofo ai totonu i tauofoga, o lena foi e silafia lelei lava e le atunuu e tolu tausaga e leai lava se galuega e faapea ua ou aveva pe ua ou fausiaina. Leai, o lo o ou tausisi pea i tulafono faavae a le tatou Malo aua o le mea lena lea mafua ai ona ou alu ese ma le tatou Matagaluega ona o tuuaiga lava a le Itu Agai. Silasila la i le mea lea ua tupu, lea ua toe filifili au e le Palemia ma te toalua. Ua vaai la i mea ia na ou fai atu ai? O le a la le tulaga lea ua oo nei i ai? A oo i le taimi e afio ai le Palemia i atunuu i fafo, o ai e tauavea le Malo? E tauave e le sui usufono mo Faasaleleaga Nu.4! O le mea lena ou te tatalo atu ai i le Vaega a le Tautua tou te le toe omai o sao i le Palemia, tou te omai sao ia te au. Lau Afioga i le Fofoga Fetalai, ua uma lau lauga.

Lou itumalo e ma la outou tapuaiga, afai foi o le a sa outou faalogologo ua le tautamalii le talanoa a lo outou tofi, e pei lava ona ou fai atu i aso ua mavae o le Nofoa lea e nofo ai le tou tofi o le nofoa uamea e le o se nofoa laupapa. E fiu lava la nisi e tau aveese e le mafai ona toe aveesea o lea ua ou ola i i le mea lea ou te i ai. Ao le fono usu a Samoa e momoli atu le faamalo i lau Afioga i le Fofoga Fetalai, Palemia ma le Kapeneta, faapea foi le faafofogaaga a le mamalu o le Palemene ae faapea foi le tapuaiga a Samoa ma si ou itumalo pele aemaise Auauna a le Atua. Soifua ma ia manuia le fono.

FOFOGA FETALAI: Ou te manatu e le tau faafuluina le toga lelei, e le tau ailaoa foi le maa tuufala i le fetalaiga momoli i ou itu taulagi e fia le sui usufono mo Faasaleleaga Nu.4. O le mea sili o lea ua logona le Maota i le promotion fou lea ua e i ai. O ou mama na lau Afioga i le Palemia pe a malaga le Palemia i fafo.

O lea ua toe 15 minute ona tatou oo lea i le tatou malologa ao lea ua tulai mai le sui usufono mo Alataua Sisifo ae o le a tuu atu le avanoa i le sui usufono mamalu.

Tulai mai le sui usufono mo Alataua Sisifo.

Afioga LAFATELE PATRICK LEAIATAUALES: Lau Afioga i le Fofoga Fetalai faapea foi le maualuga o le Maota i lena taeao, ou te tulai atu ma le agaga faaaloalo e folasia se lagona o lena itumalo e tusa ai ma le faasoaga o le tamaoaiga o le atunuu. Ae lei agai se matou tala i le Tala o le Tupe, ou te faatalofa atu i le tapuaiga a le tatou atunuu i ona tulaga faalupe, Aiga o Nofo, Aiga o Papa, Aiga o Tupu ma Aiga na Tafai faapea foi lau faafaleupoluga i le Usoga ia Tumua ma Pule ma le paia maualuga i le tapuaiga a Samoa.

E le faagaloina foi i lenei taeao tatou uso i Sasae i le Faigamalo a Tutuila ma Manua i le afio o le Kovana Sili ma le Lutena Kovana lau Afioga i le Fofoga Fetalai ma le Maota o Sui. Faatalofa atu foi i si au faapeleple le Afioga i le Peresetene o le Senate faapea foi le tapuaiga a le Motu o Tutuila ma Manua ona faapea lea o se matou tala o paia sauoo ma paia sautuafafafa o le itumalo lenei e ao lava ona matou oo i ai. E amata mai Falelima seia paia Tufutafoe i le paia maualuga aua le Nofo a Faalupea ma Aiga i lau fetalaiga Folasa ma lena Itu o le Alataua, si ou nuu o Tutufatoe i le afio o le Tama a le Malo ma le Usoalii, lau fetalaiga Momomemausu ma le lena itu o le itumalo, malo le tapuai. E faapito augata foi se matou tala i lenei taeao i le paia maualuga i si ou nuu pele o Neiafu, lau Susuga i le matua Tauiliili faapea foi le Aiga na mua i malae le Aiga Samooleoi, laua Ioga Tapaau le fano, Taatiti ma Tuaiaufai ae a le maualuga o le aufaigaluega tofofi a le tatou itumalo o lo o lagi faalupea aua se manuia o le itumalo. Ona faapea lea o se matou tala i lenei taeao o paia na o le itumalo e amata mai Siuosave seia paia Faatoatoa e nuunuu faatini o tausaga ia oulua fetalai Taatiti ma Tuaiaufai e taoto ai measina i le malae o Falemoa.

Ae lei agai se matou tala i le Tala o le Tupe e pei ona taoto i Lumamea, e ao ona momoli se matou faafetai i lau Afioga i le Fofoga Fetalai i le taeao lenei o le agaga lena o le itumalo lenei sei tau momoli se matou faafetai i lau Afioga i le Palemia faapea lau Afioga i le Minisita mo Galuega, Felauaiga ma Atinae Eseese, e tusa ai ma le faaaloalo e pei ona i ai le nuu lenei. Lau Afioga i le Fofoga Fetalai faapea le tapuaiga a Samoa, o le 2013 lenei o tausaga lea faatoa taumamafa le itumalo lenei i se suavai taumafa. O le ala lea o lou manatu i le taeao lenei e tusa ai ma le finagalo o le itumalo e le galo le faaaloalo lenei. Lau Afioga i le Palemia faapea le Minisita mo Galuega, Felauaiga ma Atinae Eseese, ua taoto mai i tia sa toa o le itumalo lenei na omai e fai le vai. Ou te le fai atu, pau lava o lou taimi e faamanuia i ai le Atua ao le taeao lenei i le faafofoga a lou itumalo, a lea ua ou momoli le tatou faafetai i le Afioga i le Palemia faapea foi le Minisita mo Galuega.

Lau Afioga i le Faatonusili o le Pulega o le Suavai, masalo e tele matou tala sa fai atu i le taimi ua sola ma le fatia ua alu. Mafua i se a? Ona o le faanaunauga o le loto ia feinu le itumalo lenei. O le a la sau faafofoga i le taimi ua sola ma le fatia ua alu, leaga o le lauga a le itumalo lenei e le susu e tuusasao lava matou upu. Lau Afioga i le Fofoga Fetalai ma le mamalu o le Maota ou te faamalulu atu, lau Afioga i le Faatonusili faapea foi le Afioga i le Minisita mo Galuega o le uiga lava lena o le sui usufono mo Alataua Sisifo. A i ai lava se mea e faaletonu e le mafai ona tuua e lafo atu i lumamea e fai i ai la outou fua ae leai se lagona o le Nofoa lenei e sii se ta i le tatou va fealoai.

Afioga Hon Leaupepe Toleafoa Apulu Faafisi (Aana Alofi Nu.1): Lau Afioga i le Fofoga Fetalai.....

FOFOGA FETALAI: Malie le sui usufono o saunoa sei tuu atu le avanoa i le faauilavea a se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Tulai mai le sui usufono.

Afioga Hon Leaupepe Toleafoa Apulu Faafisi: Ua ou tulai atu ma le agaga faaaloalo e le fia faauilavea i le suanoga a le sui usufono o lo o agiagi malie fisaga i le saunoaga a le sui usufono i galuega lelei ua faatino e le Malo. Ae pau lava le mea ou te tulai atu ai ona o lo o atagia pea i le Maota Fono lenei saunoaga ma fetalaiga e pei e foliga e taia gofie ai le faalogo ma e pao papa foi i le faafofoga mai a le Atunuu. Pe le mafai ona sui le upu lea susu i le upu foi lea faainuinu, pei e mamalu le upu lena. Aua le toe taua le upu lea susu ae tau le upu lea faainuinu ona mamalu lea i le tapuaiga a Samoa o lo o faafofoga mai.

FOFOGA FETALAI: Sei tulai mai le sui usufono mamalu mo Alataua Sisifo e faaauau le saunoaga.

Afioga LAFATELE PATRICK LEIATAUALES: Lau Afioga i le Fofoga Fetalai afai o le finagalo lea o se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi o le agaga o lea e tau faamatala atu ai lagona ma tulaga na i ai felafolafoaiga i le taimi ua sola. Ae a faapea o lou finagalo lea, e leai lava se leaga o lau tala, o upu faatoeaina ao le taeao lenei.....

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie le sui usufono mo Alataua Sisifo mo le faasaoina o lou taimi sei tuu atu le avanoa i le Taitai o le Itu Agai.
Tulai mai le Taitai o le Itu Agai.

Afioga Hon Palusalua Faapo II: O matou nei e leiloa lea mea o le lauga susu. Pe mafai ona faapupula mai e le sui usufono mamalu le uiga o lea upu lauga susu? E le malamalama ai matou ma le faaaloalo lava.

FOFOGA FETALAI: Tulai mai le sui usufono e faaauau le saunoaga.

Afioga LAFATELE PATRICK LEIATAUALES: Afai e te le malamalama ona e tapuai lelei laia ae soia e te faalavelave o lea e see le sa o le Alataua.

Lau Afioga i le Fofoga Fetalai faapea le maualuga o lenei taeao o lena ua ou fai atu. Ia tapui atutafa ia leaga e fai sina siisii o matou tala i le taimi ua sola. Ao le agaga ma le faamoemoe o le manatu i le tapuaiga a le itumalo. Lau Afioga i le Palemia matou te o lava i le palapala e le galo le faaaloalo lea. E leai foi se agaga e faatauta pe sii se ta i e sa nofoia le Nofoa lea. Ae pau lava lea o le mea na ou sau ai o le suega o se matou vai. Ao le taeao lenei lea ua faafofoga mai le itumalo, le sui usufono mo Alataua Sisifo matua fai sau faafetai leaga o oe le isi tagata e upu upu tetele. Lau Afioga i le Minisita mo Galuega o lena ua ou faapena atu, faafetai le faaaloalo, faafetai le faaeaea ma e uma lava le Paeaiga lenei ou te le toe tagi lava i se isi mea. O matou foi e le o se itumalo e tagisa, pau lava lea o le mea sa faanaunau i ai le loto ia maua se matou vai taumafa. Lau Afioga i le Pule Sili o le Pulega o le Suavai, lena ua ou fai atu e leai se agaga e sii se ta pe faatautee i le tou galuega lelei e lagolagosua aua le Malo ae le mafai ona tuua o matou tiute ma faiva na valaau ai matou e matou itumalo e matou te omai i le Palemene.

Lau Afioga i le Fofoga Fetalai, o lena ua ou faapena atu, lau Afioga i le Palemia ma le Minisita mo Galuega, Felauaiga ma Atinae Eseeese, lau Afioga i le Pule o le Pulega o Suavai ma le maualuga o le Matagaluega, tofa i le Atua, o le a se pati ua sala po o se gagana ua le tautamaliia i le taimi ua sola ma fatia ua alu, leaga e faapena le auauna e tauanau i mea lelei aua le manuia o le itumalo. Ua ou faalogologo atu ma le totoa i le aso ananafi ma le aso ua alu, o le toatele ia o sui usufono sa faitio i latou vai, ao le vai lea na maua e le itumalo lenei, se ou te le tau fai atu. Sei oo i le vaiaso lea ona ou sau lea ma ki mai se faguvai oka, oka le manino ou te leiloa po o le a le mea na ala ai ona tuai ona fai. Ae faafetai i le Minisita mo Galuega se ua ola le nuu lenei. E leai foi se agaga e faatauagavale i e sa nofoia le Nofoa o le Minisita mo Galuega.....

FOFOGA FETALAI: Malie le sui usufono mo Alataua Sisifo o lo o saunoa sei tuu atu le avanoa i le sui usufono mo Siumu.

Tulai mai le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai, manaia le saunoaga a le sui usufono ae sili pe ana tau ia o Mose lea na taina le papa lea ua sua ai le vai o lona itumalo.

FOFOGA FETALAI: Tulai mai le sui usufono mamalu e faaaau le saunoaga.

Afioga LAFATELE PATRICK LEIATAUALES: Afai o le finagalo lea o le sui usufono o le a le mea e tuu ai leaga ana ou le sau lava e le feinu le itumalo lenei. E le sese le tala lea. Ona faapea lea o se matou tala, o le atoaga lena o le matou faafetai. Lau Afioga i le Palemia malo le fai o le faiva, ou te iloa nao au lava e te fiafia i ai leaga o au e tuusasao lava upu ao isi sui usufono uma ia....lea na saunoa nei le Minisita Lagolago o Tupe faatoa lelei lava lea o se Tala o le Tupe ina ua o ese sui usufono ia.

FOFOGA FETALAI: Malie le sui usufono o saunoa sei tuu atu le avanoa i le sui usufono mo Faasaleleaga Nu.4.

Tulai mai le sui usufono mo Faasaleleaga Nu.4.

Afioga Peseta Vaifou Tevaga: Lau Afioga i le Fofoga Fetalai e moni ai le upu foi lea a le atunuu, e fei i lava manu laiti uma ae o manu matutua e manaia i le faalogologo. O le a faapefea ona fai mai ana le alu ese e le lelei le Tala o le Tupe, o malamalama o le Tala o le Tupe mulimuli lea a le sui usufono mo Faasaleleaga Nu.4 ae lei alu ese. Se leaga o lea e faalogologo lou itumalo o le mea lea leaga ua i ai le mea ua misi ae onosai mai lava le sui usufono mo Alataua Sisifo.

FOFOGA FETALAI: Malie le sui usufono mo Faasaleleaga Nu.4 ua maea lou taimi e te le lauga faalua.

Afioga Peseta Vaifou Tevaga: Ou te faamalulu atu, o le faafetai lea e fia avatu.

FOFOGA FETALAI: O lea ua uma lou taimi. E le mafai la ona toe fai se faafetai ua uma lou taimi.

Afioga Peseta Vaifou Tevaga: Lau Afioga i le Minisita o Tupe ua matua lagolagoina e lenei itumalo le Tala o le Tupe i lenei taeao.

FOFOGA FETALAI: O lea ua maua. Tulai mai le sui usufono mo Alataua Sisifo e faaauau le saunoaga.

Afioga LAFATELE PATRICK LEIATAUALESIA: Lau Afioga i le Fofoga Fetalai, o le tulaga tonu lava lea o le sui usufono lea, ave i lalo o le Palemia sei tau faatonutonu laitiiti. E leai se agaga e faatauagavale i le sui usufono ao lea ua sao lelei lava. O le isi mea mo le silafia e lau Afioga i le Fofoga Fetalai, lea sa saunoa nei le sui usufono, o le sui usufono foi e faipisinisi, a outou mananao e fai tou pisinisi ona tou o lea e fai tou pisinisi ae aua tou te omai i le polokiki. Tuu le polokiki e agai mai i ai matou.

FOFOGA FETALAI: Ia ou te vaeluaina le saunoaga a le sui usufono mamalu, o lea ua ta le taimi, sei maea mai le tatou malologa ia ona faaauau lea o la oulua fesuaaiga ma le sui usufono.

Ou te faasilasila atu ua tatou taunuu i le tatou taimi malolo, o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa Faitulafono i le itula e 10.45 i le taeao mo lana malologa masani.

Na toe faaauau Taulumaga a le Fono Aoa Faitulafono i le itula e 11.20 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

E i ai le talitonuga ua palegaaau le taliga o le sua ma matu i fau, e talitonu foi ua vaai atu ua faafoisia lo outou malosai mai le taeao analeila, o lea ua maua ua maua lo tatou faamalositino i lenei vaega o le aso.

E momoli atu le faafetai tele i le tatou Maota Fono ona o le faamoemoe o le tauavagameaina o le tatou galuega. Malo tauatai, malo le onosai i le vaega o le aso.

Ae lei toe tuu atu le avanoa, e faia le tatou malologa o saunoa le sui usufono mo Alataua, ae lei toe tuu atu le avanoa e tuuina atu i lau Afioga i le Palemia mo le tatou lafo. Tulai mai lau Afioga i le Palemia.

LAFO MO LE SUIA O ITULA O FONOTAGA

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo o le agaga lava ina ia taumafai e tulituli le tatou Tala o

le Tupe, ina ia vave pasia ae tatau ona aua nei i ai se toa i a tatou galuega o lo o fai, o lea e faatu ai le lafo mo le suiga o a tatou taimi o Fonotaga, *Ina ia faataatia ese Tulafono Tumau 31(1), ina ia avanoa ai le suia o a tatou itula Fono e amata mai le 9:00 i le 1:00 pei ona i ai nei, 3:00 i le 7:00 ona malolo ai lea toe amata i le 8:00 i le 11:00 nanei.* O le lafo lea ma le agaga faaaloalo.

Faaluaina e le Sui Palemia, Afioga i le Minisita o Tupe ma le sui usufono mo Faasaleleaga Nu.4.

Na faamaonia le lafo ma tulai ai Itula o Fonotaga ua suia.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014.

FOFOGA FETALAI: Ia, e manatu o lea ua logona le Maota e uiga i le tatou lafo faatu, ma e talitonu o le agaga uma foi na o le taumafai atu o le Nofoa ina ia limataitaiina le tatou Fono e tusa ai ma a tatou galuega faatino ma le faataua o le tatou taimi. O lea e tatalo atu ai pea ma le agaga faaaloalo i lo tatou Maota, ia e le tau aoaia e Laupua Tamafaiga, o le taimi foi ua sola ma le taeao nei, o le agaga ma le faamoemoe e tau tata lava i le moa o le ala ona o le manumanu i lo tatou taimi e taua tele. E fai foi o lena a o lenei, ia a o le taumafai atu foi o finagalo ma faamoemoe o sui usufono mamalu, ia finagalo malie foi le Malo i lea itu, ona o le talitonuga o manatu sa fauao faupo mai lea taimi lea taimi e taua tele le faaali atu. Ae finagalo malie foi i le tali atu a le Malo, e le mafai ona malamalama se mataupu pe a faapea e puupuu se faapulapulaga.

Ae talitonu le paia maualuga o le tatou Malo, o lo o lava lo outou taimi i le taimi e tali atu ai le Malo i taimi o Minisita, ae tausi pea le avanoa i Afioga i sui usufono, ae sei molimolitai finagalo o manatu ma lagona ma timaiga, ona faapena ai lea ona faasolo le tatou galuega.

E faia le tatou malologa o saunoa le sui usufono mo Alataua Sisifo, ia le Alataua o lea ua maua le avanoa e faamuta mai ai le saunoaga i lenei vaega o le aso, tulai mai le sui usufono.

Afioga LAFATELE PATRICK LEIATAUALESIA: Faafetai i lau Afioga i le Fofoga Fetalai, masalo sa maua foi se faasiliga malosi i lau Afioga foi i le Taitai o le atunuu faapea foi le paia maualuga o lenei Maota. O le atoaga lena o le matou faafetai, pei lava ona ou fai atu i le taimi ua sola ma futia ua alu, matou te o lava i le tuugamau ma le faaaloalo lea a le Malo. Ua uma foi ona ou faamalulu atu i lau Afioga i le Palemia faapea foi le Afioga i le Minisita mo Galuega, Felauaiga ma Atinae Eseeese ma le Ofisa Sili o le Pulega o le Suavai, e tusa ai foi ma a tatou felafolafoaiga i le taimi ua sola. O le agaga ma le faamoemoe sa faanaunau ai le loto, ina ia faasopolia le auaunaga o le tatou suavai ona e taua o le vai o lo o taoto ai ma le ola o le tagata.

Lo tatou itumalo, o lea ua outou faalogologo mai i le taeao lenei ua ave foi so tatou sao ma se faafetai i le Afioga i le Palemia faapea le Minisita ma le Pulega o le Suavai, e tusa ai foi ma tulaga na i ai a tatou felafolafoaiga i le taimi ua sola.

Ae lei agai sa matou tala i le Tala Autu o le Tupe, ia e momoli foi le faafetai i lau Afioga i le Palemia faapea foi le Afioga i le Minisita mo Tina ma Tamaitai, Atinae o Nuu ma Afioga ma Agafesootai, aua lava le taitaiina o le tatou faamoemoe e pei ona i ai le Sisigafua a lo tatou atunuu. Sa sologa lelei e ui foi ina le mafuta ona o nisi o fuafuaga faale-aiga ae sa maua mai lava, aua o au sa ou alu ou te taalo poka i Vegas_masalo o la e silafia lelei e le Afioga i le Palemia, o le ala lena o le malaga sei tau faaoga ua tele le tupe ua le iloa po o le a le mea o le a faaoga i ai.

A o lenei taeao o le a agai loa sa matou tala i le faamoemoe o le taeao lenei. O le Tala o le Tupe i lau maitau atu, e le tele foi sa matou faamatalaga, pei ona ou fai atu, o le itumalo lenei e le finau vale, ma e le ao lapisi le lauga a le itumalo lenei, e le tagisa foi le itumalo lenei. Mo le silafia e lau Afioga i le Fofoga Fetalai, na o ni nai fautuaga laiti lava e fia taoto atu po o fea e taoto i ai le tofa faatupu ma le tofa uta faa-Faleupolu a le tatou Faigamalo, a o lea ua ou fai atu, ua lava ma totoe le galuega lenei. O lou iloa i le tilotilo i le Tala o le Tupe lenei, o le Tala o le Tupe e masani ai a tatou felafolafoaiga, pe ititi pe tele, a o le faasoia e faasoia paleni lava, o le faasoia e tau utiuti ae taumafai lava lo tatou Malo e faasoasia i itumalo taitasi. O lenei la Tala o le Tupe pei lava ona ou fai atu, faatoa lelei lava lea o se Tala o le Tupe a le atunuu ina ua o ese le aufaipisinisi ia sa i ai, ma o le....

Afioga Peseta Vaifou Tevaga: Lau Afioga i le Fofoga Fetalai....

FOFOGA FETALAI: Malie le sui usufono o lo o saunoa, sei tulai mai le faaulavea a le sui usufono mo Faasaleleaga Nu.4.

Afioga Peseta Vaifou Tevaga: E le mafai ona tuuloa le sui usufono ae lei avatu se faamatalaga i le mea lea. Silasila foi lau Afioga i le Fofoga Fetalai, i totonu o le tatou Maota o lea ua potopoto mai ma afifio mai ia nisi sa avea ma alii loia o le tatou atunuu ma e foi sa faamasino, e faapea foi i le mamalu o le aufaipisinisi lea ua ulufale mai totonu o le Maota lenei, ma o i tonu lava o lea ua manaia ai ma matagofie le faatinoia ia le taitaiga o le Malo lenei, e mafua mai i a? e mafua mai i businessman, tagata faipisinisi e lelei le mafaufau, tilotilo i le Tala o le Tupe, o lea ua...le Tala o le Tupe i le lelei o....

FOFOGA FETALAI: Ia malie le sui usufono o lo o saunoa, malie le sui usufono mo Alataua Sisifo sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o a tatou felafolafoaiga lava o lo o fai lava i suaga faatamalii, ae o le tapenaga o le Tala o le Tupe, e amata ona alu le valaau a le Faauluuluga a le Matagaluega i le masina o Aperila, o nisi foi taimi e ave ai i le faaiuga o Mati, e valaau uma ai lava Faauluuluga o Matagaluega uma kopi mai foi ia te au ma Minisita e amata tapena a latou Tala o le Tupe ma avatu ai i o i le Faauluuluga o le Matagaluega o le Tupe ma a latou Ofisa Sinia. A maea loa ona faatalatalanoa loa lea o le Matagaluega o Tupe ma e foi e lagolago i ai i le Tala o le Tupe faapea foi ma Faauluuluga o Matagaluega ma Faalapotopotoga o lea e moomia le fesoasoani. O le mea lava la e masani e sau talosaga uma e sau mai luga e piliona ia po o le oo lava i le 2piliona, ae galulue le Matagaluega o le Tupe

ma faatulaga le mea e oo i ai le gafatia, ia ona amata loa lea ona faatalanoa i mea e mafai ona fai i le taimi nei, e pei lava foi ona ou laulauina atu i le aso ananafi. A uma loa lenei, ua amata ona faataoto mai le tulaga o le tupe pei foi ona faatalanoaina ma ua iloa ai, o mea ia e ao ona ave i ai le faamuamua, ia ona faatalanoa loa lea o le Faauluuluga o le Matagaluega le Minisita o Tupe e tau mai ai o mea ia e mafai o mea ia e le mafai, ia ona see mai loa lea o le mataupu i luma o le Kapeneta ona fola ai lea i luma o le Kapeneta ona fola ai lea i luma o le Kapeneta ia fuafuaga e i ai foi ma tuualalo a le Kapeneta e faapea ma faapea, ia ona faamuta loa lea iina ua uma e oo lava i le lauga o le a aumai i totonu o le Maota Fono. Ua ala ona ou taua ia mea, ina ia maioio lelei ona o lea e faafogafoga mai le atunuu i le faagasologa o mea nei ma faatino latou o le aufaigaluega a le Malo, o tagata na aoaoina i Iunivesite ma ua malamalama loloto le latou tapenaga i le itu tau tupe ma vaega uma o le tamaoiaiga, ia ona sau ai lea i luga, e i ai foi le vaega a le Kapeneta ia i le vaai lea lautele i le atunuu i le tulaga faa-Upufai o Malo, ma o iina la e faamaea ai loa ma faatino ia le galuega tele e aumai i totonu o le Maota nei. Ua ala ona ou avatua ia mea ina ia malamalama lelei ai aua e le na o tatou lea e talanoa o lea e alu i tua ia mataupu faapenei ina ia malamalama ai, leai o a tatou lava fetogiaiga e fai iinei, o nai mea foi lele e faatupu ai le naunau i le galuega ia ma faatea ai le matamoe ona o taimi faapenei a taapo lava le isi anapo, ia e faapenei ua amata ona tulemoe.

Lau Afioga i le Fofoga Fetalai ona o nai mea faapea e faamalulu atu ai foi aua le faafogafoga mai a sui usufono, ia malo le onosai, o mea lava faapea e fai lava a tatou galuega ma talitalie, nai lo le fai ma faauu e vave ai ona pe le fatu o le isi. Ia manuia le tatou Fono.

FOFOGA FETALAI: Malo faafetai, e manatu ua malamalama le folasaga a le Afioga i le Palemia. Ia sei tulai mai le sui usufono mo le Vaa o Fonoti.

Afioga Tialavea Fea Tionisio Seigafolava (Vaa o Fonoti): Lau Afioga i le Fofoga Fetalai, e talitonu sa ou nofonono lava e tuu pea le saunoaga a le sui usufono mo Alataua Sisifo e saunoa, o le faatolu lea ona tau e le sui usufono mo Alataua maua, o totonu foi o le Palemene e le soona siia ai se isi, e iloa le vaivai o le tagata i ona manatu ma ana saunoaga, ma ona uiga, pau lenei lau Afioga i le Fofoga Fetalai.

FOFOGA FETALAI: Faafetai o lea ua taunuu mai le finagalo le Vaa o Fonoti, sei tuu atu le avanoa i le sui usufono mamalu, Saleaula.

Tofa Levaopolo Talatonu: Lau Afioga i le Fofoga Fetalai, leai faafetai sa faalogologo atu lava ma le totoai i le saunoaga a le Afioga i le sui usufono mamalu e faapea foi a la felafolafoaiga. Leai na o se tuualalo foi a lenei itu, ia fai malu o outou faiva, o le faatuatuga uma a le atunuu ma lenei itu, o lea e tuu atu i lenei itu o lo o tu i le foe o le tatou Malo, a faapea o le faiga lenei lo outou femisamisai faapena, ia o le a le tatou mea o le a maua? Ma o lea ua atagia ai i le faaletonu tele lava lenei e tupu i totonu, se faamolemole sei fofo a outou mea ona outou omai lea.

FOFOGA FETALAI: O lea ua maua le faatofalaiga Saleaula.

Afioga LAFATELE PATRICK LEIATAUALES: Lau Afioga i le Fofoga Fetalai, e leai se mea e te faalavelave ai fua Saleaula, se tapuai mai o lea e....

FOFOGA FETALAI: Le sui usufono mo Alataua Sisifo sei faasaoina lou taimi, sei tuu atu le avanoa i se tasi o sui usufono mo le Palota Taitoatasi, Afioga Mauaiva Pat Ah Him.

Afioga Mauaiva Pat Ah Him: Faafetai i lau Afioga i le Fofoga Fetalai. O lea ua tulai atu ma le faaaloalo lava ona o le sui usufono o lo o saunoa. E le tetena foi i lou loto le saunoaga a le sui usufono o lo o matagofie, ae o le faalavelave, o lo o faafogafoga mai le atunuu aemaise foi i latou o fitoitonu i agluega o lo o taua e le sui usufono. Ma o ni lafoga foi... pei ona taua le aufaipisinisi. I le taimi foi ua sola sa taua ai le aufaipisinisi e tatau ona tuu le pisinisi ae tuu le polokiki ia latou. E pei o ni lafoga ia ua lagona ai le tau tilotilo ai pe ua tau le manaia. A o le agaga moni lava, faamolemole tatou galulue faatasi. E aoga foi le tatou nutimea faatasi e maua ai le femalamalamaai ma le matagofie ma tuputupuae ai pea le tamaoaiga i si o tatou atunuu. Ma lou faaaloalo lava. Faafetai.

FOFOGA FETALAI: Malo faafetai. Ou te manatu ua malamalama, malie lava le sui usufono mo Alataua Sisifo se i fai atu le tala lea a le Fofoga Fetalai. Ou te manatu o lea ua fautua atu le Palemia, ua avatu foi le faamalamalama ona o le tuleiga ma le saunoaga lea sa saunoa i ai le sui usufono mamalu. E talitonu le faamoemoe ua sagatonu le faamoemoe o le fautua atu. Alataua, e le tau aoaia e Laupua Tamafaiga i le tuleiga ma le saunoaga. O le mea lea e popole ai le Fofoga Fetalai, o le corner lea a oulua ma le sui usufono mo Gagaifomauga Nu.1, o lo o fai lava si siisii mai i nisi taimi. Tasi, lua, tolu. O nofoa ia e tolu e tatau ona avatu pea i ai le fautuaga ma le tuualalo a le Nofoa, ia fafai malu le faiva, e tetele tafega ae selefutia ai Vaisigano. Atonu foi e agatonu le saunoaga i nisi o sui usufono mamalu ae afatia ai le lautele o le tatou Maota nei.

O le mea lea e fautua atu ai le Alataua, tefa le tauala ma le faautautaga i le taimi o totoe o le lauga, agai mai e faaiu mai. Aua le toe agai i tulaga na taua o lea foi ua tulai mai le Vaa o Fonoti ma faaali mai le atugaluga. O le manumanuga lena o le tatou va fetausiai, ae tulai maia e saunoa faauma, o lea ua uma lou taimi.

Afioga LAFATELE PATRICK LEIATAUALES: Faafetai lava i le saunoaga a lau Afioga i le Fofoga Fetalai. A lea ua saunoa malamalama le Afioga i le Palemia, e leai lava ma ni agavaa tau tupe i tagata nei. O lea e i ai lava tagata e fitoitonu i ai le mea, a o le siiga o le tusi lea i luga, se o tala faatoeaina.

Afioga Peseta Vaifou Tevaga: Lau Afioga i le Fofoga Fetalai, ou te le malamalama i le sui usufono mamalu, e ala ona umia e le tagata le mea o le pisinisi, e lelei le numera lelei le mafaufau.

Afioga LAFATELE PATRICK LEIATAUALES: Ia o la e fai tou pisinisi ae aua tou te omai i le polokiki.

Afioga Peseta Vaifou Tevaga: A e silasila i le Tala o le Tupe, o lea ua uma ona saunoa le Afioga i le Palemia i le mafaufau lea na tapenaina le mea lea, o lea la ua pasia le Tala o le Tupe.

FOFOGA FETALAI: Malie lava le sui usufono mamalu se i tau lauama tootoo le tatou Fono, o lea ua uma ona faapulapula. Le sui usufono mo Alataua Sisifo, aua ne i toe agai i tulaga e lamatia ai lo tatou va nonofo, agai sao i le tatou Tala o le Tupe, o lea ua manino ma malamalama tulaga o le atugaluga, ae tatou faagasolo le tatou Fono.

Afioga LAFATELE PATRICK LEIATAUALES: Lau Afioga i le Fofoga Fetalai, o la e faafogafoga mai le atunuu, e sao lelei lava le saunoaga a le Palemia, o la e i ai lava tagata e nafa ma mea ia. A o lau faatusatusaga o le mea lea, o le ala lena sa fai atu ai a matou tala. Ae leai se agaga e faapea e faatauaagavale pe loto eleelea se isi i ia foi uso. Ae tasi lenei filifiliga ua matua fiafia lava i ai le atunuu, o le aveese o oulua, because its a conflict of interest. O e fai a oulua pisinisi.

Afioga Peseta Vaifou Tevaga: Lau Afioga i le Fofoga Fetalai, leaga e le manuia upu ia. Silasila foi lau Afioga i le Fofoga Fetalai, silasila i le filifiliga sili ona taua ua faia e le tatou Malo? Na tofia maua ma te lagolagosua i le Afioga i le Minisita o Tupe, ae tou silasila i le valaaulia a le Atua, o lea foi ua toe musumusaina e le Atua le Afioga i le Palemia e avatu le tofi o Faasaleleaga Nu.4 la te toalua. Na o tofi maualuluga lava ia e aumai ia Faasaleleaga Nu.4.

FOFOGA FETALAI: Ou t manatu ua malamalama le mataupu.

Afioga Hon Palusalua Faapo II: Lau Afioga i le Fofoga Fetalai, na o se mea e fia faamalamalama ma fesoasoani atu i lau galuega.

FOFOGA FETALAI: E leai se mea e fia faamalamalama lau Afioga i le Taitai o le Itu Agai, o lea ua malamalama. Ua atili ai ona le malamalama pe a ou tuu atua nei le avanoa i lau Afioga. Ia malilie sui usufono o le fuilauvi lava ia a Salafai, e faapea lava mea a le aualii ia.

Afioga Hon Palusalua Faapo II: Ae le o le ata lea o le tulaga ua i ai le vaega le la?

FOFOGA FETALAI: Le sui usufono mo Alataua Sisifo, tulai mai le sui usufono e faaiu mai le saunoaga leaga o lea ua taatia i lagatonu le faamoemoe. Tulai maia se tasi o sui usufono mo Aana Alofi Nu.1, Afioga Hon Toleafoa Apulu Faafisi.

Afioga Hon Toleafoa Apulu Faafisi: Lau Afioga i le Fofoga Fetalai, e pule tutasi lau Afioga i le Fofoga Fetalai, ae ua ou tulai atu e momoli atu le faafetai i lau Afioga ona o le faamalamalamaina o le mataupu lea. Faafetai foi i le Palemia o lea ua manino le faafofogaaga a le Palemene aemaise o le faafofoga mai a Samoa. E pei o itu aupito sili na e popoe i ai le taofi. E le

afaina le Palemene, aua o lea e silafia e sui usufono mamalu uma o le Palemene le faagasologa o le faatinoina o le Tala o le Tupe, ma i latou o e galulue e faatino. Ae ua ou tulai atu ona o le popolega i limataitaiina le faafofoga a le atunuu, ona e foliga mai e faataaloga i vai a tatou saunoaga ma fetalaiga ae taitasese ai le faafofoga a le atunuu i faapea mai, ai o nai uso ia, ma taua le aufaipisinisi, ai o latou ia o lo o fausia le Tala o le Tupe. Ae o lo o i ai lava e atamamai ua uma ona aoaoina latou te faia le Tala o le Tupe, fautua i le Minisita, avatu i le Kapeneta, i le taimi lena ua uma foi ona feiloai ma Faauluuluga o Matagaluega ma Faalapotopotoga. Ne i limataitaiina sese le faafofoga tapuai mai a Samoa. E pei o itu ia, ae aua ne i tatou fetuiai faa-auia o apoa ma faataaloga i vai tatou saunoaga ma fetalaiga ae paia ai le faafofoga a Samoa i le latou tapuaiga. Faafetai.

FOFOGA FETALAI: Malo. Se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo ai ua galo i le Maota leni uluai saunoaga a le sui usufono. Na amata lava i lana faapea mai, o au nei sa ou i Las Vegas, sa ou alu ou te poka ai. Ia, e iloa lelei e le Palemia, ou te le iloa sa alu i ai le sui usufono. O ana ia foi saunoaga faateteine mai le Maota e tau mai ai le isi mea e le malamalama ai nisi, ae ia outou iloa lelei, o le tagata e alu e poka ae sau gau, e faapea lava lana gagana. O lona uiga la, sa ou faapea le sui usufono mo Faasaleleaga Nu.4, ona le amanaia lea, e faapea lava gagana a le tagata sa alu e poka ae gau, ona sau loa lea faapea. O le ala lena na ou faapena atu ai, ia malie ia le sui usufono o lo o saunoa nei, o lea ua iloa e tagata sa e gau. O le mea e tatau ona e faia, e tatau ona fai lafo o tama ia. Lau Afioga i le Fofoga Fetalai o lau toe faaopoopo atu lena, ae faauma maia lau saunoaga o lena ua manaia.

FOFOGA FETALAI: Malo. Ia, le sui usufono mo Alataua Sisifo, o lea ua fautua atu le Nofoa, o lea o le a aliali ai ma le gau o le sui usufono mo Faasaleleaga Nu.4 talu lou mateletele i leni aso. Faauma mai lau saunoaga o lea ua maea le tatou taimi.

Afioga LAFATELE PATRICK LEIATAUALES: Lau Afioga i le Fofoga Fetalai, e le toe agai foi se matou lauga i ia vaega. O le agaga moni lava ia, e faamalulu atu i se tasi o sui usufono mo Aana Alofi Nu.1, Afioga Hon Toleafoa Apulu Faafisi. O lea sa manino lava o le faatusatusaga o le Tala o le Tupe ia i laua ona sa galulue ai foi i lea Matagaluega. Afai ua le tau tamalii i la outou faafofoga, e faamalulu atu. E pei foi ona malie i le saunoaga a le Palemia, se o mea o upu faatoeaina. A o leni aso, faafetai i lau Afioga i le Fofoga Fetalai. E pei lava ona ou fai atu i le taimi ua sola, e le toe tagisa le itumalo leni, oka, oka se faaaloalo e pei ona i ai nei, e pei foi ona i ai le suavai taumafa o le itumalo leni. Na o le tolu lava pe fa nai au mataupu ia ona uma lea o le matou lauga.

Ou te fia agai atu i le Minisita mo le Soifua Maloloina, faamolemole o lea foi sa taua i saunoaga a sui usufono ni fomai faapitoa latou te tilotilo i gasegase, aemaise lava mai foi nei tigaina. E i ai si au mai sa taoto i le falemai i Motootua mai le nuu lea o Saleapaga i Lepa. E maliu nei lava le teine, o le tina e laitiiti masalo na o le 30 tausaga. E maliu si tiene ma lana

pepe i le manava se i tulou le faafofoga a le atunuu, e le i o o mai lava se tala a le fomai po o le a lea mai. Ae sa matou talosaga i ai, pe leai se avanoa e ave ai i Niu Sila e pei o le faataua a le tatou atunuu ma atunuu uma lava o le lalolagi, e faataua lo tatou soifua. A faapea e le gafatia e fomai i inei, tatou saili fofo i isi atunuu.

FOFOGA FETALAI: Malie le sui usufono o lo o saunoa se i tulai mai le Minisita ona o lea e taua le Matagaluega ma le mea na tupu. Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, o le gasegase lea e saunoa i ai le sui usufono i le ma talanoaga faasamasamanoa ananafi, ma o le taimi lava lena na ou sailia ai loa le vaega lea aua o lea faatoa ou maua se faamatalaga. O lo o tapena mai la le lipoti o le gasegase lea, ae i le taimi nei, ne i aveseina le faafofoga a le atunuu ma tuuaia i latou e le aafia ai i le tulaga o le vaai o le gasegase lea. O le tina lea e tusa ai ma le faamatalaga na ou maua, e le gasegase, o le faaletonu lava o lona toto. O le toto la ua bleed ai. O le mafuaga lea o lona gasegase. O le a maua mai le – ou te le manao foi e fai atu se faamatalaga leaga o lea e faamaumau saunoaga ne i toe aafia ai tulaga mulimuli ane. Ae malie le Afioga i le sui usufono, ae a pe a finagalo malie e taoto le vaega lea ona o lea e faagasolo sailiiliga. Ae mo le taimi nei i le faamatalaga ua oo mai ia te au, e leai se togafiti e mafai ona faia i le gasegase lea, e i ai mea o elemeni o le toto e tau o platelets. O platelets i totonu o le toto, o vaega ia o cells e faaputupu ona form ai lea o le clot e le mafai ai ona piliki tagata. A faapea la o le toto ua leai ni mea ia, e tele mafuaaga e faaititia ai pe tuuititia vaega ia i totonu o le toto, ona maua loa lea o mea na ua suavaia le toto ma e piliki. A o o ina piliki, e le mafai ona toe utu le alu o le palapala. E pei o se faamatalaga lena e avatu e faamalamalama ai, leaga o le a agai e tuuaia le aufaigaluega ma nisi, ae i ai le faaeteetega, ne i maoaluma se faamatalaga ae le i maea sailiiliga maumautu, a o lea e tapena mai le lipoti, ona ou valaauina lea o le sui usufono e o o atu i lou ofisa e faamalamalama i ai tulaga o le gasegase lea o lo o saunoa i ai. Ma le faaaloalo tele.

FOFOGA FETALAI: Malo faafetai. Ou te manatu ua tataua ona see ese le Afioga i le sui usufono, e fai si lavelave o le mataupu, e fai o lou finagalo, a o le tali mai foi a le Matagaluega lea ua saunoa i ai le Minisita, ae faasolo isi a tatou mataupu, toe lua lea e totoe. Tulai mai le sui usufono mo Alataua Sisifo.

Afioga LAFATELE PATRICK LEIATAUALES: Faafetai i lau Afioga i le Fofoga Fetalai. E pei lava ona ou fai atu, e leai se agaga e tuuaia le Matagaluega. A tuuaia o lea ua oti le tagata, e oti ai ma lana pepe e ono masina i totonu. E pei o lau folasaga, e le i taunuu mai po o le a tonu le mafuaaga aua o lea sa i ai le faamoemoe e ave i Niu Sila, tatou te saili fofo i ai pe a faapea ua leai lava se isi togafiti e fai i ai. Ae o le a ou le toe talanoa i le mataupu lea, leaga o lea ua saunoa le Afioga i le Minisita. Masalo o se taimi ona o o mai lea o se faamalamalamalaga.

O lea na saunoa le Afioga i le Minisita mo Leoleo ma Falepuipui i le aso ananafi, ua maea le tatou Fono ananafi ona ou see lea i le Matagaluega o Leoleo ona sa i ai le saunoaga a si ou uso mai le Vaisigano Nu.2, o lana fana

lea na ave e faapea ua leiloa. Ae matou talanoa ma nai tama ananafi, ae faapea mai na afio atu lava le sui usufono ma lana fana e malepe. So o le mea la lenei se i tau faamanino atu vaega ia, i te i ua faapea le sui usufono ai ua matou ave le fana.

FOFOGA FETALAI: Malie lau Afioga i le Sui Minisita mo Leoleo ma Falepuipui se i tulai atu le sui usufono e ana le mataupu. Tulai mai le sui usufono mo Vaisigano Nu.2.

Tofa Motuopuaa Uifagasa Aisoli Vaai (Vaisigano Nu.2): Lau Afioga i le Fofoga Fetalai, ua faanoanoa tele au i le faamatalaga lea o le fana e malepe. O le fana, o le winchester doublé barrel. O le fana, e mafai ona dismantle. E i ai ma le case na ave ae o le matua pepelo lava o lenei faamatalaga e avatu e malepe. O le fana ia o le matua fana lelei lava, o la e iloa e le alii la e na te vaaia le armoury ae alu atu fai mai ua leiloa, alu atu fai mai ua elea. E pei o le mea lenei e faamalulu atu ai i faapea ai se.... Ia a malepe e \$2,000 na ou faatauina ai? Faafetai.

FOFOGA FETALAI: Ou te manatu ua malamalama le atugaluga o le sui usufono. Ma o le a lafo atu i lau Afioga i le Minisita, o lea ua fesoasoani mai le Minisita Lagolago ae talitonu e le o se mataupu e toe agiga i tua o lea ua faamaumau e le Minisita mo Leoleo, o le a tali mai i taimi talafeagai e faamalalama ai le mataupu. Ae faaiu maia le saunoaga le sui usufono mo Alataua Sisifo.

Afioga LAFATELE PATRICK LEIATAUALES: Lau Afioga i le Fofoga Fetalai, sa saunoa le Minisita ananafi, e leai foi se isi e sii se ta o lea ua saunoa le Afioga i le Minisita. Ae mo le silafia o le tuuaia o le Matagaluga, o le tala lenei na tuuina mai ananafi, na afio atu lava le sui usufono ma le fana e malepe, ou fai atu e taatia ai pea i ina se i toe afio mai le sui usufono po o le a se mea e fai ai, o le malepe lava lenei na avatu ai e toe aumai ai pe a faapea o le tulaga lenei.

Lau Afioga i le Fofoga Fetalai, ona faaiu lea o sa matou i lau mataupu i le Kolisi a lo matou Itumalo. Masalo o lo o faalogologo mai lo matou Itumalo, o le Kolisi lenei na ou fesili atu i lau Afioga i le Minisita mo Aoga, Taaloga ma Aganuu, po o fea tonu lava o taoto i ai lenei faamoemoe. E pei ona silafia na oulua afio atu ma le Minisita o Tupe ma sa tatou feiloai ae le o iloa la e le nuu nuu i lenei taimi po o fea o taoto i ai. Na valaau mai ananafi matou te fia omai i le Palemia ae ou fai atu i ai, soia tou te faalavelave o le Toeaina lea faatoa sau mai Hawaii o la e Fono, ae taatia mai se i ou talanoa i le Minisita o Aoga, Taaloga ma Aganuu ma le Minisita o Tupe po o fea o taoto ai le tatou faamoemoe, a toe tagi mai foi i se faleaoga o lenei ua fai le vai, se i mau pea le toovae ma onosai e le faigofie le faasoia tau utiuti a le Malo, ia lavapapale mai pea o lenei ua outou faalogologo mai ua uma ona ou fesili i le Minisita mo Aoga, Taaloga ma Aganuu po o fea tonu o lo o taoto ai lo tatou faamoemoe. E tataua ona tatou fiafia ua outou faalogologo mai ua ave lau faafetai tele lava ma ou faamalulu foi i le Palemia faapea le Minisita mo Galuga, Felauaiga ma Atinae Eeseese e tusa ai o le mamafa o upu sa lagalaga ma siisii a o lea ua ou faamalulu i ai. Ia fiafia o lenei ua maua la tatou vai, ae a outou silasila i le tele o lauga a lenei Maota o lo o tagi ma i le tele o vai a o

tatou ua pei lava o le spring water na ua tatou feinu ai, e le masani ona tatou feinu ae faafetai i le Malo ua alu alu suaga a le vaa tele ma ua fai foi lo tatou inati, tatou te o foi i le palapala e le galo lenei faaaloalo tele. O le 2013 tausaga a o lea faatoa tatou feinu....

FOFOGA FETALAI: Ua maea le taimi o le sui usufono.

Afioga LAFATELE PATRICK LEIATAUALES: Faafetai i lau Afioga i le Palemia faapea foi le Minisita o Galuega, Felauaiga ma Atinae Eeseese ona o lenei faamoemoe tele. Ona faapea lea o sa matou tala, lau Afioga i le Fofoga Fetalai faapea foi le maualuga o lenei Maota, matou te fefefe i lape o upu, matou te faamalulu atu i le tofa faatupu ma le uta faafaleupolu e magalo ai so matou sese ma se faaletonu. O le a sa outou faafofoga i le taeao ma lenei aso, o le agaga o le sui usufono o le faanaunauga o le loto ina ia taumafai ma finau atinae a le Itumalo na ala ai ona matou omai i lenei Maota.

I lau tapuaiga Samoa e amata mai i Lana Afioga Mamalu O Le Ao o le Malo seia paia lava se faatauvaa, faafetai i la outou tapuaiga. O le paia lasilasi aua le afaigaluega paia na tofofi a le Atua o lo o tala mea faasolo ma aulagia i lea afioaga ma lea alaafaga aua le galuega ma le Feau a le tatou Matai Sili i le lagi.

O la matou tala lea ia manuia le Fono usu a le Atunuu.

FOFOGA FETALAI: Malo faafetai saunoa i lenei vaega o le aso, out e lagona foi ua faasolo foi le tatou galuega e pei ona faatulagaina, malo tulei, faafetai saunoa.

Ia tulai mai le sui usufono mo Aleipata Itupa i Luga o lea ua avanoa le Maota mo lau saunoaga.

Tofa FAGAAIVALU KENRICK SAMU (Aleipata Itupa i Luga): Faafetai atu i lau Afioga i le Fofoga Fetalai e tusa ai foi ma le avanoa ua tuuina mai mo lenei Itumalo o Aleipata Itupa i Luga, e taumafai atu ai se lagona vaivai i le Tulafono Tau Faaofi o le Tala Faatatau Autu o Tupe 2013/2014. E muamua lava ona ou faatulou i le Maota i Tiafau nei o le Malae o le Faautugatagi a le atunuu. I le afio o lau Afioga i le Palemia ae tainane foi o le aiga Kapeneta.

A talii mai foi i lenei itu o le Maota, ou te faatulou atu i lau Afioga i le Taitai o le Itu Agai aemaise o la outou Vaega Faaupufai. E le faagaloina foi le mamalu o Ofisa Sili o Pulega o Matagaluega ma Faalapotopotoga a le Malo aemaise o Pisinisi Tumaoti, e le faagaloina la outou fatuaiga tausii aua o outou o lo o vae ma lima i ai le Malo ae a le atinae o le atunuu.

E le faagaloina foi le tapuatapu mai o lou Itumalo o Aleipata Itupa i Luga mai Ulutogia i Vailoa aemaise o lou nuu pele o Lalomanu. Ou te faatalofa atu foi i le au fai tatalo i lau Susuga i le Toeaina Faatonu aemaise o feoi o le Talalelei aua le laugaina o le feau a le Atua aua se manuia o le Itumalo, e le gata i afioaga taitasi a o le Atunuu.

Lau Afioga i le Fofoga Fetalai e le umi foi se manatu o lenei Itumalo e ala i le Tulafono Tau Faaofi o le Faatatauina o Tupe 2013/2014, pau o lea e momoli atu le agaga faafetai tele i lau Afioga i le Minisita o Tupe ma le Ofisa Sili o Pulega atoa ma le Matagaluega o Tupe, aemaise o le lavaloa i

Matagaluega taitoatasi o e sa togimaa aua lenei Tulafono Tau Faaofi o le Faatauina o Tupe 2013/2014, ou te talitonu o i tonu o lo o i ai le atinae o le Atunuu. Talofa i la outou faasoa le 'au'au ae talitonu o i tatou lava ua masani i le faasoa i so o se ituaiga seleni mo atinae o le atunuu. E momoli atu ai le agaga faafetai tele i le Malo e tusa ai ma le Tulafono Tau Faaofi o le Faatatauina o Tupe 2013/2014.

Lau Afioga i le Fofoga Fetalai, e pei ona ou fai atu i le taimi ua sola e le umi tele se lauga a lenei Itumalo, na ona toe faamanatu ma toe tatalo atu i nisi o talosaga ua faapena ona taoto i luma o a outou Afioga i Minisita. O le a aofia uma matagi i liu i le faamatalaga a lenei Itumalo, na ona tatalo atu lava i nisi o Minisita ua faapena ona faatoai ai manaoga o lenei Itumalo.

O le a ou amata mai i le Minisita mo Galuega, Felauaiga ma Atinae Eeseese. E muamua lava ona – e pei lava o upu a le atunuu e le tau laeia le maa osofia. E momoli atu ai le agaga faafetai e tusa ai o galuega lelei mai lava i le amataga o lenei Paeaiga seia oo mai lava i lenei vaiata aua le atiaaina o lo tatou atunuu. E fai ai au ma sui o lenei Itumalo e momoli atu ai le faafetai tele i lau Afioga i le Minisita mo Galuega, Felauaiga ma Atinae Eeseese e tusa ai o le auala ua fuafua mai Samusu i Lalomanu. Ou te talitonu o taiala nei a le Malo ina ia taumafai e siitia mai i latou o lo o nonofo latalata i le sami, a o le taua o lenei auala o lo o faapena ona taumafai lenei Itumalo e agai i uta i mea mapuepue. E momoli atu ai le faafetai ona ua maitauina ua amata galueaiina lenei auala mai Samusu i Lalomanu.

Lau Afioga i le Ofisa Sili o Pulega o le Faalapotopotoga o le Malosi faa-Eletise, o lo matou Itumalo ua fai lava sina televave o le atinae o tagata asiasi maimoa mai fafo. O le tatalo a lenei Itumalo o le tele o poumoli i tua o lo o i ai pea moli e oo mai i lenei taimi ae paga e leai ma se moli o toe ola. O le tatalo ina ia alofagia ma toe faaola atu nei moli e faamalamalama ai le feoai i po, ae le gata i lea o nai tagata asiasi maimoa mai fafo i le aafia ai i taifau se i tulou lava le Maota.

Ona ou oo mai ai lea i le Pulega o le Suavai, e momoli atu le faafetai i lau Afioga i le Ofisa Sili o Pulega, ou te talitonu o matou i tua e fai lava sina faigata tele o le suavai. O le maitau a lou nei sui usufono mai lava i Lalomanu talu lava ona ou ola mai ma ou vaai ai e le tane vai o lo o i ai i le taimi lenei – le faatanoa vai. Po o le a se silasila mamao a lau Afioga i le Minisita ma le Ofisa Sili o Pulega, po o ua le alagataua ona toe fai se isi faatanoa vai. O le maitau i ai a tumu le faatanoa vai ua oso i lalo le vai, ia ua maimau le suavai, ou te talosaga atu ina ia toe silasila i ai lau Afioga i le Minisita ma le Ofisa Sili o Pulega, o le toatele o lo matou Itumalo ua agai i uta i le mapuepue ua faigata foi ona agai i ai le suavai ona ua le ae i le tulaga o lo o i ai. Ua na o se tatalo atu faamolemole ina ia alofagia e faigata foil au galuega a o le a taatia atu lava ina ia faatupu manatu i lau Afioga.

Ona ou oo mai lea i le Minisita o Leoleo ma Falepuipui, faafetai atu faapea foi le Komesina mo le siitia o le auaunaga faa-Leoleo i lenei vaiata. O le tatalo a lou nei sui usufono se i alofagia le ofisa i Lalolamanu, o lea ofisa lea sa nonofo ai tamaitai tausima i aso ua mavae a o le taimi nei ua na ona faafou lava ae ua leaga le fale. O le tatalo i lau Afioga ina ia e silasila ane, afai e lelei mo le aufaigaluega i Apia nei e lelei foi mo lo matou Itumalo.

Ona ou oo mai ai lea i le Minisita mo Fesootaiga ma Faamatalaga Tekonolosi. Ou te talitonu ua savali ne ii le 20 tausaga e le o toe ola la matou TV Samoa, o le tatalo i lau Afioga e moni lava au o lo o ua pulea umia

saoloto le TV ae po o le a se fesoasoani e tauala atu i lau Afioga ae musumusu atu i ai po o le a se auala, ae afai o se tupe e totogi, o le a taumafai lava lo matou Itumalo i sina seleni ae se i faasafua atu ai lenei auaunaga. O matou e nonofo i tua ae omai iinei aemaise lava i taaloga taua a le tatou atunuu o lo o tapuaia le alofaiva o fanau aua o fua faalele nei a le tatou Atunuu mo atunuu i fafo o alo ma fanau e ala i taaloga. O le tele o taimi se i tulou lava lenei Maota, e omai onana lava toeiaina i tua e tuli mai le TV i le vaveao ma e ono tutupu ai foi faalavelave, a o le tatalo se i alofagia pe mafai ona fesoasoani ae i lea vaega.

Ona ou oo mai ai lea i le Minisita mo Faatoaga ma le Faleoloa o Faatoaga, leaga e le o alaala mai i i a o le tatalo a lenei Itumalo po o fea o i ai le tatou vaa povi lea sa fuafua mai mo lenei masina o Iuni. E pei ona silafia e le Minisita ua tele a matou talosaga a ua leai ni manupapalagi, ua maea foi ona fausia pa a ua leiloa po o a mea a tuu ai i totonu.

Ona ou oo mai ai lea i le Minisita mo Aoga, Taaloga ma Aganuu. E momoli atu foi le agaga faafetai a lenei Itumalo i le Minisita ma le Ofisa Sili o Pulega, a vaavaai ma le totoa i taiala ua maea faataatia e le Matagaluega, ou te talitonu o le fatu lea o so o se aiga ma le Malo, a lelei ona aoaoina alo ma fanau e faapena foi ona manuia aiga, manuia nuu aemaise o le atunuu. Ona pau lava le talosaga a lenei Itumalo ia faasafua atu faiaoga, o la matou Kolisi i Vaisuli, e i ai mataupu e le o mafai ona aoaoina ai ona e maua e le o i ai ni faiaoga, a o le tatalo a lenei Itumalo ou te tatalo ua utiuti foi faiaoga e i ai le tomai o lo o faatinoina lea auaunaga. Faafetai mo le faaaoga fua o tamaiti aemaise o tupe o lo o ua faamatuu atu i aoga a lo matou Ekalesia aua lava nai fanau. O le talosaga vaivai a lenei Itumalo i lau Afioga i le Minisita i Aoga Pre School, pe le o agavaa ona totogi e le Malo faiaoga ua maea ona faauu atu i le Aoga Pre School i Sogi, ona o le matou aoga i tua o lo o tau togitogi e nai loomatutua ma toeiaina nai faiaoga. E tatalo atu ai pe a fa au ae mafai ona totogi e le tatou Matagaluega.

Ona ou oo mai lea i le Minisita mo le Soifua Maloloina, faafetai i le auaunaga faapitoa mo le falemai faa-Itumalo aua o ia auaunaga sa le mafai ona faasopolia ai le Itumalo i le tele o tausaga, peitai ane ua aoga lenei vaitau ua tulai mai ua faasafua atu ai lenei auaunaga faa-Fomai faapitoa. Ona pau o lea ia matua talavai, e leai se aoga e alu atu ai le Fomai faapitoa ae toe foi mai lava i Apia nei le toeiaina ma le olomatua e faatau atu ai le fualaau, ae a maua uma ia vaega ona e taua tele mo matou i tua. O le tatalo ia alofagia se matou taavale mo mai...

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Minisita leaga o lea ua taua mea tau talavai.

Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama: O le tulaga lea i talavai lea e faateia ai au ona o le tulaga i le auaunaga lea i le taimi nei, a alu le fomai i tua e alu faatasi lava ma le fale talavai ma le faata lea e fai ai le faata i tua ma aumai i Apia e faitau atu ai ma tau atu ai le mea o faaletonu. E faapena foi la ma le talavai, e fealuai le fomai e fai galuega i tua a o lea ua ave ai lava ma talavai ina ia foia ai le tulaga lea e atugalua i ai le sui usufono, ina ia uma loa ona faalogo le mai ma tusi le vailaau ma tuu atu ai lava fualaau o lo o maua ai lava i le taimi lena, ae e le toe malaga mai i Apia e saili ni fualaau. Se i

vagana ai la e i ai ni fualaaui e faapitoa lava e le masani ona maua i tua, atonu o fualaaui la na o lea e omai ai i Apia e saili, a o fualaaui lava e masani ona faaaoaga i aso faisoo ma tulaga lautele, o lo o maua uma i le vaega lea a le Fale Talavai o lo o malaga faatasi ma fomai.

O le faamalamalama lea ma le faaloalo tele.

FOFOGA FETALAI: E manatu ua faamalieina atugaluga o le sui usufono ona o lea ua saunoa malamalama le Afioga i le Minisita.

Tulai mai le sui usufono mamalu e faaauau le saunoaga.

Tofa FAGAAIVALU KENRICK SAMU: E faafetai atu i lau Afioga i le Minisita. E leai foi se lagona o lenei Tootoo e faalavelave, ae leai o lea lava e sao lau talanoa atu.

O lona lua o talosaga lau Afioga i le Minisita, ua savalia nei ma le lima masina o tuu atu lau talosaga i lau Afioga ma le Matagaluega. E pei foi ona avatu le talosaga a lau fomai e manaomia ai se faata faapitoa mo au i Niu Sila talu ai ua faasefulu tasi ona ou oo atu i lou Ofisa ma o le tali lava e tasi, o le ala lea o lea ou te avatu ai i lenei vaega o le aso ina ia alofagia. Afai lava e leai, ua lava foi lea ua ou malie foi i ai. A o le a lava le finagalo o le Alii ia te au i lou mai, ua lava foi lea.

FOFOGA FETALAI: Malie le sui usufono o lo o saunoa se i tali atu po o le a tonu le gasegase lea e aafia ai oe, po o se gasegase e foia lelei pe ua ui le mai.

Tulai mai lau Afioga i le Minisita.

Afioga Hon Tuitama Talalelei Tuitama: E saolele le saunoaga a le Afioga i le sui usufono. O le tulaga lea i gasegase ia ua matauina i inei mo le manaomia o taotoga i atunuu e mamao i Niu Sila pe afai e le mafai ona foia i inei, e ave le talosaga i le Komiti. E i ai le Komiti e tau o le Screening Committee e silasila ma vaavaai i le gasegase pe faamaonia o le gasegase lea e aoga i ai se togafitiga i Niu Sila. A faapea e le aoga i ai se togafitiga i Niu Sila, ona aumai lea o le latou fautuaga e aua le aveina e maumau ai tupe a le Malo ona e le aoga i ai se togafiti i fafo. A o na fautuaga, e le faapea e faia i luga o ni o latou lagona faale-tagata, e faavae i luga o scientific evidence. O lona uiga a i ai molimau maumaututu e faamaonia ai o le gasegase lea o le gasegase e mafai ona togafitia, o i ina e faavae ai i luga le latou faaiuga.

O le tulaga la lea i le gasegase o le Afioga i le sui usufono, e moni na oo atu. E faalua leaga o lea e fai mai e faasefulu tasi, ae faalua ona ma feiloai i lou Ofisa i le tulaga lea. O lo o taoto ai nei la i totonu o le falemai, e leai se pule malosi a le Minisita e ave ai ni gasegase e iloa e le o lava lona malamalama i le background po o amataga ma aafiaga e le mafai ona fai i totonu o le Ofisa. E ui lava ona o au o le fomai, ae e le mafai ona ou faia i totonu o lou Ofisa tulaga ia e saili po o le a le ituaiga gasegase o le sui usufono. O lea la na ave i ai lau faatonuga i le Ofisa o le Soifua Maloloina ia i latou o lo o faagaoioia tulaga ia, se i silasila ane i le gasegase o le sui usufono ona ua leva ona aafia i le tiga o lona ulu.

O le tulaga lea i ulu tiga, e le faapea a tiga loa le ulu ave loa i Niu Sila. Toeitiiti maua le afe o tagata lea e i ai i Samoa nei po o Apia lava ia o lo o aafia i le gasegase lea o le mai ulu. E le faapea la a tiga loa le ulu ave loa i

Niu Sila e togafiti ai, e leai. E muamua inu au panadol, a faapea e le tea ai ona alu lea fai le faata. A faapea e leai se mea e maua i le faata lena ona fai lea o le isi ituiga faata o le CT-Scan. A fai foi la le CT-Scan ae leai foi se mea e maua ai, e leai la se mea e faavae ai se recommendation po o se fautuaga e ave ai i fafo ona e leai se faailoga o i ai e iloa ai o i ai se mea o faaletonu.

Ia manatua foi lau Afioga i le Fofoga Fetalai ma le mamalu o lenei Maota, e tele ulu tiga e le mafua i ni mai, ae mafua i le tele o faalavelave o le aiga, pe mafua i se mea o uoli ai le mafaufau i le va ma le toalua, pe ua tele foi aitalafu. O mea uma lava ia e mafua ai le tiga o le ulu. O le galuega tele la e faatino e le falemai o le taumafai e saili po o le fea o mea ia lea e mafua ai. A faapea e iloa tonu ona fai lea o le fautuaga talafeagai. A faapea o le tele o faalavelave o le aiga, ona fai lea i ai, “Totogi lou pasese e te alu ai i Niu Sila se i uma faalavelave ona e toe sau ai lea.” Pe mafua foi ona o le va ma le toalua, ona fautua lea i ai, “Vaai lau faifeau e te talatalanoa i ai. “

E oo mai la i le taimi lenei o lea ou te faatali i se lipoti mai le falemai.....

Tofa FAGAAIVALU KENRICK SAMU: Lau Afioga i le Fofoga Fetalai, o le a uma lou taimi i le faiga o le aoga a le Afioga i le Minisita. E leai e le o au o se fomai ae ou te malamalama lelei.

FOFOGA FETALAI: Malie le sui usufono o lo o saunoa leaga o lea na e saunoa ua faasefulu tasi ona e afio i le Ofisa, a o lea e saunoa le Minisita na o le faalua.

Se i maea le faamalamalama a le Minisita ona tuu atu lea o le avanoa.

Afioga Tuitama Talalelei Tuitama: O le taimi nei la lau Afioga i le Fofoga Fetalai, o lea o lo o ou faatali aua e pei ona ou tolaulauina atu, o le ulu tiga pe atoa le ono masina o saili le mafuaaga aua e tilotilo i mea uma lava ia i lou olaga pe na lavea lou ulu i se lakapi, pe na tau ai se maa, pe na ta e lou tama i aso o e laitiiti.

O mea uma ia e tatau ona maua le talaaga o le olaga ma le soifuaga o le tagata ona fua lea i ai, pe ua leai se lauulu e ufiufi ai mai aafiaga o le la ma le timu. O mea uma ia e ono tiga ai le ulu.

Lau Afioga i le Fofoga Fetalai, o lena se faamatalaga ou te taumafai atua mo lenei taimi, a o le a sau se taimi ona maua lea o se fautuaga. A o lau fautuaga na ave i ai, a i ai lava sina tamai excuse laitiiti e ave ai le sui usufono i Niu Sila, fai loa le pepa ae ave i Niu Sila. Ave pea se i tau lava ina oo i Niu Sila, ona saunoa ane lea i ai o le fomai i Niu Sila e leai sou mai, ona toe foi mai lava lea.

Ma le faaaloalo lava lau Afioga i le Fofoga Fetalai.

FOFOGA FETALAI: Se i tuu atu pea le avanoa i le sui usufono mamalu.

Afioga Hon Leaupepe Toleafoa Apulu Faafisi: Faafetai mo le avanoa. Ioe lau Afioga e i le Fofoga Fetalai ma le paia o le Palemene. O se mea e fia malamalama ai i le saunoaga a le Afioga i le Minisita mo le Soifua Maloloina ona e matau atu e le o tapa se lipoti a se fomai taulasea Samoa. Pe e le mafai ona tapa e lana afioga i le Minista se lipoti a se taulasea Samoa pe afai e le o

maua mai se mafuaaga mai le Ofisa o le Soifua Maloloina? Pe e le o le toeaina e fasia ma se tulaga faapena ona o le fealuai po?

Afioga Hon Tuitama Talalelei Tuitama: Lau Afioga i le Fofoga Fetalai, ua maea foi ona faia le tulaga lea. O le faaaliga a le taulasea Samoa, o le mai foi lea e tau o le fee.

FOFOGA FETALAI: E faafetai atu i le faamalamalamaga a lau Afioga i le Minisita. E leai e tumu le Nofoa i le faaeteete ona e ta liu ae popoe lau Afioga i le Minisita ona o le sui usufono, o se tasi foi o sui usufono faatoa taunuu mai i lo tatou Maota. Ua e silafia foi lau Afioga i le Minisita, e le i mamao atu nei ona lagia le faaitu lea i le mea lava lea i le gasegase, o manumanuga la ia e alofa ifo lau Afioga i le Minisita i le sui usufono mamalu ina ne i o tatou faaataata a lafoga ae le aulia le faaiuga o lenei Paeaiga.

O le fautuaga lea e tuuina atu i ou tafatafa ona ua le tasi ae ua fai mai ua faasefulu tasi, ia alofa ifo lau Afioga i le Minisita se i fai ane se fuafuaga e ave si alii i Niu Sila se i siaki pe e le o le fee moni lea e tupu ai le faafitauli.

Ou te manatu ua malamalama. Ua e faafofoga mai o lea ua faaoloolomaa ma talosaga le Fofoga Fetalai i lou mai ina ia ave oe i fafo e siaki po o le a le mea lene e faaletonu, ae ia e foi mai ua tutupu lou ulu? (*I le sui usufono mo ALeipata Itupa i Luga*).

Se i tulai atu le Palemia. O lea ua iu lava ina tali atu le Palemia i lou gasegase.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ua ala ona ou tulai atu ona o lou uso a sui usufono ma te tuaoi. O le ala lene aua a i ai lava se mea ou te fia fesoasoani ai, aua le tuua lou oo atu tatou te talanoa. Afai foi toe ono masina ia e totoe o lou soifua, aua e te popole. E o atu uma lava le Palemene nei pe afai a o le a le lagi ia te oe. O lea foi la ua ou tau atua, e o atu foi ma leoleo e fata lou pusa ma tatala atu ma le tagavai a le Malo, o i ina e iloa ai le tatou mafutaga feavatai ma le faaaloalo o le Palemene i lau Afioga.

O le mea lea, lototele e umi foi le ono masina e le puupuu.

Afioga Hon Palusalua Faapo II: Lau Afioga i le Fofoga Fetalai o se mea e fia malamalama ai.

FOFOGA FETALAI: Ia, se i fai mai lou tomai faafomai lene e i ai?

Afioga Hon Palusalua Faapo II: O lea ua saunoa le Afioga i le Minisita mo le Soifua Maloloina o le fee lea e gasegase ai le Afioga i le sui usufono, ae na ou faalogologo i le leitio lea e fai le latou polokalame foi lele o le metotia, ona ou faalogologo ai lea i le fofu o le mai lea. E tatau ona silafia e le Afioga i le sui usufono ina ia aua ai ne i oo i le tulaga lea na saunoa i ai le Palemia. Ina ne i popole le sui usufono ona vave oo ai lea i le tulaga lea. A o le polokalame lea a le leitio lea o le metotia, ia ki i ai i taeao uma e te faalogologo i ai, o i ina o lo o tau mai ai le fofu o le faafitauli. O le a le fofu, na o le lulu lava o le masima i lou ulu ona e faamalu lea i le taeao, e te talitonu i ai e matua tea ai lava le mai lea e te gasegase ai.

FOFOGA FETALAI: Malie le Taitai o le Itu Agai, se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E sese le mea lea e te tulai mai ai. E mafua ona sese leaga ma te le i talanoa ma le Minisita. O le mea lena o le fee, o le fee lena e maua mai le sami. Na ona ou logo atu i le Minisita, o au o le faatama o le au taulasea uma lava i Samoa. O le sao o le gasegase o le fee fee ae e le o se fee.

FOFOGA FETALAI: Malie lava le sui usufono mamalu mo le fia faasaoina o lou taimi, se i tuu atu le avanoa i le Tamaitai Minisita mo Faamasinoga ma Pulega Tau Faamasinoga.

Tulai mai lau Afioga i le Sao Faapito.

Afioga Hon Fiamé Naomi Mataafa (Minisita mo Faamasinoga ma Pulega Tau Faamasinoga): Ioe lau Afioga i le Fofoga Fetalai, o se mataupu e fia faamalamalama. O lea foi ua tulai atu le Afioga i le Palemia i le tulaga o lo o nofo tuaoi ma le sui usufono o lo o saunoa ma o le matou vaimotu lava lea.

Ina ne i te i ua taitaiseseina tupulaga o lo o faafofoga mai, o le Palemene lenei e le o se Palemene e omai e sue ai ni gasegase o ni faipule. Atonu o le sao o le mataupu a le Afioga i le sui usufono o faiga faavae a le Malo e ave ai tagata i fafo e togafiti ai o latou gasegase.

Lau Afioga i le Fofoga Fetalai, o lea na toe fai nei e le Palemia le fesuaiga o le taimi ona o le a alu ai o tatou aso atoa iinei i le fonu ma o le mafuaaga tonu lava lea o lea e umi ai le fonu, o le tatou talanoa i le mea e le tataua ona tatou talanoa i ai, ae tatou te le o sao i faiga faavae e ao ona lotea i le tatou fonu lenei. Faafetai.

FOFOGA FETALAI: Malo, tulai mai le sui usufono mamalu, ou te fautua aua e te faafofoga i le fautuaga a le Taitai o le Itu Agai i metotia, o lona uiga e le ono masina ao lea o le a lua masina lou soifua. O lea ua tatou lalata i le taimi malolo ae faaiu maia le saunoaga.

Tofa FAGAAIVALU KENRICK SAMU: Faafetai atu i lau Afioga i le Fofoga Fetalai, leai e le toe tele foi se upu a lenei toeaina pau o lea o lea ua ou malamalama ao le tulaga i le talosaga sa agai uma lava i le procedures masani lava pei ona aumai ai nei o lou mai ulu ua savalia ma le sefulu tausaga. Ae e maua i faamaumauga a le falemai e faalua ona fai CT scan e normal, o le fautuaga a le fomai e fai le talosaga ma avatu le lipoti e ave i le Minisita e ave ai au i fafo e fai ai lou faaata faapitoa. O le ala lea e le faapea o lou sau iinei ona ou taumafai lea e ave lou tofi faasui usufono o le Palemene e ave ai au, leai o lea lava sa uia lava ala e tusa ai ma faiga faavae a le Malo. O le tulaga i le fesoasoani mai a le Taitai o le Itu Agai e le au lou taofi i lea vaega ae fai i lau Vaega Faaupufai e faafofoga i le polokalame lea i le taeao e amata ona fofu ai tou ao au e leai o lea ou te talia lava lau talosaga i le fomai ina ia i ai se taimi e tatala ai lona finagalo ma avatu au i atunuu mamao. Ae momoli tele atu le agaga faafetai i lau Afioga i le Minisita mo le Soifua Maloloina e tusa ai ma lea faamalamalama ae ana faapea o se mai a lou itumalo ua leva lava ona ave.

FOFOGA FETALAI: Malie le sui usufono sei tuu atu le avanoa i le Minisita mo le Soifua Maloloina.

Tulai mai lau Afioga i le Minisita.

Afioga Hon Tuitama Talalelei Tuitama: Lau Afioga i le Fofoga Fetalai ma le mamalu a le Maota. E manaia le fautuaga a le Afioga i le Tamaitai Minisita ia Fiamē Naomi Mataafa. O le ala foi lea ou te fiafia ou te talanoa atu aua e ui lava ina avatu i se tulaga faamalie ao le auala lena o mea lea sa ou tau atua. E ala la ona ou toe tulai atu ona o lea e faafofoga le atunuu ma le Maota nei o saunoa le sui usufono e faapea, “ua fai ane le fomai e avatu le faatagaga a le Minisita”. O le tulaga tonu lava lea o lea e mafatia ai le Palemia ma au nei ona o le tele o gasegase nei e le faia atua i le Kapeneta le faatonuga e ave le mai. Pau lava le tulaga e oo atu ai i le Kapeneta o le faatagaga a le Kapeneta e faaavanoa ai seleni e tofogi ai taotoga ma togafitiga pe a ave le mai i fafo. Ao le mea lea i le ave i Niu Sila o le mai, o le faaiuga lea a le fomai. Afai e silafia e le fomai o le mai e tatau ona ave i Niu Sila, e fai lana recommendation e aumai i le Kapeneta e ave ai le mai. Ona approve lea e le Kapeneta o seleni e faatino ai taotoga ma togafitiga ia o le a fai. Ao le tulaga lea e tulai mai nei, o lea ua ou iloa nei a i ai le mai ua alo ai le fomai e le tau saoa i ai o lou gasegase ua le aoga i ai se togafiti e maimau le ave i fafo aua e le mafai ona fai toatasi e ia le faaiuga lea aua e fai foi fesootaiga ma fomai faapitoa i fafo ona faapea mai lea o fomai faapitoa i fafo, e tusa ai ma faamatalaga ia ua aumai ma faata, toto, po o a uma suesuega ia na fai, o le matou taofi e le aoga le aumai iinei e leai se togafiti e aoga i ai. Ona alu lea o le fomai ua le taua i ai ae fai i ai na o le pau lava le tagata e mafai ai ona e alu o le Minisita po o le Palemia. Ona omai lea o aiga o mai nei, a le o i le Palemia, se la ua fai mai le fomai nao oe lava e mafai ai ona ave le mai i fafo. Pe omai foi ia te au ma faapea mai, la e fai mai le fomai nao o oe lava e mafai ai ona ave le mai i fafo. O le tulaga lea ua aoga ai le talanoaina o le vaega lea iinei, ina ia faasao atu ai le vaega lea e leai se faatagaga i le Minisita e mafai ai ona ave se mai i fafo. Pau lava le galuega a le Minisita o le ave o le submission e fai mai e le falemai ua uma ona filifili le Komiti lea ua tofia e le falemai o le mai lea e tatau ona ave ae soia le toe faia o le amio o le le faamaoni e tau sao i le gasegase e le aoga se togafiti ia te oe. O le tele o isi vaega a uma ona faamalamalama i ai, ona malilie lea o latou lotou ua malamalama ina ia malamalama le gasegase i le tulaga ua oo i ai ona fai ai lea o lana filifiliga. Ao le tulaga foi lea e i ai privileges o le Minisita ma le Kapeneta i tulaga e manaomia ai ae le mafai ona ou faamatala atua ia mea leaga e aofia ai ma le Maota. Ao le vaega la lea e pei ona saunoa i ai le sui usufono e leai la, e lei i ai se faaaliga ua oo mai o lea ou te faatali i se recommendation e aumai i le fomai i tulaga ia e tatau ai ona agavaa lau Afioga mo togafitiga i fafo ona ave lea i le Kapeneta e fai ai le faaiuga. Ao le taimi nei e lei avatua ia te au se faatagaga e ave ai lou mai i fafo.

FOFOGA FETALAI: Ou te manatu ua malamalama le saunoaga a le sui usufono mamalu ae faauma maia lau saunoaga o lea ua maea lou taimi le sui usufono mo Aleipata Itupa i luga ou te manatu ua malamalama le mataupu. Ou te fautua atu foi aua le tuua le taulogologo i le tulaga o le gasegase e pei

ona taua i le Maota ou te lagona ua oo i ooooga ae ou te manatu e le o toe mamao ae tulai maia e faaiu mai le saunoaga.

Tofa FAGAAIVALU KENRICK SAMU: Faafetai atu i lau Afioga i le Fofoga Fetalai, o le a le toe oo foi se leo o lenei toaina i lenei mataupu ae pau lava o lea na ona avatu ona ua loaloa foi le taimi e lei maua mai se tali.

Ona ou faaiu atu ai lea o se sao o lenei itumalo i lau Afioga i le Minisita mo Punaoa Faalenatura ma Siosiomaga faapea foi Ofisa Sili o le Matagaluega ae moni lava i Minisita Lagolago ae pei o lau Afioga i le Minisita ma Ofisa o le Punaoa, aemaise foi le Esetete Tausi aemaise foi le Ofisa Sili o Saienisi. E momoli atu ai le faafetai ma le faamalo i galuega fita o lo o faapena ona feagai ai ma lau Afioga i le Minisita ma Ofisa Sili o le Matagaluega ua faapena ona i ai se sao faatauva'a o lenei sui usufono. Faamalo galulue ou te talitonu e fai sina lavelave o le tele o galuega fai i totonu o le Matagaluega ae talitonu o lena e alofagia e le Atua.

Ae nao nai talosaga lava a le matou itumalo e pei lava ona faaleo muamua i se lapisi mo le matou itumalo e le gata i Aleipata Itupa i Luga aua o lena e silafia e le Malo ua malosi lava le atinae o tagata tafafao mai mai fafo i si o matou itumalo. E pei o nai faafitauli o le tuai atu o loli lapisi ae ua vave le tele o lapisi aemaise lava i le atinae o tagata tafafao maimoa mai fafo. Po o le a se tofa i lau Afioga mo le lumanai aua e umi foi se taimi o fuafua lea faamoemoe ae aoga tele mo le matou itumalo.

Ona faaumna atu ai lea o se faamatalaga i se mataupu mulimuli lau Afioga i le Minisita ou te talitonu ua i ai le mataupu a lenei itumalo i lau Afioga i le Minisita ma le Ofisa Sili o Pulega o le Matagaluega o Punaoa Faalenatura ma Siosiomaga. O lena foi ua i ai sailiiliga ma suesuega e pei ona faia i le Aleipata Marine Protection Area ae talu ai ona o le tatalo mai pea o le matou itumalo e fia faafofoga mai ua afea i sau faamatalaga le polokalame lenei. O le ala lea ua ou toe faaleo atu ai leaga o la e faafofoga mai lou itumalo lea ua ou taua i lenei vaega o le aso po o le a se tulaga ua i ai sailiiliga a le Matagaluega aua ou te talitonu o se atinae taua mo le itumalo ae pei e faafoliga mai ua vale tuulima le agalelei o e na agalelei mai i lenei polokalame.

Ia o se sao lea o lenei itumalo lau Afioga i le Fofoga Fetalai o le a foi se faafofoga i se tala ua foi ua sala po o se pati ua le.....ia malu ave i fale i lou finagalo e faapena foi i Minisita i se tala foi a lenei itumalo e faamalulu atu. Ae na ona ou faapea atu ia alofagia e le Atua lau Afioga i le Palemia aemaise le Aiga Minisita, Taitai o le Itu Agai ma sui usufono mamalu uma o lenei Palemene aua lo tatou feagai ai ma tiute na aumai ai tatou e itumalo taitasi i totonu o le Maota o le atunuu. Ia faamanuia foi le Atua i afioga i Ofisa Sili o Pulega o Matagaluega taitasi aemaise o Faalapotopotoga a le Malo aua e le faagaloina la outou fatuaiga tausii o lo o vae ma lima i ai le Malo ae a fuafuaga fai mo le lumanai, e le gata i lea ao se manuia o Samoa.

E pei o se faamatalaga lena i lenei afiafi ia manuia tele toe taimi o totoe i le Alii.

FOFOGA FETALAI: Malo faafetai saunoa i le sui usufono mamalu mo Aleipata Itupa i Luga, ou te talitonu ua taua lou sao ma fautuaga ua tuuina atu i le Palemia aemaise le Kapeneta ma le faafofogaaga a le Maota.

O lo o avanoa pea le Maota mo se isi sui usufono e fia saunoa. Tulai maia lea Itu o le Maota i lau Afioga i le Minisita Lagolago o se tasi o sui usufono mo Faasaleleaga Nu.1, Gatoloaifaana Amataga Alesana Gidlow.

Tulai mai le sui usufono e saunoa.

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1): Faafetai tele i lau Afioga i le Fofoga Fetalai mo le avanoa o se tasi o sui usufono mo Faasaleleaga Nu.1.

E faafetai atu i lau Afioga i le Fofoga Fetalai aemaise foi le mamalu o le Palemene i le afio o lau Afioga i le Palemene aemaise foi Minisita o le Kapeneta, lau Afioga i le Taitai o le Itu Agai faapea foi le mamalu o sui usufono o le Palemene.

E faatalofa atu foi i Faauluuluga o Matagaluega ma Faalapotopotoga Tumaoti a le Malo ua tatou faatasi i lenei itula o le aso. E le gata i lea o le Susuga i le Failautusi o le Fono Aoaofaitulafono ma le Matagaluega o lo o lima ma vae i ai galuega a le Palemene. E faapea foi ona faatalofa atu i le faatasi ai ma nisi o alo o le atunuu ua auai faatasi mai e molimauina galuega faa Palemene a Samoa. Tau ina ia alofa le Atua ia aoga le tou faatasi mai.

Ou te faatalofa aua le tapuaiga a Samoa i Lana Afioga Mamalu, O le Ao o le Malo ma le Masiofo, Sui o le Fono a Sui Tofia ma le Masiofo, Afioga i le Faamasino Sili ma le Vaega o Faamasinoga aemaise foi alii ma tamaitai faamasino ma faamasino faatonu.

O le faafogafoga tapuai mai a le Usoga a Tumua ma Pule, Ituu ma Alataua, Aiga i le Tai ma le Vaa o Fonoti e faatalofa atu. O le faafogafoga mai o le Aufaigaluega Paia a le Atua, o lo o latou nofo tatalo ma nono manu aua se manuia o Samoa atoa ae le gata i lea o le alofaiva o Taitai o Samoa. Fafafetai le tatalo.

E muliai ona ou faatalofa atu i lou itumalo mai lava i ona pa ma tuaoi, mai Maota i Salelologa seia paia Safua i Lalomalava. I le afio o Tapaau, tupu ma ee, o le aufue loloa ma tootoouli o le itumalo. O le tapuaiga a faletua ma tausii, saoa ae le gata i lea o aumaga e tua i ai le itumalo ma alaafafaga faapea foi alo ma fanau lalovaoa. E faatalofa atu i le Susuga i le Toeaina, lau Susuga Solomona Tuatagaloa ma le faletua ia Aleli faapea le paia o le Aufaigaluega a le Atua o lo o faafalelemalu i totonu o le itumalo ona o se manuia. Faafetai tatalo, faafetai tapuai mai a o alofaiva o outou sui usufono. Ia se i tapuai maia ae se i fai se manatu e tusa ai ma le Tala Faatatau o le Tupe mo le tausaga 2013/2014 e pei ona opea nei i malae.

Lau Afioga i le Fofoga Fetalai, e muamua lava ona ou avatu le agaga faafetai. Ou te faafetai i lau Afioga i le Palemia ma le mamalu o le Kapeneta, aemaise le Afioga i le Minisita o Tupe ma le Matagaluega i se Tala o le Tupe ua maeaea ona tapenaina ma saunia aua galuega fai a lo tatou atunuu. E le faigofie, aua o Samoa lava ia o se atunuu tau atiae. Ae peitai, ona o le limalima lelei ma le tagai i mea tatou te maua i o tatou lima ua mafai ai ona tulai mai se Tala o le Tupe tatou te galulue faatasi i ai. Faafetai tele.

E faapea foi ona ou fia faafetai atu i a tatou paaga mai atunuu mamao, e tele le fesoasoani pei ona tatou molimauina ua mafai ona latou agalelei mai ai i nisi o vaega e le o mafai ona o o atu i ai le tatou faasoa. E fia faaleo i i le agaga faafetai i a tatou paaga mai atunuu mamao. E matua lagolagoina e lou nei sui usufono le Tala o le Tupe e pei ona opea nei i le malae, aemaise o lou iloa o lo o avea se tasi o sui usufono mo Faasaleleaga Nu.1 e saunoa ma tagai

i le faataatiaina ma le faataotoina o le Tala o le Tupe o lenei tausaga, lou soa sui usufono lea ia Magele. O le paia lava lea i le Aiga Salevalasi. O le mea la lea, e leai se tala tele, na o le faaopoopo atu o lou lagolago i le ioeina o le Tala o le Tupe i lenei tausaga. Ma e talitonu foi le manatu, o lo o mulimulitai pea le Afioga i le Palemia ma le Kapeneta ma lenei lava vaega faaupufai o Malo, o le Vaega a le HRPP, o le Vaega latou te puipuia aiatatau a Samoa, o lo o latou faamuamua pea le manulauti, 'O le mea e lelei mo Upolu, e lelei foi mo Savaii.' Ma o le faatuatuga lea. E leai se masalomia o le faasoia e pei ona vaavaai ma faalogo atu i ai. Faafetai mo nisi o galuega sa talosagaina ua uma ona faatino. Lau Afioga i le Minisita mo Galuega, Felauaiga ma Atinae Eeseese, faafetai tele. O lenei foi itumalo, o le itumalo ua masani tele i le ositaulaga. Matou te avatu le matou faatuatuga o lo o i ina le potu, le atamai ma le agaga alofa e faatino ai mea lelei uma mo Samoa atoa.

E laitiiti lava ni nai mataupu ou te fia tautala i ai e avatu ai se tuualalo a lenei foi sui usufono mo Faasaleleaga Nu.1 i le tatou galuega i lenei tausaga. Lau Afioga i le Minisita mo Punaoa Faalenatura ma le Siosiomaga, o le tulaga lava lea o le aoina o le tatou lapisi, e pei foi ona saunoa i ai nisi sui usufono i lenei aso. Ma o lo o tatou faamuamua foi le tatou beautification po o le faamatagofieina o le tatou atunuu aua a tatou malo mai fafo ina ia latou iloaina o Samoa e numera tasi i le aulelei ma le matagofie i le Pasefika.

O le matou itumalo, sa masani lava i le amataga o konekarate nei e aoina le lapisi, sa faatolu ona alu atu le ao lapisi i le vaiaso e tasi, a o nei, ua na o le faatasi lava le alu atu a le au ao lapisi. O pulega la a alii ma faipule i alaalfaga taitasi, ua latou faia se tulaga foi lea ia aua ai nei mataga auala foi nei aua le fegasoloai o le mamalu o le atunuu, ua faasa ai ona aumai ni lapisi i luma. A tea loa le aso o le aoga lapisi, ona tuu lea o lau lapisi i tua se i faatoa toe aumai foi i le aso lea e ao ai le lapisi. E pei e le faatauaina ai le agaga o lo o tatou faamuamua ina ia faatumauina le faalauleleiina o Samoa, ae le gata i lenei o le tulaga lava tau soifua maloloina ina ia tulituliloa. O le mea lea ou te tatalo atu ai i lau Afioga i le Minisita mo Punaoa Faalenatura ma le Siosiomaga, i le amataina foi o konekarate o lenei Tausaga Faaletupe Fou, se i toe tagai ane pe mafai ona toe faaopoopo le aso e aoina ai le lapisi i le matou itumalo.

O le pai atu foi o le vaa i Salelologa, lea na saunoa se tasi o sui usufono e muamua ona vaai i le pamaa. A o lau ia vaai i ai, e muamua ona vaai, tulou le mamalu o le Palemene, le lapisi lea e tuu mai i lalo o le fale lea o lo o fai ai galuega a le Matagaluega o Tina ma Tamaitai. Ua uma foi ona ou logoina e e tataua ona latou vaavaaia ia tulaga, ae pei o la e fai mai isi o le vaega lenei o le Port Authority, fai mai isi o le uafu. Ia ua fetuunai faapenei, ae ua tumau ai le mataga o le vaavaai atu lea pe a tau atu tagata tafafao maimoa mai fafo, aemaise lava o tatou tagata i le lapisi o lo o faapea ona taatia mai ai.

Ia, faafetai ua amata ona toe faaleleia galuega o le aualatele i le matou itumalo. Faafetai tele lava i lea tulaga, ae tuu atu pea i ou tafatafa lau Afioga i le Minisita mo Galuega, se i toe tagai ane i le toe faafou atoa ina ia toe umi pei foi o le faiga sa i ai, pe a ma le tolusefulu tausaga na taatia ai ona o le lelei ma le mautu o le faiga, e le i toe tagofia lava, o lea faatoa toe tagofia nei. Ia, e tuu atu pea po o le a se fuafuaga i ni seleni e maua e le tatou Malo, ina ia faapena ona fausia ai ma mautu auala mo Savaii. Aua o le isi lea mataaga i lata faalogo i ai i tagata asiasi mai fafo, o ona auala. E sili atu i lo auala o Upolu i isi taimi. E fia faatumauina lea foi mau.

E avatu foi se tuualalo e tagai anea i pe le i o o i se taimi i fuafuaga a le tatou Malo e fai ai se auala foi lea e sopo atu ai mai i i Faasaleleaga Nu.1 e o o atu ai i Vaisigano. E tatala ai foi na nofoaga aua le atiaeina o le motu. E pei foi o le auala lea e oso atu i Tiavi i Siumu, o lena ua outou tagai i ai ua fale loaloa ma ua atinae uma lena vaimea sa vaomatua ona ua mafai ona o o i ai tagata i o latou sa ma o latou nofoaga. A faapea foi o le a, pe toe faaleleia le auala lea i Patamea e alu atu ai i le Itu o Tane. O le isi foi lena auala e ono fesoasoani ai foi i le tulaga lava lea o le climate chage o lo o tatou pepese ma talanoa i ai i le foia ai o lea mataupu.

Lau Afioga i le Fofoga Fetalai, e tasi lava si mataupu lea iinei i le taulaga o lo o ou vaavaai pea i ai ma ou faapea, e lelei ona ou tautala ai, o le tulaga lea o le pedestrian crossing lea e i luma o le RSA ma le fale lea o le Faalapotopotoga o Tau'i mo Faalavelave Faafuasei. E saoloto lava tagata e omai ma o ae. A o o la i le taimi foi lea e pisi ai le traffic i le taeao, e matua fai ma faafitauli ua toe o o lava i le round about foi lea le solo a tagata, ae o lo o fai pea le fegasoloai aemaise le autalavou, e pei o la e tafafao i le latou savalivali, a o lea o lo o tutu le tele o tagata aua latou feau e tataua ona agai i ai. E faapena foi lea – o i ina foi, o lo o i ai le auala i tafatafa o le Development Bank pe right turn mai foi iinei i Sogi. Pe tataua ona taofia ia right turn, ae faataga na o le left turn aua o la e flow le traffic, aua e le o mamao le round about lele e mafai ona faaoga le traffic i le taimi lenei, aemaise o le taeao i le fegasoloai o le paia ma le mamalu o le atunuu i a latou galuega ma feau e tataua ona fai. Lau Afioga i le Fofoga Fetalai, na o le pau lena o nai motugaafa e fia tuuina atu i luma o le Palemene e fesoasoani atu ai foi se lagona ma se vaivaiga o lenei itumalo, aua ua faataatia lava nisi tulaga o matou itumalo i faleaoga ma tulaga faapena, e tuu atu pea i le faasoa limalima lelei a le tatou Kapeneta ma le tatou Malo. I se taimi ona o o mai lea, e momoli atu ai le faafetai tele. Ia manuia le tatou Fonotaga. Soifua.

FOFOGA FETALAI: Malo. Faafetai saunoa i lau Afioga i le Tamaitai Minisita Lagolago. Ou te manatu o lea ua nofo fale ia Sa Tuiamaa ma le sao ia Manuvao aua le tatou Tala o le Tupe. O lo o maua pea o tatou minute, o le 15 minute e amata ai ma le 15 minute e faaiu ai pe a ta le tatou malologa. O le a tuu atu le avanoa i se tasi o sui usufono mo Vaimauga Sisifo, Tofa Lenatai Victor Faafoi Tamapua, ua avanoa le Maota mo lau saunoaga.

Tofa LENATAI VICTOR FAAFOI TAMAPUA (Vaimauga Sisifo): Faafetai i lau Afioga i le Fofoga Fetalai mo lenei avanoa. E fia avea foi lenei avanoa e faatalofa atu ai i lau Afioga i le afio o lau Afioga i le Palemia, Sui Palemia ma le nofo a Minisita o le Kapeneta. Afio lau Afioga i le Taitai o le Itu Agai ma sui usufono uma o le Palemene o Samoa. E faatalofa atu foi i Ofisa Sili o Pulega ma Pule Sili o Matagaluega ma Faalapotopotoga ua mafai ona tatou faatasi i lenei taeao, aemaise foi o le tatou faatasi ai ma tamaitai pule ma alii, aemaise foi faiaoga ma le fanau aoga ua mafai ona tatou mafuta i lenei taeao i le tatou Fonotaga.

E faapito augafa se faatalofa i le tapuaiga a lou itumalo pele o Vaimauga Sisifo i le paia maualuga o le Fale Sagauga i le afio o Alo o Sina, le afifio o le aiga paia o Salevalasi, susu oulua Matua, afifio Tupuola, Faumuina ma Siligatusa, susu le Matua o Leupolu ma Alo o Malietoa. Afio Soalo ma le Matua o Feetau, alaalatai le Faletolu, alaalatai le Vaigalepa, alaalatai oe

Tuisamau. Liua le vai o Sinafatulua i le paia maualuga o le Fuaiupolu, i le afio o le Matua ia Tofaeono, afifio Tama o Asi ma Patu, afifio aiga e tolu, afifio le Usoalii, alaalatai i laua na tai Tamapua ma Manogiamanu ma le mamalu i le nofo a ituaiga ia Fuata, tainane le mamalu ia Ataga ma Sa Ataga.

Lau Afioga i le Fofoga Fetalai, ou te faafetai tele mo lenei avanoa ua tuuina mai e momoli atu ai se tasi vaega o le sao o lenei itumalo aua taualumaga o le talanoaina o le Tala Faatatau o le Tupe 2013/2014. E avatu foi le faamalo ma le faafetai i le Afioga i le Minisita o Tupe ma le Matagaluega e tusa ai ma le tapenaga maeamea ma le matagofie. Na pau lava o lea, tau ina ou taumafai e faaleo nisi o manaoga e le o atagia i le Tala o le Tupe a ua maea ona tuuina atu le tala tusitusia, a o faafogafoga mai si o matou itumalo.

Lau Afioga i le Minisita mo Galuega, Felauaiga ma Atinae Eeseese, o le auala taavale po o le access road lea i Vaivaseuta e agai atu lea i Magiagi. Ua manaomia le faaleleia ona ua tupu ma ola lea vaega o le itumalo, ua tele nai tagata ua nofoia, ma ni nai poumoli e fai lava si pogisa o lea vaega, faamolemole. Lona lua, o se tala tusitusia foi sa faaoo atu i se auala o se pitonuu o Faatoia i le vaega lea i Vaimauga. Lona tolu, o le toe fia faaleleia lea o le taligalu i Vaiala ma agai atu i Taumeasina ma Moataa. Fa, o le talosaga mo se vaipaipa mo le tóatele o tagata o lo o afifio ma papaaao i Afiamalu.

Lau Afioga i le Minisita mo Punaoa Faalenatura ma le Siosiomaga, o le auala savali o lo o i le togatogo i Moataa. Na pau lava lea o le auala savali o lo o mafai ona sopo ai tagata o lo o nonofo i le pito i uta e agai i tai, e faapena foi tai i uta. Aemaise foi fanau aoga ma tagata matutua i le feoaiga lea i le agai i tai ma uta. Ua manaomia le faaleleia ona a sua tutui le tai, sei tulou lava, e oo mai i luga o tulivae ia le vai lea, o lea e avatu ai le talosaga ma le agaga maualalo.

Lau Afioga i le Minisita mo Aoga, Taaloga ma Aganuu, o se faleaoga fou mo Moataa e pei ona i ai le talosaga a lenei afioaga, e fai lava sina vaapiapi o le mea o lo o i ai ma le malupuipua ona o le latalata tele i le alatele.

Lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai malo le malaga manuia, ae tau ina tuu atu pea i ou autafa o lo o faatino pea tiute o matafaioi faa-sui o le nuu le Pulenuu o le susuga ia Tuiono Uini i Magiagi faapea le sui o tina o Fetulima Malopito. E tele foi le sao o le vaega lea i le faapipiina o le cash power i Magiagi, ia o lea ua tele ina maea. O lea e avatu ai le talosaga vaivai, e a ni pefea ae toe faaee pe reinstate tofiga o Tuiono ma Fetulima e pei ona i ai aiaiga ma sui o le Malo i totonu o nuu ma afioaga.

O nai talosaga faapoopo e fia faaleo atu talu mai aafiaga mai le Afa o Eveni. Muamua, o ala o lo o tatafe ai le vai, talu mai le Afa o Eveni o lo o i ai pea le popolega ona o lo o tafe pea le vai i ni alavai fou sa sue ai le auala a le lologa i le taimi o Eveni. O timuga i le lua vaiaso talu ai, lea sa vaia foi le siisii o tafega o le vai lea i Lelata agai mai i Vaisigano, faamolemole o lea ua nofo manino tagata lea sa aafia, o le tetele o timuga, o le mafuaaga tonu lea afua ai le lologa. O lea e faaleo atu ai le talosaga ma tagai lo tatou Malo i le toe faaleleia i se tulaga sili ona puipua le alavai mai Ueligitone Magiagi agai i Lelata seia paia Vaisigano. O le tele o aiga ua toe foi uma e toe faalelei o latou fale ma o latou fanua, a o lo o faamoemoe mai i lo tatou Malo mo le puipuga mai se isi lologa.

Lona lua na ona ou fia piiama i le uso a sui usufono a lenei itumalo i le auala laupapa lea i Leone ma Maagao. E manaomia tele le faaleleia i se taimi vave ona o le poloka tele o le auala mo femalagaiga a le atunuu i taeao ma afiafi.

E faaiu sau faamatalaga i le faamalo ma le faafetai tele i le Afioga i le Minisita mo le Soifua Maloloina, faafetai mo le falemai fou a lenei itumalo. E ui ina tau o le National Hospital ae talitonu le taofi o lou manatu faapito i tagata o lenei itumalo. Pau lava lau talosaga e manatua ni tusi valaau o tupu ma ee o Vaimauga Sisifo i le aso e tatala ai le tatou Falemai Faa-Itumalo.

Lau Afioga i le Fofoga Fetalai, ia alofagia e lo tatou Tama i le lagi taualumaga o totoe o le tatou Fonotaga, alofagia le itumalo pele o Vaimauga Sisifo, aemaise o le faafofogaaga a Samoa. Soifua.

FOFOGA FETALAI: Malo, faafetai saunoa i lau Afioga i le sui usufono o le fale-Vaimauga. E manatu ua faafogafoga ma le totoa lo tatou itumalo i lenei vaega o le aso, malo fetalai, malo saunoa i le tatou Tala o le Tupe.

E manatu o lea ua toe lima minute ta le itula e 1:00, ma e i ai le talitonuga o le Nofoa ia o le a fai se tatou malologa. E talitonu foi ua alu le taeao atoa o tatou faa-aaogagase ua ou iloa ua logoina mai au e le augasese o lea ua fue le tatou suavai, ia ua tatau ona tatou o sei tali le sua e maua lo outou faasiliga malosi, o lo o saunia e le Matagaluega nei le mea e tali ai la outou sua, o tulaga o le tausia o le tatou faamalositino i meaai paleni, ia o lea o le a tatou agai ai i le moegalo ma le laumoli, ma ona teuga eseese e ala i fualaau taumafa mata ma fualaau aina o lea ua tapena i ai le tatou ofisa. E i ai le talitonuga o le a tatou toe amata i le itula e 3:00 seia aulia le itula e 7:00 ia ona faagasolo ai lea o le tatou galuega mo lenei afiafi. A o lenei taimi e momoli atu le faafetai tele mo le tatou Fonotaga.

Ou te faasilasila atu o le a faataatia ese Tausalumaga a le Fono Aoao seia aulia le itula e 3:00 i le afiafi a nanei.

Na faataatia ese Tausalumaga a le Fono Aoao i le itula e 1:00 i le aoauli seia aulia le itula e 3:00 i le aoauli.

Na nofoia le Nofoa e le Fofoga Fetalai i le itula e 3.00 i le afiafi.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2012/2013 MA LE TULAFONO TAU FAAOFI O
LE FAATATAUINA O TUPE 2013/2014 – felafolafoaiga faaauau i luga
o le faitauga faalua**

Na toe faaauau felafolafoaiga.

FOFOGA FETALAI: E momoli atu le agaga faafetai i lenei itula o le aso, o lea ua ta tonu le itula e 3:00 e pei o le tatou taimi faatulagaina na atofa ma faatuina ai le tatou lafo aua le faaauauina o la tatou Galuega seia aulia le itula e 11:00 i le po a nanei.

A o le i amataina le tatou Fono e momoli atu le faafetai i le Maota nei ona o le tulaga o le tatou Fonotaga i le aso analeila. Faafetai atu i tuleiga ma

saunoaga a sui usufono mamalu aemaise o le taumafai i le tali mai o le Malo e ala i le faamalamalamaina o mataupu sa taua. E i ai lava le talitonuga e tatau pea ona avatu le fautuaga a le Nofoa ina ia taatia i le agatonu ma mafai pea ona maua le agaga o le filemu ma le agaga o le tausisia o le faaaloaloga i totonu o lenei Maota. E i ai foi nisi o taimi e silisili a outou faamatalaga ma fealofai faalou-le-mana i tuleiga ma saunoaga, ia e le tau fai atu o lo o matua le tuu i le tofa ma le faautautaga ia te outou o tootoouli o le Atunuu. O outou o fue loloa ma tootoouli o le Malo o Samoa, ua tatou omai i Tiafau e faaauu galuega ma le faatuatuaga o le a leai se peau e laga. E toe talosaga atu ai i le tatou Maota ia lauama tootoo ma faifai malu le faiva ma ia tatou piiama i le tatou tautinoga, o le Maota e le o toe i ai se taulealea o i ai. O le Fono sili a le Atunuu na o le tofa ma le faautautaga oo ma le faautautaga loloto ma le tofa faatamalii o lea e i ai le toala faa'au tama o le mamalu ma le maualuga o Samoa.

E i ai foi le talitonuga e le na o tatou o lo o Fono, ua saunoa foi le Afioga i le Palemia e pipii tia ae mamao ala, e tu manu ae le tu logologo e fai vae o tala. E pei lava ona apoapoai atu ia seu pea le manu ae tagai i le galu. O a fuafuaga ma lavasiga o le faamoemoega aua foi le avea le naunau e fai ma mea sese. Ua outou iloa le vatapuia o Samoa o le atunuu tofi e leai se isi e toe fiu niuali pe toe fia tagata iloa ua uma ona pae laufono ma pae lafanua lo tatou atunuu, ua iloa aiga, ua iloa faleupolu, ua iloa le tagata ma lona faasinomaga ma lo tatou va nonofo ai.

O le mea lea le Maota, e le o se faatonuga a le Fofoga Fetalai, a ia outou alofagia le tausia o le mamalu ma le taualoa atoa ai ma le tausisia o a tatou Tulafono Tumau e limataitaiina ai le tatou Galuega.

E faia le malologa i le taimi anaeleia ua maea le saunoaga a se tasi o sui usufono mo Vaimauga Sisifo. O lea ua avanoa ai foi le Maota e lelei lava le vavevave mai i luga e saunoa, o le a tuai atu lava le tali a le Malo e lei atoa mai saunoaga. E fautua atu foi e oto pea le lauava mumua ae tuu nisi mea e le tutusa lona aoga mo se isi taimi e uma ane lau 30 minute ua manuia ma taunuu i le lelei fautuaga i le Malo aemaise manaoga mo Itumalo.

Tulai mai le sui usufono mo Vaisigano Nu. 1 e saunoa.

Afioga TUFUGA GAFOALEATA FAITUA (Vaisigano Nu.1): Faafetai mo le avanoa i lau Afioga i le Fofoga Fetalai. A o le i faia se faamatalaga, e muamua lava ona – ua soa foi po o ua fai sina leva o le aso, ua soli ata o itula o le aso, ae fia faamauiina le faafetai a lenei Itumalo i lau Afioga i le Fofoga Fetalai ona sa avea lava oe ma sui e ositaulaga i le taeao aua le faafetai i le Atua ma fesili atu foi i le faatasi mai o le Agaga Paia i le usugafono a Samoa i lenei aso.

Ou te faatalofa atu foi i le tapuaiga a Lana Afioga Mamalu O Le Ao o le Malo o Samoa, Afioga Tui Atua Tupua Tamasese Efi ma lau Masiofo ma le aiga. E faapea foi le tapuaiga a lau Afioga i le Sui o le Fono a Sui Tofia, Afioga i le Tui Aana Tuimalealiifano Sualauvi ma lau Masiofo ma le aiga. Susu foi lau Afioga i le Palemia ma le Kapeneta, Afioga i Alii ma le Tamaitai Minisita, afio lau Afioga i le Fofoga Fetalai ma le mamalu o le Palemene.

Afio lau Afioga i le Faamasino Sili, Afioga i Faamasino faapea le mamalu o le Ofisa o Faamasinoga, ae tainane o le tapuaiga mamala a le atunuu o lo o tui mai le mulipapaga a o alofaiva lana Palemene i le soalaupuleina o le Tulafono Tau Faaofi o le Faatatauina o Tupe 2013/2014. E le faagaloina foi

le tapuai faavailoloa ai o Ofisa Sili o Pulega o Matagaluega ma Faalapotopotoga a le Malo faapea foi Faalapotopotoga Tumaoti.

E faapena foi ona le faagaloina le tapuaiga a lenei Itumalo faa-alaalafaga o Vaisigano Nu.1, i le Afio o lau Afioga i le Tapaau, Susu mai le Gafa, afio mai le Aloalii, Maliu mai oulua Taulauniu, le Aiga Sa Oloapu ma Upu ia te oe Safune. Afio mai foi Tapu ma le Toalima, alaatai foi oe Safune, Susu Tufuga ma lo latou Aiga Sa Tufuga, Afio mai Masoe ma lo latou Aiga Sa Masoe o le uso tuofe, afio mai le Falefa o le Usoalii, afio mai lo outou maopu i lau Afioga Tupua ma le aumaga ma le Aiga Sa Taneavae, afio mai le Aiga Samoeleoi, Afio mai le Aiga Sa Lilomaiava faapea foi le Aiga o Mavaega, maliu mai oe Salafai na Faiga ma ou ituala na lua, le Falefia-ole-atiatipa o Salafai, faapea le Siufanua ma lou Fale sefulumalelua, le Fofoga o Fao faapea foi le Fofoga o Mua, tulouna foi Oe le Mu'a. O paia na o lo ta Itumalo o Vaisigano Nu. 1, malo le onosai, malo foi le tatalo, malo le tapuai. E pei lava ona ou tatalo atu i lau lauga faa-taupou ina ia tatalo ma tapuai mai e manuia ai faiva a la outou auauna i le Fono usu a le Atunuu i Tiafau nei.

E le fia faagaloina foi le galuega ma le tapuaiga o lo o fita i tuga i ai auauna paia a le Atua i totonu o le tatou Itumalo i lau Afioga i le Alii Sea aemaise foi o faafeagaiga tau i le lagi o so o se fata faitaulaga i totonu o le Itumalo, malo le galulue, malo foi le nonomanu.

Lau Afioga i le Fofoga Fetalai, e fia faamauina le faafetai a lenei sui usufono i Minisita ma Matagaluega o lo o gapatia i le taumafaiga ma le faatinoina o lenei Tulafono Tau Faaofi o le Faatatauina o Tupe 2013/2014.

Lau Afioga i le Minisita o Tupe Maua ma ana Minisita Lagolago aemaise o le Ofisa Sili o Pulega ma le Matagaluega, e ala i le tau aoaoina o tupe e tuuina atu e fai ai galuega ua fuafuaina mo le tau atiaeina o le tatou Malo. E moni lava foi ua tau galogalo nisi mea ma ua tau faaletonu le faalogo a le toaina Minisita, a o lo o aoina tupe e le o misi se vaega, malo faafetai le galulue. E maitau atu o lo o agai pea i luga le aoina o tupe faapena foi ma atinae fou ma atinae e toe faaleleia ona o mala faalenatura ma atinae tauave masani, maimau pe ana tele a tatou tupe semeamanu ua faatinoina uma mea o lo o matou tatlaio atu ai ae soia, tatou talia mea ua maua mai i lenei laueleele ua foai mai e le Atua e fai ma o tatou tofi.

E avatu foi le faafetai i lau Afioga i le Minisita o Tupe ma ana Minisita Lagolago, Ofisa Sili o Pulega ma le Matagaluega o Tupe i le tau faasoaina o tupe le 'au'au a le tatou Malo tau atiae. O lenei Tulafono Tau Faaofi o le Faatatauina o Tupe 2013/2014, ou te faaupuina o lo o atagia ai le alofa i le atunuu. E ala ona ou taua o le Tulafono Tau Faaofi o le Faatatauina o Tupe 2013/2014 e alofa, ona ua le aapa e siitia lafoga po o VAGST a ua aapa e aumai nonogatupe e mama tului lea ua faatatau mai ai le \$120.3miliona e faatumu ai le short e \$80.08miliona e togitogi i tupe maua masani ma nai nisi services nei a isi Matagaluega a le Malo ma Faalapotopotoga Tumaoti. Aua ana siitia le VAGST e aafia ai le atunuu lautele aemaise o le olomatua ma le toaina Savaii o lo o toaaga e fai sina pupu talo ma ni nai fai, ma fafaga nai mea-i-tuaolo ma nai moa e tua i ai. Ae a alu atu e faatau mai se suka, masima, aniani po o se isi lava mea e fai ai se kuka o le afiafi ua lavea i le tau o le soifuaga pe a na sii le VAGST. O nei atinae lau Afioga i le Fofoga Fetalai, ua faatatau i ai tupe faaalu a le Malo, o atinae e le mafai ona alo ai le Malo aemaise lava o le polokalame e toe faaleleia ai vaega sa aafia e le afa o Eveni, lea e faatatau mai ai le \$64miliona faatasi ai ma le taligamalo a Samoa i

fonotaga a atumotu laiti e tau atiae le tamaoaiga SLDS 2012 lea e faatatau mai ai le \$15miliona, a tuufaatasi mea ia e lua semeamanu na o le \$1miliona le short o le Tala Faatatau o Tupe 2013/2014 po o le paleni lelei foi pe a feosiai fuainumera e faaitiitia ai i le \$1miliona se isi atinae. O lenei Tulafono Tau Faaofi o le Faatatauina o Tupe 2013/2014 e faatatau i le polokalame mo le toe faaleleia o mea sa faaleagaina e le afa o Eveni, o se fuafuaga e tatau ma le alofa. Aua foi o nei mala faalenatura e le faapea na fai atu le Itu Agai e sau se i faatiga ai le Malo, po o se mala faalenatura foi na fau e le Malo, e alaga tatau ai ona faatatau nei tupe e alu e faaleleia ai mea na faaleagaina. E le na o Matagaluega a le Malo ua faatatau i ai le polokalame lea, o lea foi e i ai le \$7.5miliona ua faatatau mo polokalame o le faaleleia o Maota ma laoa o le atunuu sa faaleagaina. Ia, malo le faasoa lelei, malo foi le alofa i le atunuu. O le \$15miliona ua faaagaaga mo le fonotaga a atumotu laiti e tauatiae le tamaoaiga, SLDS 2014, o se tulaga lelei lea i mea tau exposure, e le gata mo le atunuu, a o tagata foi o le a faagaioioia ia fonotaga tetele faapea. E lelei mo tagata tafafao maimoa mai fafo, a o le poto masani o nai o tatou tagata i le faagaioioia o fonotaga tetele faapenei o le a maua ai aua le alu i luma mo tomai tau fonotaga tetele faapenei pe a tulai mai i le lumanai.

O le tulaga aoatotetele o le Tala Faatatau o le Tupe 2013/2014, e matua lagolagoina e lenei itumalo faaalaalafaga le Tala Faatatau o le Tupe agalelei ma le alofa i le atunuu.

Ona ou o o mai loa lea lau Afioga i le Fofoga Fetalai mo manaoga ma mea e fia faaleleia mo le soifua lelei o tagata o lenei itumalo. O lena ua taatia atu le – faafetai i le Afioga i le Tamaitai Minisita mo Faamasinoga mo nei galuega lelei e pei ona folasia le lipoti na saunoa i ai le sui usufono mo Vaimauga i Sisifo. A o le tagisa atu a lenei itumalo o lena ua taatia atu i ina. Ou te manatu ua silafia lelei e lau Afioga i le Tamaitai Minisita. Na pau le mea lea ua ou mauaina, o lea ua taatia atu i ina e fai i ai le faasoa.

O faleaoga lau Afioga, o lea foi na fofogaina e le sui usufono mo Alataua Sisifo le latou faleaoga, ae le o mautinoa le taimi e fai ai. A o le taimi lenei, o le faleaoga o le kolisi o lenei itumalo, na o nai potu ua matua ova le tamaitiiti ae le lava potu aoga. Ia, lau Afioga se i...afai e le talafeagai se i faatali pea i le kolisi lea i le Alataua e tuuitiitia ai le numera o tamaiti i le kolisi i le taimi nei.

Lau Afioga i le Minisita mo Fesoootaiga ma Faamatalaga Tekonolosi, o le TV lava lenei na amata ona ou talanoa atu ai i le amataga. E moni lava lau Afioga sa lelei, ae lelei mo se taimi itiiti. O le taimi lenei e ola le TV ae le umi ae amata ona nenefu. O le tala a latou o lo o i...fai mai e fautua atu i lau Afioga, e a pe a tuu mai i tai le pou aua o le maa la e i ai nei e alu i le la. A o o la i taimi o timuga ma pogisa foi, e le umi lava ona alu le TV ae nenefu. Ae a toso atu i ai se eletise, e masalo a pe le eletise ona iloa foi lea e latou e le o afaina le Matagaluega o le a tuuai loa i le EPC.

Lau Afioga i le Minisita mo Galuega, Felauaiga ma Atinae Eseeese, o lena ua faaoo atu i lau Afioga manaoga o lenei itumalo, o taligalu ma auala galue, o mea masani, vaipaipa, moli auala, faalauteleina o auala tetele. Faafetai mo le Ofisa o le Vai ua i le itumalo e fesoasoani i vaipaipa ua faaletonu. A o le tatalo, maumau pe ana tuu atu i ai ma le Ofisa o le EPC, e faaitiitia ai le tau faatalitali mai o nai o matou tagata i le card foi lea, ae a fai se ofisa e mafai lava ona e alu atu faatau mai i ina se cash power i se tau taugofie.

Lau Afioga i le Minisita mo le Soifua Maloloina, o le a ou le fesiligia lau Afioga i ni mai, ona ou te talitonu a ou fesili i le mai, e alu lenei taimi uma atu ai ma lou taimi. A o lena e taatia atu i ina le talosaga i se nofoaga e tu ai le falemai o lenei itumalo. O le nofoaga lea e pei ona ou fautuaina, e matua tele ai mea e lelei ai, advantage na i lo mea e le lelei ai. E tele naunau advantages ona o lea ua i ai uma Matagaluega a le Malo i le tulaga lea e i ai ma saogalemu aua o la e i ai leoleo, o le Ofisa Tinei Mu, e i ai ma mea uma. O se isi nofoaga lau Afioga, e taatia atu i lau Afioga le tuualalo a lenei itumalo.

O le mataupu la lea lau Afioga, mo taavale foi nei e aumai mai fafo. O nai toeaia foi mai tua sa le iloa foi le mea lea e i ai le Tulafono nei, ae ou te manatu pe a pe a fai se auala e afaina ai kamupani vaa nei e aumaia taavale. Aua o kamupani vaa nei latou te iloa lava le tausaga o taavale ae aumai pea. Na pau lava le mea o lo o manaomia o le tupe e aumai ai, ona omai loa lea o nai tagata feofeoi solo i nei pei e valea ona ua fai atu le Ofisa e le mafai ona avea le tou taavale i tua ona ua tuai le tausaga.

Ia, lau Afioga i le Fofoga Fetalai, o motugaafa ia a lenei itumalo, ia manuia tele le tapuaiga aoatetele a le Vaisigano po o le Itu Asau.

FOFOGA FETALAI: Malie le sui usufono o lo o saunoa se i tuu atu le avanoa. O se mea e fia faamalamalama po o se mea e fia faasao Saleaula?

Tofa Levaopolo Talatonu: Lau Afioga i le Fofoga Fetalai, o se mea e fia faasao. E puupuu lava si mea ona o lea ua taua e le sui usufono mamalu le mea lea ua tuuaia kamupani vaa i le tausaga o taavale ma taavale e aumai i totonu. E le o se tiute lena o kamupani vaai, ua silafia lelei lava e kamupani vaa e i ai le PFL ma le...

Na pau lava lo latou tiute o le lau mai i totonu. A o le tiute tonu lava lena e mafua ai ona faafesootai mea o custom insurance i o ma tulaga uma e ave i ai details o taavale. Ae pei o le mea lena e fia faamalamalama atu, e le o se tiute lena o kamupani vaa. Ma le faaloalo lava.

FOFOGA FETALAI: O lea ua maua e le sui usufono. Se i tuu atu muamua le avanoa i le Minisita mo Tupe Maua, o ia tonu lava e a ia le Tulafono e faatagaina ai taavale. Tulai mai le Minisita mo Tupe Maua.

Tofa Hon Tuiloma Lameko: Lau Afioga i le Fofoga Fetalai faapea sui usufono mamalu o le Maota, ua ou tulai atu e avatu foi sina faamalamalama i le sui usufono o lo o saunoa nei e uiga i taavale. Ua ou taua le tulaga lenei ina ia malamalama ai, ae ua avea le laga e le sui usufono mo Vaisigano Nu.1 e avatu ai se faamalamalama ina ia tuueseina ai le tulaga lea faapea e omai mamao i Savaii faapea Upolu nei, ae le iloa po o le a le mea e tatau ona fai po o le le totogiina o tiute. O le mea lava e tatau ona malamalama i ai, o le tiute o le tagata e okaina le taavale, ia maua lelei pepa na fausia ai le taavale, fausia mai le atunuu na fausia ai le taavale. O le mea lena ina ia malamalama lelei ai, e ao ona maua muamua pepa na ma aumai ae o la e sau le vaa e aumai taavale. Ma o tiute ma mea uma mo le aveina mai o taavale, e fua agai i le tausaga na fau ai le taavale. O i ina e fai ai fuafuaga a le Matagaluega o le Tiute e assess ai le taavale. Nei la ina ua laga e le sui usufono mamalu, atonu o lea e faalogologo mai le atunuu, ae ua tele lava taavale. O le auala faigofie lena, o le tusi i o i le tagata lea e import ina le

taavale ia aumai lelei certificate ma pepa e faamaonia ai le tausaga na fausia ia le taavale. Afai ua aumai le taavale ae le maua mai pepa na, o le auala e masani ona faaaoga le Matagaluega o Tiute, i totonu o afi o taavale, o lo o mafai ona maua i ina – le isi lena vaega o la e mafai ona faaaoga. E i ai lava taimi e feeseeseai ai. A o le fautuaga la i le saunoaga a le Ofisa, ia tusi i e na tusia le taavale, ia malamalama ma ia maua lelei mai pepa, o le original, pepa na fausia ai le taavale i le atunuu na fausia ai. Ma le faaaloalo.

FOFOGA FETALAI: Malo faafetai i le saunoaga a lau Afioga i le Minisita. Tulai mai lau Afioga i le Sui Palemia.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, o lea ua saunoa le Afioga i le Minisita o le Tiute, ma o le tulaga foi lena lea e i ai. E fesoasoani foi kamupani vaa e tau faamalamalama i tagata o aumai a latou taavale. A o le faalavelave, o le mea lea e tupu, e fiu lava le mea e fai atu i ai, ae tasi lava le latou tala, ave pea le matou taavale o la e i ai le vaega la e i Samoa e faitalia latou ma vaai ifo. O le mea la lena o lea e tupu nei, e fiu foi kamupani vaa ia e tau faamalamalama le tulaga lea e i ai taavale, ae le mafai lava nai tagata. A o le tulaga lena lau Afioga i le Fofoga Fetalai.

FOFOGA FETALAI: Mo le faasaoina o lou taimi le sui usufono mamalu, se i tulai mai le Afioga i le Sui Taitai o le Itu Agai.

Afioga Hon Aeau Peniamina Leavaiseeta: Lau Afioga i le Fofoga Fetalai, leaga e taua lava le mea lea e saunoa i ai sui usufono e uiga i taavale. Po o le a le tala i le tarako foi lea na aumai talu ai? O lona uiga la ua aumai, ona fai loa lea o outou a o lea la e fealuai nei. E le o outou lea e pau i ai le faaletonu lau Afioga?

FOFOGA FETALAI: Se i tulai mai lau Afioga i le Minisita mo Tupe Maua.

Tofa Hon Tuiloma Lameko: Lau Afioga ua le maua atu le saunoaga a le sui usufono mo Falealupo.

Afioga Hon Aeau Peniamina Leavaiseeta: Leai o la e sao lau saunoaga ua malamalama atu, o lea ua aumai nei le faaletonu i o. Ae o lau taavale na aumai o la e lelei le faaletonu ae ua atili leaga ai ia outou i le tapenaga a lau Matagaluega. Po o outou la lea e i ai le idea vave lea e toe fesui ai mea?

FOFOGA FETALAI: O lea ua maua le folasaga a le sui mamalu. Se i tulai mai lau Afioga i le Minisita mo Tupe Maua.

Tofa Hon Tuiloma Lameko: E leai ni fesuiaga e faia iinei. O lea ua ou fai atu ia aumai le taavale, aumai ma le pepa na fausiaina ai le taavale. E leai lava la se isi mea e toe fai i ai. A pepelo foi ma aumai, e maua uma lava i le Matagaluega o le Tiute. O le mea la lea o lea foi ua saunoa atu le Minisita mo Faafetauaga, o le auala faigofie lena. Ae a faaaoga nei le mea lena, o le a atili ai ona tigaina nai tagata aua o lena o le a fai le mea sese.

FOFOGA FETALAI: Malo. Ia, se i tuu atu muamua le avanoa i le Afioga i le Sui Palemia.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, e toe faaopoopo atu lava si vaega lea. O le tala lena e fai ifo i o, ave pea le matou taavale o la e faatali mai matou aiga. E le malamalama la le Ofisa o le Tiute ma le kamupani vaa po o a mea a aiga i inei e fai i mea nei pe a taunuu mai. Ae pei e foliga mai, e i ai le isi auvaega e fiafia i ai pe i ai ni latou togafiti foi nei e tau fesui ai pepa, ae le mafua la o i i le Matagaluega, po o le ofisa o vaa, e i ai foi ma isi kamupani na e faapena o latou uiga. E taumafai lava ia fai se fesui aiga ia sao ai le mea lea e taamilo ai i le Tulafono.

FOFOGA FETALAI: Malo. Mo le malamalamaaga o le Maota lau Afioga i le Minisita, e lelei leaga ua le fuatasi le mea lea o le faafitauli, e o o foi i tagata o lou itumalo, sa lavevea foi i le mea lea o tausaga faatulagaina ma tausaga faatagaina. Ae lelei lou saunoa malamalama lau Afioga i le Minisita, o a tausaga ia, o lea e faafofoga mai le atunuu, i le mea lea e atugalua i ai le sui usufono o Vaisigano Nu.1. O a tausaga ia e faagata ai taavale aumai aua o le tatou Fono lenei e salalau ia Samoa atoa, ina ia malamalama le atunuu, aua ne i toe aumaia se taavale i tua atu o le tausaga lea. Ae tuu atu le avanoa aua o le auga lena o le finagalo o le sui usufono mo Vaisigano Nu.1. Tulai mai lau Afioga i le Minisita mo Tupe Maua.

Tofa Hon Tuiloma Lameko: E tai 12 tausaga o le matua o le taavale, ae sui lava la i tausaga uma. A faapea e 12 i le tausaga lenei, e o o atu foi i le tausaga lea ua sui. O le tali atu la, e 12 tausaga le matua o le taavale e tataua ai ona aumai i inei i Samoa. Ma le faaaloalo lava.

FOFOGA FETALAI: O lona uiga o le luaafe ma le fia lea tatou te talanoa i ai?

Tofa Hon Tuiloma Lameko: O lona uiga o le 2002.

FOFOGA FETALAI: O lea ua manino le Maota, ma o lea foi ua tautino le solo a le tamaloa e ala i le Minisita ina ia aua ne'i toe tulai mai le faafitauli lenei, ma e talitonu ua le fuatasi ua oo lava agai i le Afioga i le Palemia ma agai i le Afioga i le Minisita le talosaga lenei, ua fia foi talosaga ua oo mai ia te au e le mafai ona solia e se isi le tulafono o taavale faatulagaina e aumai i le atunuu.

Lau Afioga i le sui usufono mamalu Vaisigano, e manatu ua malamalama le mataupu o le 2002. Malie sei avatu lava le avanoa i le sui usufono mamalu mai Saleaula.

Tofa Levaopolo Talatonu: Lau Afioga i le Fofoga Fetalai ma e taua le mataupu lea ua tatou talanoaina e fia maua ai foi le fesoasoani. Afai la o le 2001 lea ua i ai ia tausaga o taavale e faatagaina, masalo po o le fa ai nei o vaiaso na ave ai foi i tua le isi taavale toe faafoi atu lea, a o le tele o taavale lea sa i tai e i tua tausaga, sa faaleaoga uma lava, a o le taavale lea pei ona taua e le Afioga i le Sui Taitai o le Itu Agai o le 1992, o lea lava e lei toe

faafoia lava i totonu o le Matagaluega e fai ai se fua o le Matagaluega, lea e matua faamautu mai i le Lipoti a le Komesina o Sulufaiga. Ma le faaaloalo.

FOFOGA FETALAI: Ia o mataupu faapenei e le mafai ona ou tuu talaloaina e agai i le Maota leaga e tatau ona tapa faamaoniga, ona fai ai lea o se suesuega maumaututu e le mafai ona talanoaina. Malie le sui usufono, a le o lena o le a tapa faamaoniga o le mataupu lena ia ona tuuina mai lea i totonu o le Maota ona mafai lea ona fai ai se faaiuga a le Fofoga Fetalai. A o le taimi lena, tulai maia lau Afioga i le Minisita.

Tofa Hon Tuiloma Lameko: O le tulaga sao lava lena, ma e pei ona ou taua, o la e tusi lelei i totonu o le Tulafono, e faatoa sese lava lea ona o le tulaga lea o la e iloa ai iinei e sese tausaga o le taavale e aumai, a o la e fai lava i le aiga, aumai sei e le afaina e faigofie foi tatou i o i...O le mea la lena o lo o tupu ai nei le faaletonu, o le aumai o taavale, lea na i ai nai eseese ia talu ai nei e faaoga sese le tulaga i ai e taumafai i ai e tiga ona iloa e le o le tausaga lea o le taavale lea na aumai ai, ae o la lava e finau lava. Ia lau Afioga o le tulaga lena.

FOFOGA FETALAI: Malo. E manatu ua manino ma.....

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai e fia fesili atu lava faamolemole?

FOFOGA FETALAI: O ai e faamalamalama i ai a, a fesili e agai i o le a faataga e le Fofoga Fetalai.

Tofa Aveau Tuala Lepale Niko Palamo: I le vaega lea o le tausaga o le taavale ona o lea e i ai le tatou Tulafono foi lea o le WTO lea na saina e afaina ai taavale ma le mulipipi i lalo o le vaega lea o le WTO, e faafesili atu ai la leaga o lea ua tau mai le tausaga, e faafesili pe faapefea o le a le.....

FOFOGA FETALAI: Ia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai e sese le aumaiga o le fesili, e faauilavea i o i le saunoaga ae le o lou fesili mai o au lea na ou tu e faamalamalama le mataupu lena.

FOFOGA FETALAI: O le ala lena o le taumafai atu, malie le sui usufono mamalu o lea ua tusitusi le peni a le Afioga i le Minisita e tapa lou finagalo e agai i taavale. Ua outou silasila foi, o tagata Samoa uma la e i fafo, e ese foi le fai aikia o tagata, e aumai le faitotoa i le isi mea, aumai le afi i le isi mea, aumai le atigi taavale i le isi, e oo mai le taavale iinei ua sefulu tausaga ua eseese mai mea o le taavale. O lea lava e taumafai le Ofisa o Tiute aua e ese le ream number, ese le jersey number, ese le door number ese le engine number, ia e oo mai le taavale iinei ua ese le ituaiga taavale, e ese le afi, ese pau, ese rims. Ae malie o lea ua malamalama le mataupu, faafetai i le sui usufono mo Vaisigano ia aua nei toe sasi tatou nuu po o le tatou atunuu ia ae ua taatia 2002, aua nei i ai se taavale i tua atu o le 2002. Ae tulai maia e faaiu mai le saunoaga ua maea lou taimi.

Tofa Aveau Tuala Lepale Niko Palamo: Lau Afioga i le Fofoga Fetalai, o le mea tonu lava lea o lea ta te fia malamalama ai.

FOFOGA FETALAI: Ia sei malie lava le sui usufono mo Vaisigano.

Tofa Aveau Tuala Lepale Niko Palamo: Ona o lea ua faasalalau o lea ua faafofoga mai le atunuu i le tausaga e faagata ai taavale lea ua tau o le 2002, ae o le mea ou te fia malamalama ai, i lalo o le Tulafono lea o le WTO lea na saini e tatou o le tasi lea vaega sa...ina ne'i taitaiseseina le atunuu.....

FOFOGA FETALAI: O lea ua ou maua le sui usufono mo Faleata Sasae, o lau fesili e agai i le Minisita mo Tupe Maua, o le fesili lea e tau faamalalama o le fesili a Matia ma Tia Ituau. O le a i ai se taimi e manatu e le tuua ai lo oulva va nonofo ma le Afioga i le Sui Palemia, a uma ona tali atu lea i ai ma le WTO, e ui lava ina e lei afea i lau saunoaga, a o lea o le a taumafai e tali atu. Tulai mai le sui usufono mamalu e faaauau ma faauma mai le saunoaga.

Afioga TUFUGA GAFOALEATA FAITUA: O le mea lea na tau fesili atu ai se aafiaga o le kamupani vaa o le toe faafoi, aua a aumai nei ae talia pea e latou le aumai ae le talia le faaulufale, ona fai lea o le owner i le kamupani vaa e toe faafoi le taavale lea i Niu Sila po o fea le mea na aumai ai, ia ona faafaigofie lea i nai aiga le toe tau mai faapea e faatau parts i tai i le uafu, ma le faaaloalo.

Ua toetiiti lava galo ia te au le Afioga i le Minisita....

FOFOGA FETALAI: Malie lava le sui usufono mamalu o lo o saunoa, sei toe tuu atu lava le avanoa i le tali faaiu a le Minisita mo Tupe Maua.

Tofa Hon Tuiloma Lameko: Lau Afioga i le Fofoga Fetalai, a faapea e le faia tulaga talafeagai ma le Tulafono, o le Tulafono la e i ai e toe faafoi le taavale, e toe faafoi lava i le mea na aumai ai, e lua la, a le toe faafoiina le taavale ua auction le taavale iinei e totogi ai mea ia iinei. O le mea lea ua lelei foi le laga o le mataupu lea, aua nei maimaua le taimi e taumafai ai i nai o tatou aiga i o, aumai pea tusa lava pe iloa o la e sese le tausaga, aua o le mea lena e fai, i lalo o le Tulafono, a sese e le mafai ona satisfy, toe faafoi le taavale. Ia a o le faalavelave lena, e le iloa po o ai na te toe faafoiina, aua e le taitai toe aveva e le kamupani vaa, ioe, a o la e i ai i le Tulafono.

Tofa Levaopolo Talatonu: Lau Afioga i le Fofoga Fetalai, ia malie lava lau Afioga ua.....

FOFOGA FETALAI: Ia Saleaula.

Tofa Levaopolo Talatonu: O lea la ua saunoa manino ia le Afioga i le Minisita, a i ai se taavale e aumai e faasolitulafono le tausaga, ave i totonu, auction, ona auction mai laia ona fealuai faasolitulafono lea e tusa ai ma Tulafono....

FOFOGA FETALAI: O lea o le a ou tali atua e vave ai lea Saleaula, o le auction lea o le demolished, e demolish le taavale, e vaevae foi lea vaeane le Maota, e le faapea e auction ona ave lea toe faaoga pei o se taavale, e auction lava ona taape ai lea i tai i le tiute ona tofu lava lea o le tagata ma lana faitotoa ma lana pau e ave e le mafai ona toe faaogaina.

Tofa Hon Tuiloma Lameko: E vaevae le taavale, e avatu lava le masini tipitipi le taavale ona avane loa lea e ave e faatau le fasi mea o le taavale lea e ave e faaoga i sau taavale. Ma le faaloalo.

FOFOGA FETALAI: Ia le sui usufono mo Vaisigano Nu.1, ua iu lau saunoaga faaiu maia o lea ua malamalama lelei le tulaga e oo i ai le taavale auction o le talai taape i tai i le uafu, pe a sese le tausaga e aumai ai.

Afioga TUFUGA GAFOALEATA FAITUA: Lau Afioga i le Fofoga Fetalai, o lea ua tasi lava le Minisita lea ua galo ia te au le faafetai o le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, ona ua atoa atu i o le isi vaega o le auaunaga i le itumalo lenei, malo faafetai. E faapea foi i le Minisita mo le Matagaluega o Punaoa Faalenatura ma le Siosiomaga, o lo o i ai le SROS ma le STEC, e molimauiina e lenei sui usufono le pulea lelei o lea Matagaluega ona o vaavaaiga a le Afioga i le Minisita.

O motugaafa na lau Afioga i le Fofoga Fetalai, ia manuia tele le tapuaiga aao tetele o le itumalo o Vaisigano ia po o le itu Asau i le affio o Aiga ma Tapaau o le Itu, ia alaala mai Tootoo o Matia ma Tia Ituau, mamalu mai le tapuaiga, ia manuia foi le itumalo faa-Faipule o Vaisigano Nu.1, ia manuia foi le tapuaiga mamala a Samoa, ia maua foi e lau Afioga i le Fofoga Fetalai le faatoatoa ma le onosai e faafoe ai le Maota Fono o Samoa ina ia tau atu i sona taunuuga lelei, ae faafoi le viiga i lo tatou Atua. Faafetai mo lou avanoa, soifua ma ia manuia le Palemene o Samoa.

FOFOGA FETALAI: Malo faafetai saunoa, malo fetalai i le sui usufono mo Vaisigano Nu.1, e manatu ua taua lou finagalo i lenei taimi o le aso.

Ia e tatala atu le avanoa i se isi sui usufono e fia saunoa i le tatou Maota. Tulai maia le tatou sui usufono mo Anoanaa Sasae, tulai mai lau Afioga i le sui usufono, ua avanoa le Maota mo lau saunoaga mamalu.

Tofa ALO FULIFULI TAVEUVEU (Anoamaa Sasae): Faafetai lau Afioga i le Fofoga Fetalai mo le avanoa o le sui usufono o le itumalo o Anoamaa Sasae.

E muamua lava ona ou faatulou atu i le paia o le Maota o le Palemene o Samoa, afio lau Afioga i le Fofoga Fetalai, afio lau Afioga i le Palemia ma le paia i le Kapeneta, Afioga i Minisita, afio le Afioga i le Taitai o le Itu Agai, ma le mamalu foi o Afioga i sui usufono o lea itu, ae tainane foi Afioga i sui usufono o le tatou Palemene lenei.

O le paia foi i le tapuaiga a lou atunuu o Samoa o lo o tui mai pea le mulipapaga aua le alofaiva a lau Palemene o lea o lo o i le Maota o Samoa i lenei itula o le aso. Ae ou te faatulou atu foi i le paia o le Afaigaluega a le Atua i so o se fata faitaulaga o lo o nofo ma nonomanu aua se manuia o Samoa mo a taeao. E talitonu lava, e ui lava ina fesouai i nisi taimi lo tatou

atunuu ma oo mai faigata, ae o lo o vaaia pea le agalelei ma le alofa o le Atua, o lo o manuia pea fuafuaga fai a lo tatou atunuu aemaise lo tatou Malo.

Ia avea ia lenei itulau lau Afioga i le Fofoga Fetalai, sei taumafai atu ai se sao o lenei itumalo. A o te lei oo i sau faafetai i le Tulafono Tau Faaofi o le Faatatauina o Tupe 2013/2014, ou te fia faatalofa atu foi i lou itumalo o Anoamaa Sasae, malo le soifua, e talitonu foi, o outou paia ma outou sa e le toe oo i ai se tala a la outou auauna, pau o lea, e talitonu lava o la outou tapuaiga o lea e manuia ai le faamoemoe a la outou sui usufono aemaise o le alofaiva o le Palemene o Samoa mo tulaga manuia o le tatou atunuu.

Lau Afioga i le Fofoga Fetalai, e muamua lava ona ou fia faamauina lau faafetai ma o le mea taua lea i lenei aso ma le faamoemoe o lou sui usufono, ua leva foi ona sausaunoa le paia ma le mamalu o lenei Palemene i tulaga o le tatou tupe faasoaso o lenei tausaga fou o le a tatou oo i ai faaletupe.

Ae momoli atu lau faafetai i le Afioga i le Minisita o Tupe, aemaise foi vaega uma o le tatou Malo sa o latou lagolagosuaina lenei Tala o le Tupe. E talitonu e le o se galuega faigofie, aua e tele faafitauli e tatou te le mailoa le taimi e oo mai ai e ono faafuasei ai le manaomia o le tele o le tupe e fesoasoani aua lo tatou atunuu. E i ai le Afa o Eveni faatoa maea atu nei, e talitonu lava foi sa tele ni faaupuga ona o le manaomia o le fesoasoani. Peitai sa taumafai lava lo tatou Malo e sailiili se seleni aua tulaga faaletonu sa afatia ai. Ma o lenei lava la ua aliai mai foi i lenei Tala o le Tupe e talitonu le taofi, o lea lava e vaaia le agalelei o le Atua, aua ana faaletonu ma tatou le vaai mamao i ia faafitauli, atonu o le a faaletonu foi se Tala o le Tupe po o se fuafuaga mamao a lo tatou Malo, aua alumaga a lo tatou Malo i lenei tausaga faaletupe. O le mea lea e momoli atu ai le agaga faafetai i lau Afioga i le Minisita aemaise o Matagaluega uma a le Malo sa galulue ma fuafuaina le utaga mamao lea ua vaaia ai le ata lelei o le Tulafono Tau Faaofi o le Faatatauina o Tupe 2013/2014 mo le savaliga o lenei tausaga faaletupe.

E momoli foi lau faafetai i le Minisita o Tupe Maua a le atunuu, e ui lava o le matou vaega ae ou te manatu lava o le Afioga i le Minisita ma le Matagaluega, o lo o vaaia pea i tausaga uma o le atagia mai ma le matagofie o le aoina mai o tupe mai totonu o le tatou atunuu. O le tasi lea fesoasoani tele i le Malo, o le mea lea e momoli atu ai le agaga faafetai tele ona o le aliali mai ai o lo outou faamaoni ma le galulue punouai aua le taumafai mo le atiaeina o lo tatou atunuu.

Ona oo mai ai lea o se faamatalag e tusa ai ma le faamoemoe o lenei Itumalo, lau Afioga i le Fofoga Fetalai, ou te manatu lava o se tulaga lelei lea e vaai i ai sui usufono mamalu o le Palemene, e vaai agai i totonu o le Itumalo i mea o lo o tutupu ai ma taumafai e faaleleia ina ia oo i se tulaga lelei. E muamua lava ona ou faafetai atu i lau Afioga i le Minisita mo Punaoa Faalenatura ma Siosiomaga, i le talosaga sa tuuina atu i lou nuu o Lalomauga, o nei lava talosaga e aafia ai lo matou nuu i Falevao faatasi ai ma Falefa ma Manunu. Po o le lua vaiaso talu ai sa matou afea ai lou Ofisa ma talosagaina ona ua vaaia lava le pagatia o nei alaalfaga ona o vaitafe. O Lalomauga ua toetoe lava a tafe le vai i le ogatotonu o le nuu, a o le vai foi e le laititi, a oo atu i Falevao le malosi e tapunia atoa le aualatele. O le tulaga foi o lo o i ai Falevao i le vaega tonu o lo o i ai nei le faleaoga o Falevao o lo o fai, o i ina e alu ese ai le vai ma lona alavai masani ona alu atu lea ma tafia atu ai nisi o aiga aemaise o le auala tele ma le mafai ai ona feoi atu le la itu i Saute o le atunuu. E momoli atu le faafetai i lau Afioga ona o lou talia ma le fiafia o

lenei savali. E faaalua lea tulaga ona sa matou talosagaina ai lau Afioga ina ia e oo atu se i e tagai ma silasila i mafatiaga o lenei alaafaga, sat alia lelei e lau afioga mai le tele o ou tiute ma faiva i lea aso ma lea aso. Sa e molimauina lava le tulaga faigata o nei alaafaga, e faafetai atu ai le faafetai tele e le gata i lau Afioga a o le vaega ua fitoi tonu i ai lenei faigata e pei ona i ai.

Ia tatou tuu i luma o le Atua e fesoasoani mai i lenei faamoemoe, o le a le masalosalo foi lenei sui usufono ma le Itumalo i le tulaga o le a oo i ai le faamoemoe ina ia faaleleia, malo faafetai. E le gata i lea e talosaga atu ai ona o lenei tafega talu ai e pei ona e silasila i ai o lo o fau ai le maa sa i ai i totonu e fai ma mea ua soona alu ese ai le suavai ua le iloga le mea e tafe ai, e talosaga atu i se masini e tataua ona sua ese ai le vai ae faatulaga ina ia o faatasi i se alavai e tasi.

E le gata i lea a o lo o i ai foi le talosaga a lenei nuu o Falefa, faatasi ai ma nai nuu nei i tua o Sauano ma Saletele e manaomia lava ni taligalu. O le mea lava lea ina ua ou nofoia le Nofoa o le Itumalo, sa tuitui atu lava ma talosaga mai, o lenei foi ua i ou aao le talosaga mo taligalu o nei nuu. O Sauno ma Saletele e pei lava ona outou silasila i ai e lumafale i le moana ae tuafale i le papa, a tupu mai se faaletonu e leai se mea e sulufai i ai le soifua o nei tagata. O le mea lea e talosaga atu ai se i e tagai ane o le a se taimi a lava lau faasoa mo lenei tausaga ia alofa ane i nai nuu nei. Ia e faapea foi i lo matou nuu o Falefa ua leva ona tuuina atu le talosaga ona o le popolega o nuu e latalata i le sami a faaletonu le tau ma toe oo mai se isi mala faalenatura o lenei popolega.

Ona oo mai ai lea i lau Afioga i le Minisita mo Galuega, Felauaiga ma Atinae Esee, e le o toe po se lilo o lenei ua taoto atu le talosaga tusinga. E talosaga atu i lau Afioga e le gata ina ma o atu ma le Pulenuu o Manunu, o le auala o lenei nuu ua leva ona leaga e amata atu lava i Saoluafata e oo atu i Manunu. Ua uma ona valita ao le mea ua tupu ua le o toe vaaia se ta a ua afaina ai taavale afi o lenei nuu, o le upu moni lava a e alu atu i Saoluafata agai i Manunu e vave ai lou taunuu ma i Apia pe a e sau mai Saoluafata. E talosaga atu ai ina ia tagai ane i se avanoa e faaleleia ai le auala o lenei alaafaga.

Sa taloaga atu foi i le auala o Sauano ma Saletele e i ai le auvai e tafe tonu i le auala, o le isi itu atoa o le auala a ua leai se paipa e le o se auala laupapa a o paipa sa alu ai ae ua lauitiiti a le auala o lenei alaafaga. E le gata i lea sa taloaga atu foi i le auala o Sauano ma Saletele i le auvai e tafe tonu lava i le auala, o le isi itu atoa o le auala a ua leai se paipa, e le o se auala laupapa a o paipa sa alu ai, ua leai se paipa i le isi itu ae ua toe lauitiiti lava se vaega o lo o alu ai le auala o taavale o lenei nuu. Ae alofa ina ia tagai ane po o i ai se avanoa, po o i ai foi se paipa o taatia solo i le Matagaluega se i faaleleia ai lea tulaga – na o le ala vai ae tafe tonu lava i le moa o le auala, o le auala foi ua lata i le sami ma ua afaina ai le paia lea e alu ai le suavai.

O le tasi talosaga a lenei nuu e vaaia lava le matagofie o galuega i autafa o le auala i le amata atu lava i Apia seia oo i tua, a o le nuu lenei e mamao ese ma le main road ae i ai lava lo latou auala, o autafa o le auala ua toe ititi maua i niu i vao o le autafa ala e leai se konekarate e teuina auala. E talosaga atu ai pe maua se konekarate moa vao latou te teuina e le gata i tagata asiasi maimoa mai fafo a o le feoi ai o le mamalu o le atunuu ina ia matagofie lea tulaga.

Ona oo mai lea i auala galue, e taloaga atu foi i le Minisita o Galuega, Felauaiga ma Atinae Eseeese ina ia tagai ane i auala galue o lo matou nuu o Falefa ua faaleagaina. E le gata i lea e manaomia ni moli o le faleaoga e i uta i le auala, e manaomia le toe fia faaleleia ona o le toatele o le nuu o lo o nonofo i uta o le auala galue, se i tagai ane i lau faasoa pe talafeagai i lenei tausaga po o se taimi lava e te finagalo i ai ma lava ai lau faasoa ina ia faataunuu le faaleleia o le tulaga. E faapea foi i le auala galue o Lufilufi, e pei ona ou taua i le ogatotonu o lea tausaga o le toatele o aiga o lo o nonofo i uta a ua faaleagaina le auala ona o lo o tatafe ai vai pe a oo ina timuga. E le gata i lea o lo o manaomia foi ni nai moli i lea auala aua le afioaga o lo o feoi ai.

O le talosaga i le Minisita o Fesootaiga o lea ua tatou tu lata i le taaloga a le Manu Samoa, o televisea lo matou Itumalo talu mai lava ona maea le afa o lo o faaletonu le ala ata e tasi foi le channel na o le TV1. O le tulaga o lo o i ai le televise i le taimi nei ta te fiu e fealuai ma le antenna sa ou faapea na o au ae faapena uma i aiga. A fai e 15 po o le 30 le aofai o tagata e taaalo a o ata o le televise tai 30 aua e tai 15 tagata taaalo, ou te talitonu e le o se faaletonu tele masalo a faaleleia le pou ona toe foi lea i le tulaga lelei. E talosaga atu ina ia oo atu i le Aso Toonai ua maea faalelei ina ia lelei ai foi le maimoa ma le tapuaiga mo le tatou au lakapi.

Lau Afioga i le Fofoga Fetalai, ona pau lea o nai vaega e avatu ai se sao o lenei Itumalo, e le gata o le faafetai ona o le tupe faasoa a le Malo a o nai mea e tuitui atu ai finagalo o Minisita aua nai mea o lo o fia faaleleia mo lenei Itumalo. E momoli atu le agaga faafetai ona o le lava papale i lenei aso, ou te talitonu ua iu manuia i le alofa ma le agalelei o le Atua. Ia manuia toe itula o totoe o le tatou Palemene. Soifua.

FOFOGA FETALAI: Malo faafetai saunoa i le sui usufono mo Anoamaa Sasae, malo timai, faafetai fautua mo le Malo ma le Kapeneta. Ua avanoa le Maota mo a tatou sui usufono e le i saunoa o lo o lava lava le taimi.

Afioga Lafaitale Patrick Leiataualesa: Lau Afioga i le Fofoga Fetalai ou te iloa ua leai se isi, o le a le mea e le Tali ai loa le Malo?

FOFOGA FETALAI: Malie le Alataua, ou te malamalama lelei o oe lava ia o le tau, ae faapalepale mai ona e taua taualumaga ona e i ai nai isi sui usufono ia e fia saunoa.

O lea ua faailo mai le faamoemoe o Faasaleleaga Nu.3. Tulai maia lau Afioga i le Taulagi, Liolefaga ma le Faleaana, Toleafoa ma Tagata Matutua. Ua tatau foi ona tulai mai Tootouli o lena Itu o le Maota ona ua leva ona e faapalepale i Tualumaga ma le faamoemoe.

Aua e te faafofoga tele ia Lealailepule ma Papalii. Tulai mai oe e faaloalua ou aao ma sauni mai mo le saunoaga.

Tulai mai lau Afioga i le sui usufono mamalu Tuileutu, le sui usufono mo Faasaleleaga Nu.3.

Tofa TUILEUTU ALAVAA VOI (Faasaleleaga Nu.3): E fanolua i vasa ae lua mata toese. Faafetai. O le Maota o le malae o Malo Tiafau nei. E muamua ona ou faatulou, o lea ua tuvaga figota ae olioli livaliva. Ua logo i Tualogo ua logo i Sipilia e pei o le tala ia Filomemea. I le ua faliu le la ua faatifa le fetu, ua lagona e tino le vaivai ina ua faapea mai ua tauafiafi le aso.

O le aso e faalele fulu aitu o Salafai ae maitau upu e o nonofo i tuaoi. O lea e talitonu ua fili le tupetoga ma le manoa. Ua logo le afa i le afa ae ifo le fau i le fau. O lo o lupe le lafo a Lualemana aua le Tala o le Tupe. Ae muamua ia ona ou faatulou ma ou faatulou pea i paia o Samoa mai mauga Silisili seia paia ona vanu tafato i ona pa tuaoi, o ona malae fonon, i ona maota sa mai Manua i Falealupo. Masalo e le toe auaua aua ua maioio ua uma ona tuu fata mea ia na amata mai le vavau e oo mai i aso nei ma e oo lava ie lua. O paia o Samoa ua taotooto.

Tulouna le afio o Lana Afioga Mamalu O Le Ao o le Malo ma le Masiofo, o le Sui Ao ma le Masiofo, le taotoga a i'a e fia. O paia ia i Tupu o Samoa, Aiga o Tupu, Aiga o Nofo, Aiga o Papa ma Aiga na Tafaifa. Le Usoga a Pule ma Tumua, Ituaui ma Alataua, Aiga i le Tai ma le Vaa o Fonoti, Faleupolu o Papa ma Faleupolu o Tofiga.

E faapea foi o tatou uso i Sasae, le nofo a Tootoo ma le Tau Maopu, Faleagafulu faapea foi Manua, le Laau na Amotasi ma Tootoo o le Faleula ma ona upu tumau. E le suia e oo i le faavavau. O paia ia o Samoa, ae ou te fia oo foi i le Afaigaluega Paia o lo o latou tauasu se vai ma asuasua malu agaga ma faamoemoe ina ia tumau Samoa i lona Faavae, e Faavae Samoa i le Atua. Tatou te asamo i le Atua aua se manuia.

Ona faapea ai lea o le taofi, e le galo foi Afia i si ona vao i le afio o le Faamasino Sili ma le Aiga Faamasino ma lo latou Ofisa paia. E faapea foi le afio mai o Tupu ma Ee i Faaululuga o Matagaluga aua o le lima taumataua lea o Samoa.

O lenei aso, e ese le pupula a le la e ese foi le pupula a le masina, e ese foi le pupula a le isi fetu i le isi fetu aua e le malu pea le sami. A lagalaga, fatifati ma pisi le galu, e talitonu e maua i ina se tautai. O lenei aso ou te talitonu e muamua foi ona ou oo i lou itumalo ne i faapea ane ai ua ou faatuatuai atu ai ua.....

E ui i lea le paia i le Taulagi, na o oe lava le aiga e tau i le lagi, e leai lava se isi aiga. O ou paia e mai Siufaga ma Vai o le Alii, le la ituvai e afio ai le Sao Tofa ma le Aiga Sa-Tofa, Susu Sua o oe o le Maopu faapea foi Usoalii ma alo o Vaafusuaga, Tailatau ma le Falefitu o Salemuliga, Ogevasa ma Taitaii ma Fagaoneone, o ou maota sa na.

E faapea lea itu i Saasaai i le afio o Vaafusuaga, le Suafa o Tea ma le paia i le Usoalii, aemaise foi o lau pule Leuu ma oe le Matua Fetalai Segi ma le mamalu ia Salemuliga. Alii o le Toaono e tutusa uma mata o tao, e leai se tao e..... Nonumalo, lau Afioga Unasa, Tooala, Lefinealii ma Soaemalagale e faamemelo i ai le Faleaana ma Salemuliga ma le Toafa faapea foi Tagata o le Aava lea e i ai au lenei.

Lou itumalo, ta te fia utuutu vai e te faalanu ai, ae paga e mativa ma le atoatoa. E ui i lea, o le a taumafai atu se sao o lo outou sui ma lo outou tofi aua se manuia o lo tatou itumalo ae faapea foi le faafofoga a Samoa.

O le mea muamua e avatu le faamalo ae mulimuli ou oo i le tupe aua pe fai lava i fea, ou te talitonu lava o magavai uma lava e i ai le mea e toa i ai, o le mulivai. Ae muamua ona ou faapea ane, faafetai tele i lau Afioga i le Minisita mo Galuga, Felauaiga ma Atinae Eeseese. E tasi mai Saua ae lua i Matautu, e tasi lava le Itu Agai lea e maua ai le auala galue lea, na o si toeaina. Faafetai, o oe lava o le sifi. O le agaga mauuluga e talosaga atu. Ou te talosaga foi i le Palemia ma le Malo, ae a pe a polokalame faapea a uma loa Faasaleleaga Nu.3 ona faasolosolo loa lea ma le siigata o masini i itumalo, ae aua le faapea

e uma lea konekarate ave i o e fai fea ma fea. A uma loa le matou auala ona faasoo loa lea o Savaii ma toe faasolo mai i Upolu. Aua e i ai isi auala ia ua leaga totonu ma ua toe leaga ai a tatou auala tetele talu ai le le uma o le konekarate i ina, ae toe sosoo atu ma le isi itumalo, ae faafetai tele i lau Afioga i le Minisita ona ua maua se auala o lenei itumalo, ae talosaga atu e moomia foi e le isi nuu la e i talaatu atu i Saipipi. Toe tolu lava pitonuu tetele la e i ai Sapini, Malae ma Luua. Na ona tuutuu atu i ou autafa lea vaega ae alofa foi i le faasoa ma le le auau.

O le itu lena i auala galue, a o le isi itu lea i moli leaga ua oo mai aso faigata e pei ona taua e le Tusi Paia, "O aso faigata e oo mai ai puapuaga." Ua tele le lata mai o le sami, ua tele le matagi, ua pisia foi fale, ua ao lava ona tala i uta. E moomia ni nai moli i uta i auala galue ona ua fai i ai, ua sulu i ai ae faamalo atu i lau Afioga i le Minisita.

Ona oo mai lea i le Minisita mo Punaoa Faalenatura ma le Siosiomaga ma Eleele. O le talosaga vaivai a lou itumalo leaga a outou silasila i ai, e sau faapea Faga ae oso faapea Tuasivi (*na faatusa i ona aao*), e pei se faamuli aliao. A kolosi la faapea, e o ifo uma lava Safotulafai i inei ae pupuni mai e Tapueelele le matou faletolu. Ni a fa a lau afioga, e le mo nei ae silasila ae sii atu se isi elele i tua atu o Vaiaata, ae ave i ai Saipipi, Saasaai ma Faga. Tuu atu i ai aua o le fatu lea o Samoa, o faatoaga. E avatu ai vaimalu i lau Afioga i le Minisita, tau ina tuu ane i ou autafa se tulaga faapena ma le agaga faaaloalo.

Lau Afioga i le Minisita mo Aoga, Taaloga ma Aganuu, sina fesoasoani mo faleaoga o lenei itumalo. O matou a oo ina lulu le mafuie e manunu, se i tau fesoasoani atu i le talosaga a lo matou nuu i Faga, e faapea foi Saasaai. A pa le faititili e alu i fafo le tuli a tamaiti. O talosaga e lafo atu lava i autafa o lau Afioga i le Minisita ona ua le lelei. E le i leva tele le faleaoga ona o le EU lava..... ae ona ua ese nei aso ua tele mafuie, o le mea lena ua tai ave ave tutupu mai ni pefea, o lena e talosaga atu ai i lau Afioga i le Minisita mo Aoga, Taaloga ma Aganuu. O le talosaga lena a lo matou itumalo.

Ona ou oo mai lea i le Minisita mo Leoleo, Falepuipui ma Auaunaga tau Tinei Mu. O au ou te i Tuasivi lava i le tele o aso. A ou tilotilo i le vao la e i tafaala faafesagai ma le faleoloa tele lea, e lavea ai foi le Afioga i le Minisita mo Faamasinoga ma Pulega tau Faamasinoga. O le leaga ia o le auala lea e alu i tai. Se i tuu ane lava sina.....o la e i ai le fale tutasi lea e o uma i ai Savaii ma le tatou Usoga i faamasinoga, a o i ina la i tafaala i le faafesagai ai, o aseta lapopoa ia a Savaii e i ai le Ofisa o Leoleo, Falemai ma le Ofisa o Faamasinoga. O le lona tolu pe a faalagi Samoa, o le Faamasino Sili ma Alii o le Faamasinoga, ae a silasila la i ai, e fai o le patupatu ma gaoa i le alu i tai i le fale faamasino, a o i ina i tafaala. Ona ou fesili lea, po o fea faasalaga ia e fai nei e tai fia itula ae le aveane e pei o aso ia, o nai vaega foi ia e faasala i le Toese, o ane e vele i luga le vao aua e fepasiai ai tagata mafaufau e pei o turisi aua o la e i ai le Samoa Post, National Bank, o le Red Cross, o le Victim, o la e i ai uma lava, o le Ofisa o Faamasinoga ma le Falemai. E le manaia i le vaai, ae na ona faoololomaau ma tuualalo, ae e le aoaia e Laupua Tamafaiga, a o nai motugaafa.

FOFOGA FETALAI: Malie le sui usufono o lo o saunoa, se i tuu atu le avanoa i le Minisita leaga o lea ua taua le Matagaluega.

Se i tulai mai le Minisita mo Leoleo, Falepuipui ma Auaunaga tau Tinei Mu.

Afioga Hon Sala Fata Lisati Pinati: E momoli atu le agaga faafetai i le uso a sui usufono ua laga se tasi o mataupu taua tele. Ua taua le auala lea e alu i tai i le Matagaluega o Faamasinoga ma Pulega tau Faamasinoga i Tuasivi i le mea o lo o i ai le Ofisa o Leoleo. Ou te faafetai atu i le sui usufono mo Faasaleleaga Nu.3 ma o se vaaiga sili le fetai ma le tulaga e pei ona taua i le aso. Masalo o le aso a taeao o le a faapea ona galueaina ai ma faaleleia tulaga uma ia ma lou faaaloalo lava. O taeao e faatino ai.

FOFOGA FETALAI: O lea ua tali atugaluga le sui usufono mo Faasaleleaga Nu.3.

Tulai mai le sui usufono e faaauau le saunoaga.

Tofa TUILEUTU ALAVAA VOI: Faafetai i lau Afioga i le Minisita mo Leoleo ma Falepuipui faafetai lava. O le tali filemu e liliuese ai le ita ao le tali tiga e tupu ai le ita.

Ona ou oo mai lea i le isi itu lea a ou tilotilo i le femaliuai ma le feafifioai o Samoa, o tupu ma tamalii o Mulifanua ma Salelologa a silasila i ai, ou te talosaga atu ae a pe a tuutuu i totonu pa uaea ma fai lelei se auala e laina ai taavale e le gata i Mulifanua ao Salelologa. Ae ou te fai atu o le omoomo ma le vaivaia ae afifio ai outou afioga i i i aso uma lava. Ae a pe a tuu ni nai mita e tuu ai le pa uaea lea i tafatafa pe lua mita o le auala sima e laina ai taavale ua tele tagata ua aafia i le itu lava lea o le alu i Falelatai. Ou te talanoa atu o le vaiaso lea na pau ai le taavale a le turisi i le lua le la e i o i tala atu o le faleoloa o Eveni tuai. O le turisi e alu e alu atu e alu faapea, e liliu mai lana taavale e sau e tu i le laina ae alu atu pau i le lua lea e i ae suesue atu o le lua o le cable o telefoni ua le toe faaogaina. O lea ou te talanoa i mea.....

FOFOGA FETALAI: Malie le sui usufono o saunoa sei tuu atu le avanoa i le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: Lau Afioga i le Fofoga Fetalai e aoga foi le matou fesoasoani atu ae faafetai lava mo....ao la ua uma ona talanoa ma le Pulega o Uafu ma Taulaga la ua amata ona faatitia fuafuaga e fai se topographical survey o Mulifanua ma Salelologa. O la foi ua faatitia fuafuaga e le toe paka ai se taavale i fafo i luga o le auala i Mulifanua ae o le a taumafai e tuu mai i totonu ma faaoga uma le eleele la e i ai. O nisi foi o fuafuaga i nisi o faleoloa e lisi ai luga o uafu ia ina ia mafai ona maua le auaunaga ma maua ai nisi tupe a le Pulega o Uafu ma Taulaga ae faafetai mo ia vaega ua faagaioi. Ma lou faaaloalo lava.

FOFOGA FETALAI: Malo faafetai i lau Afioga i le Minisita mo le saunoaga faamalamalama.

Tulai mai le sui usufono mo Faasaleleaga Nu.3 e faaauau le saunoaga.

Tofa TUILEUTU ALAVAA VOI: Faafetai tele i lau Afioga i le Minisita semanu oe e lagolago mai ao alofa molipo e manatu aemaise lava a outou afioga mamalu o le Malo aemaise o mea ia e taia i le vaai ma savalia i aso uma. Po o le a le matagofie o le fale i le togavao ae leai se isi e alu e molimau ao mea ia e feafioai pea o atu ai ma papalagi ma turisi i aso uma. Ia a silasila i

le gate lea ae tuu ia nei pea mai lou uso a Minisita ai e.....ao le faitotoa lea e o ai pasi i totonu o le uafu e i i ai lava taavale i omoomo o la e lava e i ai i le taimi lenei ao la e sa eli mai le asuemu i o pe aumai ni nai amuamu e tanutanu ai pea ua leai foi se mea. A o atu la turisi tasi lea mea.....ou te tautala i le mea na tupu i le vaiaso lea, ae sue atu o le lua lava lena, nai tamai mea foi ia pei ni circle lea e i lalo o le tele lava o nuu e i ai mea faapea la e i tala atu o le fale o Eveni tuai, e mimilo mai ae alu atoa le pau i lalo ona o atu lea o tama ou fai atu i ai e o e sii atoa i luga le taavale ae aua o le turisi. E tasi le turisi ae soo uma le lalolagi i le upu a le turisi lena o Samoa e le lelei. Ia ona matou o lea sue mai tulou le Maota laau uumi e faatutu ai faasilisili i luga ia iloa e tagata. O nai manatu na, o mea ia e pei o lau vaai lena e le gata i le tatou atunuu aemaise o e femalagaai aua o la e lelei Salelologa ao Mulifanua ua tele taavale e aafia i le ramp o le uafu lea e maualalo tele. O le mea lea e tupu i aso uma ae a pe a toe sii pe upgrade laititi i luma i i le ramp o le vaa, o le tele lava o taavale maualalo e o atu le auvaa laga i luga i ogalaau tulou le Maota ao la e lelei Salelologa pe sua pe pe e sologa lelei lava. Na ona tuu atu lava ao mea ia e vaai i ai i taimi uma, i le taimi ma lona ai o le tai ma lona ta mea ia ao le tele o mea e faamalo atu ia outou afioga aemaise foi e le faapito i se tasi le mamalu foi o lenei aso lea ua lupe le lafo a Lualemana aveai, aveai ona taoto lea i lagatonu ma ee i lagapue tulaga o le pasiaina o Tala o le Tupe. Ao le faamalo ma le faafetai, leai o upu a le Tusi Paia, “o tagata maualuluga uma latou te faia lelei o latou galuega ae le o latou uma e faatuatuaaina. Le Malo e, lau Afioga i le Palemia ma le Kapeneta, afifio Minisita, o le tatou avega lena e pele foi so matou penei atu, o Samoa lava ia e tua lava i le fealofani ma le feavatai ma lo tatou.....O le aso e le umi lau talanoa atu ae pau lea o nai.....ao le Tala o le Tupe pe la o ai a toe.....e leai lava se tasi e le o silasila foi ma vaavaai i mea. O le taimi foi ma lona ai, o le aso e lelei ai ma le aso e faalelelei ai, o le aso e ata ai ma le aso e tagi ai, o le aso e maua meaai ma le aso foi e asamo ai ma utitui ai le faaso. O le a se tualumaga o lenei fononua e ala i le Tala Faatatau o Tupe 2013/2014 malie faafetai le tapena, faamalo e le faigofie ae aua foi nei faatupu tiga aua o le e lelava e ita gofie, o le faatupu le poto e faatupu foi le tiga aua foi e le moe e faitau i aso uma, o so o se mea lava la e avatu ita, e faapena lava le soifuaga. Ia tulou Samoa i lau faafofoga faapea foi le paia e, o lenei Maota i lau Afioga i le Palemia ma le paia o outou ia faamalo le fai o le faiva, faamalo taupati, faamalo tauatai, faamalo foi i lenei Itu i le Afioga i le Taitai o lenei Itu, faapea foi le Sui Taitai ma le nofonono atu faamalo le tautai e le faigofie Samoa. E ui lava i le tatou naunau o lea lava ou te au i le Afioga i le Palemia e faamuamua mea e muamua, e le taua foi aitalafu ae taua mea e fai pei e faapena ea le uiga i lau Afioga i le Palemia o lea ou talitonu e saolele. E toetiiti lata mai le lalolagi e fai e totogi e le tagata latou, latou mea ae manuia ai le atunuu.

O nai motugaafa ia, ua malie le lupe na faalele, malie foi le faga i paau, ua faamalo le faiva o le foa, ua malie le lautua i le falelala, o la outou pule lena, matou tapuai atu ma tui atu le mulipapaga ma tuualalo atu. O upu anamua i sailiga motu a Samoa, se tuu ia le faautaga vale ae soo maea le fua. O le lauga lea o nai motugaafa ia a Faasaleleaga Nu.3 o le Aiga taulagi, na pau lea o le aiga e tau i le lagi ona faapea ai lea o tala a lou sui usufono ma le faaaloalo, ia manu teleina le Maota o Samoa. Lau tapuaiga Samoa, tapuai maia ma le manuia ae faiva o a outou auauna vaeane foi le Maota nei, ia manatua pule ae galo faalaeo a ia viia ai le Atua e faavavau.

Ia manu teleina lau Afioga i le Fofoga Fetalai, manuteleina Faauluuluga o Matagaluega faapea foi le loaloa o le Maota. Soifua ma ia manuia.

FOFOGA FETALAI: Malo faafetai saunoa i lau Afioga i le sui usufono mamalu mo Faasaleleaga Nu.3. Ou te manatu o lea ua logo faa Tutuila le Maota ma ua logo malie i mauga o Salafai i le faatamasoaliiga, malo fetalai, malo saunoa, malo foi le velo aso i le tatou mataupu i lenei aso aemaise o fautuaga manino ma le atoatoa mo le Afioga i le Palemia ma le Kapeneta.

Ua tatou taunuu mai mo se isi sui usufono e fia saunoa o lea e avanoa le tatou taimi.

A outou finagalo ou te tolaulauina outou suafa o le a tofi atu e le Fofoga Fetalai pe a faapea o le tulaga lena ae pei o le agaga lena o le faatuina o le tatou lafo i le taeao analeila o le tuliamoina o le tatou galuega.

Tulai mai le sui usufono mo Faasaleleaga Nu.4.

Afioga Peseta Vaifou Tevaga: Lau Afioga i le Fofoga Fetalai ua ou talosaga atu ma le faaaloalo afai ua leai nisi pe mafai ona toe alu atu le faalua o lea e lei uma mea a lenei itumalo.

FOFOGA FETALAI: Ua fai lava sina ou soli fonu i le aso lenei. Malie le Faasaleleaga o lea o mea na galo i lau lauga lea molimoli uma mai e le lauga a le sui usufono mo Faasaleleaga Nu.3.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ua tatou taunuu i le numera ua uma ona saunoa ua avanoa ai loa ona faamuta le tatou talanoaga ae tali le Kapeneta. A silasila mai ua leva ona faalavelave mai le Minisita mo Leoleo ma Falepuipui ua fia amata ona tali matou ae amata ona faagasolo le tatou Tala o le Tupe. O lena e i lau Afioga i le Fofoga Fetalai le avanoa e mafai ai loa ona fai se tatou faaiuga ae faagasolo le tatou fonu.

FOFOGA FETALAI: Ou te manatu o le a fai le faaiuga a le Fofoga Fetalai ona ua faatutu gata le tatou Maota i lenei aso ae faigata tele le tatou va tapuia ma le va nonofo.....

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: Tulai mai lau Afioga i le Taitai o le Itu Agai.

Afioga Hon Palusalua Faapo II: O lea e maitau atu e i ai itu e...e fua foi le matou tali atu i le saunoa mai o le la Itu. O lea e maitau atu o la e toatele e lei saunoa o le la Itu e fua la i ai aua o lea toe toalua matou.

FOFOGA FETALAI: O le ala lea o le avatu o le timai a le Fofoga Fetalai i lau Afioga i le Taitai o le Itu Agai aua e te fua i o, o o e ona le Tala o le Tupe masalo ua matua malilie Minisita Lagolago la e mafua ai ona le lauga ona ua malie atoatoa i le Tala o le Tupe. Ae avatu pea le tuualalo e manaia le faasoa maia o oulua lau Afioga i le Sui Taitai o le Itu Agai ma le Taitai o le

Itu Agai ona faasolo ai lea o le tatou galuega. O le tatalo atu lea ma le faaaloalo.

Ia, o lea ua tulai mai le Afioga i le sui usufono mamalu, o le fofoga o alii i lea Itu o le Maota, ia, le sui usufono mo Faleata Sisifo. Tulai mai ua avanoga le Maota mo lau saunoaga.

Tofa LEALAIPEPULU RIMONI AIAFI (Faleata Sisifo): Faafetai i lau Afioga i le Fofoga Fetalai. Sa i ai le manatu ou te le lauga, ae ua ou faanoanoa i le saunoaga a lou uso lea na fai atu ananei, e pei ua tau faasusususu laitiiti. Ia, a o lenei itula, e muamua lava ona ave le faafetai i le Atua i lenei aso, faafetai i lona agalelei ma lona alofa ia Samoa si o tatou atunuu vaivai. A o lea ua tatou oo mai i lenei vaiaso, ua faasoa lona tamaoaga, o lona agalelei ma lona alofa. Malo le tapuai i le paia o le tatou Atunuu, mai lava i ositaulaga ma le aufaitatalo, faapea le Afioga i le Ao Mamalu o le Malo ma le paia o Samoa i ona tulaga faalupe. Malo le tapuai.

E faamalo foi i lou itumalo i le taputapu mai a o alofaiva le Palemia i lana Fonotaga i lenei vaiaso. Ou te faatulou foi i lau Afioga i le Fofoga Fetalai, malo le onosai, malo le lototele i le faafoeina o le tatou Fono. E faatulou foi i le paia o le Maota o Samoa i le Afioga i le Palemia ma le paia o lena Itu i le Kapeneta ma sui usufono mamalu. E faapea foi i lenei itu i le Afioga i le Taitai o le Itu Agai ma lenei Vaega, ia malo le onosai. Faamalo le galulue i lau Afioga i le Palemia ma la outou Kapeneta, o Minisita taitasi, faamalo le galulue. Se o Samoa ua uma ona fai tofiga a le atunuu. Outou e galulue ma faatino le galuega ma taitai le atunuu. O matou, matou te omai e supervise le tou galuega, a lelei, faamalo, a faaletonu, fautua, a leaga, ia tau loa i le atunuu.

Ia, o le Tala o le Tupe, e le tele se manatu i ai, ona o matou nei o lo o i le Komiti o Tupe. E avatu le faamalo i le Afioga i le Minisita ma le Matagaluega o lo o nafa ma le faasoaina o tupe a le atunuu. E le faigofie. Faamalo le faasoaina mea lelei. O lau lava tilotilo i le Tala o le Tupe, o le taimi nei, o lea e faaletonu le tamaoaga. O se Tala o le Tupe foi lea e fai fuafua, e conservative foi lea. Ae ou te talitonu e tatau ona tagai e fotuai mai le Supplementary i ni nai tupe e toe faatei ai le tamaoaga. E le o agai i luma. O le isi vaega, e tele lava tupe e mafai ona faasoaina, tele Matagaluega i lau matau, o la e faaopeopea tagata faigaluega ae o lou talitonuga e le o moomia. O isi Matagaluega ua top heavy, ua tóatele tagata i luga, ae leai nisi e faia galuega. O vaega uma ia e tatau ona tagai i ai e faasoaina mai le tupe ma faaoga i nisi atinae.

O lenei lava mea tatou te vavao ai i tausaga uma ma aso uma, o le faafitauli e faafeagai pea ma Samoa, o le tau o le soifuaga ma le leai o ni galuega. O mea lava nei e pito i luma i aso uma ma taimi uma. I lou la sui usufono, e mafai lava ona fofoga e tatou lenei vaega. Ua leva ona tatau ona tatou fofoina, o lo o taumafai foi le Malo i aso uma ma taimi uma. O le mea lea e toe faamamafa ai pea i lau tautalaga le vaega lea o le Matagaluega o Faatoaga ma le Matagaluega lea o le SROS. O Matagaluega nei e lua, e i ai lou talitonuga e mafai ona tele lo latou sao e fofoga ai le faafitauli lenei. Aua e ala ona taugata le soifuaga, o le 90% o mea nei tatou te faaogaina, e aumai mai fafo. E ala ona leai ni galuega, leai ni fale gaosimea, leai ni mea foi nei e faatupu ai galuega. Ae ou te talitonu, o Matagaluega nei e lua, e tatau ona galulue faatasi e coordinate lelei le agai i luma.

FOFOGA FETALAI: Malie le sui usufono o saunoa se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, na amata lava le saunoaga a le sui usufono o sese, o lea lava e o o mai nei ua atili sese. O le tulaga o lo o taua mai ai, o tatou, e le na o le Matagaluega lea, o tatou lava i tua ma tatou i totonu o le Maota nei e alu atu ai upu mo le uunaia o tatou tagata e galulue. O le a la le mea lea e tupu? O le matua mau lava o le atunuu, ae pule lava le tagata ia i le mea e loto i ai. Afai lava e nofo ma aumai oloa mai fafo, o lona ia lona manao. Ae faapefea le tulaga o le tatou tamaoaiga? O la e lava seleni e mafai ai ona oka mai mea e tatou te mananao ai. O lea e faataoto atu le tatou polokalame ae le mafai ona o atu le Matagaluega e galulue, o la e galulue le atunuu. Ou te le iloa la po o le a le mea lea e saunoa i ai. O la e tele le povi la e i ai. Afai nei a tatou aiga, e tele le puua, tele le moa, ae masalo na o ia lava lea e leai sana pamoia o i ai, leai se maumaga. Ou te le iloa la po o le a le mea lea e agai i ai le sui usufono. A o lea lava e tele a tatou faagaoioiga o le tamaoaiga o lo o fai nei, ae le taofia ai lava lo tatou o i fafo, aua o aga lava ia a so o se Malo, e i ai a le free choice e mafai ai ona tatou o aumai oloa mai fafo. E le taofia le manao o tatou tagata. O le mea lea o lea e tataua ona tatou lauga i ai, o le uunai ma saga uunai ma saga uunai, a o lea e taoto polokalame a Matagaluega. O le Matagaluega o Faatoaga faapea foi ma le SROS o lo o uunaia a tatou atinae lea ua i ai le suauu e mafai ona uunaia ai le kiso. O lea foi e galulue i le fai o tatou magari, lea ua i ai le suauu e maua mai i le avoka. Ma ua tele mea ia ua i ai, ua i ai foi ma le tulaga o falaoamata. A o mea ia o lo o faagaoioi ai, e gaoioi i le tulaga o lea ua tele le fuafuaga o lo o taoto mo le uunaia o le tatou falaoamata. Masalo faatoa amata ona fua mai mea ia po o le sefulu tausaga o lumanai ai, ina ia talia e le lalolagi lea foi ituaiga oloa fou. E toe tuu atu se isi avanoa e toe talanoa ai?

FOFOGA FETALAI: Faafetai lava i lau Afioga i le Palemia. Se i tulai mai le sui usufono mamalu e faaauau mai le saunoaga.

Tofa LEALAILEPULE RIMONI AIAFI: E fia miliona lea e alu i le aumaiga o le moa i tausaga uma, e fia miliona e alu i le aumaiga o le falaoamata, e fia miliona la e alu i le aumaiga o le aniani. O mea nei, a na faapea e fai i Samoa, o le matua tele o le...

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le matua tele o tatou fuamoia lea e i ai nei. O le mea lea ou te iloa ai e le o iloa e le sui usufono. O le matua tele o le tatou fuamoia lea e maua lava i Samoa nei. A o o nanei i le afiafi ona sau lea ta o e ave oe e faamatamata i taumafaiga nei o lo o taumafai nei e uunaia ai le fuamoia i totonu lava o le tatou atunuu. O le faalavelave lona o outou, ua tele le tou fia o i TV ae le o e vaavaai i mea ia o lo o faia e le tatou atunuu.

FOFOGA FETALAI: Malo. Ia tulai mai le sui usufono mamalu e faaauau mai le saunoaga.

Tofa LEALAILEPULE RIMONI AIAFI: O le mea la lena o lea ou te talanoa atu ai, e le na o le faatino o mea nei, ae ua tatau ona galulue le vaega lea ma le Malo. Afai o le a fai le falaoamata, ia fai se fale e fai ai le falaoamata. Galulue faatasi ma le private sector e fai se....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, faatoa uma nei lava ona saunoa mai isi sui usufono o le Itu le Ia, e tatau ona fai ma tuu nisi mea i le private sector latou te faia. O lea la e taoto fuafuaga faapena, ae ua leva foi ona faatali se private sector e omai e talatalanoa i tulaga na. O lea e faatali le private sector i le taimi nei, a ua leva lava ona i ai, ua leva ona maua a tatou falaoamata, ma o lea foi e faatalanoa ma atunuu i fafo pei e tau foliga mai o lea ua amata ona iloa tele e atunuu i fafo, e taua tele le falaoamata lea e maua mai i le ulu. O lo o i ai le mea taua lea e maua e le ulu, e le o mafai ona maua e le falaoamata lea e gaosi mai i le corn. Lau Afioga i le Fofoga Fetalai. O tulaga na o lea e i ai le tatou atinae i le taimi lenei, ae le o le tu ae loa lava agai i le leaga i, leaga i, leaga i. O lea e tele lava le taumafaiga lea e taumafai nei e le Matagaluega o Faatoaga ma le Faalapotopotoga lea o le SROS.

Tofa LEALAILEPULE RIMONI AIAFI: E leai ma sau tala talu ona ou lauga e leaga se mea a se isi. Ou te le faaleaga se mea.

FOFOGA FETALAI: Ou te faamalulu atu, se i faaauau lau tala pe a tatou foi mai i le tatou malologa masani, se i tali le sua, o lena o le a amata ona e avaavau ma e sela e le i taitai lau lauga o lea faatoa lima minute. Ou te faasilasila atu o le a faataatia ese Taulumaga a le Fono Aoao mo lana malologa masani o le afiafi.

Na faataatia ese Taulumaga a le Fono Aoao mo lana malologa masani i le itula e 4.46.

Na toe faaauau Taulumaga a le Fono Aoao i le itula e 5.15.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono. Ia, e talitonu ua vaai atu ua foi le malosia i le tatou usugafono. O le taeao analeila sa tatou taumamafa ai i le koko ese manogi mai esi mai Salafai, aua o lea e aofia le tatou Motu nei i Upolu. Ona o o lea i le aoauli tatou taumamafa i le ofu o le faafaleolo, o meaituaolo na pefu ai i inei i Tiafau lea na faalalo nei e le aufaigaluega i le taeao e tali ai la outou sua. A o le tatou sua lea na uma atu nei, o le masi popo e fai i le falaoamata

lea na saunoa i ai le sui usufono mo Faleata Sisifo. Ou te manatu ua toa lelei le moa, o lea o le a tatou alo i le tatou taamilosaga seia aulia le itula e 7:00. O lo o ua sauni mai foi le aufaigaluega i se isi faamalositino ina ia taofia ai lo outou popolega i le mai suka lea na saunoa i ai le Minisita mo le Soifua Maloloina. O lea lava e tautata atu i le moa o le ala, ona o le taumafai e tausisia le soifua maloloina o le atunuu.

E fai le tatou malologa o saunoa le Afioga i le sui usufono mamalu mo Faleata Sisifo. E talitonu, ia tulai maia e faaauau le saunoaga o lea ua maua lou avanoa. Oi, malie lava lau Afioga, se i tuu atu le avanoa o lea e le i maea atu le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai ma le mamalu o le Maota, ou te tulai atu i le mataupu lenei leaga sa ou tau manino atu i le aso ananafi, e le toe tuumamaina e le Malo ni lafoga e le faavaea e lafo mai i le Vaega lenei. O so o se taimi lava matou te toe faalogoina ai ni mea faapea, e le mafai lava ona toe tuu e alu loa ae tataua lava ona faasao.

O mataupu sa laga o lo o manino i le saunoaga a le sui usufono. Muamua, o lo o sese le filifiliga o tagata ua toatele tagata faigaluega a le Malo ua tataua ona faamalolo nisi.

Lua, e le o faia le galuega a le tatou Fale Suesue po o le SROS faapea foi ma le Matagaluega o Faatoaga. O lou taofi o ni tuuaiga e matuia tele nei tuuaiga, a o lea e le o nofo mai le Minisita mo Faatoaga ma le Faleoloa o Faatoaga, Afioga Hon Le Mamea Ropati, o Au lea ua Minisita i le taimi lenei i le toesea ai o le Afioga Le Mamea Ropati. O le Minisita mo Faatoaga ma le Faleoloa o Faatoaga o lo o i Roma i le Sauniga tele a le Lalolagi e tauaaoina ai Pine Taualoa i Atunuu ua ausia matatia faatulagaina mo le Millennium Goal i le Food Security, o lona uiga o fuafuaga uma faataotooto e faatino e le Malo, ina ia faamautinoa ai le lava o taumafa mo tagata o le atunuu. E na o le tasi lava le Malo o le Pasefika lenei ua ausia le tulaga lena a o lea e le i oo i le tausaga e faaiu ai o le 2015. O lea la na o Samoa ua ausia le mea lea, o le ala lena e taua ai le mataupu ina ua ou matua faalogo atu i finagalo ua faaalua ae faavae i ni tulaga le faavaea e faapea ua mafua le finagalo ona o lea e aumai pea mea mai fafo, aumai fuamoa ma isi taumafa. I lou manatu, ua matua tele le sese o ia manatu e aumai. O le mea lenei o le filifiliga o tagata faigaluega i totonu o Matagaluega e moomia, e umi lava se taimi o silasila i ai le Ofisa Sili o le Pulega i le moomia e moomia ai, ona tatalo loa lea i o i le PSC. O le PSC o lo o i ai tagata tomāi latou te iloa ai i le vaaiga lautele tiute o lo o faatino e lea tagata faigaluega ma lea tagata faigaluega. E le gata i lena a o lo o nofononofo mai foi le Matagaluega o Tupe, o la foi e faata mai a latou aū i ni tulaga e ono maumau ai tupe a le tatou Malo. O tulaga ia lea e tataua ai ona faamalamalama ma faasao...

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie le Taitai o le Itu Agai o lea e agai le faamalamalama a le Afioga i le Palemia i mea sa laga e le sui usufono.

Afioga Hon Palusalua Faapo II: Ioe, ta te valuvalusia lava aa o le fau lau Afioga, o la e tele lava le taimi e tali ai le Afioga i le Palemia, ae silasila ua 6 minute....

FOFOGA FETALAI: Le Taitai o le Itu Agai, aua e te fesiligia lau faaiuga i luga o le avanoa ou te tuuina atu i o outou taimi, o lea lava ou te faasoasoa atu. O lea e ave le avanoa ina ia malamalama le finagalo o le sui usufono na laga ona ou tuua foi lea o le avanoa, vaai foi e talaloa lava le taimi e tuu i le fonu a alii.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le taimi sa pule ai le sui usufono mo Faleata Sisifo i le Malae Vaalele, sa fai lava ma ou vaavaai ma ou follow up ana galuega i le taimi lena a o Minisita Faumui, o le matua lelei o le faagasologa o galuega ae na alu lava faaletonu. O le a le mea na faaletonu ai? Ua uu uma e ia tulaga o galuega ua le mafai ona toe faamatuu atu i tua ona o le mau lava lea e taofiofi ae aua le soona faaalu tupe. E le iloa e le sui usufono mo Faleata Sisifo i le taimi lena e faaalu tupe e toe maua mai ai isi tupe faaopoopo. O lea lava la e tauave le mataupu lea, o le a ou le fai atu na oo mai foi le sui usufono mo Gagaemauga Nu. 2 sa i lalo o ia, lipoti mai ia te au foi lena mea. Ou te le o talanoa atu la i se tulaga foi lele le malamalama, o lea lava ou te tilotilo i mea, o lea lava e silafia e le sui usufono a o Ofisa Sili o Pulega, o le la e lauga mai ai ae ese foi lona ia faatinoga. O le mea lea e faatino ai nei galuega e le Matagaluega o lo o sao le faatinoina e le aufaigaluega. O le aufaigaluega lava ia ua uma ona sailiili e le PSC le aufaigaluega talafeagai.

O le itu lea e taua i taumafa lau Afioga i le Fofoga Fetalai, e le mafai ona tatou taofia le saolotoga o tagata o tagata foi latou ua fia tausami i oloa a papalagi. E tiga lava ona fai atu o fuamoia foi ia e iinei ae fai mai e aumai lava fuamoia mai fafo. O le taimi lenei i moli saina o le matua fua lava se i e alu i se faaipopoga o a moli la e i ai, e leai lava ma ni moli saina e aumaia. O le anoano o taro chips o lo o i ai nei ma le taimi sa tele ai tatou banana chips, e leai lava ma ni chips a tatou e aumai ae aumai lava chips mai fafo.

Lau Afioga i le Fofoga Fetalai, e le o i ina e faamasino aim ea ia, o i ina e te iloa ai le lava o le tamaoiga ua i ai i o tatou tagata, ua latou mafai ai ona aumai mea e fiafia i ai. Ia vaai i le tele o le atinae povi o lo o i ai nei, ua oo foi i le atinae mamoe ua tupu ma ola, a o le a le mea lea e manao i ai o tatou tagata? E i ai le lauga lea na fai nei i le taeao ma ananafi e mananao e aumai nisi uta povi a o la e tele povi, e i ai le isi falepovi na ou fai i ai, o le a le mea e le faia ai le tatou polokalame lea na fai, na aumai povi mai fafo ma faaleleia ai a outou lafu manu i le aumai o povi fou e ui lelei ai lafu. O le tasi a le isi fai faatoaga povi, leaga e le i o atu lava nisi e aumai, a o le polokalame lena a tatou a tele ni au povi ona aumai lea e ave e faatau i uta, a maua lau tupe ave e faatau tai tasi mai, tailua, tai tolu, tai fa, tai lima, tai ono ma tai fitu e le tatou Matagaluega o Faatoaga. E i ai tagata ua latou faia le mea lena a o lea ua ou tau atua o lo o alu lava le tatou polokalame, a ua tele tele au povi ma ua le lava le vao, aumai e faatau mai i le Matagaluega, ona faasoa atu lea i isi tagata o lo o fia maua ni povi a o lea lava e tele povi i totonu o le tatou atunuu. O le ala foi lena a o atu ai i faalavelave e agai lava tagata e fai povi aisea? Ua tele povi.

Lau Afioga i le Fofoga Fetalai e mafua i se a, o polokalame a le Matagaluega o Faatoaga, o lea ua tele le tatou talo ua i ai nei. O fea na maua mai ai na talo? O le polokalame ma suesuega a le tatou Matagaluega o Faatoaga, a o le mea o lo o tupu ia tatou na ona tu ane lava o lea ua leai ni mea e lauga ai ona nofo foi lea ma faitio i le Matagaluega o Faatoaga, faitio i le SROS a o lea o lo o tele le latou galuega o lo o fai. E te fiu lava e te fealuai ma tuuaia le atunuu leni ua agai i lalo, e lua lava mea e iloa ai le sese o lena mau, o lea o le a siitia i tatou i luga i le tulaga o Atunuu ua maualuluga lona tamaoaiga. Lua, o mai ia e mamai ai nei tatou ma ave i fafo e togafiti ai e pei o le toto maualuga ma isi mai oti uma ia e taua i le taeao nei, o mai nei e mamai ai tagata o atunuu ua maualuga le tamaoaiga.

Lau Afioga i le Fofoga Fetalai, e fiu lava la e fekamiai mai solo i nisi mea a o mea ia e lua e le mafai lava ona sao ai se tuuaiga ona o gasegase, se i vaai i gasegase nei e gasegase ai tatou o gasegase o atunuu ua maualuga le soifuaga o lo o latou i ai, ua tele a latou tupe e maua ma ua mafai ai ona faatau so o se meaai e tupu ai mai ia. Ma le lona lua, o lea ua aloaia e Malo Aufaatasi e le tataua ona toe nofonofo pea Samoa i lalo i i, ua le o toe atunuu mativa a ua atunuu ua maualuga lona tamaoaiga.

Lau Afioga i le Fofoga Fetalai, o le faasaoga lena o le sui usufono na saunoa i le taeao analeila ona na amata mai lava le saunoaga o sese ou te faauilavea atu lava o la e sese. O le mea la lea, a i ai nisi mea o totoe aua e te toe agai mai i le Matagaluega o Faatoaga e toe lavea atili ai o lea e tumu lau pepa i isi mea, o lea o le a ou faatalitali atu.

FOFOGA FETALAI: Malo faafetai saunoa faamalamalama i lau Afioga i le Palemia, ou te manatu ua malamalama le finagalo o le sui usufono.

Tofa LEALAILEPULE RIMONI AIAFI: Faafetai i lau Afioga, faafetai foi mo le taumafataga ua maua ai le malosia o le tino. Ae talu ai o lea ua saunoa lau Afioga i le Palemia e sese le lauga, o lea la o le a toe amata lelei le lauga ma faasao.

Lau Afioga i le Minisita o Galuega, Felauaiga ma Atinae Eeseese, malo le galue, o oe le isi Minisita talavou ma vae mama. Ia se i toe faamanatu atu le tatou vai i Falelauniu faamolemole, ua ou faalogo ua uma ona vili a ua fia feinu nai tagata ae faamolemole se i tagai ane ai i lea vaega ua leva ona ta talanoa ai, aemaise o le auala alo na i Falelauniu e agai atu i Aleisa o le auala lena e manaomia tele, e le o tele lava ni mea ou te talosaga atu ai i tausaga uma, e faapea foi i le auala i Toamua lea na ta feiloai ai, faamolemole se i tagai ane i ai pe a tau ane ai lou finagalo.

Faafetai i le Matagaluega o Aoga, Taaloga ma Aganuu ma nofoa ma kesi mo faleaoga o Vaiusu ma Vaitele aemaise o nai auala na e i ai i ina. O lea lava ou te alu atu ta talatalanoa ma e fesoasoani mai ae faafetai mo na galuega e faatino.

Lau Afioga ona pau lava le mea o le a ou toe oo ai i le mea lea na ou talanoa ai e leai se faamatalaga a Lealailepule pe a tilotilo i faamaumauga na ou tuuaia sese pe faaleaga se Matagaluega, e le faapena se lauga a Lealailepule. O lau faamatalaga o le mea lea e fesoasoani e maua ai galuega ma tuu ai i lalo mea ia e aumai i fafo ae gaosi i inei a tatou mea. O le mea lea na fai ai le SROS, o le mea lena na ou fai atu ai tatou te galulue faatasi ona pau lea o galuega – o le mea lena na faatu ai ina ia faaoga ai fua o

faaeleleaga a Samoa e gaosi aim ea ma subtitise ai mea ia e aumai mai fafo ma sefe ai tupe ae maua ai galuega. O le Matagaluega o Faatoaga e sao ua tele le talo sue nisi mea e faaaoga ai talo ua leai nisi mea e ave i ai. Malo faafetai mo faaaliga a le aufai faatoaga lea e fai i tausaga taitasi. O meat o povi ma mamoe, moa ma pako o mea faapena, o mean a ou te lauga ai i tausaga uma, a e tagai i ai – o le tatou fale fasi manu o lenei ua tolu tausaga o lenei Paeaiga o tau lava, o le mea lenei e tatau ona fai.

O le tulaga i tagata faigaluega o lau lenei observation, out e le o fai atu e faaleaga ai ma ai, toe tagai lelei ai i le structure lenei e i ai ma Matagaluega taitasi po o talafeagai o latou tiute o lo o fai ma le aofai o tagata faigaluega...

Susuga Hon Tuilaepa Fatialofa Lupesoliai Aiono Neiote Saile Malielegaai: Lau Afioga i le Fofoga Fetalai, o lea lava e talafeagai. O le faalavelave o le mea lea e tupu na o nai o outou tamai taimi lava o lea tou te feiloai ai ma tagata o Matagaluega ae tou te le o maua atoa le aotelega. E i ai le mea foi lele o lenei tou te vaai i le small picture ae tou te le o vaai i le bigger picture. O le fautuaga lenei ia te outou, afai e i ai se avanoa i se isi taimi ona outou o lea tou te nonofo ai i totonu ma mataitu i le faagasologa o galuega ona outou iloa foi lea e outou le pisi tele o le aufaigaluega.

Ona pau lava le mea, o au na ou faapea ua sui le mea lea ua i ai nei, o aso la a o ou galue, e masani ona valaau atu – o lea ou te talanoa atu i le tausaga 1970 faasolo mai i le 1980. A oo ina fono le Komiti o Tupe e valaau atu le taimi ou te sau ai ona ou sau lea. O isi taimi e valaau atu i le 10:00 i le po ma ou te sau i le 10:00 i le po. O isi taimi e valaau atu ou te sau i le ta o le 9:00 i le po o le Aso Faraile, a le o le po o le Aso Faraile o le po o le Aso Toonai. Ona ou sau lea, e ta tonu lava le taimi ua ou i nei. A ou sau, na o le tasi le sui o le Komiti la e i ai, ona ou faalogo atu lea ua taumusumusu e mumusu i ou faalogo atu, a o la e telefoni le Taitaifono i lenei taimi i le RSA, “Se i vaai ane lava po o i ina le matou Taitaifono? A uma ona telefoni i le RSA ua telefoni i le Mount Vaea, a o au lea na sau po o le ta o le 8:00 i le po, e ta le 11:00 o ou faatalitali. Ona ou fai atu lea, faamolemole o le a ou alu i le fale ae afai ua leai nisi aua ne’i toe valaau atu au ou te sau i le taimi nei, o au la lea e faapea ua i ai se suiga.

O le mea lea ou te maua nei i nisi o faamatalaga ia ou te maua mai i le aufaigaluega a le Malo i Faauluuluga o le aufaigaluega a le Malo, o faauluuluga e matua pisi tele i a latou galuega, o le ala foi lenei a valaau soo atu, omai valaau soo atu, omai e le o i ai e le atoa le quorum, ona omai lea faamaimau ai loa lo latou taimi e tuu ai le number 2, number 3. O le taua ia o le galuega lea tou te faia. A valaau Faauluuluga o Matagaluega, ia outou alolofa ia atoa uma outou i le taimi e taunuu mai ai ma le taunuu mai ua i ai uma outou e faapena, ina ia tupu ai le mea lenei, aua e te poto e aoao atu, a o lea e te faavalevalea e te mulimuli ai i au aoaoga, a o lea e te atamai tele e faatonu atu ia le aufaigaluega, a o lea foi e tupu le mea faapena i totonu o le tatou lio i galuega faa-Komiti. Lau Afioga i le Fofoga Fetalai, ia o se tali atu lenei i le saunoaga a le sui usufono.

Tofa LEALAILEPULE RIMONI AIAFI: Faafetai, o la e afio i o le Taitaifono ma Komiti ia HRPP, o la foi e i tua atu o le Afioga i le Palemia le Taitaifono o le Komiti o Tupe, ia ma o le vaega tonu lava lenei e maua ai le tali o le mataupu lea ae ou te le oo i ai lau Afioga.

Faafetai lea i le Afioga i le Minisita mo Tupe Maua...

FOFOGA FETALAI: Malie le sui usufono, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai o le mea tonu lea ou te laga atu ia malamalama lelei, e le mafai ona fai se fonu pe afai na o le Taitaifono, e le mafai ona fai se fonu a le tatou Komiti, e tataua ona auai uma lava sui usufono na filifilia atu i le Palemene lenei ona faatoa mafai lea ona usu le fonu. E ala ona ou tutu atu leaga o lea e faaalu i tua a outou saunoaga, pei e foliga mama ia ae o la e maitau mai e le atunuu le tulaga o a tatou felafolafoaiga.

FOFOGA FETALAI: Malie e le o ni aiiavea, ia agai i se isi mataupu o lo o lava lou avanoa.

Tofa LEALAILEPULE RIMONI AIAFI: Lau Afioga i le Minisita mo Tupe Maua, malo mo le aoina o a tatou tupe i lau Matagaluega, ae toe tagai ane lau Afioga i mea foi ia e tatalo atu ai nai isi faipisinisi e fesoasoani ai aemaise mea ia o Turisi, o lena lava e feteenai le Tulafono lena e i ai ma le malamalama o nai isi tagata, e ta le 10:00 omai leoleo tapuni ia ae omai isi e leai, ae tapuni lava i le 10:00 i le po ae ou alu atu ta te alu i le fale, ia o la e fai mai bingo a isi loomatutua faatoa taape i le ta o le 12:00, ae fesoasoani ane i lena vaega ae malo mo galuega.

Ona ou oo mai lea lau Afioga i le Fofoga Fetalai, i le mataupu lea e masani ona lauga i ai o le mataupu lea i tului mo nonogatupe po o interest rates. Muamua, e ave lau faamalo ma lau faafetai i le Afioga i le Minisita o Tupe i le tului maualalo ua toe tuuina atu nei i nai tagata ia faipisinisi aua le toe taumafaiga o a latou atinae i le taimi o le Afa, 3% ia o se tului maualalo tele, talu lava ona ou ola i Samoa faatoa ou faalogo lea i se tului maualalo faapea, maimau pe ana mafai ona agavaa mai ai isi pisinisi. Ia ae mo lenei lava taimi e avatu le faamalo mo le vaega lea aemaise o le Central Bank i le faamatuu mai o nei tupe e fesoasoani i o tatou tagata e le gata i pisinisi ia a o fale o mea e nonofo ai nai tagata taitoatasi, e avatu ai le faamalo. Malo foi i le vaega lea o le UTOS, e tele le sao o le vaega lea o le tuuina mai o tului e fai faatauva ma le faletupe foi lea e toatasi o le Commercial Banks, o le aoga lea ua manaia ai foi lea vaega ua tau maua se fesoasoani ua amata ai ona sau i lalo tului o faletupe ia tutoatasi.

Ae faapito augafa sau faamatalaga i le NPF, e le o faapea o faaletonu le faatinoina ma le faafoeina o lenei vaega o le NPF, ae o le toatele o le atunuu o nai tagata faigaluega, pei o i i lea e tomaaga i ai i tupe e fesoasoani i a latou faalavelave ma le tele o mea fai o le faaaogaina o le fanau, o mea ia o nonogatupe foi ia personal loans. E tataua lava e auala atu i lau Afioga ia sei faamama tului o lenei mea, e 9.5% lea e i ai i le taimi nei, ae ou te talitonu e mafai lava ona fai le auala aua o tupe o tupe lava a nai tagata e toe faagaoioi, ia pe le mafai ona faamama le tului i mo vaega ia. E le gata i lea o le Faletupe o le Atinae, ona o lea pei o le tele foi o le tupe lea e faaoga i i a le vaega lea, o le tupe mai i i a le NPF lea e ave i ai e 8% e faagaoioi ai. O lona uiga a nono la i tua tupe nei, ia o lona uiga o luga lava o le 11, 12% e nono ai i tua i nai tagata faifaatoaga ma tagata atinae. Pei o mea na lau Afioga e....

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Minisita o Tupe o le Minisita foi o le NPF, tulai mai.

Afioga Hon Faumuina Tiatia Faolatane Liuga (Minisita o Tupe): Lau Afioga i le Fofoga Fetalai, e leai se manatu e faalavelave i le saunoaga matagofie a le Afioga i le sui usufono mamalu. Pau o le mea o le NPF e i ai lana obligations i le aufai saofaga, ma o latou la e maua le dividend e 7% i le tausaga, lea foi na tuuina atu i ai le isi fesoasoani a le NPF i le au faisaofaga e 4% ina ua mavae le Afa o Evan. O le tulaga lea, a silasila le sui usufono mamalu faapea foi le Palemene aemaise le atunuu o lo o faafogafoga mai, o le 7% lea e i ai i i, afai la e 9% ma le ½ lea i le tului o nonogatupe po o le 10%, e na o le 3 po o le 2 ma le ½% o lo o faaaoga e cover ai latou administrative cost, pei la o le tulaga lena e tatau foi ona i ai se vaegatupe e faatino ai galuega a le NPF, ina ia aua lava nei i ai se tausaga e misi ma le tuuina atu o dividends i le aufai saofaga, ma lou faaaloalo lava.

FOFOGA FETALAI: Malo, faafetai saunoa i lau Afioga i le Minisita o Tupe. Tulai mai le sui usufono mamalu e faaauau mai le saunoaga.

Tofa LEALAILEPULE RIMONI AIAFI: Ou te talitonu lau Afioga, e moni lava e i ai le obligation lea, ae ou te talitonu e le o se obligation foi lea e tamau i le 7% lea i le tului o tupe a tagata. Ae ou te talitonu na ona tuitui atu, ona o le mea e tatau ona toe tagai i ai e fesoasoani i le lautele o tatou tagata, afai o lena na mafai ona tuu i lalo i le 4% ia nisi o nonogatupe, ou te talitonu e mafai ona toe tuu i ai i nai loan laiti na a nai tagata ae faaaoga tua i loan tetele foi ia i tua a le au commercial e maua mai ai tupe. Malo faafetai o le mea lea o le SBEC, tasi lea vaega taua tele na faatu mai e le tele o tagata ua manuia ai mai le New Zealand Aid aemaise foi i latou o lo o faafoeina lea vaega i le latou fesoasoani i le aufaipisinisi laiti, ou te talitonu e tatau ona faaauau lea vaega e ave i ai le...ave pea le faamuamua a le Malo e fesoasoani i mea nei o lo o alu tonu i nai tagata tau atiae laiti, ae fesoasoani le vaega lea i a latou loans. Sa i ai le fenumiaiga ia te au i le isi taimi a le SBEC ma le SPDP ea po o le a le igoa o le isi mea, a o le vaega lena e tele tele le tului, ona o le vaega lena lea e tele ina o atu ai nai loomatutua foi ia o le matou itumalo e aumai tupe e pay off ai a ea ae toe fai lea o le isi loan, o le mea lea ua ou vaai i ai ia pei se loan scheme le mea, ua le loan scheme foi lea e manuia ai le tagata e ona le tupe ae leai se manuia tele o alu i le tagata o faaaogaina. Ae faafetai lava au i le SBEC o lo o faapena ona fesoasoani i nei mea ma e ao ona toe faaauauina lea auaunaga taua.

O le mea lea ua taua pea lau Afioga i le Minisita mo Fesootaiga ma Faamatalaga Tekonolosi le mea lea o le Initaneti lea na lauga ai foi nisi o sui usufono, ua fai ma auala ua taugata ai le tele o auaunaga, ae ua matua lagona lou faanoanoa i le tulaga lea ona e tau pea i tausaga uma tausaga uma ona faatalanoaina ma le Matagaluega e o lo o vaaia ma nafa ma le regulate ina o nei mea, ae leai lava se tali po o se galuega o lo o foliga o fai, e fesoasoani ai i le tuumamaina o tau o nei mea. E tatou te vaai foi i le Tala o le Tupe e fia miliona ma miliona lea e alu i le totogiina o le mea lea o le initaneti, o le tasi foi lea mea o lo o fai ma faafitauli i nai tagata fai faletalimalo ona o le taugata tele o lenei mea.....

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Minisita mo Fesootaiga ma Faamatalaga Tekonolosi, tulai mai.

Afioga Hon Tuisugaletaua Sofara Aveau: Lau Afioga i le Fofoga Fetalai, faafetai lava mo le avanoa. Ua ou manatu e ono alagatatau ona taumafai e faamalamalama atu ona ua tele i ai finagalo i le mataupu lea. Ae tatau ona toe faamalamalama atu ona e foliga o lo o agai se tusitusilima i le Regulator o lo o i ai nei le Pule Faatonu. E silafia e le tatou Maota nei o le Tulafono e puipuia ai ia initaneti, e lei ona faaaogaina e tatou, e lei leva foi ona i ai i latou e latou te provide ina ia le auaunaga lea i lo tatou atunuu, i le taimi nei lava latou o lo o aumai i totonu i le kamupani e ala mai i le kamupani e tasi, ona faatau atu lea i kamupani e tolu pe fa. Ae a tagai i lalo o le Tulafono e i ai aiaiga taua la e i ai i totonu o le Tulafono e tatau ona faataunuuina ona faatoa mafai lea ona fegaoioiai ia le faatinoga o le mea e pau ai i lalo le tau o le initaneti, e lei faia la mea na mai le amataga. O lea faatoa omai i totonu le au taaalo i le taaloga lea e toafa pe toalima, e i ai la aiaiga la e i ai i totonu o le Tulafono e vaavaai atili ai ia latou ia e toafa pe toalima, ona mafai lea ona faataatia atu e le Pule Faatonu i aiaiga e agai uma i ai. O le mea la matou te tatalo ai matou, ina ia mafai ona tele pea toatele mai pea ina ia faigofie ai ona fai, aua o i lalo lava o le faavae, o le toaitiiti o i latou e faaaogaina o le taugata foi lona, o le faavae lava lona o mea nei, o lona uiga, e le o matua toatele tele o tatou tagata, aua e faaeteete foi le Pule Faatonu e soona fai sana faatonuga i se kamupani ma i latou ia e provide ina le service, ona o la e i ai ona saisaitiaga i totonu o le Tulafono. A outou tagai la i ai i le Tulafono, e le faigofie i le Pule Faatonu ona faaoga lana pule i le taimi lenei, ae o la o lo o galulue le tatou Matagaluga i le masina o Aperila, o lona na outou tagai i ai o la ua pau i lalo le tau o telefoni, aisea? Ona faatoa mafai ona faatulaga ia auala o le Tulafono la e faavasega mai i le Tulafono, faatoa mafai e le Pule Faatonu ona faatulaga le vaega lona ina ua mafai ona taufai gaoioi uma lava le vaega o le tatou atinae lea. O lona la ua aumai i le 17.7sene sa i ai, o lea ua 13sene nei ia le in connecting fees, ae le o mafai ona fai e le Pule Faatonu lona mea pe a lei aliai mai le mea e tatau ona fai, e sau ai mai i le isi kamupani i le isi kamupani. O lea la ua uma la lona a o lea ua galulue nei i le faiga o le retail lea foi la e aafia ai ma le initaneti. O lea la ou te tatalo atu, ia onosai mai laitiiti, aua ua toetiiti uma le galuega a le Pule Faatonu ona o lea faatoa manu mai ia aiaiga o le Tulafono e mafai ai ona tusi le lima o le Pule Faatonu, e faapea, ma faapea, ma faapea, sa le mafai ona fai, a o le taimi nei la, ua toetiiti lava maea le galuega lona, ia ona o la foi e saisaitia ia lima o le Pule Faatonu.

FOFOGA FETALAI: Malo, faafetai ua malamalama le faamalamalama a le Afioga i le Minisita. Tulai mai le sui usufono mamalu.

Tofa LEALAIPELE RIMONI AIAFI: O le mea lea e tupu lau Afioga, faafetai i lau Afioga i le Minisita, o lea pei e faailoa mai, sei toatele ni tagata e faaoga ona tuu lea i lalo. O le mea moni, e le o gaoioi le vaega lea e faatoatele ni tagata e faaoga, ua lava le polofiti lea e maua mai totonu o galuega a le Malo ma le aufaipisinisi, e lava lona ua lava lona mo latou. E

faapefea ona toatele e faaaogaina pe a le afford ina? Na fai lau internet e tasi le masina ae tape, afai ou te le afford ina, ou te iloa o le 90% o tagata e le afford ina e o latou aiga. E le o faia la se galuega i lou lea talitonuga, ae ui i lea....

FOFOGA FETALAI: Ia malie ia le sui usufono mamalu, e manatu ua matuai malamalama lava le faamalamalama a le Minisita lea sa tulai mai, ae o le a tuu atu pea le avanoa lau Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau: Lau Afioga i le Fofoga Fetalai, faafetai, masalo o le mea lea e tau faaeteete i ai ona o le tamalii lea o lo o galue ai nei, e i ai le saisaitiaga i lalo o lana Tulafono lea e faaoga nei i le taimi lenei e le mafai ai ona fai le mea lena i le taimi lenei, e solitulafono la le tamaloa pe a fai ia se fuafuaga i le mea lena tou te mananao i ai e tuu ai i lalo le tau o le initaneti ina ia mafai ona....toeitiiti lava. E le o se mea la tau i le tamaloa, a o le mea tau i le atinaeina o le industry lea, ona o lea faatoa amata ona ola mai ia le Industry e i ai ona aiaiga la ua faataoto i totonu o le Tulafono, e le mafai ona e faia le mea lea, e le mafai ona e soona tuua i lalo le mea lea, seiloga ua vaai po o ai e malosi, a o ai e vaivai, a o ai e feoloolo, ona faatoa mafai lea ona fai o au faaiuga. O le faatonuga lena o lea e i lalo o le Tulafono lea foi e saisaitia ai tatou, ae ua leva ona naunau e fia tuu i lalo, o lea pei ona ou fai atu i le amataga, o lo o taumafai pea ina ia fai le galuega lea. O le isi la faamoemoe i le tulaga lea e pau ai i lalo, o lea ona o le tatou cable lea e taumafai pea e toe maua le tatou cable lea fou, ia ona tele lea o le fesoasoani mo tatou.

FOFOGA FETALAI: Malo.

Tofa LEALAILEPULE RIMONI AIAFI: Aveese ma lea vaega lau Afioga.

FOFOGA FETALAI: Ioe le sui usufono mo Faleata Sisifo, o lea ua tali atu le Malo.

Tofa LEALAILEPULE RIMONI AIAFI: Faafetai. O le mea lea o le TV ma le Leitia lau Afioga aemaise nai nuu i tua ma i latou uma ua mafai ona oo i ai lenei auaunaga, ae ou te talitonu o le tasi foi lea vaega e tataua ona tagai i ai le Matagaluega, ae tataua ona tilotilo e aoina mo...o la e silafia e le Afioga i le Minisita universal studies ua uma ona fai e mafai foi ona oo le TV i nai ia foi tagata o le atunuu aua o le obligation a le Malo, e mafai ona faaoga pe faapefea ona fai, e tataua ona faatino mo le agai i luma.

Ona oo mai lea....

Afioga Hon Tuisugaletaua Sofara Aveau: Lau Afioga i le Fofoga Fetalai....

FOFOGA FETALAI: Sei toe tuu atu le avanoa i le Afioga i le Minisita.

Afioga Hon Tuisugaletaua Sofara Aveau: Lau Afioga i le Fofoga Fetalai, e faapena foi le agaga o le faamoemoe i le mataupu lea aua pe toatolu ea la sa saunoa i ai o le Maota nei. E matou te taumafai e fai vaega uma i le mea e gata ai le malosi. E lei gata le matou malosi e pei ona silafia i le taimi nei o kamupani uma lava ia e fai TV e le o toe i ai se kamupani a le Malo o i ai. E le mafai foi la ona matou tuusao atu i ai le faatonuga e ese mai le auala lava e tasi lea e totoe lea la e i lalo o le Malo le auala e tasi lava e lei faia e le Matagaluega. O le a la le auala e tasi? O le tape o le tv, o le aveese o le laisene ona fesili lea afai o le 5% o le atunuu lea e lei oo i ai le tv ae tape ai le 95% o fea la le sao o lena mea? O le faafitauli la lena lea matou te faafesagai nei ae ua outou tagai foi i ai ua uma ona ou tusi la e faafofoga mai le Ofisa o le TV, lua vaiaso talu ai sa ou toe tusi foi i ai ina ia lagolago i le mataupu lea ma fesoasoani pea i ai. Ao lea ua outou faafofoga mai o lea e ia matou le faaiuga ao le faaiuga la o le taunuuga e fai lava sina lavelave mo tatou, fai foi sina faiga mo tatou e pei ona ou fai atu e le faapea e 10% pe i lalo ifo o le atunuu e lei oo i ai le TV ae afai nei la tatou te faia le faaiuga ona o le 10% lea ae faapefea nei la le 90%. O le faalavelave lena ma o le faaeteetega foi lena ae sao le saunoaga.

FOFOGA FETALAI: Ou te manatu o lea ua faamau e le Afioga i le Minisita lea tulaga.

Tulai mai le sui usufono mo Faleata Sisifo e faaauau le saunoaga.

Tofa LEALAILEPULE RIMONI AIAFI: Faafetai lava e leai se agaga o lenei sui usufono e tape le TV ao le mea lea na ou fai atu ai o le infrastructure o le Malo e tagai i ai po o ai e faia? Someone must gonna provide le service lea ona tuu lea i luga o le tau o le TV ao lea e i ai ma o la e silafia e le Afioga i le Minisita o la ua leva na i ai suesuega i auala ma metotia e fai aua le mamalu o le atunuu e le mafai ona oo i ai lea vaega.

Ona ou oo mai lea lau Afioga i le Fofoga Fetalai i le Kamupani o le PFL. Ou te talitonu o lea ua savali i le fitu pe valu masina talu ona fai.....

FOFOGA FETALAI: Malie le sui usufono sei tuu atu le avanoa i le Sui Palemia.

Tofa Hon Fonotoe Nuafesili Pierre Lauofo: O lea ou te vaavaai atu i le Tala o le Tupe e leai lava ma se tupe o fuafua mo le PFL. E leai lava la ma se vaegatupe i totonu i i, o le mea lea ou te manatu se saunoa sao oe i le Tala o le Tupe ae aua e te saunoa fua i mea e le o i totonu o le Tala o le Tupe.

FOFOGA FETALAI: Tulai mai le sui usufono mo Faleata Sisifo e faaauau le saunoa.

Tofa LEALAILEPULE RIMONI AIAFI: O lea faatoa ou malamalama e manaomia se training a le Sui Palemia i procedures o le tatou fono i mea nei o lauga faalauaitete. E le o i ai foi i totonu se TV Samoa ma se initaneti i mea ia, o mea nei e pule le sui usufono i mea e fai ai lana lauga.

FOFOGA FETALAI: Malie le sui usufono o saunoa sei tuu atu le avanoa i le Sui Palemia.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, silasila ifo i Tulafono Tumau a le Maota e te saunoa i saunoaga faalauaitele i le Tala o le Tupe. E te le saunoa faalauaitele i le lalolagi, silasila ifo i Tulafono Tumau, ae fia malamalama i le PFL ona e silasila lea i Tulafono Tumau ona fai lea o lau fesili tusitusia i tulaga masani ona momoli lea o lau fesili i le Fofoga Fetalai mo le aso a taeao pe maua se avanoa. O le tulaga lena.

Afioga Hon Palusalua Faapo II: Lau Afioga i le Fofoga Fetalai o se mea e fia famalamalama.

FOFOGA FETALAI: O le a le mea lea e fia faamalamalama.

Afioga Hon Palusalua Faapo II: O le mea lea i le PFL lea e fai mai e leai se mea i le Tala o le Tupe ae manatua o le Tala o le Tupe lea o lea e aofia ai ma le Tala o le Tupe i le tausaga ua mavae lea e i ai le faamoemoe e faagasolo nei. Na alu ai tupe a le atunuu. Ua ou leiloa i le Sui Palemia po o le a le mea e popole ai. Ai e popole ina nei tei ua iloa o lea taunuu upu i le PFL.

FOFOGA FETALAI: Faafetai i le Taitai o le Itu Agai o lea ua maua lou finagalo.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai o le Tala o le Tupe 2013/2014 lea tatou te talanoaina ae ua maea le Tala o le Tupe 2012/2013, ua uma ona talanoaina le vaega lena.

Tofa LEALAILEPULE RIMONI AIAFI: Lau Afioga i le Fofoga Fetalai, o lea ou te malamalama o lena foi e silafia e lau Afioga. O le a ou see ese mai aua o lea ua ou iloa e i ai le mea la e tau nana i le PFL, e i ai le mea la e tau nana e fua i musu.

Ao lea o le a ou oo mai le SPA lau Afioga i le Fofoga Fetalai.

FOFOGA FETALAI: O le faasaoina o faamaumauga o tatou tualumaga e leai se tagata e mafai ona tali atu i mataupu tau le PFL na o le Minisita e fitoi tonu ma le PFL. O le mea lena e tataua ona outou logosaia le taumafai e tali tali atu ao le aotelega o le tali fuitau a le Malo i lona tulaga atoatoa ou te talitonu atu i lo outou finagalo.

Tofa LEALAILEPULE RIMONI AIAFI: O le mea lea na tau avatu o mafauauga e fesoasoani ai aua o lea ua commit le tatou Malo ao le mea lea o le punipuni mai o le a tuu la au fautuaga ae fai ia gau.

Ona ou oo mai lea i le SPA lau Afioga i le Fofoga Fetalai.

FOFOGA FETALAI: Lau Afioga i le Fofoga Fetalai e le o gau le PFL, e leai foi se faamaoniga po o se tala ua aumai po o se lipoti e faapea o gau le PFL. E leai foi se mea faapena i luma o le Maota, leai foi se mea o faasalalau mai i se gau o le PFL. A la e tatala le PFL pe a e fia alu e te silasila i ai, la e i tai i Matautu.

FOFOGA FETALAI: Malie le Taitai o le Itu Agai sei tuu atu le avanoa e faauma atu ai le tali a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o lea ua uma ona tali le Minista i le fesili e leai lava ma se mea tou te...o le tulaga lava ia a avatu lava le tali o le tali lava lena. Ae leai se PFL o gau, o la e folau lelei lava le PFL. E leai ma se mea tou te popole ai, o le a faapefea ona tou popole tou te leiloa ma se mea tau vaa. O le a la le mea o le a outou omai tou te fautua mai? O la e lelei le PFL ia ma ua matua 100%. Ua uma foi ona faamatala atu ia te outou le PFL i le fonotaga talu ai. E leai se mea o le tou popole ai, aua tou te popole ma aua tou te fautua mai na o mea sese lava tou te fautua mai ai.

FOFOGA FETALAI: Malie le Taitai o le Itu Agai o lea ua oo mai i le NPF le saunoaga a le sui usufono mo Faleata Sisifo.

Tofa LEALAILLEPULE RIMONI AIAFI: O le a ou see ese mai le PFGau, PFL. Malie Honourable Leader have a rest.

Lau Afioga i le Fofoga Fetalai, ona ou oo mai lea i le SPA, o au ou te fia fesoasoani tele i lea atinae. O le 90% o mea ia tatou te i ai ou te faaogaina le uafu. E tataua ona toe fai faalelei le uafu e tele faaletonu o lo o i ai e fesoasoani foi i le Alii Pule o lo o i ai ma ana taumafaiga, tele aitalafu o lo o i ai ae tagai i ai le Malo po o le a se faiga e fesoasoani ai i lea Pulega tele a le Malo e le mafai ona tuu ai faapea ae o lea ua ave i ai le fesoasoani faafetai i lena tupe ua ave i ai e fesoasoani ai i lea vaega. Ou te matua lagolagoina le uafu, ona e tele tele lona sao i totonu o le tatou atinae ma mea tatou te faaogaina. E i ai lisi la e i ai i o, lisi muamua o le lisi lea na ave i le Tanoa o le fanua lea na matou feiloai ma le Afioga i le Alii Pule e tataua ona toe tagai i ai pe afai e tuai ona faatino lea...ua tataua ona toe faafoi mai fanua i lalo o le Pulega o Uafu ma Taulaga e tele nisi galuega e mafai ona fai ma toe fesoasoani ai. O fanua taua fanua nei pe a mafai ona toe faatino. Ou te fautuaina lau Afioga i le Minisita e manaia le toe tagai i ai. O le isi la e i ai o le lisi lea e fai ai le kalapu a le Marina i tai, na e sese toe tele le faaletonu na e i ai. Sei toe tagai lelei i ai lau Afioga i le Alii Pule ma le Board e toe faasao le lisi lena e tele le faaletonu la e i ai. O lena tou silafia e le tau fai atu. Faafetai ua i ai le siitaga i totogi o uafu...

FOFOGA FETALAI: Malie le sui usufono o saunoa sei tuu atu le avanoa i le Sui Palemia.

Tofa Hon Fonotoe Nuafesili Pierre Laufofo: O le mea lea e malamalama i ai le Malo e leai se mea o sese i le lisi ao lea la ua saunoa mai e tagai po o le a le mea la e sese i le lisi. E le o malamalama po o le a le mea lea e sese i le lisi lea e saunoa i ai?

Tofa LEALAILLEPULE RIMONI AIAFI: Lau Afioga i le Fofoga Fetalai, ou te lei taua lava se suafa o se isi i le lisi leaga o lea e malamalama i ai le SPA, malamalama i ai le Afioga i le Minisita ao lea ua saunoa mai le Sui Palemia, o lona uiga la o lau lisi? Po o le sao la lea? O le lisi a lau Afioga?

FOFOGA FETALAI: Malie le sui usufono mo Faleata Sisifo.....

Tofa Hon Fonotoe Nuafesili Pierre Lauofo: E le o sau lisi, o le mafuaaga lena na ala ai ona ou tu atu leaga pei e i ai se mea na e sau i tua o lau saunoaga. Na ala ona ou fai atu ona e faapea e i ai se mea e foliga mai e alualua ae leai se mea alualua i le lisi o le mafuaaga lena o lau fesili atu po o le a le mea lena e faaletonu?

Tofa LEALAILEPULE RIMONI AIAFI: Ia faafetai e pei ona ou fai atu na ou ta aofai le lisi ona ou see ese lea.

FOFOGA FETALAI: Malie le sui usufono mo Faleata Sisifo sei tuu atu le avanoa i le Minisita mo Uafu ma Taulaga.

Afioga Hon Manualesagalala Enokati Posala: Lau Afioga i le Fofoga Fetalai e tali vave atu i le tulaga lea e leai se mea o faaletonu. A silasila i ai i le vaega lea ua faataatia ai o lagona na ina ia develop luga o le uafu ma ia mafai ona faaoga i le tulaga e tosina mai ai turisi ma nisi e mafai ona faaogaina ia vaega. O le agaga foi lena o lea e faamoemoe i ai le uafu i Mulifanua ma le uafu i Salelologa ina ia mafai ona tosina atu i ai le mamalu o le atunuu faipisinisi e faaoga ma available le service i luga o uafu. Ou te manatu foi pei o le tulaga lea e i ai uafu i Asau ma le uafu i Satitua. O le taua ia o nei atinae aemaise le taumafaiga o lo o i ai le Matagaluega o Faatoaga ma le Ofisa o Faiga Faiva aua a silasila i ai i le tulaga o faiga faiva ua oo i ai ua faigata i vaa alia, ua tataua ona siitia le tulaga o vaa fagota e mafai ai ona maua le tamaoiga talafeagai e atiae. O lona uiga o la ua i ai le sleep way e mafai ona siitia i luga i vaa tetele atu i lo alia aua o la ua available le service. E le gata foi i lea a oo ina faatosina mai investors, e tilotilo la ua i ai le malae vaalele, ua i ai le uafu i Savaii faapena foi tua i Aleipata. O lona uiga o la ua i ai mea e mafai ona tosina mai i ai aua le atinae o le tatou atunuu ma maua ai galuega. Ma le faaaloalo tele.

Afioga Hon Palusalue Faapo II: Lau Afioga i le Fofoga Fetalai, o se mea e fia malamalama ai ona e taua tele le mea lea e saunoa i ai le Minisita aemaise la o le mea lea na tulai mai ai le Sui Palemia. O le lisi, o lea e fautua atu le vaega lena e silasila leaga o lea matou te iloa o le lisi o lea e i le Afioga i le Sui Palemia, o le mea lena o lea e fautua atu i o lea fia maua le.....

Tofa Hon Fonotoe Nuafesili Pierre Lauofo: O le tulaga tonu lava lea, o le lisi.....

FOFOGA FETALAI: Malie lau Afioga i le Taitai o le Itu Agai, malie lava lau Afioga i le Sui Palemia, o lea ua tali atugaluga na saunoa i ai le Afioga i le sui usufono mo Faleata Sisifo ma tuuaia ai le faaletonu o le lisi. O lona uiga o le faaletonu e solitulafono le lisi. O lea ua tulai mai le Afioga i le Sui Palemia ma faamalamalama aiaiga na faatulaga ai le lisi lea tou te....ma e le o ni mea e natia o lea e iloa uma lava e Samoa aafiaga o le Sui Palemia i le tulaga lea. O lea la ua tulai mai le Minisita e ona le Pulega ma tautino mai e leai, leai se mea o faaletonu i le lisi. O ai lea e tulituliaupu? O le tali a outou

lea e tou te aumai o lea e faaletonu po o le tali a le tagata o lea na te faafoea le Matagaluega.

Malie le sui usufono mo Faleata Sisifo tatou agai ese ma lea vaega o lea ua tali manino le Malo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai o le a ou agai ese ma lea vaega ae aoga fautuaga na e avatu na e nofo fale ia Satuiamaa.

Ona ou oo mai le i le EPC, faafetai i taumafaiga o lo o taumafai ai le Malo i nei atinae tetele. E le faitioina foi le tulaga o i ai i le pe soo o le tatou paoa ona o le taumafai e faaleleia. Pau lava lau fautuaga i lau Afioga i le Minisita mo Galuega i le konekarate lea na faatinoina le galuega pe i ai ma se vaega i totonu i le tagata na faatinoina le galuega aemaise le Malo o Iapani o tou galulue pea mo se tausaga po o le lua tausaga e fesoasoani ina ia mautinoa po o lelei ma mautu le faatinoina o galuega aemaise lava i le taimi e amata ai ona operate pei o le taimi lenei ma le maintenance o nei mea aua o mea tetele toe taugata a le Malo. Afai o i ai i le konekarate faafetai.

O le isi vaega e i ai nisi o kamupani na e fia omai e fai isi ituaiga paoa, ou te talitonu o lena e te silafia ma tilotilo i ai le Komiti o Tupe e tele le commitment lena e i ai le EPC i mea tau tupe ma ou te talitonu foi e le o toe avanoa nisi tupe e toe invest ai i mea faapena. Ae afai e omai a latou, tatala i ai le avanoa e omai ai latou i latou tupe e faatino ai ona filifili lea o le tagata po o fea le mea e alu i ai.

Ona ou oo mai lea lau Afioga i le Fofoga Fetalai i le Soifua Maloloina.

FOFOGA FETALAI: Malie lava le sui usufono o saunoa sei toe tuu atu lava le avanoa i le toe tali mai a le Minisita mo Uafu ma Taulaga.

Afioga Hon Manualesagalala Enokati Posala: Lau Afioga i le Fofoga Fetalai, o tulaga ia pei o le renewable energy o la ua uma ona...e le o i ai lava se vaega o pau ai o la ua uma ona faasalalau expression of interest i kamupani e mafai ona latou galueaina le solar ma vaega eseese. O lona uiga o la e maioio e le o nofonofu le Faalapotopotoga e pei foi ona ou talanoa atu i le isi taimi o Samoa lava le atunuu muamua na aumai i ai fesoasoani ia na aumai i Iapani e tauala mai i le Failautusi a le Pasefika. O lona uiga o lo o faatino tulaga uma. Ae leai se mea e popole ai o la ua agai le Faalapotopotoga i tulaga ia e aoao mai ni kamupani ma fai i tulaga masani ma aumai latou tauofoga ma faatino ma tagai i faiga faavae a le Malo e fai ai. Ma le faaaloalo.

FOFOGA FETALAI: Malo. Tulai mai le sui usufono mo Faleata Sisifo e faaauau le saunoaga. Toe lima ou minute.

Tofa LEALAILEPULE RIMONI AIAFI: Faafetai mo le vaega lea lau Afioga i le Minisita.....

FOFOGA FETALAI: Malie lava le sui usufono mo Faleata Sisifo, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea ou te tau tomanatu pe ua fa ea pe lima tausaga talu ona faatino mea ia sa muamua ona aumai le Tulafono Tau Faaofi e soloia ai le pule tutasi lea sa i le EPC e latou te mafai ai nao latou ona gaosi le eletise, e amata mai lava i lena Tulafono Tau Faaofi po o ua fa nei ea tausaga talu ai ona pasi. Ona tatala loa lea o le avanoa, a o le faalavelave e i ai Kamupani e le na o le Solar ae i ai foi isi Kamupani e omai ma a latou foi talosaga i le mea lea o le bio-fuel.

O le faalavelave o le toatele o le vaega lenei e omai ae toe sue atu ua leai. E i ai foi le isi kamupani, le kamupani tonu lava lea e te fai mai ai o lea foi e saili atu ua tele foi isi a latou talosaga mai i inei. Ona ou tusi lea i ai, faamolemole aumai a outou bank accounts se i siaki aku po o i ai moi ni a outou tupe pe leai. Na avatu atu le tusi lena ua le toe tali mai ae ou faalogo atu ua pasi solo i isi vaega o le Malo o la ua o e talanoa ae le mafai ona pasi aua ou te tuvae lua ai pe a aumai i totonu o le Kapeneta. O lea ou te tusi atu ai e aumai a latou bank accounts e ave i le Komiti e saili ai po o ni Kamupani moni. O le tasi lena siaki ua leva ona taoto ia tatou faiga faavae e maua ai tagata e omai ae leai ni tupe, o le tulaga lena e masani ai lo tatou Malo ma Malo uma lava e muamua siaki. Ua ala ona ou tau atu ona o lo outou leo tetele tele ua matua tou leo tetele tele. Ou te le faitio i le mea lea a fai atu le mea – o lena ua outou faia le mea na matou fai atu ai, a ua leva lava ona faataoto e le Malo, a o le mea lea ua tupu ia te outou ua matua tou leo tetele tele a ua leva ona fai e le Malo.

FOFOGA FETALAI: Ua toe 5 minute o le sui usufono.

Tofa LEALAILEPULE RIMONI AIAFI: Ia se i alofa isi toaina ia ua leotele si toaina, leai na o fautuaga e avatu i lau Afioga i le Minisita, ae faafetai i le tulaga lea.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le faalavelave e aumai a outou fautuaga ua fa tausaga talu ona fai, ua maua mai ea. E aumai le fautuaga ua leva ona – o le mea lena na ala ai ona aumai le tatou Tulafono Tau Faaofi i le fa tausaga talu ai ina ia soloia le paoa tutasi lea sa i ai i le EPC na o i latou ona o le tapenaina o mea ia. Ou te toe faapea atu, soia tou te toe leo tetele.

Tofa LEALAILEPULE RIMONI AIAFI: E le afaina, o le mea lea e talanoa atu ai e tatala le avanoa, o lea ua leva ona outou iloa ua tatala lea pule i tua....

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le mea tonu lava lena ou te fai atu ai ua leva ona tatala le avanoa, ua leva lava ona tatala le avanoa.

FOFOGA FETALAI: Tulai mai ma leo lemu mai ae faaiu maia le saunoaga .

Tofa LEALAILEPULE RIMONI AIAFI: O lea se i tau faa feala.....

FOFOGA FETALAI: Ua toe 3 minute o le sui usufono.

Tofa LEALAILEPULE RIMONI AIAFI: Sa ou popole out e oo i le Soifua Maloloina i le amataga ona e uma ai lou taimi, a o mea ia o lo o saunoa i ai le Minisita ma faamalamalama i le mai suka ma mea uma nei e sili mamao atu le faamalamalama a Mulitalo i tausaga a o Minisita o le Soifua Maloloina e sili mamao i lo le doctor lea. E avatu le faafetai i le polokalame lea na fai nei e tetee atu a ii faamai pipisi.....

FOFOGA FETALAI: Malie le sui usufono se i tuu atu le avanoa i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, out e fia faatepa le sui usufono i le Tulafono Tumau fuaiupu 77, o lea e solifono, o lea out e faitaua.

FOFOGA FETALAI: Tulai maia le sui usufono e faaiu mai le saunoaga ua maea lou taimi.

Tofa LEALAILEPULE RIMONI AIAFI: Faafetai i lafoga nei na fai aua o lea sa tuutuu a lalo atu i lau Afioga i nei galuega lelei ua faatino aua nei faamai i le itupa o tane i faamai pipisi ma mea uma malo faafetai i lau Matagaluega, o mea aoga ma mea lelei.

Ona ou oo mai ai lea i le siitia o tau laiti nei mo le vaaia o le falemai, o mea lava nei o le olaga faalenatura o le tagata a sii le tau o le oloa e tatau foi ona sii le auaunaga ma sii aim ea e faatino ai galuega. O le tulaga lena lau Afioga, afai e siitia le tau o lona uiga e tatau foi ona tilotilo i le auaunaga ia sili atu ona lelei. Aua o lou lava talitonuga a faapea e sii le \$10 ae subsidise uma ai private i tua i le tai \$10 lea e totogi e le tagata ae \$10 e totogi e le Malo afai e 100,000 tagata na o le \$1miliona i le tausaga e alu ai a ua solve ai le tele o faafitauli.

O le tulaga i le siusiu pipi e le toe mafai ona fai ai se mea o lea ua taga mai a o le mean a fai sa tuu i ai le 300% ina ia faigata ona toe.....

Afioga Hon Tuitama Talalelei Tuitama: Lau Afioga i le Fofoga Fetalai, ona o le mataupu lea sa laga muamua, out e talitonu foi sa faafofoga le sui usufono o ou taua lea vaega ona o lea e tulei mai lava le private sector i le tulaga lea, e pei e faafoliga mai e lelei ai le service, a o lea ua uma ona ou taua o lo o galulue faatasi le Matagaluega ma le Private Sector o le partnership lea o lo o faaaogaina e le Matagaluega Fomai Tumaoti latou te faia le Outpatient. O lo o faaaogaina foi Fomai Tumaoti latou te vaaia falemai i tua, lea e faafaigaluega ai i konekarate e galulue ai mo le soifua maloloina.

O le tulaga foi mo le siitia o le auaunaga, o le faamoemoe tonu lava lena lea e fai ai nei le falemai fou. E pei foi ona ou taua i le taimi ua mavae, o le CT scan lea e faaaoga e tatou na o le tasi le slice, o le falemai fou lea o le a faaoagaina nei e 16 slices o le CT scan lea o le a faaaogaina nei. E tele la le eseese o le auaunaga o lo o faamoemoe e tuuina atu i le tatou falemai fou o lo o i ai. E faatasi ai foi ona o lea e mulimulitai a ii le tulaga ai lava o ni a latou soalaupule lea e fai i mea e tatau ona laga i le Fono a o lea e le o atoatoa

ona aumai e tofu lava le sui usufono ma sina ana fasi mea e molimoli mai a ua le tuufaatasia.

O le tulaga o le siitia o le auaunaga, e pei ona maua sa ou taumafai e faamatala i le sui usufono mo Vaisigano sa lauga a ii le tulaga o tamaiti. Ua faalua ona lauga le sui usufono, na lauga i le Tala o le Tupe talu ai ma na ou avatua i ai le tali o le a silasila i ai le Mataglauega, a o lea foi ua toe aumai nei. O le agaga lea ina ia tuu saoloto pe vaai fua tamaiti mai le faatoa soifua mai seia oo i le lima tausaga le matua.....

Tofa LEALAILEPULE RIMONI AIAFI: Lau Afioga i le Fofoga Fetalai, o lea ua tali le Minisita i le sui usufono mo Vaisigano Nu. 2 i le mataupu lea i tamaiti ae le o alaala atu le sui usufono. O le tulaga o lo o i ai nei ua i ai le fuafuaga a le Matagaluega, o le tualga sa i ai e vaai fua lava tamaiti mai lona faatoa soifua mai e oo i le tolu tausaga e leai se tupe e tologia i le vaaiga ma togafitiga. O le taimi nei ua i ai le fuafuaga a le Matagaluega mai le faatoa soifua mai e oo i le 15 tausaga o le tamaitiiti e vaai fua ma togafiti fua.

O le tasi tulaga o le siitia o le auaunaga o so o se gasegase e i ai sona fesootaiga ma maitaga tau tiga e vaai fua uma. O le auaunaga ua leva ona taulagi mai, o faamai le pipisi po o faamai oti e i ai le toto maualuga, cancer, suka, mai fatugao, o gasegase uma nei e vaai fua. Ua leva ona vaai fua mai e oo ma ii lenei taimi ma e faaauau ai pea lea tulaga.

O le tasi tulaga o o tatou tama ma tina matutua ua penisione, o lo o vaai ma tala fua a latou talavai, e faapena i gasegase o mai tuga e pei o le fatafata vaivai, cancer, mai o ponaiivi e aafia i le siama, mai fatu, e maua fua fualaa ma taoto fua i totonu o le falemai. O auaunaga ia o lo o saunoa i ai le sui usufono ma ua tatau ai ona avea lenei avanoa e faailoa atu ai le siitia o le auaunaga o lo o alo atu i ai le falemai aua le tatou falemai fou.

FOFOGA FETALAI: Ua ou manatu e faauma mai lau lauga le sui usufono mo Faleata Sisifo.

Tofa LEALAILEPULE RIMONI AIAFI: O le siusiu pipi ona ua toe tatala mai ae 300% le tiute o lo o i ai. O le mea o lo o tulai mai manatua o le tau o le siu pipi i Tutuila na o le US\$10 po o le US\$20, ae a aumai i inei po o le tolu i le fa au pusa e le oo i le 300% lea, ae lelei se i faataga mai ai taitasi mo nai tagata.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, e i ai le mea lea e misi atoa i le saunoaga a le sui usufono. E sao o lea ua tatala le avanoa a o lo o i ai le puipuiga i lalo o le Tulafono e faasa ai ona faatau, o le upu lea e faaoga “is for personal consumption” o lona uiga a aumai lava sau ato siusiu pipi e faaoga lava ma taumafa e oe a e mai ai lava oe ma e uma ai lava. O le tulaga tonu lena o lo o i ai le Tulafono ae le o faatagaina ona faatau i faleoloa ma faatau i le mamalu o le atunuu.

Tofa LEALAILEPULE RIMONI AIAFI: O le mea lea e tupu o lea e faapea tatou te le o malamalama – tatou te iloa uma lava e le o mafai ona faatau a o le mea lea e talanoa atu ai i le travel allowance a le tagata e \$500 ae sau la ma ana siusiu pipi e leai se tiute ona defeat ai loa lea o le mea lea na ai ona tuu i luga o le 300%. O lona uiga a manao e faalaitiiti le aumai o le siusiu

pipi e tatau ona tuu i luga o le 1000 po o le 2000% ona toe feololo lea o le mea aumai.....

FOFOGA FETALAI: O lea ua maua atu le mea lena e te saunoa i ai le sui usufono mo Faleata Sisifo, ua ou tatalo atu ua uma lou taimi.

Tofa LEALAILEPULE RIMONI AIAFI: O lea o le a faauma lau lauga, faafetai i le Afioga i le Palemia i le Fono lea o le a fai mai i le tausaga fou. E leai se isi e le talanoa i le matagofie o lea fono ma o le avanoa foi lea mo i tatou e faalauiloa ai lo tatou atunuu i le toatele o tagata o le a omai. Ona pau lava o lea e avatu le lagolago ma ia matua tapena lelei ma fai ia matagofie aemaise o nai au faipisinisi fai mea taulima ma amata ona fai ia oo atu i lena taimi o lava i omai foi tagata ma o atu e faatau ae le taitai ona lava. E tatau ona matua lava tapena i tatou

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ona pau lava lea o le mea faatoa manaia ai le sau a le sui usufono, faatoa pau lava lea o le mea lea e lelei. Ae i ai le vaega lea e le o mafai ona faatino i le taimi lenei o lea ua i ai le fund e amata ai ona faatino le tatou water front development, o le a matua fai atoa ai lava luma i i ma alu atu ai lava e gata ma ii tai i Matautu. A outou silasila i le oneone uliuli lea na aumai e le Evan o le tasi lena mafuaaga ua taofi ai ona toe eli, lea o le a toe faaoto mai ma toe picked up le faga oneone lena e sau lava mai tai taamilo atu i i. E oo i le bay keke po o le pu fafa sei tulou la i tua ane o le fale o le Malo ua i ai foi le fuafuaga e matua fai lelei le mea lena e fai ma matafaga e tafafao ai le atunuu. O lona uiga o le a i ai le faga oneone uliuli i le itu atu le la sosoo mai ai ma faga oneone papae, sosoo mai ai ma faga oneone enaena ma faga oneone lanu meamata i le itu le la, a umi ona tatou Fono faapenei, a alu alu ia tuu le Fono ae tatou o tatou te taele a ii gatai ma tatou faalala i gatai.

O le tulaga la e ala ai ona ou fai atu, o le fuafuaga lea masalo e amata i le tausaga fou, o e o le a front iga le sami o le isi lena o latou sao tele lava e faamanaia ae avatu le ata i le mea e tatau ona fai ina ia paleni aim ea uma ma atili toatele ai tagata asiasi maimoa mai fafo e omai ma feoi solo i le taulaga ma omai e faalogologo i le Itu Agai.

Lau Afioga i le Fofoga Fetalai, o lau toe tulai atu lena, o lea faatoa manaia lau saunoaga a ua uma le taimi.

FOFOGA FETALAI: Lau Afioga i le sui usufono mo Faleata Sisifo, o lea ua tautino le saunoaga a le Palemia. Aua le popole o lea o le a maua lua lisi ma le Taitai o le Itu Agai i le wáter front lea o le a fai. Aua e te lua atugalu fua i le mariner le la taatia pea le mea le la o la e ua leva ona amata ma ua matagofie, ae faaiu mai le saunoaga. Faaiu mai le saunoaga e ava tele atu ae tausisia a tatou Tulafono.

Tofa LEALAILEPULE RIMONI AIAFI: Ia faafetai lava i lau Afioga i lenei aso ma le faagasologa o le tatou Fono. Faafetai i lau Afioga i le Palemia ma le Kapeneta faapea Minisita. O matou lava ia o le tuu atu o le tuualalo, a fai, lelei, a leai, ia e toe taumafai foi i le isi taimi. E tai pei lava o le supo povi foi lele, e faaoga le mea tae tiai le ponai.

Lau Afioga i le Minisita o Tupe, malo faafetai. Na ala ona tupu le faigata ma le tulaga na tulai mai, o le peni. E i ai le peni lea e ia te au, o le mea lea e lotoleaga ai le Taitai o le Itu Agai ma le sui usufono mo Gagaemauga Nu.2 i le sui usufono mo Faasaleleaga Nu.4. O le peni lea na sau ma le sui usufono mo Faasaleleaga Nu.4 mai o, o le peni na ia sainia ai le loan o le fogafale sefululima lea e i tai. Faafetai i le sui usufono mo Faasaleleaga Nu.4 o lea ua tau le peni, ua maua sao lava le promote o oe.

FOFOGA FETALAI: Ia, leaga o lea ua taua le suafa. Tulai mai le sui usufono mo Faasaleleaga Nu.4.

Afioga Peseta Vaifou Tevaga: Lau Afioga i le Fofoga Fetalai, ou te le i fia tu atu. Ae ou te lagona o le mataupu tonu lava lea na ala ai ona lotoleaga le Itu Agai ia te au, ma e le sefululima foi fogafale, e 35 fogafale lea na ou sainia i Saina. O le agaga tonu lava lena. O lona uiga, ua leva ona filifili e le Minisita ma lana Matagaluega se sui e lava le tomai i ituaiga galuega faapea. O le ala lena na ave ai au. A o ai e feagai ma nei galuega tetele? O le laisene lea ou te nofo ma au, o le international. E o o lava i le apolo e tau i le lagi.

Tofa LEALAILEPULE RIMONI AIAFI: Faafetai leaga na o le pau lea o le tagata na ia iloa le apolo. Faafetai aua o lea na outou faafofoga i ai nei i le taeao, na sau fai mai o Iesu o le Palemia. Ia, na ta ola mai lava ita fai mai le fesili, 'O ai le Faaola?' 'O Iesu.' Ae o lona uiga e le i faapea, o ai le Palemia? Ae fai mai, o Iesu. O le Palemia o Tuilaepa.

FOFOGA FETALAI: Le sui usufono mo Faasaleleaga Nu.1, malie lou finagalo.

Afioga Peseta Vaifou Tevaga: Lau Afioga i le Fofoga Fetalai, a foi lena pei ona ou fai atu, afai na filifili le Palemia e le Atua, e faapena foi ona filifili e le Atua Iesu.

FOFOGA FETALAI: Malie lou finagalo, o lea o le a toe fai atu lau Afioga i le sui usufono mamalu. Taatia ia ua uma ona e fetalai ma e lauga, o lea ou te iloa e te le alu i le lotu ae ua e lauga faa-Tusi Paia analeila a ua ou le faalavelave lava.

Ia faaii mai lau lauga le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga i le Fofoga Fetalai, malo le onosai, malo le lototele. I le mamalu o Samoa o lo o faafofoga mai, le Maota, a i ai foi se upu ua sala, ia, faapena ona faamagalo le auuuna faapea foi sui usufono mamalu. E faapena foi i Faauluuluga o Matagaluega e pei ona tatou mafuta, malo le galue, aemaise foi lenei Itu i lau Afioga i le Taitai, ia manuia le Fono a Samoa. Faafetai.

FOFOGA FETALAI: Malo faafetai. Ia e manatu o lea ua atoa tagi le paia o tuleiga ma saunoaga ia Tumua ma Pule, a o le a lafo le faaaloalo i le feagaiga. Ua leva ona tataua ona tulai le feagaiga i le vavao o le sui usufono mo Faasaleleaga Nu.4 ma le sui usufono mo Faleata Sisifo.

Tulai mai le sui usufono mo Aiga i le Tai, ua maua lou avanoa, ona soofau lea ma le lauga a le isi feagaiga a le atunuu, le Vaa o Fonoti.

Afioga IFOPO MATIA FILISI (Aiga i le Tai): Faafetai lava i lau Afioga i le Fofoga Fetalai. E pei uma lava o le taimi lenei e tatau ona fai ai se malologa ae se i taumafai atu le sui usufono mo Aiga i le Tai. Faafetai mo le avanoa. E tafaimaa le tamaloa na liufatu i le Alataua, ae tafai tupu, tafai tamalii, tafai faleupolu le Maota i Tiafau, i le afio o lau Afioga i le Palemia ma lau Kapeneta, afifio foi le Fono Aoao o Samoa i ona sui usufono mamalu uma, le paia lasilasi ua nofoia ai nei le malae o le faautugatagi a Samoa, ou te faatalofa atu.

Ou te faatalofa i le tapuaiga mamalu a Lana Afioga Mamalu O Le Ao o le Malo ma Lana Masiofo, faatalofa foi i le Sui o le Fono a Sui Tofia ma lana Masiofo, e faatalofa atu foi i le Faamasino Sili ma le Ofisa o Faamasinoga. I faauluuluga uma o Matagaluega ma la outou tapuaiga, faafetai.

Lau Afioga i le Fofoga Fetalai, ua ou talitonu o lenei Fonotaga o le talanoaina o le Tala o le Tupe 2013/2014. Ona ou faapea lea, o le a i ai se taimi ona ou toe o o lea i ai, ae maua se avanoa se i ou faafeiloai atu ai i si ou itumalo. Ua lua foi ma le afa tausaga lenei Paeaiga. Faafetai.

Ou te faatalofa atu i lo tatou itumalo; ou te faatalofa atu i Luatimu i Faleu, le malae na lua i ai taeao o le Talalelei i Samoa, a o le luaipou o Malo na muai tofi i ai upu o le atunuu, le susu o Leiataualesa ma le Aiga Sa Leiataua. I lau fetalaiiga Futi o le moa na vinimua ma le Sa Mutimuti ma le Matua ia Vaisagote, talofa. Le mamalu i Malaetoi i le susu o Leiataualetaua ma Aiga Sa Leiataua, le falelima o alo o Sapapa lau fetalaiiga Vai ma le faletolu, talofa. Tulouna Atiga i le susu o Taupau ma le Aiga Sa Taupau, tulouna Falemai i le susu o Mulipola ma le Aiga Sa Mulipola, alaalatai lau fetalaiiga Auapaau ma le falefa o Salua ma Satuilagi. E faatalofa atu foi i le Ana o le Maile aua Luatutu ma le Aiga Sa Luatutu, tulouna Fogamanono i le Maota e susu ai Tuilaepa o le Alo o Malietoa, le susu o Usoalii, afio le Matua ia Finau ma le mamalu i le Pologama.

Ou te faatulou atu foi i paia o Lalotoa aua le susu o Sau ma le Aiga Sa Sau e faapea foi le afifio o Lilo ma Tiumaivao ma le mamalu o Sauma. Talofa. Ou te faatalofa atu foi i si o matou nuu, i le susu o Alo o Malietoa, susu lau susuga i le Faaaloaloga i lau Susuga Moananu, Taulapapa ma Tauti. E faatalofa atu foi i le Aiga o Fuailefau ma le Pouli, susu foi le Faaaloaloga i lau Susuga Fuailefau Lote Naseri, Fuailefau ma le Pouli.

E faatalofa atu i lo tatou aiga le Usoalii, i le susu o Togialelei Ioapo o le Faaaloaloga, susu Togialelei Ifopo, susu Togiaivaimoa ma lo outou aiga. E faatalofa atu i le alaalatai o Falute ma Maoso, Fatei ma lo outou aiga, le paia i le Lautinalaulelei i le susu o Mulipola ma Taupau ma o oulua aiga. E saga faatalofa atu foi i le mamalu i lau tofa i le Tuua le tama o le nuu Lautolo faapea foi le faleupolu.

Lau Afioga i le Fofoga Fetalai, e faapea foi ona faatalofa atu i fatafaitaulaga e fia i susuga i Faafeagaiga ma o latou faletua. E le mafai foi ona faagaloina lou tama pule o si matou Ekalesia ia Lui Sanele, le faifeau foi o lenei sui i lau Susuga Lolesio ma Maletina, faafetai i le tapuaiga.

Ona ou faapea lea, o le a taumafai se sao o lenei sui usufono, pe amata mai i le Minisita mo Leoleo, Falepuipui ma Auaunaga Tau Tinei Mu. Faafetai i lau Afioga i le Minisita, faafetai foi i le auaunaga a le Matagaluega o Leoleo. E

faapito pea se faamatalaga i Faleolo i le galuega fita po o se galuega e tele le coverage i Faleolo, e faapena foi. Ona ou faapea lea, ou te tatalo atu i lau Afioga i le Minisita, ou te iloa e le o lava taavale mo le serve ina o tua ia i matou.

E faatalofa atu i lau Afioga i le Minisita mo Galuega, Felauaiga ma Atinae Eese. Faamolemole lau Afioga i le Minisita...

FOFOGA FETALAI: Malie lava le sui usufono o lo o saunoa se i tuu atu le avanoa lea i le... O le a se mea le Alataua?

Afioga Lafaitale Patrick Leiataualesa: Lau Afioga i le Fofoga Fetalai, e leai se agaga e faauilavea i le saunoaga a le sui usufono mamalu, ae ta te manumanu foi i Tulafono Tumau a le Maota, e sefulu tamai pepa ia e faitau.

FOFOGA FETALAI: Ia, o la e na ona faamaumau lava, ae o la e kiliva sao mai e Aiga i le Tai.

Afioga IFOPO MATIA FILISI: Lau Afioga i le Fofoga Fetalai, ou te iloa lava e le i aoga le sui usufono lea. Mo mea o points, o mea o pin points mea nei le Alataua.

Afioga Lafaitale Patrick Leiataualesa: Lau Afioga i le Fofoga Fetalai, a e silasila mai i tamai pepa nei e 10, o le faamaoniga lena o lau tala. Ua tatau ona masani ua lua tausaga o lana Paeiga. E le tatau ona toe faitauina na mea. E faitau uma lava lauga a le aualii ia, na o le sui usufono mo Falelatai ma Samatau le tagata lea ou te tilotilo atu e le faitauina lana lauga.

FOFOGA FETALAI: Malie ia le sui usufono o lo o saunoa, se i tuu atu le avanoa o lea o le a faalavelave outou Tumua ma Pule o lea faatoa saunoa le feagaiga.

Afioga IFOPO MATIA FILISI: Ia, ua toe ulu lava e le Malisi le Malisi, aua o le Manono foi le sui lea. Le Minisita mo Galuega faamolemole ou te faafetaia lava le galuega ua fai. Na pau lava le mea ua toe faamanatu atu e pei ona i ai si ou uso le sui usufono mo Falelatai ma Samatau i le va lea o Salua ma Sualo. Ma o lea foi ua maua le tala fiafia o lena ua i luga o le tender, ma o le a faasolosolo atu i ai galuega a le Malo. Faafetai lava.

Faafetai i le matou auala galue ou te iloa e le i faia ae ou te iloa ua i ai le fuafuaga. Ma e tau atu i lau Afioga, o auala uma ia i Mulifanua, Apolima ma Satuimalufilufi le isi pito a o Apolima le isi pito e pei ona taumafai mai i ai foi le uso a sui usufono mo Aana Nu.3, e le i o o i ai se ta talu ona feola mai le matou nuu ma le matou itumalo. A o auala foi nei e tau uma lava i faleaoga, o le primary school i Mulifanua e tau i ai le isi auala, o le primary school i Satui e tau i ai le isi auala, ma le kolisi o Aana Nu.2 i Apolima. Na o si au faailoa atu lea i lau Afioga ma le Matagaluega o lo o nafa ma auala, ae o lo o i ina lava le uta a le faimea aua le gasologa i luma. E talitonu foi o lo o malamalama, e le na o matou se itumalo, e faapena i talosaga, o le mea e ave i ai le faamuamua, o lena.

E talosaga atu foi i lau Afioga i le Minisita, ia alofagia le uafu e pei ona tatou talatalanoa i ai, e tasi lava le uafu i Apolima i le pito i uta e pei ona i ai

le ta asiasiga i le matagi lea o Eveni. Ua e silafia foi e manaomia lava se uafu. O lo o i ai foi i tai le susuga i le Faafeagaiga ma si ona faletua, e faapea foi le nuu o Apolima. E faapena foi Manono, sa ou lauga ai lava i le amataga e faaloloto, ma ua maua foi le tala fiafia mai le Faauluuluga o le Matagaluega i le SPA i lalo o le vaavaaiga a lau Afioga i le Minisita, toeitiiti lava lelei le tatou meafaigaluega o lo o i ai. Ia na pau lea o se soso atu i lau Afioga. Faafetai lava mo galuega uma lava ua fai mo le matou itumalo.

I le Minisita mo Punaoa Faalenatura ma le Siosiomaga, faafetai o lea ua toe tali mai, ou te iloa na ona faamanatu atu ae ou te iloa ua i ai le tatou tusi i le seawall. E le tele lava ni fale, ua o o atu foi lau Afioga ma e silasila i ai, mo lou silafia o le itumalo lenei o Aiga i le Tai, o mea lava nei sa ou faalogo ai lava o lauga ai nisi sui i tama o le atunuu ma tulatoa o lenei Maota, ona faapea lea, ia, e tuafale lava i le Esetete ae lumafale i le moana. O le mea lea, e laiti lava nai aiga i le pito i tai pe sefulu i lau tilotilo foi e le atoa se 600 mita e faataamilo mai ai le seawall pe a o o i ai se fuafuaga. E tatalo atu ma le faaloalo lava.

Matou te tatalo atu foi mo lou silafia ma asiasiga ua auala atu i le tatou fanua lea na avatu e le Malo mo le nuu i Mulifanua, e faapena foi Apolima ma Manono, ia alofagia ni elelee mo lenei nuu. O lea lava matou te lauina mai le ia i le maketi, ae fia maua ni elelee se i fai ai ni o matou maumaga ma mea faapena. Na pau lea o se mea ua faailoa atu i lau Afioga i le Minisita mo Punaoa Faalenatura ma le Siosiomaga.

I le Minisita mo Aoga, Taaloga ma Aganuu, faafetai i lau Afioga o lo o ua e malamalama lelei i lo matou malae taalo i le primary school. Afai o faalogologo mai le itumalo o Falelatai ma Samatau, e pei o i lava lea ua fai uma mai i ai taaloga. Ua o o lava foi i le suiga o le igoa o le Iuni Lakapi o le Aiga i le Tai, ua sui ia Aana West, ona o le manao ia tuu faatasi uma alo ma fanau a nai o matou itumalo. E faapena foi i le aoga i le kolisi, ua tuu faatasi foi itumalo tetele nei e lua, ia e alofagia.

O fuafuaga foi alualu i luma a alii ma faipule o lo matou nuu e tusa ai ma elelee na avatu, ua foai atu foi le isi fa eka mo le aoga. Ona ou manatua ai lea, faamolemole lau Afioga i le Minisita, ua tau fai lava sina tele laitiiti o le lisi lea ua avatu i le elelee o le aoga ae laitiiti le lisi lea ua avatu i lo matou nuu. Se i e toe tagai ane i ai po o le a se fuafuaga i ai aua ua matauina foi o lo o naunau lava le Malo ia faamuamua alo ma fanau aoga.

Faafetai i le Minisita mo Aoga, Taaloga ma Aganuu. O le tuualalo a le sui usufono mo Aiga i le Tai, ia outou tilotilo lava i le Tulafono foi lea i le sasaina e faiaoga o alo ma fanau aoga - ia tilotilo ma le totoa i ai. Na ou faalogo foi i ai, o sina tamai mea lava e faatino e le faiaoga ae ua faatele lava ma aumai i le Ofisa ma ua ou faalogologo foi i ai, e faaono mafai ona faamavae ai faiaoga i le galuega faafaiaoga ma o i nisi galuega. O le mea lea e tatalo atu ai i le Matagaluega, aemaise lau Afioga i le Minisita i lenei Tulafono i le sasaina o tamaiti e pei ona faalogologo atu ai i nisi o tama o le atunuu ua talatalanoa ai i lenei Tulafono.

Ona ou oo mai lea i le Minisita mo Tagata Tafafao Maimoa Mai: ona faapea lea o sau faamatalaga, faafetai lava ona ua faaoga o matou elelee i tua. E leai se agaga o le itumalo lenei ma le nuu lenei e teena ai le taumafaiga o galuega mo turisi ua atinae nei ina ia maua ai se tupe mo lo tatou atunuu. Ona i ai lea o le manatu, a mafai ona fau ni casino se fa i tua, e leai se mea matou te teena ai aua e maua ai galuega a tagata o le itumalo.

E faaiu sau faamatalaga i le Minisita o Tupe ma lenei aso aua o le auga lea o le tatou Fonotaga. Faafetai i le CEO, faafetai foi i le Matagaluega o Tupe i le tapenaina o lenei lipoti matagofie. E tasi lava le faitau atu a le tagata e malamalama i figures, tupe maua ma tupe faaalu ma mea faapena, ona pasia lea o le Tala o le Tupe. Ona pau lava lea o le fautuaga e avatu i lau Afioga i le Minisita faapea foi le Faauluuluga o le Matagaluega, o mea ia o COEs po o performance ina ia achieve targets foi ia e ave i ai. Ia tautuana ma Matagaluega ia e tumaoti, e tatau lava ona taumafai e avaeese le avega o lo o i le Malo.

O si au motugaafa lea ma lou agaga faaaloalo lava. E faapea foi i lau Afioga i le Fofoga Fetalai, faafetai lava mo lou avanoa. Faafetai foi i le Afioga i le Palemia ma le mamalu o le Kapeneta, faafetai foi i le Taitai o le Itu Agai ma le Sui Taitai ma lena Itu o le Palemene.

Ia manuia tele le Palemene ma lana Fonotaga i lenei aso, faafetai.

FOFOGA FETALAI: Malo faafetai saunoa le sui usufono mo Aiga i le Tai. E manatu ua tini tauao le saunoaga a le feagaiga a Tumua ma Pule.

O le a sosoo le fau ma le fau i le sui usufono mo le Vaa o Fonoti. Tulai mai lau Afioga i le sui usufono mamalu.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai lava i lau Afioga i le Fofoga Fetalai.

Ua afio lau Afioga i le Fofoga Fetalai, afio lau Afioga i le Palemia ma le paia i le Kapeneta, afio foi Afioga i Minisita Lagolago aemaise le Afioga i le Taitai o le Itu Agai ma lena Itu o le Maota nei.

E faapai atu foi i le tapuaiga a Samoa e amata mai i ona Ao seia oo lava i se ua aupito itiiti, ae tainane foi le tapuaiga a le paia i le Aufaigaluega Paia a le Atua i so o se Fata Faitaulaga o lo o tatalo i le ao ma le po aua se manuia o lo tatou atunuu.

Ou te faapai foi i lou itumalo ona ua toe lua isi Tala o le Tupe o lo o totoe ona o lenei ua afa lenei Paeaiaga. Afio lau Afioga Ulualofoaiga, le Matua ia Talamaivao, Aiga e lua, Afio le Usoalii, Afio mai le Toafa ma e na Taitai faapea foi Atua-le-Fauono.

Liliu mai i lea itu o le vai i lo matou nuu i Faleapuna i le Afio o Gafa ma Alo o Sina ma Suafa, Molioo ma le aiga Sa-Molioo, le Ailaoa, Malepeai o le aitu o le nuu. O paia na o lo tatou itumalo ae tainane foi le paia i le Aufaigaluega Paia a le Atua o lo o nonomanu aua se manuia o lo tatou itumalo. Maave eseese o lo tatou itumalo, ua malo le tapuai.

Lau Afioga i le Fofoga Fetalai, atonu a o le i faia se manatu i le Tala o le Tupe, e avatu le lagolago a lenei itumalo i le Tala o le Tupe ona o le tele o a matou fautuaga ma manatu o lo o i totonu o la matou Lipoti i le Komiti o Tupe na matou soalaupuleina ai le Tala Otooto o le Tupe nei, e talitonu o i ina e avatu ai le lagolago a le itumalo lenei. O le a amata atu i sina faafetai e tusa ai ma galuega o lo o faia i lou itumalo.

Lau Afioga i le Minisita mo Galuega, Felauaiga ma Atinae Eeseese e auala atu i lau Afioga i le Fofoga Fetalai aemaise foi le Faauluuluga o le Matagaluega. E momoli atu le agaga faafetai e tusa ai ma galuega o lo o faia i lo matou itumalo aemaise le auala lea e sosoo atu i Lona seia oo i Samamea, ae faapea foi le taligalu o lo o o faatasi, aemaise foi le sosooina mai o le auala lea na faaleagaina i Salimu ma Musumusuu. E momoli atu le faafetai e tusa ma

ia galuega o lo o feagai ai ma le Matagaluega. E talitonu lava i le utiuti o le faasoasoa, ae pei ona saunoa nisi sui usufono, ua 2013 tausaga faatoa oo lea o se faata i nisi vaega o Fagaloa. E le o ni auala galue, e leai o le main road. Ona pau le tatalo i lau Afioga i le Minisita mo Galuega, Felauaiga ma Atinae Eeseese, toetiiti lava oo mai le teu lea e sau i le itu mai iinei i sisifo i le nuu. Pe mafai ona faaauau e le konekarate lea o lo o i ai latou te teuina mai aua ua toetiiti lava taunuu mai ona uma ai lea. E tusa lava pe le faatina, ae e le afaina o le mea sili lava o le teu.

O le auala i le alu atu i Uafato, na o se talosaga lava e avatu. O lea auala e lima kilomita. A tofu lava le tausaga ma le kilomita e tasi, e fai fai lava uma ona e gaoa. Sa matou malaga ai ma le Taitai o le Itu Agai, toetiiti lava toe foi mai ua fefe e alu ai i le auala ona o le gaoa toe lauleaga, a o le aulelei ia o le nuu o lo o faatali mai i tua atu. E momoli atu ai le faafetai i lau Afioga i le Minisita, le susuga i le Pule Sili ma le aufaigaluega.

A o le matou nuu i Faleapuna, e tasi lava le auala galue o lo o i ai lea foi sa tatalo atu ai i le tausaga ua mavae, ona o le tóatele o le nuu ua o i uta talu mai le afa, ua tele foi aiga ua nonofo i uta aemaise o lo o i ai le pamu vai, o lo o pamu atu ai le suavai i le alu atu i Lufilufi. O lo matou nuu i Faleapuna ma Falefa o lo o faaaoaga ai le pamu vai lea e tasi, a o le matua lauleaga lava o le auala. A oo ina timu e fai ma auala e tafe mai ai le vai. E faataatia atu pea i ou tafatafa, e ui ina utiuti le faasoa a o lena ua uma ona avatu le talosaga, ae taatia atu i ina.

Faafetai i lau Afioga i le Minisita mo Punaoa Faalenatura ma le Siosiomaga e tusa ma le taligalu o lo matou nuu i Faleapuna o lo o faagasolo i le taimi nei. E talitonu e tele le galuega o lo o feagai ai, ae momoli atu le faafetai e tusa ma le galuega o lo o faatino i le itumalo. E leai se matou mea e tau ai, pau le agaga o le tatalo e auala atu i lau Afioga i le Fofoga Fetalai, le Palemia ma le mamalu i le Kapeneta, le susuga i le Pule Sili ma le aufaigaluega ona ua mafai ona faataunuu le faiga o le taligalu o lo matou nuu.

Lau Afioga i le Minisita mo Aoga, Taaloga ma Aganuu. E momoli atu le faafetai i le Faauluuluga o le Matagaluega o Aoga, Taaloga ma Aganuu. Masalo o lana official duty muamua lava lea na fai o le oo lea i Uafato i le malaga lea na matou malaga ai ma le Taitai o le Itu Agai e asia le faleaoga o lo matou nuu mamao lea. O le faleaoga lea na faaleagaina i le tsunami o le 2009, ona galo lea i le Matagaluega ona fai i ai se fuafuaga. O tupe lava a le nuu sa toe tau fau ai, ae sa faaleagaina uma i le tsunami le faleaoga lea. O le a taatia atu i ina ona ua i ai le fanua ua uma ona saunia mo se faleaoga fou pe a lava le faasoa.

O le itumalo lenei o Fagaloa ma Faleapuna e leai se malae taalo o i ai, e leai se mea. O Fagaloa masalo o le faleaoga o Lona lea o lo o fai sina lapoa o le malae o lo o i luma, e mafai ona fai ai se malae taalo o lea foi itu o le atunuu ona o le itumalo nei e tau leai ni eleele, e tua i le mauga ae lumafale i le moana, ae ona pau lea o se faleaoga e mafai ona fai ai se malae. O le taimi nei o lo o i ai le kamupani o lo o fai atua le auala, atonu e maua ai se fesoasoani e auala atu i lau Afioga i le Minisita mo Galuega e mafai ai ona o ane i latou e teuteu ma toe faaleleia le malae o lo o i ai, ona e omoomo solo, e le o lelei le mea o lo o tu ai i luma o le faleaoga, ae momoli atu le faafetai tele e tusa ai ma galuega.

Lau Afioga i le Minisita mo le Soifua Maloloina: faafetai mo le saunoaga o lo o faatali lau Afioga mo se fanua e tu ai le falemai, se i taumafai pea i nuu o

lo o talafeagai aua o lo o i ai lava le falemai tuai i Salimu, ae talitonu o uta i se mea o Taelefaga e talafeagai lea mo le fegasoloai o le itumalo e faigofie ona afe. A maua ni potu se lua pe tolu aua le gasolo atu o fomai o lo o asiasi i itumalo taitasi, e manaia lea e siaki ai nai gasegase i tua ona o le mamao. E fiu e tuli mai le maota gasegase o lo o latalata atu i Lufilufi. E mamao ala, a oo foi i le po e faigata ona ae mauga ma ifo vanu pe a e sau e tau sue mai se togafitiga i le falemai i Lufilufi po o Apia foi.

Lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, e talitonu o ni manatu na avatu i lea foi tausaga o lo o faagasolo pea. Faafetai i lenei vaitau ua le o toe maua mai ni fusuaga a tamaiti i le taulaga, ae taatia atu pea i tafatafa. Na tatou tutupu mai lava o sasa tatou e o tatou matua. E le i faapea na alo le sasa a o tatou matua ia i tatou, atonu o le auala foi lena o lo o mafai ai pea ona tatou tausi le filemu. E ese mai Samoa i atunuu uma o le lalolagi ona e i ai a tatou agaifanua. Po o a foi Tulafono e faatino, e leai e tele lava ina foi i se ifoga po o le a lava se faatoesega e fai. E talitonu e faapena le agaga ina ia puipui lo tatou atunuu ina ne i te i ua faaletonu.

Faamalo i le Minisita mo Fesootaiga ma Faamatalaga Tekonolosi, faamalo aua e le faigofie ae taatia atu pea i ina i fautuaga a nisi ua mafai ona taatia atu.

Lau Afioga i le Minisita o Tupe, e talitonu ua lua ma le afa tausaga o tatou galulue ma le sui usufono mo Faasaleleaga Nu. 4, o a foi faamatalaga ua fesouai ai lenei aso e talitonu e leai e le tetena i o matou manatu ona o lo o silafia e le Atua mea uma. E le i faapea o le sese o se isi po o a ni mea na fai, leai e eseese auala na fai e le Atua e mafai ai ona matou galulue. E momoli atu ai le faafetai i lau Afioga, faafetai foi i le faatoatoa aemaise o le loto faamagalalo i le tele o tuuaiina sa tuuaia ai lau Afioga ma lou nei sui usufono leai tuu i le Atua, o lena lava e i le Tusi Paia le tau i o le e te faamagalalo i ai. E le fai atua sau tala i lea tau i a o le malosi o lau faamagalalo o lena o lo o i le Tusi Paia le tau mo le tagata e agaleaga mai ia te oe ma e faamagalalo i ai. E momoli atu ai le faafetai e tusa ai ma le galuega, po o le a lava le tautua sa tautua ai lau Afioga i le lua ma le afa tausaga e faamalulu atu, aemaise o Matagaluega e 9 sa tatou galulue ai, faafetai i lo outou lagolago mai a o ou i ai i le Ofisa o le Minisita o Tupe, ia alofa le Atua ma faatumau i lau Afioga le toa e aua ai le foi e fai le mea moni ma aua ai foi le fefe e fai le faaiuga e tataua ona fai. E pei o se tasi o saunoaga, aua le fefefe e aumai loan e fai ai atinae a lo tatou atunuu. Ana tatou faaogaina fautuaga a le IMF ma Faalapotopotoga mai fafo e le mafai ona tulai mai Samoa i le tulaga ua i ai nei ona ua siitia le tulaga i le lelei o le tatou tamaoaiga. E momoli atu ai le faafetai i le Minisita aemaise o le Matagaluega ma le Faalapotopotoga.

Ona ou oo mai ai lea i le Minisita mo Tagata Asiasi Maimoa Mai Fafo, e talitonu le agaga o lenei vaitau o lo o luga lalo lea foi Faalapotopotoga, malo mo le faatautaiga. E ui lava ina tele faamatalaga ma feeseeseaiga ae talitonu lava le mafaufau o lo o taumafai pea e atinae lo tatou atunuu. E pei lava o le auala foi lea na fai ai atinae ona e faapea o le tamaoaiga lea o le tatou atunuu o tagata tafafao asiasi mai fafo, e i ai lava le taimi e faaletonu ai ae atonu e le o toe mamao ona faaleleia lea o lenei atinae. O le taimi nei o lo o i ai sina faaletonu ona o le le o lava o tagata asiasi maimoa mai fafo. O le agaga ma le faamoemoe i le Malo i nisi auala e galulue faatasi ai le Faalapotopotoga o

Tagata Asiasi Maimoa Mai Fafoga ma le Faalapotopotoga o le au fai hotels aua le manuia o le tatou atunuu i tupe maua.

Lau Afioga i le Minisita o Faamasinoga ma le Pulega o Faamasinoga, atonu o lo o lelei faafoe ae pau lava le agaga faamolemole e fia malamalama ai. O decisions foi nei e reserve a le Faamasinoga po o le a se tulaga ua i ai, e i ai isi faaiuga ua fitu tausaga e le i maua lava se faaiuga. Na ona taatia atu i ina i lau Afioga i le vaega lea o le Supreme Court ina ia tagatagai i ai po o le a se faaiuga e mafai ona fai ona taumafai lea e faataunuu.

Lau Afioga i le Sui Palemia ma le Matagaluega e faamalo atu le galulue, o a lava galuega o lo o feagai ai faamalo le galulue i le tautuaina o le tatou atunuu.

Ia, le Itu Agai po o le a lava le vevesi ou te talitonu e tasi lava le auga o le tatou faamoemoe ia manuia lo tatou atunuu. Ou te talitonu o a foi fautuaga e aumai tatou te galulue faatasi ai lava. O nisi foi taimi ua outou o i le televise ma tuuaia i matou ae le afaina i o matou tagata ona o le le femalamalamaai, a o lo o i le Atua pea le tau i nei mea, o ai lava e talitonu i ai o le mea lava lenei tatou te galulue faatasi ai. Ona pau lava le agaga o i tatou uma o le Palemene o Samoa, o le tatou galuega o le atinae o le atunuu, o lenei foi vaitau e le toe aoga ona tatou feupuai, ua uma foi le tatou Paeaiga na o le 5 tausaga toe 2 tausaga, ua amata ona oo mai le taimi foi lea e fai mai ai le tala a le isi toeaina i tua ia matou, o le taimi foi lenei ua tataua ona sue le mea e ola ai le cowboy ua le o toe mamao ae taunuu lo tatou vaa, o le tatou galuega lenei e tataua ona fai i le isi afa o le tatou Paeaiga, ina ia mafai ona tatou toe foi mai. O au ia na ou sau lava i le 5 tausaga, a uma ma foi i tua, o le a lava le finagalo o le Itumalo, o lenei. Ou te le i sau ou te nofo ai i nei i le olaga atoa, leai o le tofi o le Itumalo, e pule foi le Itumalo i le tofi mai i lea Paeaiga ma lea Paeaiga, a o lau Paeaiga e 5 tausaga, ae a ou toe sau e viia lava le Atua.

Faafetai i lau Afioga i le Fofoga Fetalai mo le avanoa, i a alofa le Atua ma foai atu pea le malosi i la le tino aemaise o le agaga ma le toa e fai ai faaiuga aua le manuia o le Fono a Samoa o lo o e taitaia. Lau Afioga i le Palemia ma le paia o le Kapeneta, faamalo le fai o le faiva aemaise foi ou uso a Minisita Lagolago ma Tamaitai sui usufono i lo outou galulue aua se manuia o le atunuu.

E faapena foi i le la itu o le Maota, ia manuia Samoa o lo o faafogafoga mai.

FOFOGA FETALAI: Faafetai saunoa i le sui usufono out e talitonu ua matua matagofie lenei afiafi ma ua fetai fola. E fetai lava le faaiuga o le tuleiga ma le saunoaga ma le ta tonu foi o le tatou taimi malolo.

E momoli atu le agaga faafetai tele i le onosai mai o le tatou Maota i lenei vaega o le afiafi ma ua tatou taunuu i le maea o le tatou taamilosaga lona tolu, toe tasi le tatou taamilosaga lea o le a tatou sosoo ai mo le faaiuga o lenei poi le 8 i le 11 ona tatou malolo ai lea. E avatu pea le timai mo sui usufono e lei saunoa ia outou finagalo malilie o lea o le a alu atu i luga i le tatou lisi, o lea ua ia te au le lisi o sui usufono, a tofi atu lava le sui usufono i le taimi ua faatulagaina ai ia outou finagalo malilie leaga e le toe maimauina se minute e toe faasolo ai le taimi, o lea ua faatamoe le tatou galuega ma ua tataua ona tali le Malo.

O le a faia le tatou malologa ma ua saunoa mai foi le Matagaluega o le Fono Aoao e faia se tatou taliga sua mama e faaauau ai la tatou galuega i le itula e 8:00. E momoli atu ai le faafetai tele i lenei vaega o le afiafi.

Na faataatia ese Galuega a le Fono Aoao i le itula e 7:00 seia aulia le itula e 8:00 i le afiafi.

Na nofoia le Nofoa e le Fofoga Fetalai i le itula e 8:00 i le po.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2012/2013 & TULAFONO TAU FAAOFI O LE
FAATATAUINA O TUPE 2013/2014 – felafolafoaiga faaauau i luga o le
faitauga faalua – Aso 2**

Na toe faaauau felafolafoaiga.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono. E lagona ua taumailelei le igoaipu a le tamaloa mai lea itulagi, ou te manatu foi ua taumailelei le maukeni a le satini ma le araisa faapopo ma le koko Samoa i lenei vaega o le aso. E momoli atu le faafetai tele i le onosai mai o le tatou Maota. O lea ua tatou sauni i le tatou vaega mulimuli o le tatou Fonotaga seia aulia le itula e 11:00.

E maea le tatou Fonotaga ua maea le saunoaga a le sui usufono mo Vaa o Fonoti. Ia, o le avanoa lenei e tuuina atu i le Afioga i le Sui Fofoga Fetalai e tomua ai i le tatou faasologa o le vaega mulimuli o le tatou Fono ua faagasolo nei.

Tulai mai lau Afioga i le Sui Fofoga Fetalai e saunoa.

Tofa AGAFILI PATISELA ETEUATI TOLOVAA (Palauli Sisifo): Faafetai atu i lau Afioga i le Fofoga Fetalai i le avanoa ua tuuina mai. O lenei itula, e muamua ona faafetai i le Atua ona ua tatou aulia mai lenei itula o le aso. E ui lava ina ua loaloa foi le aso o faaaaogagase ona o tiute ma tofiga e pei ona tofofi i ai tatou, ae matauina lava e le o tuulafoaia le Palemene i lau Afioga i le Fofoga Fetalai faapea foi le Palemia ma le Aiga Kapeneta, le Taitai o le Itu Agai faapea foi sui usufono taitasi ma Faauluuluga o Matagaluega ua tatou faatasi i lenei itula. Ua mou atu le malamalama i tiute, o feau ma galuega sa feagai ai le atunuu, ua ufitia i tatou i le pogisa a o mauuluga pea le alofa ma le agalelei le mavae o lo tatou Atua. O Samoa o le atunuu tofi, aua e talatau Toga ae talatofi Samoa. E ui foi ina uliuli le moana ae ua iloa ala o ia. Ou te manatu o le a le o se faamatalaga a Palauli Sisifo i faigata ma paia o Samoa aua le tapuai faafogafoga mai a Le Ao o le Malo aua pe oo i ai sau faamatalaga pe leai, o paia lava ia o Samoa e tumau e le liliu. Ae na ona ou faatalofa atu i le faafogafoga tapuai mai a Samoa i lenei itula o le po.

Ou te faatalofa atu i lou itumalo o Palauli Sisifo i le faga i sasae, i le afifio o le paia o le Aiga Salevalasi, le falefa ma faigata ma le tautalaga a Faiumu faapea le igoa o Salemuliga. Ou te faatalofa atu foi i le faga i sisifo, i le

afifio o Faatupuinatui ma Tuato, falesefulu o Pesefeamanaia ma e na tai. Afifio foi le Matua ma le uso, faapea le ituala mavae, le Tama a le Fale ma le mamalu i le Ailaoa. Afifio foi Letele ma Leaupepe faapea oe Utumapu, alaalatai le mamalu i le Falelua.

E faatalofa atu foi i si ou nuu o Salailua i le afifio o Lealaitafea ma le aiga Alosina, susu Savaiinaea ma aiga Sa Amituanai, afififo le Matua ma le Tamatane, afifio Leuluai alii ma alii o le vaipaepae, alaalatai oulua Aitutagata Tuato ma Tuitolovaa ma le igoa o Salemuliga. Le paia i le Aiga Sa Lauulu ma le nofo a Suafa ma lau fetalaiga Faatoafe ma le nuu faigata.

Ou te faatalofa faapitoa atu foi i lau Susuga i le Taitaifono o le Ekalesia EFKS lau Susuga Tavita Roma ma le faletua, faapea le nofo a Faafeagaiga i Ekalesia e fia mai Falemii seia paia Nuulu ma Vaipaepae. Talofa talofa lava. Malo le tapuai. A ou te talitonu lava o le mau faa-Samoa, o so o se faiva e sii ae tapuaia, o faiva manuia ia.

Lau afioga i le Fofoga Fetalai, e le umi sau faamatalaga i le Tala o le Tupe, na o lau faafetai atu i le Afioga i le Minisita e ala atu i le Nofoa. O le tele ia o lou faatuatuaga i laasaga ma le tapenaina o le Tala o le Tupe i lea tausaga ma lea tausaga. I le taimi e taunuu atu ai le faailoaina o si au fasikeke i le Matagaluega, o le taimi o le a finau ai le Matagaluega o Tupe ma Matagaluega taitasi aua e mananao uma lava Matagaluega e tetele a latou fasikeke. I le taimi foi e sua ai le aulapauta ma le aulapatai i le tele o faamatalaga aua lava le taumafai ia lava se tupe a lea Matagaluega ma lea Matagaluega. E o o mai la i le Kapeneta, ua lava lou faatuatuaga i le Matagaluega faapea le Ofisa Sili o Pulega ma le aufaigaluega ua maea ma ua lava tapena le Tala o le Tupe. Na pau lava lau fautuaga i lau Afioga i le Minisita e ala atu i le Nofoa, a e toe tomanatu i tua i lau lauga muamua i totonu o le Palemene lenei, sa ou talosaga atu ai i lau Afioga, a o i ai lava se avanoa e nono mai ai ni a tatou tupe, nono. Au asa siisii foi le Maota i lena vaitau i lota fou mai i faaupuga faapea, talofa e ia tatou fanau, o le a nono nono la ae o ai e totofia? E malamalama lelei le Maota i le saunoaga a le Palemia, nai tamai miliona lava ia tatou te totofia i lea tausaga ma lea tausaga o nonogatupe, ae fia selau ma selau o miliona lea e faagaoioi ai atinae ma le tamaoiga o le tatou atunuu. Toe ono lava masina ona siitia lea o le vasega o lea o le a tatou aoga ai nei.

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie lau Afioga i le Sui Fofoga Fetalai... O le a le mea lea e te fia faamalamalamaina lau Afioga i le Taitai o le Itu Agai?

Afioga Hon Palusalua Faapo II: O mea ia o aitalafu e saunoa i ai.

FOFOGA FETALAI: Ia, ailoga e i ai se faamalamalama o lea lava e...

Afioga Hon Palusalua Faapo II: Mo le silafia e le sui usufono, afai e piliona le aitalafu ae afai e \$42miliona lea e totofia i tausaga uma, e ova i le 200 tausaga o totofia. O e silafia la le mea lea e fai atu ai? E ova i le 200 tausaga o totofia.

FOFOGA FETALAI: Ia, o lea ua malamalama le Taitai o le Itu Agai. Ia, malie lau Afioga i le Taitai o le Itu Agai, se i o o lava i lou taimi e faamalamalama ai terms ia o le tologiina o mea ia e te atugalu i ai ona faamalamalama lea. E faamalie se i tuu pea le avanoa se i saunoa pea le Sui Fofoga Fetalai i lona lagona, i lona naunau toe ono masina tatou see ese ma le mataupu lea o Least Develop Nation. Tatou te o ese loa, ia e le mafai loa ona tatou toe maua le faamanuiaga lea e naunau i ai le Minisita o Tupe ma le Malo e tataua ona tatou maua. Ia, se i tuu atu la le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o au ua tau te i i le te i valevale mai a le Taitai o le Itu Agai. Po o le 200 tausaga po o le 300 tausaga, o le matua selau pasene. A lea na ou lau atua ananafi le isi nogatupe muamua, ae na o le 232 lava le tului o la e totogi. O mea faapena, tatou te moomia lava ni nogatupe e 200 pe 300 tausaga o totogi aua foi e laitiiti lava nai mea e totogi. E leai se mea e te popole ai. E pei lava e te le o maua mai le mea na ou talanoa atu ai i le aso ananafi, a o le sae ia o faigamea ia umi o totogi, ia o o atu i ai na o le \$1 e totogi.

Afioga Hon Palusalua Faapo II: Leai, lau Afioga, leaga o lea na saunoa le sui usufono, e le tologia e fanau ma fanau, a o lea ua ou tali atu, e totogi e fanau ma fanau ma fanau ma fanau, e uma le po lenei o tau le fanau, e totogi lava aitalafu lenei.

FOFOGA FETALAI: Malie le sui se i tulai mai le Malo e faamalamalama.

Susuga Hon Tuilaepa Fatialofa Lupesoliai Aiono Neioti Sailele Malielegaoui: A foi la o le mea lena e taua ai, aua a totogi e fanau ma fanau ma fana una o le 5sene e totogi. Ia se i vaai laia i ai? E te le o maua mai lava le idea o le mea.

FOFOGA FETALAI: Ia, tulai mai le Sui Fofoga Fetalai e faamalamalama le mataupu a le Taitai o le Itu Agai.

Tofa AGAFILI PATISELA ETEUATI TOLOVAA: Lau Afioga i le Fofoga Fetalai, ou te faafetai lava i le tofi o le sui usufono ua maua ai le avanoa ou te malaga ai i Saina, lea e le i leva nei ona ou foi mai. E i ai se tala pei o se tala o le vavau na ou faitau ai i Saina e faapea e i ai se ulugalii Saina e lumafale i le sami ae tuafale i le mauga. Ua soifua le fanau a le ulugalii, ua silasila atu le tama, e le mafai ona i ai se fanua e faalatele i ai ona o le a tupu lona aiga. Ona i ai lea o le mafaufau o le tama Saina, o le a eli ese le mauga, alu loa le Saina aumai le suo amata ona eli le mauga. Ua fesili i ai isi tagata, o oe e te faavalevalea, e faapefea ona e eli eseina le mauga? Fai mai le tala a le Saina, a o o mai lou oti, o le mea o le mauga e totoe, e omai lau fanau e eli, ina ia mafai ai ona faaleleia lo latou olaga. A eli eli e lau fanau ua feoti latou, fananau mai ni a latou fanau, eli e latou ia uma. O le agaga o le mea lea, o le agaga ina ia faaleleia le soifuaga o tagata. Ia lava se mea e o i ai.

Afioga Hon Palusalue Faapo II: Lau Afioga i le Fofoga Fetalai, o se mea e fia faasao. E ese lava le mauga, ese tupe ia e tofogi ai aitalafu. O le mauga ia, e mafai lava ona ou alu eli, e pei ona saunoa le sui usufono mamalu. E ese lava le mauga ia e mafai ona eli, eli foi i lima, eli i vae, a o le tofogiina o le mea lea, o le afu o le atunuu. Ma lou faaaloalo.

FOFOGA FETALAI: Ia, tulai mai le Sui Fofoga Fetalai e saunoa.

Tofa AGAFILI PATISELA ETEUATI TOLOVAA: O lou lava lea finagalo, a o lou foi lea manatu e fai atu. Ae ou te iloa a ou talanoa atu i mea e tau o analysis o faamatalaga ma le faatusatusaga o mea, e fai lava sina ou le malamalama i ai. Lau Afioga i le Fofoga Fetalai e ala atu i le Nofoa, ou te fautuaina lau Afioga i le Minisita, o a nisi nonogatupe e mafai ona fai i lenei masina, ou te tatalo atu lava e nono. Aua na ou lauga atu i le 2011 e nono, nono. O lea la ua amata galuega a lou itumalo i galuega ia, faafetai tele lava.

Ona ou o o mai ai lea i lau Afioga i le Minisita mo Galuega, Felauaiga ma Atinae Eeseese...

FOFOGA FETALAI: Malie lau Afioga i le Sui Fofoga Fetalai se i tuu atu le avanoa ia Saleaula.

Tofa Levaopolo Talatonu: Lau Afioga i le Fofoga Fetalai, o lea la ua manino nei, o lea ua matua tatalo le Sui Fofoga Fetalai i le Minisita o Tupe ina ia matua fai ni nogatupe i le ono masina lea e totoe, aua e uma loa le ono masina lea e totoe, ia e le iloa po o fea le mea o le a tatou o i ai. O lea la ua manino mai i i, o le mea lea o lo o atugalulu i ai le Vaega lenei. I tatou o o mai le DC i le LDC, ae le o tapena lelei. Ma le faaaloalo.

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Minisita o Tupe.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, faafetai. E leai se faafinauga e faia ma le sui mamalu o Saleaula e pei ona saunoa i le mataupu lea. O le tulaga lava ia i le siitia o Samoa i luga i le laina o atunuu ua agai i luma le tamaoaiga. E le o siitia Samoa i luga ona o le lelei faafoe o lona tamaoaiga. O lea foi e pei ona faamatala atu i le taeao nei o le classification o Samoa na faia e Malo Aufaatasi. O lea lava e fai feutanaiga ma le faletupe o le lalolagi, le faletupe o Asia faapena foi ma le faletupe o Europa ina ia faaauau pea tulaga faapitoa mo Samoa i le agai atu i le lumanai. E leai la se mea e atugalulu ai le sui usufono, e le o i inei Tuivalea. Ma lou faaaloalo lava.

FOFOGA FETALAI: Ia, tulai mai le Afioga i le Sui Fofoga Fetalai, ou te manatu ua malamalama. Faafetai i le Afioga i le Minisita.

Tofa AGAFILI PATISELA ETEUATI TOLOVAA: Ia o le finagalo lava lea o Saleaula. Ma ou te fautuaina lava le sui usufono mo Saleaula, aua e te faia ni assumptions i luga o lau lauga leaga ou te le i fai atu ai i le mea lena. O lea ua e silafia lelei, a nono tupe i le taimi lenei i se pasene laitiiti, e le mafai ona tatou toe maua pasene ia pe a sui nei le tatou vasega. A o lea ua e

fai mai o le uiga lena o lau faamatalaga, faamolemole lau Afioga i le Fofoga Fetalai, e leai e le o le uiga lena o lau tala.

FOFOGA FETALAI: Ia, se i malie le Sui Fofoga Fetalai se i tuu atu le avanoa i le faauilavea a Saleaula.

Tofa Levaopolo Talatonu: Lau Afioga i le Fofoga Fetalai, e leai ou te le o tetee i le saunoa a le Sui Fofoga Fetalai, a lea ua toe faamanino mai. E uma loa le ono masina lea sa tatalo ai e fai ai a tatou nonogatupe, tatou te le toe o i se pasene a lua ma le tolu pasene mama, tatou te o i luga o le 10+, o le mea lena na ou fai atu ai.

FOFOGA FETALAI; Ua maua le saunoaga a le sui usufono, lea o le a ou tali atu ia e puupuu ai, o faiga faavae e le faapea e tipi lava tipi motu loa. O lea foi ua fai tatou amepasa i Iapani ma Saina o la foi e i ai faletupe i na atunuu o lo o pau a latou rates. O le tapena lena na saunoa manino i ai le Minisita o Tupe i le tolu fa lauga faa-Minisita o Tupe. Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA: Lau Afioga i le Minisita o Galuega, Felauaiga ma Atinae Eseeese, out e le toe fai atu i se manaoga o lou Itumalo o lena ua i ou aao, faafetai tele i lou tali mai. E i ai nai vaega out e fia talanoa a ii le tulaga lautele, o le Aso Faraile na tea nei na ou sau ai i le vaa moe mai Savaii. Out e manatu e manatua pea i lauga o le 2011 e leai se pasi o le vaa ae silia ma le 20 i matou, na fai lea o le matou tonu o tagata uma e omai nonofo i le aualatele mai Mulifanua i Apia e totogi e latou le van e omai ai, ao tagata e afe i tua e pei o Vaitele ma Aleisa, Vaiusu ma Faleula uta lea o le a ou aumaia. O lau tatalo i lau Afioga, a faapea ua leai se pasi na laisene mo lea auaunaga o le a le mea e leai se van a le Faalapotopotoga o Vaa a Samoa mo sina pasese pau e omai ai nai tagata o lo matou nuu. E le gata foi i lea, ua ou faitau atu i le Lipoti a le Komiti o Tupe, o lo o latou fautuaina ai se fua e fua ai loli mamafa. O au out e nofo i uta i Aleisa Sasae matou te feagai pea i le taeao, aoauli, afiafi ma lea faafitauli i loli tetele. E le afaina loli tetele o lo o lauina uta ae i ai le taliuta i tua, a o loli tetele o lo o lauina mai le palapala ma maa lapopoa ae leai ni taliuta i tua. O anapo ina ua maea atu le Fono, e lima loli na matou fetau, e tolu loli e lelei moli, tasi le loli e matua leai lava ni moli ma le loli e tasi na o moli pe a faamalolosi ae a faavaivai loa u ape. Na ona tuu atu i tafatafa o lau Afioga i le Minisita, o lea foi ua e faafofoga i le tele o le faaletonu ma le poloka o taavale i Malifa, Lelata, Vaivase e oo lava i le Iunivesite i taeao, aoauli ma afiafi ona o le faaletonu o le auala laupapa i Lelata. Out e talitonu e i ai le Tulafono e faatapulaaina ai le feoi o loli tetele i luga o le auala tele i le taeao. O le taimi nei ua fai ma faalavelave nei loli tetele i le taimi o le pisi o taavale i le taeao mai le 6:00am i le 9:00 i le taeao a ua fai ma faalavelave nei loli tetele i luga o le auala. Out e iloa o le Tulafono e i ai le taimi e faataga ai loli tetele ona feoi i luga o le auala.

Lau Afioga i le Fofoga Fetalai, e momoli atu lau faafetai i le tele o Matagaluega a le Malo, ua ou maitauina ua tele le siitia o le auaunaga. O le uiga o lau faamatalaga, ua le nofoai le tele o Matagaluega se i omai tagata i Apia nei a o lea ua momoli le auaunaga i nuu i tua. Ua ou maitauina i le

Matagaluega o Tupe Maua sa ave le latou auaunga e taamilo i nuu i tua ma fesoasoani i le aufaipisinisi laiti i Tumua nei. O lea foi ua molimauina i faasalalauga a le Matagaluega mo le Soifua Maloloina o lea sa taamilo le aufaigaluega i falemai i tua i Upolu nei ma Savaii se i siaki le vaega o alii mai le 18 tausaga e agai atu i luga. Faafetai tele mo lea auaunaga, o lea out e iloa e tele Matagaluega ua leva ona latou faia le auaunaga lea. O le Matagaluega o Tina ma Tamaitai, Atinae o Nuu ma Afioga ma Agafesootai, Matagaluega o Faatoaga ma le Faleoloa o Faatoaga. Ou te faafetai atu foi i lau Afioga faapea le Palemia ma le Kapeneta ona o lo outou sapasapaia o le polokalame a le matou Ofisa o le Fono nei e ala i le faalauiloa o le Palemene. O le mea moni lava o le tele o mea e tutupu i Samoa e le iloa e tamaiti aoga. Na ou fesili i tamaiti aoga i le polokalame leni ina ua tatala ananafi pe latou te silafia o ai le Fofoga Fetalai, na sii i luga le lima o le tamaitiiti ona ou fai atu lea, o ai le Fofoga Fetalai? O Laauli Michael Jones, ia vaai e matua le iloa lava e tamaiti. O le toatele o sui usufono e le iloa e tamaiti aoga, ae leai se pese a J.Lo, leai se tama pese po o se tamaitai e sau i se ata tifaga e le iloa e tamaiti o le tatou atunuu, ae a oo i le lotoifale o Samoa o le vaivai ia o le silafia e tamaiti. Faafetai o lea ua amata le matou polokalame.

O nai aso e lua ua tuanei sa ou auai i le polokalame faalauiloa a le Iunivesite faapea le Matagaluega o Aoga, Taaloga ma Aganuu ma le Matagaluega o le Komisi e Pulea Tagata Faigaluega, o le polokalame sa faalauiloa ma faatosina mai ai tamaiti ina ia mafai ona faatauaina le galuega a faiaoga ia i latou. E lua aoga a Savaii na fai ai e lua aoga a Savaii na fai ai, na vaelua le motu, o le taua ia o lea polokalame ma o se polokalame muamua lea ua faatino ina ia taumafai e faatosina mai tamaiti mo le galuega faa-faiaoga. Po o ai e amata mea, po o ai foi e amataina ma taulamua ou te faafetai ua i ai le amataga. E i ai ni itu taua na aliae ma i leni polokalame o le mea muamua o le tuu itiitia o faiaoga. O le mea lona lua, o le le toatele o tamaiti e fiafia i le matematika po o le numera ma le saienitisi.

Lau Afioga i le Fofoga Fetalai o le mea mautinoa e auala atu i le Minisita, ua mautinoa mai i lea faalauiloa e ala ona toalaite tamaiti i le matematika ma le faasaienitisi, o le faafitauli ona e amata mai lava i lalo i le primary level e oo ma i luga e leai se tamaitiiti o toe fiafia i ia mataupu. E pei foi ona silafia o le Aoga Faifeau o se vaega a le Education system a Samoa ua aso ua mavae, o lea ua le toe i ai ni aoga a Faifeau, o le a la le mea lea ua faatumuina le avanoa lea? Aua e oo atu le tamaitiiti i le Primer one po o le standard one ua amata ona iloa faaopoopo le 1 ma le 1, 2 ma le 2, ua amata foi ona iloa tusi le A, E, I, o le faalagolagomaga lea o le Aoga Faifeau.

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, na o sina mea lava e fia faasao. Ou te masalo o lo o saunoa le Sui Fofoga Fetalai i le Ekalesia o lo o tautua ai, a o le Ekalesia EFKS o lo o fai suega ma aoga a le Faifeau, o lo o faagasolo na fai i le tausaga lea ma toe fai foi i leni tausaga. Ua toe fafagu lea vaega e le Ekalesia e ala i Tama o le Ekalesia ma le Fono Tele ina ia toe unai le tulaga o le vaega tonu lea o lo o

vaivai ai alo ma fanau a le atunuu i mataupu tau matematika ma le potu salalau. O le tulaga lena ae le tuua ai le tulaga atiae o mafaufau o alo ma fanau i le Tusi Paia.

Ma lou faaaloalo lava mo le silafia e le Maota aemaise o le faafogafoga a le atunuu leaga o au o le Tiakono Toeaina e tatau ona faasao le mea lea.

Tofa AGAFILI PATISELA ETEUATI TOLOVAA: Faafetai i lau Afioga i le Minisita po o le Tiakono Toeaina, faafetai foi o lea ua toe amatalia e le Ekalesia EFKS ae tatau ona toe faamalasia i tulaga uma lea tulaga ae taatia atu. O le faaitiitia o faiaoga e le o se mataupu fou, e le mafai lava ona taofia ona o le fegasolosoloai lava o le aufaigaluega a le Malo, ou te talitonu foi e le mafai lava ona foia le faafitauli ona o le faiaoga o le faitotoa lea mo isi avanoa faigaluega e tele i luma atu. O lou lava lena talitonuga o le faiaoga o le faitotoa lea mo isi galuega e tele lava e mafai ona oo i ai le tagata e avea ma faiaoga. Ou te le talitonu e faapea ua ala ona o ese faiaoga ona o le leaga o totogi, e i ai foi isi vaega e pei o le job security, o le mautinoa o lau galuega ma le faamalieleina o le loto o le faiaoga pe afai e lelei luga o suega a lana vasega.

Lau Afioga i le Minisita mo Aoga, Taaloga ma Aganuu, a uma ai lou taimi i i ua ou malie foi. Lau Afioga i le Fofoga Fetalai, se i toe silasila lava i le polokalame lea e totogi ai aoga a tamaiti. Ou te talitonu o lena e te silafia o le ulutala o le Tusi a le isi tamaloa o le matou nuu “e fai taliga o aupa”. Ua i ai lava tala ua ou iloa ma ua faamautinoa ua i ai foi nisi o faiaoga ua toilalo ona o lea tulaga. Sa matou fono o le mea lea na ou alu a i Savaii, sa matou fono ma le Ofisa o le Pule lua ina ia faamalamalama ia i matou o Komiti o aoga lea tulaga, faatoa ou malamalama ai foi au i le tulaga o le grant. O lea ua ou malamalama o le 2010, 2011, 2012 o le 60% i le 70% e alu i le fauga fale, ae pei na o le 20% i le 30% e alu i aoga a tamaiti. Out e tatalo atu e aua le tuu aunoaina ae tatau lava ona malosi le Matagaluega e follow up ma monitor le faaaogaina o seleni.

Ua faafogafoga Samoa i le finagalo o le Ofisa Sili o Pulega o le Matagaluega o Aoga ina ia faauumi itula aoga e oo i le 4:00. E pei ona ou fai atu out e le faitio i le Matagaluega a o ni manatu e faatupu manatu i lau Afioga e auala atu i le Nofoa, totogi e le Malo pili o aoga a tamaiti toe o ese mai tamaiti mai o latou matua mai le 7:00am - 4:00pm i le afiafi, silasila pea i ai pe talafeagai. E alu le aso atoa o aveese tamaiti mai o latou aiga ma o latou matua, atonu e talafeagai i fafo aua o le toatele o matua e faigaluega, a o tatou o le taimi lea e tatau ai ona omai tamaiti i o latou aiga.

FOFOGA FETALAI: Malie le sui usufono se i tuu atu le avanoa i le faamalamalamaga a le Minisita mo Aoga, Taaloga ma Aganuu.

Afioga Hon Magele Mauiliu Magele: Lau Afioga i le Fofoga Fetalai, ua tele nei manatu ua saputu mai, o le taimi muamua lenei ua ou faalogo ai o faaoga sese le SSFLS, o le tausaga muamua sa amata ai sa i ai faafitauli e pei o ni mea e fai mo le uluai taimi e i ai ni faafitauli. Ae afai e toe tupu mai i lenei tausaga o le mea lena e popole ai.

Ou te tulai atu ona e taua le mea ua saunoa i ai le sui usufono ina ia nanea sau tali e tali atu ai i le silasila pe talafeagai le 7 i le 4, se i faamatala mai e ia po o le a sona silafia la e i ai e ala ai ona le lelei ona ou tilotilo lea i ai. O le

faaiuga a le Matagaluega o Aoga, Taaloga ma Aganuu e fuafua i luga o suesuega ma itula faaopoopo e aoga i le tamaitiiti. O lea foi e tau atiae a tatou taaloga extra curricula activities e mautinoa foi i suesuega e matua aoga lava i tamaiti vaivai e atiae ai o latou mafaufau. O le tulaga lea i vaivaiga faale tagata o le a umi le taimi, o suesuega o le umi lava o le taimi o le tamaitiiti i le faleaoga o le lelei lena.

O le tali puupuu atu lea a o le a ou toe tali manino atu i ai pe a oo mai i lou taimi.

FOFOGA FETALAI: Malo faafetai ua tali malamalama le Afioga i le Minisita e ala atu i le faatofalaiga a le Sui Fofoga Fetalai. Tulai mai le sui usufono e faauau le saunoaga.

Tofa AGAFILI PATISELA ETEUATI TOLOVAA: E pei lava ona ou fai atu i le amataga i lau Afioga i le Minisita e ala atu i le Nofoa, ou te le faitioina le Matagaluega a o ni manatu e faatupu manatu i lena itu. Ua ou toe manatu foi i lau talosaga i le taimi ua tuanai atu i le faaaogaina o tamaiti vasega 13 ae latou te le ausia le Iunivesite po o nisi aoga maualuluga, o lau saunoaga i lena tausaga o le a faatonuina Pule Aoga o aoga maualuluga e tatala faleaoga mai le 2 e oo i le 4, e oo mai i le taimi lenei e leai se mea o faia. O manatu e faatupu manatu e avatu e atiae ai leaga e ese le taua o le Matagaluega mo Aoga, Taaloga ma Aganuu ma le galuega faa-faiaoga, ma le faaaloalo lava.

Afioga Hon Magele Mauiliu Magele: Lau Afioga i le Fofoga Fetalai e le mafai ona faalauiloa ni suiga tetele faapea e lei tuuina atu i le Kapeneta e aumai ai le faatagaga o le mea foi lena ua tuai ai ona faatino. O le taimi nei o la ua i luma o le Kapeneta le Pepa, o suiga tele ia e le faapea e fai atu loa nei tupu taeao. Ma le faaaloalo lava.

FOFOGA FETALAI: Faafetai mo le faamalamalama i lau Afioga i le Minisita mo Aoga, Taaloga ma Aganuu.

Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA: O le a ta le finau i lea mataupu ae taatia atu i ou tafatafa. O le galuega faafaiaoga malo i lau Afioga i le Minisita ua tele suiga lelei ua i ai ae talosia ia le taumafaiga o lo o i ai le Matagaluega faapea foi le Iunivesite i le faatosinaina mai o tamaiti e toatele ina ia mafai ona latou tauaveina le galuega faafaafaiaoga.

Lau Afioga i le Minisita mo le Soifua Maloloina e tauala atu i le Nofoa, faafetai mo galuega lelei uma. Ua maitauina lava le tele o le suiga i le falemai i Motootua e ui lava o la e fausia le falemai fou ae o le vave ia o le faasologa i le taimi lenei. O le Aso Toonai na tea nei sa ou oo atu ai i le falemai ua le atoatoa foi le malosi, ia na vave lava le faasologa i totonu o mai. Ae pei o le Vaega lea o le falemai ua ou maitauina le lelei tele ma le siisii i luga o le latou auaunaga, o le fale fainifo. Ou te mitamita ai lava i le auaunaga a le fale fainifo aemaise lava le Susuga Dr Soon sa matou feagai ao i ai foi nai gasegase mai fafo, o le vave ia ma le atoatoa o le galuega e avea ai lenei taimi e momoli atu ai le faafetai ia Dr Soon ma le auaunaga e tusa ai ma le faatinoina o tiute faa fomai nifo. Ou te talitonu ua vavae ese isi vaega o le

fainifo ua i Malifa ma isi nofoaga ou te talitonu o le mafuaaga lea ua lelei tele ai le fale fainifo.

Ona ou faaiu mai lea i le Minisita mo Punaoa Faalenatura ma Siosiomaga. Ua taatia i lau Afioga lau talosaga mo le matou taligalu. O le aso Faraile atu i ona tua sa tatau ona faaoga ai le matou fale komiti aua le auaunaga a le navy ma army lea sa taamilo peitai ane e lei mafai ona faatino i le fale komiti ona ua pau i lalo le pito i tua ona ua malosi tele le siisi i luga o le suasami. E talosaga atu ai i lau Afioga i le Minisita e te silasila ane i ai..

Lau Afioga i le Minisita mo Tina ma Tamaitai sa ou manao lava e faamulimuli mai i lau Afioga. Faafetai tele lava mo le galuega o le matou vai ua toetiiti lava ona faaiuina lea o le galuega o le matou vai. Ua molimauina e le matou nuu i Salailua le lelei faatino ona o le lagolagosua foi a le Matagaluega faapea le Ofisa o Vai Tumaoti ae pei faasilisili lava i lau Afioga i le Minisita mo Tina ma Tamaitai Atinae o Nu'u ma Afioga ma Agafesootai faapea le Minisita o Tupe.

O le lauga a Palauli Sisifo o le a seu i fanua lau Afioga i le Fofoga Fetalai. Faafetai tele mo le avanoa, faafetai foi le lava papale. O le a foi se faamatalaga ua le tautamalii i le faafofogaaga a outou Afioga i Minisita faapea foi le Palemene nei, ia malu ave i fale. Talosaga ia, ia ave lo outou soifua i le faaiuga o le fonotaga i lenei po. Ia manuia le Palemia ma le Kapeneta, Taitai o le Itu Agai ma sui usufono, ia manuia foi le Faauluuluga o Matagaluega ua tatou mafuta i lenei po, ia manuia foi lau Afioga i le Failautusi faapea le afaigaluega ma ofisa o le Fono Aoa'o Faitulafono. Ia manuia foi le faafofoga tapuai a Samoa i lenei itula o le po. Soifua ma ia manuia.

FOFOGA FETALAI: Faafetai saunoa i lau Afioga i le Sui Fofoga Fetalai, e manatu ua logo i tino matagi lelei e ala i tuleiga ma saunoaga ua faaoo atu i Afioga i Minisita aemaise foi le Afioga i le Palemia.

Tulai maia lau Afioga i se tasi o sui usufono mamalu matua mo Aana Alofi Nu.1, Afioga Leaupepe Toleafoa Apulu Faafisi mo lau saunoaga.

Afioga Hon LEAUPEPE TOLEAFOA APULU FAAFISI: Malo faafetai mo le avanoa i lau Afioga i le Fofoga Fetalai. Ua ou tulai atu ma le agaga faaaloalo sa i ai le manatu e le faia se lauga i lenei Tala o le Tupe ona ua talia ma le agaga fiafia le Tala o le Tupe e pei ona tuuina mai e le Afioga i le Minisita o Tupe. Ae ui i lea, ua lagona foi ai o manaia le faafogafoga tapuai mai a lou itumalo ma le atunuu i lenei taimi o le po o lo o tatou galulue ai. E momoli ai le faamalo i le tapuaiga a Samoa e afua mai i mauga tetele seia oo lava i mauga iti. I le afio o Lana Afioga Mamalu, O le Ao o le Malo ma le Masiofo faapea foi Sui o le Fono a Sui Tofia ma le Masiofo aemaise foi o paia faalupe o le Tafatolu o le Malo aemaise foi o feoi o le Talalelei o lo o faapena ona nono manu aua se manuia o Samoa i upufai o Malo ma lana Palemene.

E faatalofa atu foi i le faafofoga tapuai mai a lou itumalo, Faleasiu ma Fasitoo. Malo tapuai , alo maia e lagona foi le mafanafana o lo outou sui usufono ona o le tapuaiga e le gata i le paia maualuga i tupu ma ee faalupe o le tatou itumalo ia Faleasiu ma Fasitoo uta ae faapea foi le tapuaiga i Auauna a le Atua i le Susuga i le Toeaina Faatonu aemaise feoi o le Talalelei i fata faitaulaga e fia.

E momoli le faamalo ma le agaga faafetai i lau Afioga i le Palemia faapea foi le paia o le Kapeneta ma le Faigamalo. E auala se lagona faafetai ona o galuega lelei ua mafai ona faatino mo le itumalo e le gata foi i le itumalo, e le faapito foi manu ia tasi ae faapea foi le atunuu i suiga ua i ai le atinaeina o le atunuu. Ou te manatu foi ana le lelei foi le auvaa o le Afioga i le Palemia i le Kapeneta e le mafai foi ona faatino galuega lelei ua mafai ona latou faatinoina ma ua faapena ona siitia ai le matagofie ma le tamaoaiga o le atunuu. E ui lava o le tatou Tala o le Tupe ua faapea mai o se Tala o le Tupe ua faavae i le tulaga maaleale o le tamaoaiga ae ua outou silafia le tamaoaiga o le lalolagi ua faapena ona tulaga faaletonu. Ae ui i lea, o se tulaga aupito sili ona faafiafia ai le mafaufau ma le lagona o lea toe ono masina ona siitia lea o tatou i le tulaga o atunuu ua lelei faafoe le latou tamaoaiga. E momoli ai le agaga faafetai i le Kapeneta ma lau Afioga i le Palemia aemaise foi latou o lo o faatino taimatalii i Matagaluega a le Malo, Faauluuluga o Matagaluega ma Faalapotopotoga a le Malo aemaise foi o Pulega o lea Matagaluega ma lea Faalapotopotoga aua o le latou galuega ma le latou faiva alofilima ua faapena ona avatu i ai ma le fautuaga a le Malo ma le Kapeneta lea ua tulai mai ai le atunuu i se tulaga manuia.

O le Tala o le Tupe o lo o faapea mai e pei ona matou taua i le taimi ua sola o lenei Tala o le Tupe o lo o faavae i se tulaga o le tamaoaiga maaleale. O le Tala o le Tupe ua mafua ona...e faapea lava se lagona e pei ona matou fai atu ua faamauina lo matou taliaina o le Tala o le Tupe lenei e pei ona saunoa le Afioga i le Minisita o Tupe. O le mafuaaga o lea manatu, o se Tala o le Tupe ua matua lelei ona fuafua ma tapena. Ua mafua sou manatu ona e le iloa se tautai atamai i le taimi o le sologa lelei ma le lelei o le tamaoaiga o le lalolagi ae faatoa iloa le tautai matapalapala i aso o le louloua ma le utiuti ma le maaleale o le tamaoaiga ma le faaso. O le ala lea ua mafua ona ou faapea atu ou te talia ma le agaga fiafia le Tala o le Tupe lenei ona o se Tala o le Tupe ua lelei ona tapena, lelei ona fuafuaina. Malo faafetai e ui lava ina faapena ona le faamalieina ai nisi o lo o tagisa ma finagalo i ai sui usufono mamalu o le Palemene, ia e lei fauina Roma i se aso e tasi. E fai nei isi galuega, fai i lea tausaga nisi galuega e pei foi ona saunoa ma malele le Afioga i le Palemia. Fai mai le Palemia i le aso ananafi, “fai mea e tataua ona fai ma fai mea e tataua ona faamuamua”. O le taiala lea i lou talitonuga, tatou o e atinae mea e ao ona faamuamua i ai le atinae ma mea e ao ona faamuamua aua po o le a lava le tele o le tamaoaiga, po o le a foi le pote e le ofi i totonu o le Maota lenei ae a lelei ona faamuamua e maimau le taimi. Po o le a foi le uituti o le faaso ae a iloa ona faamuamua o le atamai lena i se tagata e na te foia faafitauli, o le tala lena a le isi tagata. O le tagata atamai, o le tagata e atamai e fofo faafitauli o aso nei. O le mea lea e to ai lou pulou i lau Afioga i le Minisita o Tupe, malo le tofa, malo le toa. E manaomia le Kapeneta e tulai e totoa outou loto. Sa matou saofafai foi matou iina e le faigofie le galuega ae faalagolago ma faatutua atu le Palemia i lo outou faiva alofilima. O le galulue faatasi po o le a lava le mea e mamafa e faigofie lava ona faatino i le galulue faatasi. E faamanatu atu foi o lo o faapea mai nisi o finagalo o lo o mafatia le atunuu ona o le fesiitaiga o nisi o fuafuaga e pei ona i ai le faamoemoe e faatupeina ai ma fesoasoani ai i le Tala o le Tupe lenei. So o se atunuu lava o le lalolagi e le mafai ona faamalieina e so o se malo e oo lava ia Amerika ma Saina. A outou malaga foi i tua i atunuu o Saina o le matitiva ia. E le mafai ona faamalieina le tamaoaiga o so o se atunuu o tagata

uma i le 100% o lena ua outou silafia ma tatou iloa ia naunautai o le Malo o le mea e lelei i le taulaga, e lelei foi i nuu i tua ae le faapea o le a lelei uma ai tagata aua e le faapea e lelei le tagata o la e toaga ma galue e usu i le valu itula e faaoga le aso ae o le a manuia ai fua ma le tagata e le gaoioi i le valu itula. So o se atunuu lava e i ai ituaiga tagata, e toatele ituaiga tagata, e tofu tatou ma le igoa, tofu foi tatou ma foliga, tofu foi tatou ma uiga. E i ai lava uiga o isi e mananao e fafaga i sipuni spoon feed. O le tagata lena e te fiu, e uma ona ave i ai le ia e manao e ave i ai le upega e leai ai lava, e fiu. E le faapea o le a taofia ai le atinae o le Malo ma le atunuu ae le faapea o le a taumafai e toso mai aua e sala le gagana aua le faafogafoga tapuai mai a Samoa. E fiu lava e ave le manu papalagi i le vaitafe e faainu ai a le fiainu lava e le fiainu. E fiu lava e fai atu e fai le mea lea ae le fia galue. O ai o le a pau i ai aua e i ai le isi mea lea e tupu i le vaitaimi lena aua sa tupu foi i le taimi o Iesu le Faaola. E manao le tama ma le tina e fanau e laua le fanau le tama ma le teine ae faamoemoe i le faifeau e ao e le faifeau le amio lelei. Leai o le tiute lena o le tama ma le tina e ao i le fanau le amio lelei, iloa faaloalo, iloa alofa, iloa usu i le taeao e fai se galuega. E faapena leaga o le mea lea ua i ai le tele o aiga e faalagolago e fai uma lava e le faiaoga mea uma. Ao le amio, ao le faaloalo, ao ia atamai ae usu le tina i le Bingo, usu le tama...e fiu lava e taumafai.

Afioga Hon Palusalua Faapo II: Lau Afioga i le Fofoga Fetalai, o le mea e fia faamalamalama.

FOFOGA FETALAI: Malie le sui usufono o saunoa, o le a le mea lea e fia faamalamalama?

Afioga Hon Palusalua Faapo II: E fai ma malolo. O fetalai a Iesu o a lava faaletonu ia e alofa, alofa i lou Atua ma lou agaga atoa ma lou malosi atoa ma lou loto atoa. Ia e alofa i ou tuaoi ia pei lava o oe. O lona uiga ia tatou alolofa i le au lima vaivai ma le au pagatia i le tau o le soifuaga.

O lea ou te iloa lelei o le Afioga Leaupepe o se tagata alofa, leaga o la e alolofa Saina i nai o latou tagata matitiva. O la e fau e Saina fale e nonofo ai tagata matitiva, o la e maua penefiti i Amerika e ave i o latou tagata matitiva. O la e ave penefiti a Ausetalia i tagata e le tagolima.

FOFOGA FETALAI: Palusalua, o lea na amata ona e taamilo mai i folafolaga a Iesu a o lea ua e oo i Saina.

Afioga Hon Faumuina Tiatia Faaolatane Liuga Lau Afioga i le Fofoga Fetalai.....

FOFOGA FETALAI: Malie lau Afioga i le Minisita o Tupe. O le mea lena ou te fefe ai tele pe a e tulai mai e te folafola le Tala Lelei. E pei lava e sese le mea lea e te sau i ai ae sa tataua lava ona e alu i Malua.

Tulai mai lau Afioga i le Minisita o Tupe.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e leai na saunoa le Taitai o le Itu Agai e faamalamalama le folasaga

malamalama ma le matagofie a se tasi o tamalii o le atunuu na soifua mai i se soifuaga galue ma saili malo.

Na ona ou fia faamanatu leaga o lea ua taua le Faataoto a Iesu po o aoaoga a Iesu, a o le Salamo lava ia e 23 fai mai, “O Ieova o lou leoleo mamoe o ia, e leai se mea ou te mativa ai.” O le tagata e faalagolago i le Atua e toaga e alu e toto le talo, e alu e faigaluega ae le faalagolago i le ola o le isi.

Ma lou faaaloalo lava.

Afioga Hon Palusalue Faapo II: Lau Afioga i le Fofoga Fetalai, se i faasao le mea lea leaga e le o se fetalaiga a Iesu le mea lea o oe o lou leoleo mamoe, a o le pese a le Fai Salamo o Tavita. E le o se fetalaiga la a Iesu. O le fetalaiga a Iesu lea e faamanatu i le Afioga ia Leaupepe.

FOFOGA FETALAI: E manatu o le a le faia se faafinauga leaga o le Lotu Nasareta iinei, a o le EFKS lau Afioga i le Taitai o le Itu Agai.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e tasi la lea vaega o lea e le atoatoa ai Aoa Fesoasoani. O lea e fai mai, “Na faia e le Atua le tagata i lona faatusa.” O lona uiga na o le faaputuga palapala pe ana leai le manava ola na tuu i ai e le Atua. O le mea lene na loto leaga ai Satani i le tagata na fai e le Atua, na faia le tagata e foliga ia te Ia, o tagata paia. O la e fai mai Iesu, “E sili mea tou te faia i mea ou te faia pe a outou faalagolago mai ia te au.”

Afioga Hon Palusalue Faapo II: Lau Afioga i le Fofoga Fetalai.....

FOFOGA FETALAI: Malie Palusalue, se o le a umi lo tatou taimi o fai a oulua felafolafoaiga i le faa-Talalelei, a o lea e.....

Afioga Hon Palusalue Faapo II: E tasi lava le fuaiupu lea. Ia tatou alolofa i le atunuu. O le Tulafono lene a Iesu, ia alolofa i le atunuu.

FOFOGA FETALAI: Tulai mai lau Afioga.....

Tofa Hon Tolofuaivalelei Falemoe Leiataua: Faamolemole lava lau Afioga i le Fofoga Fetalai pe maua sina avanoa?

FOFOGA FETALAI: Ia, o le mea la lea na fai atu ai. O lea foi la ua toe tulai mai le isi Aoa Fesoasoani.

Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Faafetai lau Afioga i le Fofoga Fetalai. Ua matau atu ua faalima pe faaono ona saunoa le Taitai o le Itu Agai i le vala lea, “Ia tatou alolofa i le Atua. Ia tatou alolofa i le Atua.” E i ai lou talitonuga o lo o sopoloa le vaai a le Taitai o le Itu Agai. A o lau fesili la i ai, po o ai na alofa i ai, pe alofa i le Atua pe alofa i le tupe i le taimi na faamanuiaina ai o ia i le Lotto i Ausetalia ae ua i ai foi le valaau a le Atua ia te ia?

Ma le faaaloalo lava.

Afioga Hon Palusalue Faapo II: Lau Afioga i le Fofoga Fetalai, e te faatagaina ia mea?

Lau Afioga i le Minisita, faalogo ou taliga! Ou te le i fai atu e te alofa i le Atua. Alofa i le atunuu! E eseese mamao lava le Atua ma le atunuu. Aua e te tu ae fai ifo...e le o sau upu lena na fai atu. O le mea lena e leaga ai lou moe, moe e tu ae i luga e te le lagona le upu lea na ou fai atu.

FOFOGA FETALAI: Malie lau Afioga i le Taitai o le Itu Agai, o lea o le a faamaea mai le Afioga i le Minisita.

Tofa Hon Tolofuaivalelei Falemoe Leiataua: Na o lou fia faasaoina lava o le sui usufono. O lana saunoaga muamua lena, a o lana saunoaga mulimuli lea na agai ai nei i le atunuu, a o le vaega muamua ia alofa i le Atua. A aumai Faamaumaga ae sao au, e tataua ona tea nei i le aso lenei le Taitai o le Itu Agai leaga o lea e olegia le atunuu.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O le tusi lea e talanoa tonu ai le toatolu lea, o le tusi tonu lava lea na lauga ai Tofilau ae faatoa sau i le Maota lenei talu ai le tulai soo i luga o le Itu Agai e taofi le lauga a Tofilau. Ona faamatala ai lea e Tofilau le uiga o le alofa lea foi na faalatele mai e Paulo. A o le iuga o le mea lena, ana e alofa e te le tu soo i luga e faalavelave i le lauga a Toleafoa. Po o le a lava le mea e te agai i ai, a e tulai soo loa e taofi le lauga a Toleafoa, e le o se alofa le mea lena.

FOFOGA FETALAI: Tulai maia le sui usufono e faaauau le saunoaga ona e manatu ua malamalama lea vala e pei ona i ai le atugaluga o le sui usufono mamalu.

Afioga Hon LEAUPEPE TOLEAFOA APULU FAAFISI: Malo faafetai. E leai o le a ou le amanaia le saunoaga a le Taitai o le Itu Agai aua e le o se isi foi o le maupaolo atu i o i le nuu nei. Pau lava le mea, se i fai fuafua alii i tama o le nuu.

E leai ua mafua ona ou fai atu leaga o lea e ave le mau a le Malo o lo o fua i ai ana atinae. O le mea e lelei i le taulaga po o Apia nei, e lelei foi i nuu i tua. E sao, o le taumafaiga lena o lo o i ai atinae ma fuafuaga. A avatu lava la i nuu i tua po o le taulaga e le fiafia i ai e atinae po o le a le tulaga e i ai, o lea na ou faatusaina i le manu papalagi, tulou le faafofoga tapuai a Samoa ma le paia o le Palemene. A avatu lava i le vai e le fia taumafa, o le a le mea o le a mafai atu i ai?

O le agaga lena, a o le alofa ia e leai, leaga o Iesu e ana le fetalaiga. O le fetalaiga a Iesu, “O e tumau ia te au, o au ia te ia e fua tele mai.” O ia lena e fua tele mai, e fua mai i le agaga, e fua mai i le tino. Ia leaga e fai sina mamafa o le Mataupu Silisili lea.....

O le agaga lena, a lailoa le Palemene e tau saili se fofo, a o le fofo o le galulue faatasi o le atunuu ma tatou aemaise o le pule mamalu a alii ma faipule. E tuu mai foi o latou tauau e vaai po o fea o mafuli i ai finagalo o le Palemene ma Tulafono. E fai foi le galuega a le Auaigaluega Paia a le Atua latou, ona tatou maua loa lea o se atunuu e sili ona lelei ma matagofie, malu puipuia ma faamamalu le Tulafono.

O nai mea ia mo lou itumalo e faaiu atu ai. E pei lava ona faafetai atu i mea uma lava e pei o auala, ae toe pau lava lea o se vai taumafa o lo matou itumalo o lo o faapena ona le maua ai se suavai i Faleasiu-uta aemaise foi o Fasitoo-uta, a o i ina o lo o galueaiina mai ai faatoaga o lo o faamoemoe i ai le tamaoiga o le atunuu. E lelei lava pe ana o le eletise po o se isi mea, a o le suavai o le olataga lea o le soifuaga o le tagata. O le mea lea e talosaga ma faamanatu atu i lau afioga ona ou te lagona o la foi ua leva ona i ai le fuafuaga a le Matagaluega, na o se faamanatu lava, a o le faasoa ma le lufilufi lima lelei, e faamoemoe atu i lau afioga. O oe foi o le Tiakono Toeaina e le tau faafulua ma e le tau laeia foi i se upu ma se gagana, a o le lufilufi lima lelei e manatua pea lou tulai mai i lenei foi Paeaiga.

Pau o le mea e faamanatu atu, se i silasila i le pe soo o le eletise. E ui lava i lea mea ma lea mea, a o le pe soo o le eletise e afaina ai pusa aisa, tulou lava le faafofoga tapuai mai a Samoa. O mea faapena e i ai laau ua faaleagaina. E lelei lava pe a avatu se fautuaga e faapea e amata mai i fea le motusia o le eletise ae faagata mai i fea ona o galuega e toe fia faaleleia. A o le otometi lava lea ona pe mai toe oo i le taimi e toe ola mai ai, toe pe i le afa itula ma toe ola mai foi. Na ona faamanatu atu aua e le faigofie le galuega, ae e tatau ona i ai se fofo e foia ai faafitauli. Pe la a leaga le pusaaisa e \$2,000+, ia o le a le mea o le a fai i ai? E pei o le tulaga lena e silasila i ai e le faigofie, ae e le faigofie foi le galuega.

E pei ona pau na o mea ua manatu i ai lenei itumalo o so matou suavai taumafa, ua uma ona faataoto lau polokalame. E fia avea foi lenei avanoa e momoli atu ai le faamalo i a outou afioga. Lau Afioga i le Minisita mo Leoleo ma Falepuipui, le Matagaluega o Leoleo ma le Komesina, ua faamalo le galulue.

Lau Afioga i le Minisita mo Galuega, Felauaiga ma Atinae Esee, ia maua lou malosi ma ia maua lou finagalo.

Le Minisita mo Punaofa Faalenatura ma le Siosiomaga, e faapena.

Lau Afioga i le Minisita mo Aoga, Taaloga ma Aganuu, lau Afioga Magele. O le tele o taimi ua faapena foi ona le maua i maua i le Ofisa. O lo o fai lava ma o e tau toto ni nai maumaga, atonu pe i ai se taimi e te valaau atu ai, ona ma omai lea ma aumai se toonai a lau afioga. O le a lava le mea e te finagalo i ai ma le Matagaluega, na ona logo lava o maua ma omai, ae faafetai mo avanoa e te tuuina mai. E leai o oe o le tama agaalofa ma o se tama lelei i le faiga o le galuega, e ofoina atu le soifua ma le ola tatou te galulue faatasi ai.

E faapea foi le Minisita mo le Soifua Maloloina, malo le galulue. Ou te le faafulua oe leaga o lou uso, a o oe o le toeaina o toeaina, malo faafetai.

E faapea foi le Minisita mo Tina ma Tamaitai, Atinae o Nu'u ma Afioaga ma Agafesootai aemaise le Tapaau, Afioga ia Tuisugaletauatele, malo, ia maua sou finagalo. Aua tou te popole i faitioga. O le a aveane pe na o Iesu foi latou na silasila le motu o tagata i vavega ae faitio lava? E oo mai lava le faavavau e faitio lava, aua foi a le faitio le tagata e le iloa o se tagata? Aua le popole fua i lena mea.

Lau Afioga i le Minisita o Tupe ma le tama matua, Tuiloma malo. Le tamaitai tasi o le Kapeneta, Afioga i le Sao Faapito, ia faamanuia le Atua.

Lau Afioga i le Sui Palemia ia maua sou finagalo e lagolago aua le Palemia ma le Kapeneta. Ia manuia lau Afioga i le Fofoga o le Fono. Ia manuia Faauluuluga o Matagaluega ma sui usufono mamalu o le Palemene, ae matou maloloina, faafetai.

FOFOGA FETALAI: Le sui usufono mo Faleata Sisifo, e i ai se mea e te finagalo ai?

Tofa Lealailepule Rimoni Aiafi: Tuu ia leaga o lea ua uma le lauga a si toeaina, faafetai.

FOFOGA FETALAI: Faafetai i lou ava i tagata matutua. Tulai mai se tasi foi o toe ulutaia o le Maota, lau Afioga i le tama a Aiga ma Sa-Asomua. O oe o le manaia tutasi a le Palemene e felelei mai uma i ai lupe o le vaomaoa ma tutu i lou aoa tele. Tulai mai e saunoa mo le Tala Faatatau Autu o le Tupe.

Tofa Hon TUUU ANASII LEOTA: Faafetai lava i lau Afioga i le Fofoga Fetalai. O paia o le taeao ma le aso o le a taoto a o se alaoo, aua o paia o Samoa ua uma ona aisa. E leai lava se potu e leai foi se vave e mafai ona ia toe faaopoopo sina iota o paia ma mamalu o Samoa, aua o paia mai le vavau e oo lava i le faavavau. O paia foi mai le amataga e oo lava i le gataaga. O paia ia lau Afioga i le Fofoga Fetalai, ae e muamua ona ou faatalofa i le faafogafoga tapuai mai a Samoa e amata mai i ona ao seia oo i ona iu, a o se tapuaiga mau foi i Faafeagaiga Taulagi i so o se Fata Faitaulaga i totonu o Samoa o lo o nonomanu aua se manuia o Samoa mo a taeao.

Ou te fia pai foi i le tapuaiga a lou itumalo, le paia ia Sa-Asomua ma Aiga e lua, lau Fetalai Tuuu ma lo outou Aiga Sa-Tuuu, le Falelua o Tulafale, le Fofoga o le Alataua, Utaileuo ma le mamalu i le Faletolu. A o se tapuaiga foi i le mamalu o le Aufaigaluega Paia a le Atua o lo o faafale le malu i totonu o lo tatou itumalo aua lava le semana o se manuia mo lo tatou itumalo. Tapuai maia ma le manuia ae se i taumafai atu se upu e tusa ai o le mataupu e pei ona lauliliuina nei.

E fia avea foi lenei avanoa ou te faatalofa atu ai ma faafeiloai atu i le susuga i le Faafeagaiga Namulauulu Samaoso Papalii ma le Faletua ia Sara aemaise foi o le aumalaga uma a le Assembly of God mai Sini i Ausetalia ua toai taunuu mai i Samoa nei, e i ai se taimi tatou feiloai. E le galo lo outou alofa tulai a o i ai le sailiga tupe a le HRPP i Ausetalia i le tausaga ua tuana'i.

Ona toe faafeiloai atu lea i le Afioga i le Fofoga Fetalai i lenei itula i le tuneva o le po, aemaise o sui usufono mamalu o le Palemene o Samoa. O lupe na faia mai i le fuifui o tofi na filifilia mai e nofoia Nofoa o le Palemene, o le Palemene o Samoa e tautuaina ai lo tatou Malo taitasi, a o se manuia lautele o Samoa atoa. O la outou tofiga ma ni a matou tofiga ua avea ai i tatou e faaleoina finagalo o tatou itumalo e faia ai lau faaiuga amiotonu ma le sao ma le le fefe, e faaleo ai lava lou talitonuga moni ina ia manuia ai le Malo ae tainane o le atunuu lautele. O tatou o sui usufono o le Fono Aoa Faitulafono, o sui a usufono e faia Tulafono.

Lau Afioga i le Fofoga Fetalai, o se faaeaea aupito maua luga lea a o tatou itumalo, e le faigofie le auala mai i lenei tofiga, e te le evaeva lava i le laufau

malu e sau e sui usufono, leai, o lena ua outou silafia ma o tatou iloa e faigata lo tatou auala mai i le Maota Fono lenei, lea e faalupe o le Maota o le Faautugatagi a Samoa. Ua taoto mai tiasa nisi o le mamalu o le atunuu na taumafai mai i lenei tofiga ae lei faamanuiaina lava.

Lau Afioga i le Fofoga Fetalai ma le mamalu o lenei Palemene, tatou agai i luma saili se manuia o Samoa e ala i la tatou auunaga o sui usufono o le Fono Aoaofaitulafono a Samoa. Lau Afioga i le Fofoga Fetalai, ona ou oo mai lea i le Tala Faatatau Autu o le Tupe 2013/2014, o le Tala o le Tupe lava ia o le tala o mea tau tupe. Fai mai le Lipoti a le Komiti o Tupe Maua ma Tupe Totogi, o le aofaiga o tupe maua masani ua faataoto mai i le Tala Faatatau Autu o le Tupe mo le tausaga faaletupe 2013/2014, e \$538,290,566. Ua maitauina e le Komiti le siitia ai o tupe maua masani a le Malo, o se vaega tele o tupe maua a le Malo e tusa lea ma le \$470,272,390 sa aoina lea e le Matagaluega o Tupe Maua e tauala atu i lafoga o tupe maua ma lafoga o oloa e faaulufale mai i totonu o le atunuu.

Lau Afioga i le Fofoga Fetalai, e fia momoli la le faafetai i le Afioga i le Minisita ma le Matagaluega o Tupe Maua ona o le faatinoga o lenei auunaga ma le galuega fita ma le faigata, malo le galue. I tupe faaalu o lo o faapea mai le Lipoti a le Komiti lava lea, ua maitauina e le Komiti e ui lava ina o lo o tau foia ma faafoisia le tulaga o le tamaoaiga o le lalolagi i le taimi nei, aemaise ai o le aafiaga o le tatou atunuu i faalavelave faalenatura, ae o lo o maitauina pea le faaauuina o atinae ma polokalame faataatitia a le Malo e fua i luga o ana tupe maua. O le tuufaatasiga o tupe faaalu mo le tausaga faaletupe 2013/2014 e tusa lea ma le \$746,901,013.

Lau Afioga i le Fofoga Fetalai, o se vaaiga lautele lena i le Tala o le Tupe lenei, e faatuputupulaia pea atinae aemaise o manaoga lautele o le atunuu aemaise o itumalo. Ona faapea lea o se manatu o lenei usugafono, tatou talia ia lea, ae ia fuafua lelei atinae ma polokalame faataatitia a le Malo e fua i luga o ana tupe maua. Lau Afioga i le Fofoga Fetalai o le a le toe tele se isi faamatalaga o lea ua talia e lenei usugafono le Tala o le Tupe e pei ona tuuina mai.

Ae ua ou tu atu ona o lou itumalo ia e aafia i polokalame ia e faataatitia mai. Muamua o auala galue, a maea le Paeaiga lenei ua 20 ou tausaga i totonu o le Palemene lenei o se sui usufono o le itumalo o Siumu, ae faapea se tau maitau atu, o le 1996 tasi le auala galue fai mo lou itumalo, 2001 tasi le auala galue, o le Paeaiga lea ua maea atu nei tasi le auala galue. Lau Afioga i le Minisita mo Galuega, Felauaiga ma Atinae Eseeese, ua ou talosaga atu ia e alofa mai i le ta tafutafuga, e na o le lua lava auala galue ia sa talosaga atu talu ona ou tulai mai i le amataga o le Paeaiga lenei, o le auala galue lea i Maninoa ia ma le auala galue i Saaga, ma lou faaaloalo ia e silasila mai. Sa ou talanoa atu i lau Afioga i ou auala ia ae sa faapea mai lau saunoaga, ua lava lou auala lea e ui atu i Tiavi, lau Afioga o le auala lea i Tiavi o Samoa atoa lea e faaogaina le auala lea e alu atu e tau i Siumu ia ona agai lea i Safata ma Lefaga, ona toe agai lea i le itu i Sasae o Falealili ma le atu Aleipata, ma le faaaloalo silasila mai i nai galuega ia mo lou itumalo. O lea ou te faafetai o lea ua maua le vai o le Alataua Sisifo ua taele tagata lea ua saunoa i ai le sui usufono, o lea foi ua faatusa ia Mose lea na ta le papa, a o lea e fia feinu lou itumalo. Lau Afioga o lea e tau asuvai mai lava lou nuu lea o Maninoa faamolemole, e le lava le press o le vai e ae ai i luga i nofoaga maualuluga ona o le vai lea pe a

sau mai Safata e le mafai ona ae i luga o nofoaga ia ma lou faaaloalo, ae a mafai ona vili se vai i luga i Maninoa, atonu o le a maua ai se tali talafeagai.

O le EPC o lea foi ua saunoa se tasi o sui usufono i le tulaga o le pe soo, o lea foi ua manino ma malamalama le saunoaga a le Minisita i le tulaga o le faaletonu, ae ia alofagia pe ia vave sue ane se tali o le faafitauli, ou te popole tei ua toe avatu se tusi a le Afioga i le Palemia pei foi o le vaega lea na ave i le Solar, lea e taua ai solofanua ma mea na, leaga o lea e malamalama foi i le faamaliega o le Afioga i le Palemia o mea lava mai i le Tusi Paia, e le toe afaina la ia faaupuga, ae alofa mai e tele mea e ono afaina ai i meatotino a le atunuu.

O taligalu lau Afioga i le Minisita mo Punaoa Faalenatura ma le Siosiomaga, e fia moomia se taligalu i lo matou itumalo i Maninoa e amata atu i le mea lea e i ai le Coconuts sei oo i Mulivai Safata, ma lou faaaloalo.

Ona ou oo mai lea i vai tumaoti, lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, po o le a se tulaga ua oo i ai le vai o lenei itumalo i le pitonuu lea o Saaga. Ina ua taulalata le Faiga Palota lea na maea atu nei, sa malaga atu ai nisi o le ofisa ma faapea atu, o lea ua i ai la outou talosaga masalo pe toe ono masina ona faatino lea, ia o lea o le a uma le Paeaiga e lei toe oo atu lava se isi, ae e leai se eseese o le mea lea na fai e le sui usufono mo Gagafomauga Nu.1 ma le Komiti lea, na tai foi le sua i le puua ae leai ma se mea na faia, lau Afioga se faamolemole aua nei toe o atu ni tagata e oleole lenei itumalo ma lou faaaloalo lava. O lea foi o lo o maitauina o lo o i ai se vaegatupe lea i lalo o le Matagaluega o Tina ma Tamaitai, o lea e fuafua e faasoa i e uma o lo o aafia i le Afa o Eveni, masalo o itumalo lava ia na matua afaina tele o Vaimauga Sisifo, Safata ma lenei itumalo, ae faafesili atu, po o le a le tulaga i le faasoaina, ona e mautinoa e toatele foi nisi o lenei itumalo. A o se talosaga foi ma se fautuaga, pe tatau foi ona aafia ai ma sui usufono o itumalo ia ina ia matou tuuina mai a matou lisi o aiga uma na aafia faatasi ai ma lisi a sui o le Malo aemaise foi o pulenuu, ina ia o tonu ai lava le fesoasoani ia i latou na aafia. O le tulaga foi lea lau Afioga e tuu atu ai se talosaga pe ono maua ai foi se fesoasoani mo aiga o lou itumalo lea na aafia i le asiosio i le vaiaso na tuanai atu nei, e tolu ea pe fa aiga na matua liai i luga e le asiosio o latou maota ma fale, pe le tatau ona maua ai foi ma se fesoasoani i vaega ia lau Afioga toe silasila ane i ai.

Lau Afioga i le Fofoga Fetalai, ona faaiu atu ai lea i se tuualalo i le Afioga i le Palemia aemaise foi o le Faigamalo i tulaga i alo ma fanau o lo o i ai le faanaunautaiga e toe fia saili ni o latou faailoga foi ia lona lua po o ni second degrees. E talitonu o le auala lea e mafai ai ona faa-multi skill ia le workforce ina ia mafai ai ona toe o atu i latou ua maua le faailoga muamua ae ia mafai ona toe sailiili i isi faailoga, aua o le tulaga lea ua maua e le o toe mafai ona toe alu se isi i luga o le sikolasipi a le Malo, ae talitonu lava lau Afioga pe a taumafai e sue sona faailoga. Lau Afioga e fai lava sina faigata ma e le gafatia foi e nisi o aiga, a o le mea lea ua talitonu, ua tele loia ma accountants, silasila a toe o e fai mai ni faa-Fomai o Pharmacist faa-Saienitisi ia po o fomai manu o lo o moomia e le atunuu i le vaitaimi lenei. O le manatu lea e faapea o le tele o alo ma fanau ia e toe o e aoao i aoga nei, e o atu lava ma le toe foi, ae talitonu le taofi, o i latou nei a maua faailoga tetele nei, o latou foi nei e maua galuega maua luga i atunuu i fafo, maua galuega e totogi lelei, ia o faamanuiaga uma na e toe mai uma i totonu o le atunuu. O tulaga na e tuu atu i tafatafa o lau Afioga i le Palemia, aua o lo tatou naunautai foi e tuuina

atu nisi o alo i tulaga tau taaloga ina ia saili mai lava le manuia, a o alo foi ma fanau o lo o maamaai faiiai, ia tuu latou e o e tausaili mai nisi faailoga matua tetele ia manuia ai lo tatou atunuu.

Lau Afioga i le Fofoga Fetalai faafetai mo le avanoa, manuia le Palemene, manuia le faafofoga a Samoa, manuia le Fono.

FOFOGA FETALAI: Malo le tauatai, malo le saunoa, malo le fetalai ia te oe le fofoga o le Alataua le sui usufono mo Siumu, ia e le toe tau masina se isi ma lou finagalo leaga o le tootoouli ua lava foi lou silafia i totonu o le tatou Maota Fono. Malo le saunoa, faafetai mo le sao o le tatou itumalo.

Ia, o le avanoa lenei lau Afioga i le Tuiatua Faanofonofu, ua avanoa le tatou Maota mo lau saunoaga. O lea lava ua faasolo le tatou Komiti o Tupe, ona o o loa lea i le faalau mulimuli o le tatou fale i lenei afiafi, o le Afioga i le Sui Taitai ma nisi o le Itu Agai faapea ma le Taitai o le Itu Agai. Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai. E fai alofa atu foi ua vela le fala ua alu lenei aso o faaaaogagase le paia o le Palemene. E muamua ona ou faatulou i le tafatolu o le tatou faigamalo, faapea foi Ofisa Sili o Pulega o Matagaluega a le Malo ma Faaluluuga o Faalapotopotoga Tumaoti a le tatou Malo ua tatou faatasi ai, susuga i le Failautusi o le Fono, e ui lava ina ave au i le vaalele foi lele o le Economy Class, a o lea e faamanuia atu i lau Afioga. Ia faatutusa a tatou sui usufono pe a malaga i fafo.

Le paia o Samoa ua potopoto i le afifio o Tama ma Aiga, e faapea foi Aiga ma Tama, Ituau ma Alataua, Aiga i le Tai ma le Vaa o Fonoti. E faapea foi o tatou uso i Tutuila ma Manuia. E molipo atu foi alofaaga i le afioga i le Kovana ia Lolo e faapea foi le susuga i le Fofoga Fetalai ia Savali ma le faletua ia Satala. Ia le paia ma le mamalu o Samoa ua potopoto, ae le faagaloina ai foi le tapuaiga a le Aufaigaluega a le Atua.

E muamua lava ona ou molimoli atu alofaaga ma faamaisega i le faletua o le matou Faafeagaiga i Samusutai, sa ou auai nei i le sauniga, o le faletua lea ia Lufina Faatui Livi. E momoli atu ai le faamaisega ia Tago ma Aiga, e faapea foi le matua o Amoa, le fetalaiga ia Samusu ma upu i le Faleatua. E le faagaloina foi le tumalo o le Afioga ia Togialelei, le paia lava lea aua Tuiavii ma Usoalii, Valai ma le Taauso faapea foi Su ama le mamalu ia Saleaamua. O nai moomooga alofa ia ma faamaisega e molipo atu i lo outou paia ma lo outou mamalu.

Le tapuaiga a lo tatou itumalo, e faigata foi Alaalamalae, Tane o le Itu, Alii o le Itu ma Pule na taitai ma le mamalu ia Saleaamua. O paia ia o le itumalo, malo le tapuai. E ui lava foi ina loaloa ta te le feiloai, o uiga lava ia o mea. A o lenei itula lau Afioga i le Fofoga Fetalai, e momoli atu lava le agaga faafetai i le sa saunoa o lea ua ma sosoo nei. O se sui usufono muamua lea ua ou faalogo ua fai sana reference i le matou Lipoti lea e alu le lua vaiaso i le po ma le ao o matou galulue ai. Alu le matou asiasiga i Savaii ma tua i Aleipata, galulue le matou Komiti, a o lea ua faatoa ou faalogo lava lea o fai i ai se saunoaga a se sui usufono. O lona uiga na o le tufa atu lava o nei tusi tou nofonofo ae leai se tasi o faitau ai. Ae ui i lea, faafetai lava mo le amanaia o le Lipoti a le Komiti.

O le mea muamua lava e fia faamanino i lau Afioga i le Palemia, o le Komiti lenei o Tupe e leai lava se faaletonu pe a omai Matagaluega a le Malo. Na ou faalogo i lau saunoaga i se taimi ua mavae atonu o aso ia ua mavae i le Komiti o Tupe, e o i le RSA sue mai ai nisi e faaatoa ai le quorum. O le matou lava Komiti e tautino atu ma le agaga faaaloalo, sa atoa lava i le tele o taimi, vagana ua faanoi nisi e le o lava mai. O lea foi e molimauina e Faaluuluga o Matagaluega ma Pule Lagolago e faapea foi Faalapotopotoga Tumaoti ma latou Pule Lagolago, e i ai lava nai taimi pe itula le tuai, ia o sailiiliga lava foi o isi Matagaluega e muamua mai ia i latou. Ma lou faaaloalo. Ae o le a taumafai atu se tala.

O le Tala o le Tupe, ua matua lelei i lou talitonuga, e foliga foi lea e manogi ae o o i le po ua tea le manogi ae ua faaletonu. Ae o uiga na o le tau i lenei vaitau i le Tala o le Tupe. Aua e pei ona saunoa nisi, o le taimi lava o le maaleale o le Tala o le Tupe. Ia a faapefea ona aveifo Samoa na o si tamai mea lava i le Pasefika ma atunuu tetele e i ai Siamani, o Amerika, ua matua tu lava i le faaletonu le Tala o le Tupe. O le taimi nei i Amerika o la e pe \$16tiliona ea le faaletonu la e i ai i le Tala o le Tupe. Ia o la e lava ua fiu, na o le aloalo lava o le Peresetene o Obama ia e faafono le latou vaega, aua e le o lagolago foi e le isi vaega le mea o lo o fuafua e le Malo. E faaopoopo atu i ai ma faalavelave faalenatura e i ai le afa foi sa i ai talu ai nei, e tele tagata na maliliu ai ma saga faaopoopo atu ai lava le avega i le Peresetene ma lena foi faigamalo i Amerika. E moni ai le saunoaga a le Palemia, e pei lava e lelei Saina o lea ua amata ona lelei le latou tala o le tupe, ma e tele a latou atinae, latou sustainable developments.

Ou te fia tautala lau afioga i le Fofoga Fetalai i le tatou tupe maua, o la e manino i le matou lipoti, o le tatou tupe maua e \$760,393,859. O tupe faalu, e \$651,781,927. E silafia foi e lau afioga ma le mamalu o le Palemene, o lea lava e i ai faiga faavae a le Malo. A faapea o le tatou GDP lea e taua e \$1. fia piliona, ia o lona uiga o la e i ai le vaega lea na fesiligia ai le vaega o tupe, o le latou tali, e 50% e mafai ona nono e le Malo aua le tatou tupe faaalu. Ia o lona uiga la e le i taitai mo lenei taimi.

FOFOGA FETALAI: Ua ou vaelupeina le saunoaga a le sui usufono mamalu, malie lau afioga i le sui usufono o le Komiti o Tupe, leaga o lea ua tatou taunuu i le tatou taimi malolo masani o le afiafi, le tatou 20 minute. O lea o le a tatou malolo mo le taimi nei, ona faaauau ai lea o le tatou galuega pe a tatou toe foi mai.

Ou te faasilasila atu o le a faataatia ese Tualumaga a le Fono Aoaو Faitulafono i lana malologa masani o le afiafi.

Na faataatia ese Tualumaga a le Fono Aoaو mo lana malologa masani i le itula e 9:20 i le po ma toe faaauau i le 9:44 i le po.

FOFOGA FETALAI: Ou te faasilasila atu ua toe amataina nei Tualumaga a le Fono Aoaو Faitulafono. E faia le tatou malologa i le taimi ua sola o saunoa se tasi o sui usufono o le Komiti o Tupe. Ia lau Afioga i le Tuiatua Faanofonofu, tulai maia e faaauau mai le saunoaga ma faatulaga ai nisi o saunoaga o totoo o lenei afiafi. Tulai mai Afioga i le sui usufono mamalu.

Afioga TAFUA MALUELUE TAFUA: Faafetai lava i lau Afioga i le Fofoga Fetalai, faafetai foi i le mamalu o le Maota ua maua le faasiliga malosi. Lau Afioga i le Fofoga Fetalai, o le mataupu muamua lava ou te matua fautua malosi ai i le Malo ma ou te lagolagoina e pei ona i ai i totonu o le itulau 45 o le Lipoti a le Komiti o Tupe, o le fautuaina lea o le Malo e fai se taiala mo galuega toe faalelei ai fale ma aseta a le Malo. E mafua se mau lau Afioga i le Fofoga Fetalai, ona o le tele o Matagaluega faapea foi ma vaega tumaoti o le tatou Malo, e matua manaomia lava se maintenance plan po o se tulaga faapea e faia mo tatou fale, e aumai se maota mo se faatusa. E pei foi o le matou asiasiga i Tuasivi sa iloa ai nisi fale o le malo o lo o faaletonu, ae le tele lava se seleni alu mo lenei taimi, e moomia lava na o le wáter plaster ma sina vali e faafou ai, ona toe manaia lava lea. Aua a silasila i fale o la atunuu e pei o Niu Sila ma Ausetalia, o le tele lava o fale ua tai 70 tai 80 tausaga, ae pe tai ono tausaga i le tai lima ma vali, ma toe teuteu faalelei, sui nai laupapa pe lua pe tolu o lo o faaleagaina ona toe lelei lava lea o le fale mo le isi fitu tausaga. Ae a faapea e faataatia maota o le Malo e leai se maintenance e faia, o le tulaga e o o i ai, e uma ifo ua matua tele lava le seleni a le Malo e toe alu mo le faiga o lea galuega. E pei o le agaga lea e tuualalo atu ai ma le faaaloalo i le mamalu o le Malo. Ae malo faafetai e matua maeu foi le matagofie o le tele o fale sa matou asiasi i ai, faatasi foi ma le atinae tele a le Malo i Fiaga, lea sa alu ai le USD\$103milion aua e \$18milion sa faaalu mo afi ia e fa, ae ese ai le isi vaegatupe o lo o faaalu mo le tosoina o uaea ma moli, e le gata e alu i lalo o le palapala ae faapea foi mo le alu i luga o moli. Faamalo mo lea atinae taua, atinae lelei, e faapena foi ma le atinae i Vaiaata. O la e ua uma foi ona fuafua le mea e fai ai afi e lua, e sili atu le malosi i lo le kilouati o lo o faaagaina i Savaii. O lona uiga e i ai le lumanai lelei o lea vaega i le matou asiasiga na alu i ai.

Ona ou o o mai lea i le tosovaa i le uafu i Satitoa, sa alu ai foi le matou asiasiga. Faamalo faafetai i le Ofisa o le SPA, o lo o lelei lava le vaaiga o le tatou uafu, e ui lava ina seasea faaoga, ae ou te iloa lava o aseta lelei a le tatou Malo. E aoga tele mo le feoi ai o matou pe a fia o i Tutuila. Afai lava ua le fia malaga atu le mamalu o le atunuu e faaoga le matou uafu, ia, matou te malilie lava matou e faaoga le matou uafu pe a matou malaga i Tutuila. E momoli atu ai le agaga faafetai mo lea foi atinae lelei. Ae na pau lava le tuualalo ma le agaga faaaloalo, o lea sa molimauina foi e nisi e galulue ai, e le o tagata e galulue i le uafu a o tagata o le itumalo, a toso se vaa, sa ou fautuaina muamua foi, faamolemole e fai se mea o se ato foi lea po o se tapoleni e tali ai mea o sediment e toulou mai pe a fufulu le vaa tulou, aua e fai lava si malolosi o le vali lea e vali ai noo o vaa ia lea e o atu e toso i le uafu. Ae le gata i lona, a tafefea vali ia e sau mai le noo o le vaa, o le mea e tupu, e pepe uma lava matou tuitui ma sea ma mea faapena. O le tuualalo lea ma le agaga faaaloalo lava.

O lau fesili mo le Matagaluega o Punaoa Faalenatura ma le Siosiomaga, faamolemole lava po o i ai se fuafuaga mo se tatou faamasinoga foi lea e taua o le environment court, aua tasi lea mea e taua tele. A silasila le mamalu o le Maota Fono ma le aufaigaluga a le Malo i le falesa lea e i gatai i i e fesagai tonu lava ma le Tofilau Eti Alesana, toetoe lava a papai mai le faataumata lena e sau i luma i le footpath, e matua le saogalemu lava lea mea e le gata i taavale feoi, a o tagata foi. Ia ae le gata foi i lea o le aulotu e pepese i le falesa lea e aafia tele i le latalata i le auala. Ma lou faaaloalo lava.

Sa taua e se tasi o sui usufono mo Vaimauga Sisifo, Tofa Lefau Harry Schuster le Vaisigano i lologa ia na uma nei, ou te matua lagolagoina le finagalo o le sui usufono mo le Vaimauga, aua o matou le isi aiga na matua afaina lava i le lologa lea. E molimauina ua tuu uma i lalo nai fale sa i tuafale i ina i Matautu i le Vaisigano talu ai le lologa, aua o le matou auala taavale pei lava o le vaitafe i le taimi na lolovai ai e le sao ai se isi. A o le talosaga ma le faaaloalo i le Malo, pe mafai ona fai se sailiiliga pe a maua mai se tatou tupe i le world bank po o se isi vaega e maua ma ai se tatou tupe, e fesoasoani lea mo le auala laupapa, aua ou te talitonu, a faapea e i ai se masini pe a pe lelei le vai i Vaisigano ae sua mai e amata mai Lelata po o le Loto o Samasoni mai tai ae faasima, ou te iloa e matua saogalemu le tele o aiga sa lolovai i le lolo lea. O le talosaga foi lea na aumai uma i le tóatele o matou tuaoi, e i ai Salanoa, o Pulepule faapea foi ma le Afioga i le Faamasino Sili ma le tele o le mamalu o le atunuu, e le gata i Moataa, o Matautu, Vaiala, Vaisigano, e faapea foi ma Leone. E tele aiga sa aafia ai, o le puipuia lava o le saogalemu o tagata. Ae momoli atu le faamalo i le DMO ma i latou sa faia uma tapenaga e le gata i le faamamaina ina ua uma le lologa, ae faapea foi ma nai fesoasoani sa ave i aiga. Na pau lava si fautuaga, faamolemole o le tele o isi aiga o i matou i Matautu ma Vaisigano, ou te le o vaai i ai i le lisi o i latou sa faia lea suesuega. E ui e le o le Malo atoa sa faia, aua sa i ai i latou mai fafo sa faia sailiiliga, ae ou te masalo e le i mautu lelei. O lea ou te matau foi i le tatou Paketi o lea e i ai le miliona lea ua faamatuu atu e faasoasoa mo nai aiga nei. Ia o le fesili po o ai e afisi a o ai e toso. Ia o le ala lea o lou talanoa atu ma lou faaaloalo lava, e taua tele le toe auiliili lelei o le sailiiliga lea, faavasega uma nai aiga, aemaise lava o nai aiga ua matua mafatia, e atoa le lua vaiaso o i le kolisi o Samoa ma isi nofoaga faapea sa sulufai i ai latou, sa tatau lava ona faasafua i ai le fesoasoani a le Malo i le tupe lea. Ma lou faaaloalo.

E momoli atu le faafetai i le MNR po o le Matagaluega o le Siosiomaga mo le aoina o le matou lapisi se i tulou. O le loli lea e taamilo atu i Aleipata, e matua faamalieina lava lou loto i le alu atu o le loli lea so o se taimi lava e tuu ai le lapisi tulou i luga o le fata lapisi, e malama ifo lava le taeao ua kiliva ese. E momoli atu ai le agaga faafetai mo lea auunaga, malo le galue, faafetai le auuna ma le faamaoni.

Ou te fesili i lau Afioga i le Minisita, e le afaina aua e te tali mai, na ona ou fesili atu lava ma le faaaloalo, o mea foi nei o vai tumaoti. O se faatusa e pei o le alaafaga o le Sao Faapito o lea lava e fai le latou vai tumaoti, ae oso mai le vai a le Malo lea e inu ai matou i Saleaamua ma Aleipata, faasolo atu ai i le itumalo o le Palemia. Po o le a le mea e tupu i le vai lena? O la e manino ma lelei le vai a le Malo aua e eseese vai ia e lua ae pe faapefea la ona sau le paipa lea a tatou lea e le afaina e le feinu ai nuu ia. O lau fesili lena ma le faaaloalo lava. Ou te leiloa i faiga faavae ia e i ai pe i ai se overlap i mea ia e lua? Po o le a le tulaga o i ai mea ia e lua ma le faaaloalo.

O le saunoaga a le Minisita o Tupe i le aso na tatou feiloai ai ina ua faataatia ma folasia le Tala o le Tupe sa saunoa ai lava le Minisita e faapea o le Paketi lenei, o le Paketi o le toefuataiga o le tamaoaiga. Ia atonu e le na ma le laina le afaina o le tatou atunuu ia Tesema o le tausaga ua tuanai, ae atonu o le toe fuataiga o le tamaoaiga ae ou te molimau atu ma le faaaloalo i lou lava itumalo e maua lava le 30+ taga talo e aumai e faatau i le maketi. O lona uiga o matou le isi itumalo o lo o lagolago i le consumer a tatou i Apia aemaise nai

tagata o lo o faatau talo i le maketi. O le tau o lea mea e matua maeu le agalelei o le Atua, maeu foi le agalelei ma le foai o lo o aumai i le tatou atunuu e ala i le ulu, toe maua foi le fai ma o lea e matua maumaga e iloa ai le lelei o le Matagaluega o Faatoaga e pei ona ou fesiligia soo ai le Afioga i le Faatonu Sili o le Matagaluega o Faatoaga e uiga i le maketi e fuafua i le tau o fualaaui aina ma isi mea faapena. E taua tele la aua o le aoga o le Tala o le Tupe leni e fuafua ai le vave ona toe pick up le tamaoaiga o Samoa. E momoli atu ai le agaga faafetaie le tagata i si o tatou atunuu o lo o faafogafoga mai ae faapea le Malo aua o latou lava e lagalaga mea. E pei ona saunoa le Palemia o tatou e faia taiala mo galuega e faalelei ai fale ma aseta a le Malo. O tatou foi e tataua ona taulamua e vaavaai ni mea lelei e faatupu manatu ia i latou o e galulue ma faatupu le loto galue. Atonu o lea la e taunuu ia saunoaga aua o le tulaga lea e i ai nei ua matua pick up lava tatou aufai faatoaga.

Ona faaiu atu ai lea faapea lau Afioga i le Fofoga Fetalai, o le aua atu lava o lau faamatalaga i leni afiafi, e faamamafa lava lea i se maintenance programme a le Malo mo tatou fale. Aua o lou talitonuga o le matua tele lava o le seleni e alu pe a faatamala le Malo i le tulaga lea. E talosaga i lou agaga faaaloalo po o ai uma authorities e aafia i lea vaega e tataua ona silasila totoa i le tulaga lea ma faaoga foi le tatou Vaega lea o le SROS. Ua uma foi ona matou talanoa ma le Taitai o le Pulega, o lo o faaavanoa pea lona Ofisa e siaki ai tatou vai inu ma vai taumafa. E faapena foi ma le Matagaluega a le Soifua Maloloina o lea e maua lava tala o lo o siaki lava tailua, taitolu i le vaiaso. E momoli atu ai le agaga faafetai tele i lea tulaga aua e taua tele le vai taumafa o le atunuu e le gata i Apia ae faapea foi i nuu i tua, fai ma siaki le tatou vai pe le o maua ai le siama lea o le ecoli aua e taua tele o le tele o le faamai aua o le faamai lava lea e pepesi ia tatou e pei ona molimau alii fomai i Savaii faapena foi ma Upolu. O mai lava nei o le suka, respiratory problem ma le lapopoa obesity ma le fatugao foi atonu e aoga uma nei mea e taua pe a tilotilo i ai. Ao lou talitonuga ma lou faaaloalo lau Afioga i le Fofoga Fetalai e faaiu atu ai o le taua foi o le tatou Budget leni ona o le tele o le seleni lea e ave ma le Matagaluega o Aoga, Taaloga ma Aganuu “aua a aoa le tama e tusa ma ona ala aua a matua e le toe tea ese ai”. O le agaga lena ma le faaaloalo ua matua ou fiafia lava i leni Budget ona o le tele o le tupe lea e ave mo aoga e aotauina ai fanau ma alo o le atunuu.

E faaiu atu ai se tala e momoli atu ai le agaga faafetai i lau Afioga i le Palemia ma le Kapeneta faapea foi le Taitai o le Itu Agai ma le Sui Taitai, Vaega o le Tautua, Minisita Lagolago, lau Afioga i le Failautusi o le Fono Aoaofaitulafono ma le Sui Failautusi, Faauluuluga o Matagaluega ma Faalapotopotoga Tumaoti a le Malo, le Au Faaliliu Upu aemaise le mamalu o le fono.

Faafetai i le tapuaiga a Lana Afioga Mamalu, O le Ao o le Malo ma lana Masiofo, Sui Ao ma lana Masiofo le paia o Samoa ua potopoto, agalelei le Atua i leni po. Soifua.

FOFOGA FETALAI: Malo faafetai malele i lau Afioga i le sui usufono mamalu o se tasi foi o le sui o le Komiti o Tupe Maua ma Tupe Totogi po o lau Afioga i le Tui Atua Faanofonofa aua o le sui usufono lava lea mai le tatou itumalo o le Matamatagi mai Aleipata. Faafetai saunoa, malo malele i leni afiafi.

Ua tatala atu le avanoa i lea Itu o le Maota, o lea e maua e tolu tatou lauga e faaiu ai le po.

Tulai maia lau Afioga i le alii fomai o le tamaoaiga ma tupu maua ma tupe faaalu ma tupe totogi a lena Itu o le tatou Palemene, o se tasi o sui usufono mo Salega, Afioga Afualo Wood Uti Salele e saunoa.

Afioga AFUALO WOOD UTI SALELE (Salega): E momoli atu le faafetai i lau Afioga i le Fofoga Fetalai mo le avanoa taua ua tuuina mai i le itumalo o Salega e fai ai se sao o le itumalo. Ua fano eleele le fetu taiala ao lea lava e galulue le Afioga i le Palemia ma le Kapeneta ma lea Itu o le mamalu o le Palemene aemaise foi o le loaloa o le tatou Malo ina ia saili pea le tofa ma faautautga, saili i tai, saili i uta, saili i lalo sei tulou po o fea tonu o taoto ai le mau e mafai ai ona fusi faatasi lagona o le Palemene aua se manuia o Samoa mo a taeao e tusa ai o le Tala Faatautu o Tupe 2013/2014.

E le mafai ona alu loa se faamatalaga a Salega e tatau lava ona faatulou i lenei afiafi i lau Afioga i le Fofoga Fetalai ma le mamalu o le Palemene aemaise i le afio o le Afioga i le Palemia ma le Kapeneta, le mamalu o le la Itu faapea foi lenei Itu i le afio o le Taitai ma le Sui Taitai ae tainane o lea e faavailolo le paia lasilasi o tamalii ma failauga o e foi ua ofo lo latou ola auauna i Matagaluga eseese ma Itu tino o le Malo e tautua ai i so o se tafa.

Ae tainane foi le tapuaiga i Lana Afioga Mamalu, O le Ao o le Malo ma lana Masifo, tapuaiga mamalu i le Sui Ao ma le Masifo aemaise le tapuaiga i le Faamasino Sili, Vasega o Faamasino ma le Ofisa o Faamasinoga. I lenei itula e le mafai ona alu loa sau faamatalaga ae tatau pea ona oo sau tala i lou itumalo o lo o faafogafoga mai.

Lou itumalo pele o Salega o paia lava ua taoto. E le gata o paia ua taoto ao se ala oo. O paia la ia e amata mai i Tapapa i Mataiili seia paia Vaimoliai ma Fetoliai, e le toe oo i ai sau faamatalaga ua e silafia ma ou iloa le ta itumalo o tupu ma ee, failauga ma faleupolu tofia, e le gata i lea o le mamalu o faletua ma tasi ma le malosi o le tatou itumalo ia nuunuu atu lau tapuaiga.

E le mafai foi ona faagaloina le tapuaiga mamalu i fata faitaulaga e fia ua mafai ona asuina le vai o le ola ua maua ai se manatu e poupu ai e le gata i pulega a alii ma faipule, aiga taitasi aemaise foi sui o le Palemene ua outou tusi aao i ai ua avea ai i ma ua ma le Afioga Tapuai Toese Ah Sam e faaleo se tatou savali i le Malo e tusa ai o le tatou atinae.

Lau Afioga i le Fofoga Fetalai, e amata atu sau faamatalaga, muliai ona oo lea o sau upu i le Tala o le Tupe ae ao pea ona momoli atu le savali a lou itumalo i galuga o lo o manaomia ina ia faaauau pea aemaise foi o lo o taoto nisi o fanoga sa folasia i lumamea nei.

Lau Afioga i le Minisita mo Leoleo ma Falepuipui, vaeane lava ou tafatafa masalo ua faagogo tagiao le fai atu soo o lenei itumalo i le pou. O le vaiaso nei i le faaiuga lea e fuafua e o ai i Savaii pe a maea le tatou fonotaga ona felogogai la ma toeaia po o fea tonu e tatau ona taoto ai. O lo o fiafia lava le itumalo e lagolago i fuafuaga fai uma lava a le Malo e le gata o le saogalemu o le la itu o le motu ao le saogalemu atoa o Savaii ina ia mautinoa lelei ua galulue faatasi ma o faatasi le futia ma le umele e tusa ai foi ma fuafuaga a le Malo e ala i pulega mamalu a alii ma faipule ma le soosoo tauau ma lau Matagaluga. E moni lava o le maitau a le itumalo lea e vaaavaai i faleoloa ia e aumai i faamaumaga e le o tele nisi o le itumalo o aafia i soligatulafono. O se lagona e faafiafia ai foi alii ma faipule aemaise lava o le galulue faatasi ma

lau Matagaluega ia mautinoa lelei ua sagatonu lau o le fo e tusa ai o le faamoemoe ia ola fiafia ma ola saogalemu le atunuu aemaise o le itumalo. E talosaga atu ai ma le faamaulalo i lau Afioga ua talia ma le fiafia le pou lea e i o i Salega ona e tatau ona latalata mai i le fanua lea e tu ai le falemai. O lea e i Fualalo le falemai e tatau lava la ona felatai aua o lea e sosoo atu lava ma Sagone aua a i ai foi ni faalavelave ao la ua i ai le pou a le Matagaluega e mafai ona fesootai ma faigofie ona galulue faatasi le Matagaluega o le Soifua Maloloina e tusa ai o faalavelave faafuasei.

Lau Afioga i le Minisita mo Galuega, Felauaiga ma Atinae Eseeese, faafetai mo galuega faatino. Ou te talitonu e le faigofie lau pito laau. O matou uma lava nei e 48 o lo o tagisa uma atu i manaoga o itumalo aemaise lava le taumafai ina ia faatino galuega i totonu o le lima tausaga lea ua matou tulai mai ai. Ae na ona toe talosaga atu lava ma le agaga maualalo i auala galue i Sagone ona ua leva tele ona taoto le talosaga ina ia faaleleia le auala galue. O le auala galue i Fogatuli, Samata ma Fagafau. O isi nuu o lou itumalo masalo la e malamalama lou itumalo o la e lelei e lei leva foi ona fausia i le Paeaiga ua tuanai atu.

O isi vaega o le talosaga mo le vai, o le suavai o la ua lelei atoatoa le suavai o Salega ona o suavai uma la e vili, seia vagana ai lava le suavai o Sagone ona e mamao i tai le tulaga lea sa vili e talosaga atu pea e sua lua le vai. Ua talosaga mai toeaia pe mafai ona toe tuu i uta e vili ai ina ia mautinoa ua magalo lelei. O isi vai la e vili atu i luga o isi nuu o le itumalo ae o le taimi nei o la e fesootai paipa la e faasolo mai ai la e vili i isi nuu ona fesootai mai lea ma Sagone ona maua mai ai lea o le suavai ua tau feololo ae o lo o talosaga mai lava si ou nuu faamolemole e manaomia lava le toe vili o se vai lelei ina ia mautinoa ua atoatoa le suavai lelei e maua mai ai. Ae o lo o lelei atoatoa pamu vai la e i isi nuu o le itumalo. Faafetai atu ai i lau Afioga.

O le tulaga lava ia i le EPC e moni lava ua laulauvivilu foi saunoaga i le Maota e le faigofie le tiute o lo o feagai ai nei ma le afaigaluega ona o lo o taumafai lava ina ia mautinoa ua atoatoa le auaunaga aemaise lava afi fou. I Savaii lava ia ona o lea sa matou asiasi i ai ona o le tulaga lea o le a avatu i uta i Vaiaata le afi ia mautinoa ia vave faatino i se taimi na fuafuaga ina ia faigofie ona silasila lau Afioga ma le Matagaluega i isi alamanuia ia e maua ai le malosiaga pei o le la o lea ua i ai fuafuaga po o le suavai foi ina ia faigofie ai ona fesoasoani i le tau o le eletise. Ae o le tulaga lena i le motusia soo o le paoa iinei e le o na ma le laina o lea e tau faamalamalama i le toatele o le atunuu ia outou malilie aua sa asiasi foi i ai le Komiti, matou te o atu e tolu po e lei momoe tatou alo ma fanau o la e galulue faatasi ma e i ai tomali faapitoa mai Iapani i le tau suesueina ia mautinoa lelei ua ola uma afi i le mea e tatau ona i ai. Sa faigofie lava ona faamalamalama o le tulaga lena lea e i ai atonu foi o lea e faafogafoga mai le atunuu e ui lava o lo o i ai meatotino a nisi o le tulaga lava e i ai o mea faapenei atonu i le lumanai ua tatau ona taoto mai i se taotoga lelei.

Lau Afioga i le Minisita mo Punaoa Faalenatura ma Siosiomaga e tatau pea ona momoli atu sau faafetai o la e faafofoga mai le CCSP, faafetai lava mo le tusi sa ou talosaga atu ai la ua maua le talosaga a lou nuu i le auala lea o le a faaalu i lalo i le auala savali i le matafaga, ai o le malosi o lau talosaga ae faafetai lava, faafetai foi i le CCSP ua mafai ai ona maua le fesoasoani mo lou nuu. Na ona faamanatu atu lava i fanua e ao ai le suavai, sei silasila ane i ai ona o le tele o fanua ia o la e i lalo o le Ekalesia ma Pulega a alii ma

faipule e silasila totoa ane i ai ona e foliga mai e faigata nisi o Ekalesia i o latou fanua ao le manuia mo le atunuu atoa ina ia fai se feutagaiga lelei ma Ekalesia ina ia faigofie ai ona tapue le tele o le suavai lea mo le manuia o le tatou nuu.

Lau Afioga i le Minisita mo Aoga, Taaloga ma Aganuu, ou te faafetai atu ona o ananafi ma tala atu o ananafi tau ala atu i le Fofoga Fetalai, e faafetai atu foi i lau Afioga i le Fofoga Fetalai, ona o alo ma fanau lea e autovaa mai. O se laasaga taua tele lea ia te au ma lau vaavaai i ai i le atinaeina o sui usufono. O aga ia o lea e tele ina faatino i fafo ae faafetai lava o lea ua mafai ona tatou molimauina atonu foi o lea sa saunoa i ai le Afioga i le Palemia ma le Afioga i le Taitai o le Itu Agai ina ia faatupu ai pea le lagona i alo ma fanau mo le lumanai aua o tatou nei ao latou taeao e faigofie ai foi ona fili tagaga mai ni taitai lelei e sui ai tatou i le lumanai. E moni lava o le tofi e mai le Atua ao le tofi e tapena muamua le siosiomaga ona faatino ai lea o le valaauina o le tagata. Faafetai mo lea fuafuaga taua.

O pili o fanau lea ua mafai ona fesoasoani mai ai tatou paaga mai le Vasega 1 – Vasega 8 ma le Vasega 9 – Vasega 11 o lea foi la ua i ai le sao o le Malo, faafetai tele atu lava mo le silasila mamao. Pau lava lau talosaga i lau Afioga i le Minisita mo Aoga pe lei au lau silasila i le Vasega 12 ma le Vasega 13 aua o lea e muta lau silasila i le Vasega 9 – Vasega 11 ae ai lava se matagofie o lo o faafogafoga mai foi matua ae faaaauu i le Vasega 12 ma le Vasega 13. Ou te talitonu e le faigofie aemaise foi o lea e tau faasoosoa le tatou tamaoiga ae o i i lava i aoaoga o le lumanai lea o le atunuu. O le tele o matua la ua faafetaia le galuega faatino a le Malo ma tatou paaga ae oo loa le tama ma le teine i le tausaga 12 ma le tausaga 13 e tuu atu loa le pili e totoi e matua tei lava ua le toe sau i le aoga. Ona maimau atoa ai lea o le galuega lea sa tapena e le Malo ma tatou paaga ina ia mautinoa ua maua le tatou manu lea e tuli. O le manu lea e tuli o le aoaoina lelei o tatou fanau ina ia maua se atunuu po o ni tagata foi o le atunuu e aoaoina aua a aoaoina lelei tatou te le toe popole i le tamaoiga aua o le a fanau mai ai i le aoaoina lelei lea le agaga foafoa lea e pei ona faataoto mai ma aumai e le Alii le ata tatou te sailiili ai ma e le fefefe ai foi e savavali i luma e saili le lumanai po o a lava ni ona faafitauli ae faalagolago i luma ma le taimi lenei ma ona fuafuaga.

Ou te faafetai atu ona o le Vasega 13 a lou itumalo, o le tausaga lona lua lenei talu ona amata ae e lei faigofie ona sa matou talanoa lava ma toeiina ae faafetai lava i le Malo o lea ua taunuu. E ui lava e lei i ai se alo ma fanau na ausia le tapulaa mo le Iunivesite i le tausaga lea na tea nei ae sa ou faamanatu lava i faiaoga ma tamaiti e aua le popole o le taimi muamua. O le tala lava ia faatama e fai fai lava nice. O lea la i lenei tausaga o la ua faaopoopo le Vasega 13 ao le talosaga mai ini nai faiaoga ou te talitonu e le faigofie aemaise lava faiaoga o mataupu faapitoa e i ai le Sainenisi ma isi mataupu e manaomia sei silasila ane i ai i le tausaga fou aemaise pe a i ai nisi o le a faauu mai i lenei tausaga ina ia mautinoa ua taunuu le manulauti lea a le tatou Malo i le tulaga lea mo le faamoemoe.

O malae lakapi sei vaeane lou gutu ma le afi, o la e ia matou i Salega le isi malae lakapi faava-o-Malo, o la e lava e tausi ma vaavaai lelei e Sagone ae faamolemole sei toe silasila ane lava i ai. O la e faaoga e le matou Kolisi ae ia mautinoa lelei ua tino mai le faamoemoe. O le tulaga foi la e taoto mai ai e moni o la ua oo le fanau i le Vasega 12 ma le Vasega 13 ou te talitonu o lena e i ai i lau fuafuaga alualu mamao ina ia tapena nisi tomai faapitoa pei foi o

lea e taua sei vagana ai aoga ia o Don Bosco ma isi aoga i Pesega ae ai lava se manaia pe a faapea e tapena uma vocational i vaega ia...mo aoga nei aua nei ou te talitonu o le toatele o le matou Vasega 13 lea e 50+ ma le Vasega 12 ou te masalo o le toatele lava e toe foi e fai le fatuaiga tausii. Ae a oo la i le taimi lena ua le gafatia ai le Iunivesite ao la ua tali mai tomaki faapitoa ia e fesoasoani e le gata i le fatuaiga tausii ae faapea foi ia tomaki faapitoa lea e manaomia e le tatou atunuu mo le atinae ole tamaoaiiga lautele.

O faatoaga e leai sau tala tele ona e le o tele se seleni ae pau lava o lea ua tele lava faamatalaga ona o vaega ia e taua tele lona sao mo le atunuu. Na ona toe silasila ane lava i fuafuaga fai aemaise i lou itumalo po o i ai nisi fuafiaga aemaise o laau toto ma le polokalame lea ua i ai nei faaunegatupe lea ua faamatuu mai pe a, pe a avatu se aoga i Salega e autovaa mai i ai ma isi itumalo ina ia faigofie ona malamalama i le faatumuina o le pepa lea mo le faamoemoe.

Lau Afioga i le Minisita mo Tina ma Taimaitai, Atinae o Nuu ma Afioga ma Agafesootai, o lo o logo mai lava i Savaii i le matou itumalo o lo o galulue lava. O le mea lea malo lava faafetai mo....ae o lo o i ai le lagona ina ia saga faamalosi pe ia fuafuaga ia o lo tauala atu i sui tamaitai o le Malo ae talosaga mai ai ina ia mautinoa o lo o faaauau pe fuafuaga ia na i ai. E pei lava ona ou fai atu ia taatia mai sei faaoo le tou fanoaga lena i o aemaise lava o lea e lavea ai ma faamalositino e fesoasoani i le soifua lelei o le itumalo aemaise le atunuu atoa.

O fesootaiga lau Afioga i le Minisita mo Fesootaiga ma Faamatalaga Tekonolosi o le talosaga lava e tasi sei toe silasila ane lava ia manino lelei o le tv. O le matou aoga o la ua avatu polokalame a le Kolisi o computers ae o le internet pei o le isi mea lena o le tau. Ao lea na e saunoa manino lava ia ou malamalama ai foi e le faigofie ae sei toe silasila ane pe i ai se isi fuafuaga aemaise lava aoga aua o lea foi e faafofoga mai le Minisita mo Aoga ina ia lava tapena tatou alo ma fanau i le tulaga lea. Pe lei oo se silasila a lau Afioga i le Minisita i le technology fou lea na ou vaai atu o sau i Niu Sila lea e tau o le paluni, le balloon technology po o le vaiaso ea lea na tea nei lea e faapea o le a soo uma ai upega tafailagi e le gata i Niu Sila ae ole a soo uma ai le lalogai atoa toe taugofie. E le aoiia e Laupua Tamafaiga ae na ona tuu atu i ou tafatafa aua atonu o lea e i ai le broadband lea e faagasolo ae manaia foi pe a silasila ifo i ai aua o le lumanai lena o tatou.

O le Minisita mo Tupe Maua, faafetai lava i lau Afioga i le Minisita aua o nei felafolafoaiga uma e le mafai ona faia e aunoa ma le galuega lea e pagatia ai le Matagaluega i le Tamaitai Ofisa Sili o Pulega, tamalii foi ma failauga ma le malosi o le atunuu e ao mai lafoga. Faafetai lava mo le galuega e le faigofie o lea foi sa talanoaina i lalo o le Tala o le Tupe lea ua siitia le tupe lea ua mafai ona ao mai lafoga a le Aufai Pisinisi. Ou te talitonu o le isi lea tulaga o lea e mafai ona iloa ai o lo o galulue malosi le aufaigaluega i le aoina mai o i latou ua fai lafoga uma aua atonu o le toatele lava la e le o faamaoni i le aoina o lafoga ae faafetai tele i le tulaga lea ona e le faigofie. Na ona toe faamanatu atu lava se masini xray lea e aumai ona aumai lea o container e faigofie ai ona...pei se faaata atonu e taugata ae o le a faigofie ai i le aufaigaluega ona faatino le latou pitolaau i le tulaga lena.

O le Matagaluega o Faamasinoga ma Pule tau Faamasinoga o lea lava e faagasolo galuega fai ae ona o le tulaga lea e taoto mai ona o le Maota la e i Savaii lea e agai atu faamasino ma alala ai e le o lelei ae tataua ona tapena lelei

ina ia mautinoa lelei o malupuipuia alii ma faamasino i apitaga e nonofo ai ma le apitaga o le Afioga i le Faamasino Sili. Na ona toe faamanatu atu lava e toe silasila totoa i ai ina ia mautinoa lelei ua faatino lea vaega.

O le Minisita mo Pisinisi, Alamanuia ma Leipa, faafetai lava mo le tele o Tulafono ia ua mafai ona aumai ina ia mautinoa lelei o lo o agai i luma aemaise lava o le faatosinaina mai o i latou e aumai lo latou tamaoaiga e faafaigaluega i Samoa. O lea lava e maitauina i le lisi a le Matagaluega lea e aumai o lea lava ua siitia o se tulaga lelei ae tataua ona tapena ina ia mautinoa lelei ua tele nisi pisinisi e omai tatou te fai paaga ma mautinoa lelei ua tulai mai i se tulaga lelei ao lea ua faasolosolo lava i luga i lenei vaitaimi.

O le Afioga i le Palemia, o tagata tafafao maimoa mai fafo atonu o lea e...o a foi ni tusitusiga i nusipepa e tusa o le gasegase o le industry ae ou te talitonu au ia e pei ona tou saunoa i ai o i e iloa ai le tautai matapalapala. E aoga foi tatou te galulue faatasi ae faafetai foi mo le tele o galuega ia ua tapena e iloa lea tatou te galulue faatasi ai ma iloa e gafa taulimaina ma le atinae lea o tagata tafafao maimoa mai fafo. O a uma nisi auala e mafai ona tatou galulue faatasi ai ia tatou galulue faatasi ai ina ia mautinoa ua manuia.

Sa muliai lava sau faamatalaga i le Soifua Maloloina e le faapea ua ou fai atu lea tala ae ou te talitonu o oe o se tamalii ua lava lou silafia i le auaunaga. Faafetai atu mo le matou falemai lea e i Fomalalo aua o le matou falemai faatasi lea ma Palauli Sisifo. O la ua amata nei galuega o le toe faaleleia ae manaomia lava ina ia mautinoa lelei aua e faalua ona o atu fomai e asiasi atu, o le tala mai la a le toatele ua fiafia lava i le auaunaga lea e i ai nei ona o le faaogaina o fomai faapitoa lea e galulue i tua. Ua tele ai lava le faamamaavega i le itumalo ua le mafai ai ona agai mai Tuasivi ao la ua tali lava i o lo latou manaoga ina ia mautinona ua faaauau pea. Sa fesili lava i ai ae fai mai e manaia pe a faapea e faatolu aua o la e faalua ae pule lava lau Afioga i le Minisita e fua i le avanoa o fomai.

FOFOGA FETALAI: Toe lima minute o le sui usufono.

Afioga AFUALO WOOD UTI SALELE: Faafetai i lau Afioga i le Fofoga Fetalai.

Ia o manaoga ia o lou itumalo.....

FOFOGA FETALAI: Malie le sui usufono o lo o saunoa sei tuu atu le avanoa i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, ona o lea e saunoa le Afioga i le sui usufono e faapea o fomai lea na asiasi atu fai le assessment lea pei ona saunoa i ai, e leai o au lena na ou asiasi atu i le amataga o le tausaga nei. O lau tala foi lea na ou talanoa ai i le sui usufono mo Palauli Sisifo, o le tele o le tulaga lea ua siitia i ai le falemai lea o outou i le lua tausaga lea ua mavae. Mo le silafia o le tulaga o fale lava ia ua tele lava le suiga o fale ua i ai. Ua uma ona lipea uma nofoa sa malepelepe ma moega sa elea ma faaletonu, o le taimi nei la...o lau tala la lea na fai lea ua e saunoa i ai aua e air condition foi le potu e teu ai vailaau, o le potu foi lea e fai ai consultations e matua 100% e taoto ai mai ma le potu e fai ai togafitiga. O vaega uma o le fale e oo lava i le fale e tua i ai le falemai ua matua lelei atoatoa. O le ala foi lea o le faafiafiaina ona o le auaunaga o lo o faatino ai i

le mamalu o tamatai tausi soifua lea latou te vaaia i le 24 itula le vaega lea o le fale, o le matuai manuia lava o le tou itumalo aua o le auaunaga lea e faatino ai e teine tausi soifua ia o i latou ia ua tele ai le eseese ona o le mataala ma le lelei ona latou faafoeina ma le vaaiga o le fale ua mafua ai ona matagofie ma solosolo lelei galuega tauave iina. O le tulaga lea ua e talosaga i ai i fomai, o le agaga moni lava lea e taumafai i ai le Matagaluega ia aua nei tasi i le vaiaso ae oo mai se taimi e oo atu ai faalua, faatolu i le vaiaso ona taamilo atu le fomai. Ona o le utiuti o fomai i le taimi nei e pei ona silafia e lau afioga e 75 fomai lea e i ai i le taimi nei i le aofaiga o tatou tagata i le 200,000 a fua faatatau i ai o se mea i le 2,000 tagata i le fomai e tasi. O le matou malaga lea na alu i le atunuu lea o Europa o le isi atunuu e sili ona tamaoiga, o le ration la e i ai fomai i tagata o le atunuu, e tasi le fomai i tagata e toaselau. O le taumafaiga foi la a le matagaluega lea e taumafai nei i ai ia tatou maua le ratio lena. A faapea e tatou te maua le vaega lena o lona uiga o falemai uma faaitumalo lea e i ai nei o le a tofu lava ma le fomai ma teine fomai ma auaunaga uma na o lo o faatino i le falemai tele, o le a mafai foi ona faatino i falemai ia e i ai nei. O le ala lea e talosaga atu ai i le mamalu o le atunuu, o lo o taumafai le Matagaluega ina ia ausia tulaga e sili ona maoae ma lelei ae utiuti i le afaigaluega. E fua lava i le afaigaluega o lo o i ai i le taimi nei ao lea lava foi e taumafai le tatou Matagaluega e pei ona silafia ua ou talanoa soo i le vaega i le tatou Aoga Faafofomai o lo o i ai nei ua tusa nei ma le 45 tamaiti o lo o aoga nei mai le vasega o le tausaga 1 e tau i le tausaga 5. O lona uiga o le aoga faafofomai e 5 tausaga.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Malie lau Afioga i le Minisita sei tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: Ua fai lava sina ou faanoanoa i le Afioga i le Minisita taualoa o le Maota ona o lea e foliga mai ua tali lava i taimi uma. O lona uiga e le toe tali lea Minisita i le taimi e Tali ai le Malo? Ae o le a toso ai ma le tatou fonotaga i lenei afiafi.

FOFOGA FETALAI: Ia taatia maia le finagalo o le sui usufono mamalu o lea lava e tuuavanoa ona o le taua o le finagalo, e lei i ai ma se faalavelave e tasi i le lauga a se tasi o sui usufono mo Salega lea na ala ai ona tuu le avanoa ona o le itu ogaoga lea na faamulimuli foi i ai saunoaga ona na mautinoa lava e le sui usufono o le a tali mai le Minisita.

Ia faapuupuu maia lau Afioga i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai ma le mamalu o le Fono, o le 45 la lea o le a iu uma i le isi lima tausaga lea o lo o lumanai le tausaga muamua i le tausaga lima. O lona uiga o le isi lima tausaga e 45 tatou fomai o le a i ai. Afai la e nonofo uma ia fomai i Samoa nei ma faigaluega ai o lona uiga o le a tofu le falemai ma le fomai o le a galue ai ona ausia o le mea lea e talosaga i ai lau Afioga o le a mafai ona gafatia e le Matagaluega pe faalua pe faatolu i le vaiaso ona oo atu le fomai e faatino galuega i falemai i tua. O le faamalamalama lea i le sui usufono ma le faaaloalo lava i lau Afioga i le Fofoga Fetalai ma le fono.

FOFOGA FETALAI: Tulai mai le sui usufono mamalu e faaii mai le saunoaga.

Afioga AFUALO WOOD UTI SALELE: Ia faafetai i lau Afioga i le Fofoga Fetalai, faafetai i le Afioga i le Minisita mo le Soifua Maloloina mo le saunoaga malamalama. O le isi vaega o le Iunivesite Faafomai sei silasila ane i ai ona o lea ua amata ona fesoasoani le tatou Malo i le faatupeina. Po o fea tonu le fuafuaga e taoto ai se fuafua e faatupe ai i le lumanai ao se fuafuaga lelei tele pe a faapea e faamatuu mai i le tatou Malo mo le lumanai. Ona tali ai lea o manaoga lea na e sausaunoa i ai i lenei taimi.

Lau Afioga i le Fofoga Fetalai, ona ou oo mai lea e fia fai sau tala i le Tala o le Tupe. E le tele foi sau tala i ai ona o lea ua taoto le matou galuega i Lumamea nei. Na o le pau lea, e faufautua atu lava i le Afioga i le Minisita o Tupe, e le faigofie le tou galuega lea sa outou gapatia ai ona o le Tala o le Tupe lea sa matou galulue ai e sailiili ma o se galuega tele ma ua maea ona tapena. E moni lava o lena e i ai fesoasoani na e aumai ao aga lava ia faapea a lelei lava ona tatou galulue faatasi e amanaia foi talosaga e talosaga atu ai. Ia ma le isi, o a lava ni aitalafu aua o i lea tatou te feseeseai o mea lelei uma lava ao le tuualalo ia lea e tuu atu ia mautinoa o lo o fau faatasi le tatou sa mo le lumanai.

Lau Afioga i le Fofoga Fetalai, o le sao lea o le itumalo o Salega i le tatou fonotaga o le Tala o le Tupe i lenei vaitau. Ia faatasi mai le Atua.

FOFOGA FETALAI: Malo faafetai saunoa i lau Afioga i le Sui o le Komiti o Tupe Maua ma Tupe Totogi. Ou te manatu o lea ua matua manino ma malamalama ona o oe le isi tootoouli o le Komiti o Tupe Maua ma Tupe Totogi lea sa tauavameaina le sailiiliga o finagalo ma manatu o le Maota sa tuu atu ai le lua vaiaso tou te sailiili ai ma le Taitaifono. E faamalo fetalai, faamalo saunoa i lenei vaega o le afiafi.

Ia lafo atu ia i lo lua sa seelua lau Afioga i le Sui Taitai ma le Afioga i le Taitai o le Itu Agai ua toe o le masaga o le a tata mulimuli e faauma ai le tatou taaloga i lenei afiafi ae tai sefululima minute o le sui usufono.

Tulai mai le sui usufono mo Falealupo.

Afioga Hon AEAU PENIAMINA LEVAISEETA: Lau Afioga i le Fofoga Fetalai, faafetai mo le avanoa. Faafetai i le agaga faaaloalo e tataua ai ou te tulai ai i le pau o le Maota nei. Ua tuneva le afiafi ae faigata ua toia au i le timu to ma le timu...ua maualuga le afiafi leaga o le uluai Tala o le Tupe lenei o lenei tausaga e taua tele. O le a le toe oo se matou faamatalaga i sa ma faiga. Ua pau le mea nei i lau Afioga i le Palemia ma le Kapeneta ma le mamalu i sui usufono, tatou faatasi foi ma le mamalu o alii ma tamaitai o Faauluuluga o Matagaluega a le Malo. Malo le tapuai ma le tauatai. Ua tuneva le tatou afiafi, ua tataua foi ona fai i ai upu i le taimi lenei ua tuneva le afiafi i le mea e mafai.

Lau Afioga i le Fofoga Fetalai, o le a muamua lava se matou faamatalaga, tulou lava lau faafofogaaga Samoa, tulou, tulou lava. O ou sa ma ou mamalu e le ave e tumau e oo i le faavavau. E le gata i lea, tulou, e faatalofa atu i le faafofogaaga a lou itumalo o Falealupo pele o le afio o le tupu na faanofonofu Auvaa ma Aiga o le toafa ma Siliialaei ae tainane le nofo a faafeagaiga i fata

faitaulaga e fia i totonu o le itumalo. Faamalo tapuai, talofa ma ofo alofa atu ae tapuai ai maia sei taulaina se tatou sao i le Tala o le Tupe a le Palemene ua i le Laulau-a-Fono nei.

Lau Afioga i le Fofoga Fetalai, o le a muamua se matou faamatalaga i atinae ma galuega a le Malo i lenei itumalo i le 12 masina na tea nei. O le matou tala e faapea, o le lua tausaga talu ai, lau Afioga i le Minisita mo Galuega, Felauaiga ma Atinae Eseeese ma le Kapeneta sa lei tagisa le itumalo lenei i se atinae, atinae fou po o le faaleleia o atinae tuai. Aisea? Sa nofo tapuai leaga e taua ia i matou le galuega sa tatalaina e le Afioga i le Palemia o le matou vai. E amata atu lava i uta sei tau i le aai ma soo le itumalo ua taumamafa ma taumamafa i se vaimagalo ona toe faia lea o nisi mea. Ia sei silasila outou i le umi o le tapuaiga ua a nei? Faafetai, faafetai i lau Afioga i le Minisita mo Galuega, faafetai i le Pule Sili o le Pulega o le Suavai, le fetalaiga ia Moefaauo ae tainane foi le mamalu o le aufaigaluega i le motu i Savaii ua faatinoina lena galuega logona i le masina talu ai po o le vaiaso talu ai i le soo tuaoi o matou ma le Alataua Sisifo. Ua matou fiasia uma i ia galuega, se faamalo le galulue, faamalo le fesoasoani ua fiasia nai o matou itumalo ua maua le vai aua o le faatumutumuga lena o mea uma. E ui lava ina e le i soo Falealupo ua oo i tai ae leai lava se leo, o a matou tapuaiga ma a matou tatalo na i ina i o outou aao. Na o le agaga faafetai lava i le taimi lenei, o lea ua matou iloa le mafuaaga o matou uma ma le Alataua o lo o faatalitali nisi paipa e le i oo mai, taeao a ena ona faataunuu lea. Falealupo, e le o toe mamao, o le faamatalaga lea a le Afioga i le Minisita ma le Ofisa Sili o Pulega, o outou mama na, ia outou manuia. Faafetai.

Ona oo mai lea o sa matou faamatalaga lau Afioga i le Fofoga Fetalai, e i ai vaega ia lau Afioga i le Minisita po o maua mai. O mea la ia sa tuu i le lua tausaga talu ai a o lea o le a toe tau atu faamolemole, a faapea e le maua i le taimi lenei ou te toe oo lelei atu a o lea o le a alu atu, e le tele lava ni mea.

O le faafouina o matou auala galue e tolu i Falealupo uta sa tuu uma i le taimi lena ae se i fai le mea – se ua umi tele le matou tapuaiga i le matou vaai atu, e tolu auala galue. Lua, o le faaauuina lea o le matou auala alo...

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, fa ita lava o le a saunoa faafetai mai ona ua le gata i Falealupo a ua faasopo atu i Neiafu, e le gata i lea o lo o taumafai foi mo Tufutafoe ma Falealima. Ua toe lava na o se vaega i tai o Falealupo lae e tau agai i ai. O le faafitauli o le mamao o le mea e agai i ai a o lea sa taumafai e faasopolia le isi vaega i autafa. O le tatalo foi lea, out e iloa o le tasi lea o tama matua i totonu o le Palemene sa tataua ona fiasia ua faasopolia tafatafa ane a o lo o i ai lava le fuafua e agai...e le i oo i Falealima ma Tufutafoe a o lo o i ai le fuafuaga mo le tatou suavai o lo o faagaioi le galuega. O le faaaliga lea ma le faaloalo.

Afioga Hon AEAU PENIAMINA LEA VAISEETA: Faafetai, ae manatua foi la lau Afioga vaeane le mamalu o le Palemene o matou e pei e lua laufanua, o le sau mai i tai i le aai e agai i uta pei e 8 maila i le auala ma le alu atu i uta i tai e 8 foi maila. E le iloa po o auala e tolu lea i uta lea out e fai atu ai ae ese ai le isi lua la e sau ma ii tai. O le mea lea lau Afioga, e i ai le auala

na fai e le Minisita ia Tuisugaletaua tulou le taua o le suafa, o le Minisita lea sa faia le auala alo lea mo matou pe a oo mai le Tsunami ma mea faapena, ua uma ona sauna ae le i oo ma ii uta i le mea o lo o i ai faatoaga. E pei o le tulaga lena i tei ua sau se galu maua mai lava matou e le i oo i uta a o lea e gata ai i ina a o le taua ia.

Lau Afioga o le sau la lea i i le aai i uta e 8 maila ae ese foi le 8 maila lea e alu atu i le auala alo e alu agai i uta ae masalo po o uta a o lea out e fai atu o le sau mai tai i uta. E le gata i lea lau Afioga o le malae taalo o la matou aoga, faafetai tele lava ae a faapea ua galo o le a toe alu atu.

Ona oo mai ai lea o sa matou faamatalaga lau Afioga i le Fofoga Fetalai, i nai atinae e fia talosagaina, o atinae nei na pei na tau maua mai nai idea mai le malaga talu ai nei ma le Afioga a le Sui Fofoga Fetalai, e amanaia tele ma manatua pea e lo matou – le uafu lea i Asau lea na fai i le 30 tausaga talu ai. Sa i ai le fuafuaga ma le tala sa matou fiafia ai o le a fai se cannery o maua ma le Sui Fofoga Fetalai, o le fiafia ia o lena foi Malo po o **Agenda** pe leai. O le Itumalo lea o matou mai Asau e oo i Falelima e leai ni galuega a le Malo, o matou e soifua i le fatu tulou le gagana, na o le alu lava i uta ma tai i le sami, a leai la ni galuega – ua e maua mai, e taugata la le soifuaga, e sipaka uma matou i le VAGST lea e alu atu nei, e eseese mamao lava le tau o a tatou eleni, ia silasila la outou. A fai la le mea lea o le cannery se faamolemole se i tuu ifo lava i le tou Agenda, a fai la le cannery ua lelei le tau o le soifuaga ma aai i 'ia lelei ma maua galuega a le afaigaluega ua maua mai, faamolemole. A silasila atu i ai ma lo matou talitonuga o ituaiga aisiga tonu lava nei e aoga i le atunuu e le gata o lo matou itu ae atonu e faapena foi Aleipata i le vaega mamao.....

FOFOGA FETALAI: Malie le sui usufono o lo o saunoa se i tulai mai le Minisita o Tupe mo se faamalamalamaga.

Afioga Hon Faumuina Tiatia Faolatane Liuga: Lau Afioga i le Fofoga Fetalai, o lea ua saunoa le sui usufono i mataupu o lo o ua faagasolo i ai polokalame a le Malo. O le taimi sa matou feiloai ai foi ma le Minisita mo Faatoaga, Faleoloa o Faatoaga ma Faigafaiva a South Korea, i le taimi sa ou i ai i Pusan, South Korea, sa fesili mai ai le Minisita po o a ni atinae tau faatoaga e manaomia e Samoa e fesoasoani mai ai le Malo o Korea i Saute. Nao u logo le Minisita ma le Faatonu Sili o le Matagaluega o Faatoaga ma Faigafaiva, o atinae o faatoaga o lo o naunau mai ai le Malo o Korea i Saute, o le vaega lea o lo o fai nei e le Malo o Saina ma le Faletupe o le Lalolagi. Ona tau loa lea i ai o le Vaega o Faigafaiva o lo o manaomia e Samoa e pei ona faia i Solomona e le Malo o Korea i Saute. O lea ua taoto atu le tatou talosaga mo se atinae o se falei'a e gaosia ma tuu apa ai i'a. O le uafu i Asau, o se nofoaga lelei mo lea atinae, pe a lelei le suavai.

O mea uma nei afai o le a feiloai le Minisita mo Faatoaga, Faleoloa o Faatoaga ma Faigafaiva o Samoa ma le Minisita o Faigafaiva a Korea i Saute ona aumai foi lea o le polokalame e faataatia i luma o le Kapeneta mo se faamaoniga ma faagasolo ai lea polokalame. O le tulaga lena o lo o manao le Malo o Korea i Saute e fia omai e lagolago i le atinaeina o le Pasefika. O Solomona lea ua o lo o faagasolo ai nei le atinae o faigafaiva mo le tuuapaina o i'a. O Asau ua uma foi ona fai i ai le scoping study na faatino e Ausetalia ma le Pulega o le SPA.

FOFOGA FETALAI: Malo faafetai saunoa malamalama i lau Afioga i le Minisita, tulai mai le sui usufono o lea ua tali le manao o le tatou faa-Itu.

Afioga Hon AEAU PENIAMINA LEAVAISEETA: Faafetai tele lava i lau Afioga, e vave Saina pe vave Kolea? O le a le tala? O ai e vave? E vave Saina pe vave Kolea? Ia lelei o le a lafo atu pea a o le mea sili lava.....

Afioga Hon Faumuina Tiatia Faaolatane Liuga: Ona o lea ua e fesili e foliga tutusa lava atunuu nei e lua, e eseese igoa ae foliga tutusa lava tagata e omai e te le iloa po o ai lea a o ai lea.

Afioga Hon AEAU PENIAMINA LEAVAISEETA: Ia se i faaopoopo atu la i ai ma lesi lea po o ai e vave po o Kolea, o le solar system aemaise o lo matou Itumalo o Asau atoa, tulou lava le Maota nei, na ave matou i le biggest solar system company ae fai lava fegi a koeaiina foi na – matou te o atu o ulaula mai nisi toeaiina e toaono, e ulaula i tafatafa foi lele – lea la e fai ai le attribution na o le mea lava faapea pei se apa e siliva ae puna tulou le gagana, e puna faasolo atoa le kikaka ae leai se vai, o le manaia ia that solar in action, ona ou faapea lea, Talofa, e manaia pe a tele ni nai a tatou mea faapea. E le i tau ai se isi o outou i la outou malaga i fafo i la ea mea? Aua na o le tasi lava le matou malaga, o matou uma lava o le mamalu o sui usufono o le Palemene na matou o i Nadi i Suva, e i ai la nai mea faapena i o much solar i o i lo tatou Itumalo tasi o le mea o tatou uma lava o Savaii ua lelei le tatou faalogo i solar system ma le faalogo i le tai fia sefulu miliona ae leai lava se mea o faia ae leai se tupe o alu ai i lea mea. O moomooga na.....

Afioga Hon Palusalue Faapo II: Lau Afioga i le Fofoga Fetalai o le fesoasoani i lou uso a sui usufono o lo o saunoa..

FOFOGA FETALAI: O se mea e fia faasao po o se mea e fia faamalalamalama?

Afioga Hon Palusalue Faapo II: O le mea e toe fia faamanatu i ai....

FOFOGA FETALAI: E leai se mea e fia faamanatu e aafia i lauga.

Afioga Hon Palusalue Faapo II: Sa malaga le Afioga i le Minisita e sue se tatou fogafale sefululima ioe, ae le i o e vaai solar ma mea taua nei. O lea la ou te faamanatu ai leaga o lea na fesili.

FOFOGA FETALAI: Le Taitai o le Itu Agai, o le malaga lea na malaga ai ai le Sui Palemia lea na ta o ai foi ma ave oe, lea sa e tagai a ii solar system ma tulaga uma laa nei, lea foi ua oo le fautuaga i le Kapeneta. O le study tour a le Pasefika lea na tatou malaga uma ai, ae malie lau se i oo i lou taimi o lea o le a uma le 15 minute o le Sui Taitai ona avatu loa lea ma tali atu i mean a e te finagalo i ai.

Afioga Hon AEAU PENIAMINA LEAVAISEETA: Faafetai tele lava i lau Afioga i le Minisita mo le faamalalamalama. O atinae nei o fuafuaga

faataatiatia ua i luma mea nei e le lagolagoina e lenei usugafono ma le faaaloalo e tatau ai.

Muamua, o le fale lea e tau fai i Matagalalua, ia ua iloa ma ua silafia lelei ma le fale fogafale sefululima lea o le a fai faatasi le tala e vave ai. O le fale lea e tau fai i tai faamolemole o iinei o Samoa i lenei taimi lenei e lua lava Malae o lo o tuufaatasia i ai Samoa pe a potopoto i se mea na o Matagalalua ma Tiafau. O le tatou environment i le aganuu o so o se afioaga lava e i ai se malae, its something like po o le centre lena o se mea lea e i ai lea. O lea o le a fai ma teu e nonofo ai papalagi ae leai se Malae ae talituaa mai tua le au hamo ma serve tagata ese nei i lona laumua i le taulaga. E auma tupe, tulou lava leaga e le toe maua se fanua faapea – centre.....

FOFOGA FETALAI: Malie le sui usufono o lo o saunoa se i avatu le faamalalamamaga a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga se i ou fesoasoani atu i le sui usufono. E leai se fale fogafale sefululima o aumai i le tatou Tala o le Tupe. O fuafuaga mamao nei na faataoto atu e le Malo a o le mea lea e agai i ai le tatou Malo o le sailiili o auala e maua ai galuega. O lea ou te maua atu i le saunoaga a le sui usufono, e le o se mea lelei le o atu o Samoa e serve ni papalagi. O lona uiga o mea uma lava nei e fai i totonu o faletalimalo – se matua fia tagata tele. E auma ia mea a o galuega nei e saili e le Malo mo fanau a Samoa. O lona uiga e te tetee i ni atinae e maua ai galuega? E te tetee i atinae e maua ai galuega? O le mea lea sa ou talanoa ai i le aso ananafi, o le sui usufono e saunoa e faataua aoga ae leai se taunuuga. O le taunuuga o aoga o galuega! O le taunuuga o aoga uma a fanau a Samoa o le tulai mai ma faailoga ona maua lea o galuega e tausi ai aiga. A o lea e tau mai nei e le sui usufono o se mea mataga tele le o o fanau a Samoa e tautua ni papalagi. O lona uiga o so o se papalagi lava e sau e nofo i totonu o le faletalimalo o le matua tu toilalo o se Samoa? Matua e fia tagata alii! O le matua tumu i lou fia tagata.....

Afioga Hon AEAU PENIAMINA LEAVASEETA: Lau Afioga se se i faamatala atu le mea lea e le o malamalama...

Susuga Hon Tuilaepa Fatialofa Lupesoliai Aiono Neioti Sailele Malielegaoi: E leai o lea ou te matua malamalama lelei lava.

Afioga Hon AEAU PENIAMINA LEAVASEETA: E leai e matua sese lava..se i faauma.....

FOFOGA FETALAI: Malie le sui usufono mo Falealupo o lea o le a uma ona avatu lea o le avanoa e te saunoa ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea lea ou te agai i ai o galuega ia e agai i ai le Malo, o so o se mea lava e fai e le Malo o le taunuuga o galuega – se i uma lua talanoaga. O lona uiga ua le lava le sui usufono mo Falealupo e tulai mai.

Palusalua, ua le lava le sui usufono mo Falealupo e tulai mai? O le tulaga lena lau Afioga i le Fofoga Fetalai. O fea le mea e te agai i ai, e tasi lava le

taunuuga o galuega uma ia e fai e le atunuu, ia maua galuega a fanau a le atunuu. A o lea la ua malamalama nei, o le alu o se tama fanau e serve isi tagata, o se mea tu toilalo. Se matua mataga tele mea e te agai mai i ai.

Afioga Hon AEAU PENIAMINA LEAVAISEETA: Lau Afioga i le Fofoga Fetalai ma le ava e tatau ai, e i ai le muagagana foi lele, “He’s barking up the wrong tree.” Si au uo. E ese mamao lava. Ia silasila. Leai se i fai atu lava sina au faamatalaga lea.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O fea lava le mea e te agai i ai, ua leva ona ou faalogologo, ua leva ona ou faalogologo i le mea lea e te agai i ai. Sa ou tilotilo po o fea e te agai i ai. Ae na pau lava le mea lea e te agai i ai, o le upu lea o le toilalo o Samoa e alu e galue mo isi. A o a mea o fai nei? O a tatou mea ia e fai nei? O lea tatou te saili manu mo tama fanau a Samoa. E mataga tele le mea lea e te agai i ai.

Afioga Hon AEAU PENIAMINA LEAVAISEETA: Lau Afioga i le Fofoga Fetalai, e ese mamao lava le mea lea e te saunoa i ai. Lau Afioga i le Fofoga Fetalai, o se issue faapea, e fua pauna o le taua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga e le ese, e le ese le mea lea e te agai mai i ai. Afai o se mea ua mao, tau ua mao! O lape o lauga.

Afioga Hon AEAU PENIAMINA LEAVAISEETA: Leai e soso le mea lea e te sau ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Leai, o le soso o le soso a oe.

Afioga Hon AEAU PENIAMINA LEAVAISEETA: Ia se i tau atu le mea lea ou te alu atu ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E te fiu e taamilo.

Afioga Hon AEAU PENIAMINA LEAVAISEETA: Se i fai atu pea lau faataitaiga. O le faataitaiga e faapea lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E le o se faataitaiga le mea lea na e aumaia.

Afioga Hon AEAU PENIAMINA LEAVAISEETA: Ia manatua foi lea na ou fai atu lau faamolemole.

Afioga Hon Palusalue Faapo II: Lau Afioga i le Fofoga Fetalai, na ona ou fesoasoani atu i lau Afioga i le Palemia, si tamai mea lava lea e pipii mai ai, a o le agaga o le sui usufono mamalu...

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e le o se tamai mea le saili o galuega a fanau a Samoa.

FOFOGA FETALAI: O lea ua maua Palusalue.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E le o se tamai mea le saili o atinae mo galuega a fanau a Samoa. E le o se tamai mea. Ia se i vaai i ai, o lona uiga e te lua le faatauaina galuega?

Afioga Hon AEAU PENIAMINA LEAVASEETA: O au e ona le tala, e te le o malamalama i lau tala. Ae faafofoga lelei o lea o le a toe alu atu.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ou te malamalama lelei lava.

Afioga Hon AEAU PENIAMINA LEAVASEETA: E te le o malamalama. Ia toe nofo i lalo o lea o le a alu atu. E faapea.

FOFOGA FETALAI: Malie le sui mamalu se i uma atu le saunoaga a le Palemia ona avatu lea o le avanoa.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E oo foi i le aso ananafi. Se i onosai mai le sui mamalu se i fai atu lau faataitaiga. O le aso ananafi, na saunoa mai ai le alii fomai, e te lau lava oe e fai lou faata ona e toe sau lava lea o oe e fai lou faata. Na ou tuliloa ananafi. O le a la le mea lea ua i ai nei? O lea ua aumai nei le ata o le saunoaga ananafi, e le o sese le mea lea na ou fai atu ai. O lea e matua tau lelei mai lava i i. A o a saunoaga a le fomai ananafi, o au ua leaga le ulu, e le malamalama i le tulaga na saunoa ai, a o lea ua aumai nei faamaumauga, e sao lelei le mea na ou tuliloaina atu. O lea foi la ua ou tuliloaina atu oe. A o le a le mea ua e fealofai ai? Afai o le lape o lauga, tau mai o le lape o lauga!

Afioga Hon AEAU PENIAMINA LEAVASEETA: Ae a pe a ou fai atu muamua ona e saunoa mai ai lea?

FOFOGA FETALAI: Faafetai i le alii Palemia. O le a tuu atu le avanoa i le afioga i le sui mamalu e a ia le saunoaga, saunoa mai.

Afioga Hon AEAU PENIAMINA LEAVASEETA: Ia lelei. Lau afioga, ua fai sina ou vavevave mai. (.....). O lea o le a ou alu atu. Ia, e faapea. Se i faamalalama atu le mea lea leaga e te le o malamalama.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o au o se solofanua! Lau Afioga i le Fofoga Fetalai, faasao mea ia, aua le le mafaufau, e le o au o se solofanua!

FOFOGA FETALAI: Onosai mai le sui mamalu se i faauma mai ma faaiu mai le saunoaga a le Palemia.

Afioga Hon AEAU PENIAMINA LEAVAISEETA: Se o le upu faapapalagi lea ou te fai atu ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Aua e te nanu. A ou talanoa atu, o le matai Samoa i le isi matai Samoa. Ae aua e te fia nanu aua o le fia nanu e sese ai upu.

Afioga Hon AEAU PENIAMINA LEAVAISEETA: Ok, ok. Ia o lea o le a ou faa-Samoa atu. Ia lelei, e faamalie atu i lau Afioga. Faamolemole lau afioga...

FOFOGA FETALAI: Tulai mai le sui usufono mamalu e faaauau le saunoaga.

Afioga Hon AEAU PENIAMINA LEAVAISEETA: Masalo o lau faataitaiga, o se vaega o lau faataitaiga. O lea la o le a fai nei le fale i i, o le agaga...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o se faataitaiga le mea lea na e sau ai. O lena na e matua talanoa lava i upu tautino, e le o se faataitaiga la. Afai ua uma lau mataupu e leai se isi mea e te alo i ai, ona faauma mai lea.

FOFOGA FETALAI: Faafetai i le saunoaga a lau Afioga i le Palemia. Tulai mai le sui usufono.

Afioga Hon AEAU PENIAMINA LEAVAISEETA: Sa ou faamatalaina e faapea lau Afioga, o lea o le a fai nei le fale lea, aveese uma, o lea o le a fai le fale, ona omai loa lea o tatou turisi. O lea la ou te faapea atu, ia manatua o lea o le a omai nei turisi i le malae fono o Samoa, ae pei la, manatua foi la o tagata o lea e auauna i ai, its ok.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai, leai leai lava se faamoemoe e faia se faletalimalo iinei i Tiafau. E leai ma se faamoemoe faapena.

Afioga Hon AEAU PENIAMINA LEAVAISEETA: I Matagalalua. Ua e maua ai?

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea e te tetee i galuega fai. Lau afioga i le Fofoga Fetalai,

masalo e leai se aoga e faaauau ai le ma talanoaga, leaga o lea ou te tuliloa atu, ae le o mafai ona ia talanoa mai ua sasi. A na e faapea mai lava o lape o lauga, ua lava. E te fiu e fetamoeai solo ma fesulufai solo, o upu e te saunoa i ai, o lea ou te pue atoaina atu.

FOFOGA FETALAI: Ou te manatu o lea ua malamalama le saunoaga malamalama a lau Afioga i le Palemia, o lea foi ua maua e le Nofoa le atugaluga o le sui usufono o lo o saunoa nei. Ona i ai lea o le manatu o le Nofoa, o lea ua tatou taunuu tonu lava i le tatou taimi malolo, ae manatu foi e avatu pea le avanoa e toe mafaufau ai le sui usufono mamalu e tusa ai ma le toe faaauauina o le galuega i le aso a taeao ma se i aumai faamaumauga e pei ona tatou lipotia ne i te i ua oulua feeseeseai i luga o tuleiga ma saunoaga ae.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai e le o feeseeseai, o lea ou te iloa lelei lava, o lea ou te faalogologo lelei, e le tau siakia foi i faamaumauga. Na pau o le mea o lea e manino lava le saunoaga a le sui usufono i le fai o se fale ae omai tagata mai fafo ae o atu tatou tagata e serve, o se tulaga tu toilalo le fai o lea mea faapea. O lona uiga, o galuega uma lava, faletalimalo o lo o galulue ai o tatou tagata, so o se atinae lava e fai e papalagi, o se mea tu toilalo lea mea. O lea la ua uma ona ou talanoa atu, o se manatu faavalevatea tele lea manatu.

Afioga Hon AEAU PENIAMINA LEAVAISEETA: Ona e tago loa lea liliu faavalevatea loa, ae ese mamao lava le mea na ou fai atu ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Leai, o le mea lea o lea ta te talatalanoa lava i le mea na e tuuina mai. O oe lea e te talanoa.....

FOFOGA FETALAI: Malie le sui usufono mamalu o lea o le a faauma atu le tatou Fono. Malie lau Afioga i le Palemia.

Ia, se i tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi: Lau Afioga i le Fofoga Fetalai, ia leai, o upu lava o Fono a siisii e lelei lava ona saili aua e le maua gofie le auro ma le penina. O le auro e saili lava i le manava o le eleele, a o le penina e saili i le manava o le moana sausau. Ae ua ou tulai atu atonu se i to foi le sela se i tulou le paia o le faafofoga tapuai mai a Samoa aua foi le Sui Taitai ma le Palemia. Ae ua ou tulai atu, leaga o lea e tau matau atu, e le i faia sau faaiuga i le saunoaga a le Sui Taitai lea na taua ai i le gagana faa-Peretania le solofanua.

Ou te tulai atu e lelei ona fai sau faaiuga ina ia aveese ma faamaumauga o le Fono ma toe faafoi ona o le Palemia o lo o faapena ona faasino i ai le saunoaga. O le tulaga lea ma le agaga faaaloalo. Faafetai foi i ia felafolafoaiga. Faafetai.

FOFOGA FETALAI: Ia, o lea ua maua, malie lau Afioga i le sui usufono mamalu na tulai mai ne i tatou mau eseese i le taumafai atu o le Malo e faamalamalama le tulaga o le saunoaga a le sui usufono mamalu. Ou te manatu o lea e taatia i lagatonu le finagalo o le Afioga i le Palemia, ona o le tulaga sa laga e le Sui Taitai, o lona atugaluga i faapea i faoa mamalu o malae o le atunuu. Ae le mafai ona taofiofia le finagalo o le Malo i ni atinae mo le manuia o le atunuu. O le mea lava e tasi.

O le tulaga lea e te saunoa i ai le sui usufono mamalu e ala i le upu lea na lafo, o lea ou te matau o le hold your horse, e le o se tulaga ne i te i ua... Ae a faapea o se tulaga ne i te i ua le maua lelei, a o lea ou te.....

Afioga Hon AEAU PENIAMINA LEAVAISEETA: O le muagagana foi lea, 'hold your horse', ia taofi laitiiti lava. O le uiga tonu lena. E le faapea o le horse a? Its a saying.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le ala foi lena na ou le tulai atu ai lau Afioga i le Fofoga Fetalai e aveese upu. Ou te manao e tuu ai pea upu i totonu e aoga mo tupulaga fai mai se i latou silafia ai uiga o le sui usufono mo Falealupo. O itu foi e laga ai malae, o la e talanoa i le mea la e tu ai le fale o le Malo, ae faapefea le fale lea o le Tusitala? O eleele uma lava nei o lea ua uma ona faaavanoa mo faletalimalo. E leai lava se eseese, e oo lava iinei i le alu atu iinei, o faletalimalo uma lava lea e alu atu i i. O le ala lena o lea ou te fai atu ai, o se manatu faavalevlea tele lea manatu i le faatutu o faletalimalo iinei i le taulaga, ae sau ai ma se agaga o se matua mea toilalo i a tatou fanau ona o e galulue ai. A o le taunuuga lea o galuega ma atinae uma a le tatou Malo o le sailiga o galuega mo a tatou fanau. O le tulaga tonu lava lena o lea ou te tulai atu ai. A faapea o lo o galo i le sui usufono, ia taatia ai faapea, ae o lea ua tatou taunuu mai, ua e saunoa lau Afioga i le Fofoga Fetalai, ua tatou taunuu mai i le faaiuga o a tatou Fonotaga i lenei itula afiafi.

Afioga Hon AEAU PENIAMINA LEAVAISEETA: Lau Afioga i le Fofoga Fetalai, e ese le solofanua lea na ou fai atu ai, ese le solofanua la e masani ai le alii, lea sa tau ai le aufaigaluega. A o lau solofanua lea ou te fai atu ai, o le saying, a o le solofanua lea a ia lea e fai mai nei... E ese le solofanua lea ou te fai atu ai. Ua uma.

FOFOGA FETALAI: Malie ia le sui usufono o lo o saunoa, o la ua ou faamalulu atu i le tulaga o le faanofo filemuina o le tatou Fono. O lea foi ua saunoa malamalama le Afioga i le Palemia.

Se i tuu atu muamua le avanoa i se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi: Lau afioga i le Fofoga Fetalai, e le fautuaina e le matapia le manaia, po o Laupua Tamafaiga, a o le matou lea faalogologo vaeane le faafofogaaga a le atunuu. Ae mo le silafia foi e lau Afioga, o le Itu Faaupufai a le HRPP, o le matou taitai lea, a o le taitai foi lea o le Malo. O le matou tiute lea o le matou puipui i le taitai o le atunuu ma le taitai o le HRPP i upufai o Malo ma felafolafoaiga e fetogia i totonu o le Palemene. O le tiute lea o le Vaega Faaupufai. O le ala foi lea ua

mafua ai ona laga se lagona, ia lafo atu. Ae sa matou seei foi i le Nofoa lena, a o upu ia e le tau fesiligia le sui usufono, o le upu lea e sau ai le faaiuga a le Fofoga Fetalai. Ma lou faaaloalo faafetai.

FOFOGA FETALAI: Ia tulai mai le sui usufono mamalu. Malie Saleaula se i tuu atu le avanoa mulimuli lea i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ou te talitonu lava o lea ua e malele foi i le tulaga o le tatou o o i le siui o galuega o lenei aso. A o le mea lava lea e popole i ai le taofi. E le natia o au sa toesea i le aso ananafi. A ou tilotilo i tusitusiga a le Observer la e i ai, e ese le matuia, a o le sui usufono lava lea e tasi, o le sui usufono lava lea. O lea foi la ua toe lafo lana upu, ou te tatalo atu i lau Afioga. O upu ananafi, e leai se mea o i ai, ou te lagona lava e tataua ona fai i lau pule faataga. O upu na lafo ananafi lea e tusi i le Observer, e mataga. Ia te au i le matai Samoa e tausi Tapaau, oka, oka! E ese le mataga! Ae fiafia tele nusipepa e faamau mea ia e ave ia iloa mai fafo. E le faaaloalo!

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie le Taitai o le Itu Agai se i...

Tofa Hon Tolofuaivalelei Falemoe Leiataua: Ou te faatu atu le lafo, *Ina ia aveese upu o le aso ma upu o ananafi leaga o mea o i totonu o le Palemene.*

Ma le agaga faaaloalo.

Afioga Hon Palusalua Faapo II: Se ua avea lava le se ma mea mamafa. A outou saunua lava i le solofanua.....

Tofa Hon Tolofuaivalelei Falemoe Leiataua: Lau Afioga i le Taitai o le Itu Agai, alaala i lalo ou te le o fai atu ia oe. O oe e te laitiiti, e te laitiiti foi oe ia. E patupatu a anofale lou lapoa lena e i ai. E te le malamalama.

Afioga Hon Palusalua Faapo II: Se aua e te le mafaufau, o lea ou te tu atu e taumafai e faatoatoa le mataupu.

Tofa Hon Tolofuaivalelei Falemoe Leiataua: O lona uiga, na o lou lapoa lava, ae leai lava se mea o i ai i lou manava.

Afioga Hon Palusalua Faapo II: Na ona ou alu atu lava tuma loa ma lou gutu! Ua ova lou le mafaufau, o lea ou te tu atu e tau faatoatoa le mataupu.

FOFOGA FETALAI: O lea ua maua le lafo ma ua faaluaina ma ua ou taliaina. Malie le sui usufono mo Saleaula. O lea o le a faasolo lava ina sese tele le tatou mataupu, o lea e tau faatoatoa atu le tatou Fono. Se i vaai i le tatou galuega tele sa tauasa mai i lenei aso, a o lenei lava o le a toe vevesi ua iu le tatou Fono i lenei po?

O felafolafoaiga o lea na tuu atu se i saausi tuleiga ma saunoaga o le aso. E leai foi se tulaga o le a toe apoa ai le saunoaga lea na saunoa i ai le Minisita mo Tina ma Tamaitai, Atinae o Nuu ma Afioaga ma Agafesootai, tulou le gagana, leaga e le i maua tulaga ia e saunoa i ai. O tala salatua e le i tuua i luga o se faiga taualoa i luma o le Palemene.

O lea e faamalulu atu ai, ou te le i maua le tulaga lea i saunoaga, ma o lena foi ua outou silafia le tulaga tau nusipepa. E le o mafai ona tuuina mai ni faamatalaga, ma e le o i totonu foi o faamaumauga aloaia a le Palemene o se saunoaga lea faamaumaui. Ana fai o le tulaga lea, meamanu ua leva ona ou faia se faaiuga i le tulaga aloaia ma le taualoa. Ua ou faaaloalo atu i le saunoaga a le Afioga i le na avea ma Fofoga Fetalai, se tasi o sui usufono mo Aana Alofi Nu.1, e talii ae popoe. E talitonu foi e mua lou tagata ma le taumafai atu e faatoatoa. A o tulaga i tuleiga ma saunoaga, a felelei loa manusina, paga lea le taumafai atu e faatoatoa le taumafai atu, ona o le Afioga i le Palemia o le Taitai o le Malo. O lau Afioga foi i le Sui Taitai, e le tau fai atu. O lea ua faatonuina ai e aveese saunoaga ia, pe afai o le tulaga lena o lo o agai mai, o lo o faasino i le tulaga lea agai i le Afioga i le Palemia.

Ou te faatonuina ina ia aveese saunoaga ia. Ona faapea lea o le manatu ma le lagona, ia fale ia i le fale o le Atua leni afiafi. Ou te talitonu foi o lea ua tatou taunuu, o lea ua sefulu minute ua tatou ova ai talu le tulai mai o le fuilauvi lea ua uma atu. E faamalulu atu i lau Afioga i le Sui Taitai, o le a moe le toa, taeao aena, o lo o i ai le faaumaga o lau lauga ma le faamoemoe, na tatou fananau mai foi lea i le aso fou, ia atonu ua fou lagona fou manatu, fou le faautautaga, fou le tofa.

(Upu na faatonu e le Fofoga Fetalai e aveese mai faamaumauga o le saunoaga a le sui usufono mo Falealupo: “Hold your horse, ok.”)

FOFOGA FETALAI: E momoli atu le agaga faafetai tele i leni itula afiafi i le paia ma le maua luga o le tatou Fono. E manatu ua tatou taunuu i le siui o le tatou galuega i leni aso. E talitonu foi o a ni upu ma ni tala ma felafolafoaiga i le tatou Fono i leni afiafi, e faamalulu atu ona o tulaga e taumafai atu pea e tau tata le tatou Fonotaga i le moa o le ala, ae faigata tele leaga o le tofa saili ma le tofa loloto ma le faaaliga o finagalo, e tuu malele lava. E lagona foi le agaga o le vaivai ma le taumafai atu, ae paga lea, o lo o i ina pea le uta a le faimea i lo outou paia ma lo outou mamalu E faamalulu atu Samoa i lau faafofogaaga i leni itula o le afiafi. Ou te talitonu ua tuneva le po, e faaaloalo foi i le tapuaiga. O a ni upu ma ni tala felavasai, tau ina ia sala uta a ia tonu tai. O le tulaga o leni aso ma le faamoemoe e pei o le tulaga faa-Palemene, e le faigofie le sailiga o Malo, e le milia faauu foi upu pe a tatou o i upufai leaga e faigata lau tapuaiga mamana ma lau tapuaiga mamalu, ina ne i matou le faatinoa o matou tiute, ona avea lea ma lape o le matou faatautaiga ma le valaauina. O lea e faamalo atu, o le a tatou momoe ma manu i leni aso, e talitonu tatou te alafai mai foi i faguga lelei ma ataata o manuia i le aso fou a taeao ona faaauu ai lea o le tatou galuega.

Ae tatou te le i malolo, ou te valaau atu i lau Susuga i le faafeagaiga, o le a tatou o i manua e sili le faafofoga o le Atua i le tatou tatalo mulimuli i leni afiafi. Ae sili le faafofoga o le Atua i le tatou tatalo i le afiafi ona tatou

malolo ai lea ae tatou feiloai i le taeao o muamua. Tulai mai lau Afioga i se tasi o sui usufono mo Saleaga, Tofa Tapuai Toese Ah Sam e te faaiuina le tatou Fonotaga i se tatalo.

Tatalo.

Na motusia Taulumaga a le Fono Aoao i le itula e 11:10 i le po seia aulia le itula e 9:00 i le taeao o le Aso Tofi, 20 Iuni 2013.